

**NINTH MIZORAM LEGISLATIVE ASSEMBLY
(FOURTH SESSION CUM BUDGET SESSION)**

LIST OF BUSINESS

FOR TWELFTH SITTING ON TUESDAY, THE 18th MARCH, 2025
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

FINANCIAL BUSINESS

Discussion and Voting on Demands

2. **PU LALTHANSANGA**, Minister to submit the following to the Vote of the House on 18.03.2025 (Tuesday).

<i>Demand No.</i>	<i>Purpose</i>	<i>Amount</i>	<i>Demands for Grants page No.</i>
33	Land Resources, Soil & Water Conservation	18,99,76,000.00	400-403
35	Fisheries	11,01,80,000.00	420-424
36	Environment, Forests & Climate Change	1,48,83,68,000.00	425-435
41	Sericulture	16,03,24,000.00	485-488
TOTAL		1,94,88,48,000.00	

3. **PU B. LALCHHANZOVA**, Minister to submit the following to the Vote of the House on 18.03.2025 (Tuesday).

<i>Demand No.</i>	<i>Purpose</i>	<i>Amount</i>	<i>Demands for Grants page No.</i>
6	Land Revenue & Settlement	36,58,23,000.00	52-59
17	Food, Civil Supplies & Consumer Affairs	2,78,68,80,000.00	201-211
TOTAL		3,15,27,03,000.00	

VANLALTHANTLINGI
Commissioner & Secretary

Day-12, 18th March, 2025 (Tuesday)

SPEAKER : *Zalen in ni a, nimahsela in zalenna chu sual khuh nan hmang lovin, Pathian bawiha awm nan hmang zawk rawh u.*

- 1 Petera 2:16

QUESTIONS & ANSWERS

Le, *Zawhna leh Chhanna* ah kan kal nghal ang a.

Starred Question No. 181 - Mizoram Sorkar sum leh pai dinhmun hnukung ber chungchang.

Zawhna Neitu: Pu C. Ngunlianchung

PU C. NGUNLIANCHUNGA: Pu Speaker, Finance Department changtu kan House Leader zahawm tak chhan atan ka zawhna chu –

- a) Tun sorkar tharah hian Reserved Bank of India (RBI) Treasury Holdings-a Mizoram sum leh pai dinhmun hnukung ber engnge?
 - b) A ni (date) nen kimchangin min hrilh thei em?
- (‘Reserved’ tih hi belh sual palh; keimahni lam tihsual palh pawh a nih ka ring a).

SPEAKER : A chhang turin Finance Department changtu, Chief Minister, Pu Lalduhoma i lo sawm ang.

PU LALDUHOMA, CHIEF MINISTER: Pu Speaker, ka chhanna chu –

- a) Tun sorkar thara Reserved Bank of India (RBI) Treasury Bill Holdings-a Mizoram sum leh pai dinhmun hnukung ber chu ₹895.08 crore a ni.
 - b) Hei hi February Ni 15, 2025 report-a ni e.
- (Pu Speaker, a aia thar hi a awm a, ka’n sawi nghal law law mai ang a. Nitin hian zarah hian waviin ni dinhmun zel dinhmun hi kan hre thin a).

Tichuan, ka’n sawi theih chin chu, nimina kan neih zat chu crore ₹1379.35 a ni e.

SPEAKER : *Zawhbelhna zawt turin:*

1. Pu C. Ngunlianchung (Zawhna neitu),
2. Pu H. Ginzalala
3. Pu Robert Romawia Royte.

PU C. NGUNLIANCHUNGA: Pu Speaker, ka zawhbelhna chu:-

- i) Kum thar 2025 January hnulamah wawi engzat nge short-term borrowing - *wise and means advance* a neih tawh?
- ii) Engzat nge outstanding awm mek a, engtika rullh zawh tur nge?
- iii) Kum 2025-26 Financial year opening balance *negative* a nihna chhan hi a ni em? In relevant lo a ni mai thei a, mahse Finance changtu a nih angin; Naupang zirlai sang chuang scholarship nikuma an dil tawh kha sum awm loh vanga pek loh nge nia, la kal fel lo deuh a awm?

Pu Speaker, ka lawm e.

PU H. GINZALALA: Pu Speaker, Hon. Fin. Minister, Chief Minister ni bawkin min chhan a tana ka zawhna chu: -

- i) Work order awm lova hnathawh zawh tawh bill pek theih loh a awm em?
- ii) A awm chuan engzat nge?
- iii) Sorkarin pek dan tur ruahmanna a nei em?

Pu Speaker, ka lawm e.

PU ROBERT ROMAWIA ROYTE: Pu Speaker, ka lawm e. Kan House leader leh kan Finance Minister zahawm tak ka zawhbelhna chu-

- i) Treasury holdings sorkarin RBI sum neih zat crore 1000 leh tih anih thu kha kan House Leader-in a sawi a. Kha sumah khan SASCI loan ang chi thil danga hman theih loh engzat nge awm? Sum treasury holdings ah khan annual plan hnuaiia kan sum tak tak, kan annual plan a mi kha engzat nge awm?
- ii) Chanchinbu mite advertisement bill bat awm nia sawite hi pek tlak thuai theih a ni dawn lawm ni?

Ka lawm e.

SPEAKER : Le, a theih ang anga chhang turin Finance Minister, Pu Lalduhoma ilo sawm ang.

PU LALDUHOMA, CHIEF MINISTER: Aw, Pu Speaker, tuna kan sum neih han en hi chuan, “a thlamuanthlak mang e; heti zat zat mai sum kan han nei hi chu,” a tih theih a. Amaherawhchu, heng hi department hrang hrangah pekchhuah leh tur a ni a. Heng zingah hian SASCI te pawh a tel e. A detail te tea ‘chuti zat SASCI-ah; engzat nge bang’ tih hi sawi theih a har viau a. Amaherawhchu, a tam ber crore ₹1223 vel hi SASCI atanga kan dawn, kan pek chhuah leh tur a ni.

Tin, Financial year a tawp dawn a, hetah hian kum kal laia kan budget ang kha kan dinhmun chu a ni mai a, helaia kan pass ho ang khan kan kal mai a ni.

Tin, *ways and means* kumin January hnulam tih kha, ‘lak kan la nei lo’ tih kha a chhanna chua ni. Tin, *ways and means* hi lo la pawh ni ila, leiba anga ngaih tur kha a ni lo a. Vawiinah kan la a, naktuk ah kan rul leh a; tichuan, a tuk leh ah kan la leh a, a tuk leh ah kan rul leh a; tun karah kan la a, kar lehah kan rul leh a. Khatia kual kual kha a ni ta a. Chutah chuan kan lak zawng zawng kan belkhawm kha chuan, ‘e, an va puk hnem ve!’ tih tur kha a ni a. Mahse, kan rul leh zel a. Kha kha sorkara thil awmdan a ni hrim hrim a.

Tin, ‘opening ah hian negative balance a awm’ tiha kha, hei hi chu a awm fo a; *negative balance* nei lova kan awm kum hi a awm lo mai thei, ka hriat sual loh chuan. A chhan chu, sorkar inhlan chhawng zel kan ni a, leiba inrochung chho zel kan ni a. Khang avang khan, opening balance hi kan nei lo thei lo thin a ni.

Tin, scholarship pek lohna chhan hi technical thil eng emaw vang a ni a. Kan Students’ organization te pawhin thil awmzia chu an hrechiang khawpin ka hria a. Tin, central atanga kan dawn a tlai thin avang te pawh hian a hunah hian pek theih loh a ni thin a. ‘Scholarship hi tih tlai loh hram hram tum teh u’, kan inti a, kan innawr reng a. Amaherawhchu, central lam atanga a lo kal tlai vang leh, helai naupangte’n account an tihfel loh khan a pek theih chuang lova. Chung neuh neuh tihfel loh chu a la awm a nih hmel a.

Tin, ‘*work order awm lova hnathawh*’ tih hi, contract hna rei tawh tak tak, thawh si loh hi a lo awm nual mai a; an thawk seng lo ni maw, ka ti mai a. Chuvang chuan, kum 3 china upa kha kan han thliar a, kum 3 china upa contract pek tawh, hna la thawh si lohte kan han en a. An lo thawh tawh chuan, an thawh chin kha bill pek tur kan ti a, kan pe a ni. Thawk miah lo kha chu tihngaihna a awm tawh lova, thawk duh lo, thawk thei lovah kan ngai. Khatiang kha *lapse deposit* ah eng emaw zat kan puang tawh bawk tih kha ka’n sawi tel duh a.

Tin, work order tel lova hnathawh hi a tam angreng khawp mai a. Pu Speaker, a zawttu kan member zahawm tak Pu Robert Romawia chan thin department-ah khan a ni deuh ber a, a tamna hi. ‘Han pek sak hram teh u’ tiin a rawn ngen zuisak a. Ngaih pawimawh hram pawh kan lo tum ang a. Amaherawhchu, document a awm tlat lo lai hi kan buaina a ni a.

Entirnan – ‘Renovation of Rajiv Gandhi Stadium, Aizawl FC’ tih hi nuai 27 vel a lo ni a. Tin, Laying of artificial turf at Rajiv Gandhi Stadium, crore 5’ tih te pawh hi kan han dap ngat ngat a; file-ah chuan “As instructed by higher authority,” tih chauh kan hmu a ni. Khatiang kha a lo ni hlawm a. Bill pek dawn chuan administrative approval a ngai a, expenditure sanction a ngai a, work order a ngai a; khatiang awm lo khan miin rawn bill ringawt se, min bum dawn nge dawn lo tih pawh kan hre ta lo a ni.

... (*interruption*)

PU ROBERT ROMAWIA ROYTE: Hming hmerha ka hmingte a han lam takah chuan, kan sawi belh duh a. Rajiv Gandhi Stadium astro-turf phah kha Lunglei-a court case vanga phah theih loh, laksawn ngai; Rajiv Gandhi Stadium-ah sum kan nei thova Lunglei ami hi a la phah theih si lova, court lamin laksawn a ngai an ti bawk si a, a hmunah dah pawh an phal lova. Chuvang chuan, Rajiv Gandhi Stadium-hi public interest tak tak, general interest ni bawk si hi phah ila, nakinah Lunglei-a phah tur chu court case te a fel hunah Rajiv Gandhi Stadium-a kan sum neih hian kan ti ang kan ti a. Sorkar order awm thlap, meeting pawh neih thlap a ni tih kha, hming hmerha han sawi takah chuan ka’n sawi duh a. Tin, work order awm lo ka department-a awm ang kha a nih ka ring lova. Pu Nguna’n nimirah pawh a sawi a, Chawnhu kha ka hriatpui a. Chawnhu chu MP fund-in tunah hian sum pawh sanction thlap tawh a ni a, Sangau erawh kha chu ‘sorkar tharah an take-care tawh e’, an ti a; chu lo chu work order awm lo ang chi kha chu a awm ka ring lo a.

PU LALDUHOMA, CHIEF MINISTER: Ruling lam niawm takin helama kan thusawi hi an rawn sawifiah nghal zel mai a, hei hi chu a kalphung chu a ni lo. Tin, a hrim hrimin, (**Pu Robert Romawia Royte:** Ka sawi loh chuan mipuiin thu dik an hre dawnlo tlat a ni) helai hi inchhan zelna leh in hrilhfiyah zelna a ni lo; min zawta ka chhang a ni; min zawh ka chhan kha an ngaithla ve mai tur a ni. Chumi rawn sawifiah leh zel hi kan practice dan a ni lova. (**Pu Robert Romawia Royte:** Hrilhfiyah loh lutuk pawh hi a dik bik chuang lo) Insawifiah ngai hi kan tam khawp mai a; hei hi chu ka’n sawi zel law law ang e.

Chumi hmaa ka sawi duh chu, ‘*Point of order*’ tih hi a ni. Pu Speaker, kan member-te hian kan business rules kha proceeding bu kha lo chhiar ngun teh se; ‘*Point of order*’ hi engnge a nih; kan session chhunga ‘*Point of order*’ tia kan dinpui reng reng hi *point of order* tling pakhatmah ka la hmu lo. Chuvang chuan, kan misuse a ni heng te hi, chhiar ila, *point of order* a tlin chuan, ngawih tur a ni. Chief minister pawh ni se miin *point of order* a raise chuan, a ngawi tur a ni; a ngaithla tur a ni. Mahse, *point of order* tlinglo, mahni sulhnu pawr sawimam duhna mai mai kan dinpui kan dinpui a; heng hi chu phal loh chi a nia.

SPEAKER : Khawngaihin; khalai kha kan sawifiah duh a, remchang ka'n la law law ang a. Kan hmaah khan a awm vek a, Rules No. 334 ah khan 'Point of order' raise theihnate chu - rules kalhin statement an ti em; Constitution kalhin thiltih a awm em; dan kalh a awm em, tithe kha a ni a. Tin, 'point of order' raise lohna turte chu - Rules No. 334, para 6 (a) leh (b)-ah khan '*Member khan information a dil tur a ni lo*' tih leh, 'a position a sawifiah tur a ni lo' tih a awm a ni. 'A member shall not raise a *point of order* (a) 'to ask for information' or (b) 'to explain his position' tih a awm a ni. Chuvangin, tuna kan House Leader sawi kha chu a valid deuh em aw, chu ka ti a.

Amaherawhchu, miin House-ah *Statement* siam a duh anih chuan, chu chu Rules No. 335-ah khan a siam theih a ni. Mahse, chumi tur chuan, "Secretary hnenah *in writing* in a pe ang a, chumi hnua Speaker-in a remtih chuan, statement a siam duh chhan kha fiah takin a ziaak tur a ni" tih a ni Nos. 334 leh 335 ah khan, kha kha kan hmaah a awm theuh bawk a khawngaihin lo en ila.

Tin, member-te ka'n ngen duh chu - Minister-te emaw tute pawh ni se, statement pe turin kan han insawma, statement pek laia lo inauh buai emaw, lo intihbuai emaw hi chu chinglo hram hram ila. Hei, a hmingin Speaker, a kaihruaitu kan ni a, member-te kan zalen theuh ka duh a; kan duhzawng te kan kan sawi han inkhap hi hrehawm ti mi ka ni a. Amaherawhchu, '*kan Speaker hi a nep mah mah a ni,*' tih hi a ri ring kawp a nia, member-te zalenna ka pek duh avang che u-in. Heng te pawh hi min hrethiam ula, inkhap ngai emaw, inthut tir ngai emaw ang boruak hi chu thleng lo hram hram ila tih kha, a remchang em a, 'point of order' chungchangah khan ka'n sawifiah leh duh bawk a ni e. Tikhan khawngaihin House Leader khan sawi tur a la neih chuan....

PU LALDUHOMA, CHIEF MINISTER: Pu Speaker, kha, kan *Dan* chu a chiang khawp mai a. 'Mahni insawifiah nana *Point of order* hman loh' tih kha a lo inziak kulh mai a nih kha! Zawm hram hram tawh ila a tha ngawt ang.

Rajiv Gandhi Stadium chungchang kha, khatiang kha an mamawhna te a lo ni a. Thil tih theih anih chuan, Sports Council atangin dan angin an process tur a ni. Dan ang thlapin an process ang a, *administrative approval* an dil ang a, *expenditure sanction* an dil ang a, *work order* a awm bawk tur a ni. Chutiang awm lova, "thuneitu sang zawkten thu min pek angin," tih ringawt atanga hetiang hna, hetiang zat man thawh hi a hrisel lo a ni. Chutiang bawkin, Muallungthu hockey ground-ah hian nuai 65 man work order tel lova pek a ni a, Zotlang Indoor Stadium - *Laying of badminton carpet* nuai 3 man a awm bawk a, Chawnhu-ah hian nuai 10 kan sawi tawh kha a awm bawk a, Sangau playground-ah nuai 10 man a awm bawk a, Parva playground-ah nuai 10 man a awm bawk a. Sairang-ah pawh, "field lo lai rawh min ti a, nuai 10 tur a ni a," tiin min rawn thing tawh bawk a ni. Khatiang ringawt mai kha kan pe dawn nge, dawn lo kha hriatthiam a har hle tawh mai a.

Chutiang bawkin, Lungpuizawl Local Council-te'n, "lo lai rawh min ti a, field kan lai a; JCB darkar 100 kan ruai a; chumi man chu min pe rawh u," an rawn ti leh bawk a ni, tunah hian. Khang kha tam tak a awm a; kan monitoring committee pawhin hei lo pawh tam tak an haichhuak mek a ni; chu chu Press Conference-te kova sawifiah te pawh an tum niin ka hria. Tiang hian thil hi a lo pawr khawp mai a, khatiang kha a hmunah kal kan intir a, 'hemi hian cheng heti zat min rawn thing ringawt mai a, engmah document a awm si lova' tih te; "Kan Sports minister-in lo thawk rawh min ti a lawm" tih te, tawngkam ringawt a ni a, a

ti tak tak nge tak tak lo pawh kan hre thei tawh bawk si lova; 'va en teh u,' tiin kan intir a. Hna te an lo thawh tak tak kha chuanin, 'e, a tha e' kan ti a, kan inpe hram hram a ni. Chutiang chuan, hna extra min siamhnem ang reng khawp mai a; hetiang hi sorkar kalphung tharah chuan awm tawhlo turah kan ngai a ni.

SPEAKER : Zawhna dangah kan kal ang a.

Starred Question No. 182: Pensioners benefit chungchang.
Zawhna Neitu: Dr. K. Beichhua, Siaha Bialtu.

DR. K. BEICHHUA: Pu Speaker, ka lawm e. Finance Department changtu kan Chief Minister hnena ka zawhna –

- a) Sorkar hian Pensioner-te benefit pek theih loh a nei em?
- b) Nei ta se, cheng engzat nge?
- c) Mi eng zat nge pek theih loha awm mek?

SPEAKER : A chhang turin Finance Department changtu Chief Minister Pu Lalduhoma ilo sawm ang.

PU LALDUHOMA, CHIEF MINISTER: Pu Speaker, ka chhanna chu -

- a) Nei e.
- b) ₹1736 lakh.
- c) Mi 82.

SPEAKER : Zawhbelhna kan la ang a –

1. Dr. K. Beichhua (Zawhna neitu),
2. Pu Lalramliana Papuaia,
3. Lt. Col. Clement Lalhmingthanga.

DR. K. BEICHHUA: Pu Speaker, ka zawhbelhna chu –

- i) K-deposit ah hian tun dinhmunah sum tang a la awm em? Awm ta se engzat nge? Non-works department ten an hnuaia hna M-PWD kuta hlan kher lovin, anmahniin an buaipui thei em?
- ii) Tun financial year chhung hian open-market borrowing atangin pawisa cheng engzat nge sorkar hian a puk tawh? Tunhnai hian puk tumna a awm em?
- iii) Tun financial year ah hian 'Year of Consolidation' kalpui hi kan la tum em?

PU LALRAMLIANA PAPUIA: Pu Speaker ka lawm e. Ka zawhbelhna chu –

- i) Pensioners benefit pek theih loh awmte hi eng hunlai atanga pek theih loh nge an nih?
- ii) Engnge a chhan?

LT. COL. CLEMENT LALHMINGTHANGA: Pu Speaker ka lawm e. Zawhbelhna, a changtu Minister zahawm tak chhan atan –

Tun sorkar thar kan sorkar tirh khan sum dinhmun kan chhawma kha a that loh em avangin hmalak tak tak theih a nih loh avangin, *Year of consolidation* kha puan hial a ni a. Kha 'Year of Consolidation' kan puana kha kan chhawr tangkai em? Engtiang chiaha tangkai nge? Engnge langsar zual te hriat theih a ni em?

SPEAKER : Chhang turin Finance changtu, Chief Minister ni bawk ilo sawm ang.

PU LALDUHOMA, CHIEF MINISTER: Pu Speaker, tuna zawhbelhna ah khanin heng *pension and other retirement benefits* te kha engtik atangin nge bat anih han tih kha chu, kan sorkar hma daih atanga bat a lo ni a, a tlingkhawm teuh a. Tichuan, tun financial year tirah khan crore 100 chuang ba kan nei a ni. Chu chu, ‘E! a dik lo e; ram tan an kum upat thlengin heng mite hian an lo thawk a, pension sorkarin a pe a, chu chu an inngahna a ni a; chu pawh sorkarin kan bat sak leh zel chu a dik lo; kan chhawr a, kan chhawrna man an hlawh kan bat sak kha a dik lo e; i ngaihsak teh ang”, kan ti a.

Tichuan, theih tawpin kan department-a thawkte’n tan an la a, *over-time* tak meuh meuhin an thawk a. Tichuan, tuna kan dawn tawh china la bang tuna ka sawi pawh hi, tun financial year liam hma hian a vaiin kan clear vek dawn. Amaherawhchu, pension hi claim a ngai ve a. An rawn claim a, a rawn lut a; a chhuak reng bawk a. Vawiinah ‘kan clear vek’ ti mah ila, naktukah a dang a lo lut ve leh thin tih kha chu hria ila.

Tin, anmahni ngei hi an rawn kala Treasury ah an signature an pek te a ngai a ni. Khatiang an tih loh kha chuanin Treasury khan a release thei lova. Hetah Finance Department in peih vek tawh mahse, amah ngei kha la tura Treasury-a a va kal si loh chuan ba ang khan, tang ang khan a lang lo thei lova. Aizawl South leh North ah hian tunhma kha chuan Finance-in a clear tawh hnu sum awm loh avanga an pekchhuah theih loh kha crore 50-60 vel hi a awm reng thin a ni. Tunah chuan crore 1 pawh tling mang lo an lak bang kha a la awm a ni mai a, kan dawn chin kha chu tihfel vek kan tum tih kha ka chhanna ni sela.

Tin, ‘year of consolidation’ kan tih hi *austerity measures* nena unau kal kawp a ni a, kan zavaiin hetah hian contribution kan nei a, Minister leh MLA te pawhin kan entitled chin kan la tawh lova, tikhan kan intihnam a; official ah pawh chutiang chuan a theih ang ang kan ti a. Tin, kan bungalow enkawl na ah te, motor chungchangah te a inren thei ang berin tunah hian kan kal mek a. Tin, bungalow kan luah pawhin ‘renovate vak loh tur; pardah te sofa set te pawh a thar a thlak kher loh tur; a awm sa rin mai tur. A lo hlui chhe tawh anih chuan Mizo siam a thlak tur’ tih kha tunah hian kan kalpui zel dan a ni a, hei hi a hlawk hlein kan hria a. Amaherawhchu, a ‘Year of consolidation’ kha tunah hi chuan a tawp tawh avangin tun kum kal mek ang em ema inrenchem kha chu kan tum tawh lova. Amaherawhchu, austerity measures hi chu a theih chin chinah la kalpui zel kan tum a. Kan zin veivahna ah te pawh a tlem thei ang ber, a zangkhai thei ang ber hian kan kal a ni. Hei tun maiah Delhi leh Guwahati ah te ka kal a, State dangin a security min provide te chu turu tak a ni; khang kha kan ti ve lo. Kan zin pawhin medical doctor te emaw, Magistrate te emaw pawh kan hruai lova khatiang khan a theih chin chinah kan in reduce a. Chu chu kalpui zel kan la tum a ni.

Tin, non-works department-te hnathawh chungchang kha, hei tun maiah khan kan thlang lawka Agriculture Department in sak chhawng ruk ve ve tur building thiang, tangkai lutuk mai tur hi department enkawl a ni. Chu chu monitoring ho hian vawi eng emaw zat, a chhiat kan hlau avangin an enpui a. Director ten hna an lo ngah a, an hna bakah an enpui thei lova, an tan phurrit anih thu kan dawng a. A department hian technical mi an nei bawk si lova, an mangan pui a, ‘kan phurrit a ni’ an ti thlawt a ni. Chuti anih chuan PWD ah pe kir mai turin kan ti a, kan pek tir a. A hma lama lo chhia kha chu kan siam tha thei tawh

lova, tun atang erawh hi chuan a kal dik ta a ni.

A chhan chu, technical mi an neih tlat loh chuan tihngaihna a awm lova. Amaherawhchu, heng consultancy firm kan han tih ho te hi tunhmaa Class I contractor kan tih tuna senior tak tak ho hi chuan hnathawh an tum vak tawh lova, tender pawh an chhang vak ngai tawh lo; a hminga class I anga khawvel chhuahsan kha an duh a ni deuh ber a; chu chu ka hnena an sawi dan pawh a ni a. Amaherawhchu, kan Consultancy firm ho hi chu an tha ang reng khawp mai a, technical mite pawh an nei tha a. Hengho te hnathawh kha va tihbuai vek kan tum tihna a ni chuang lo.

Tin, kan puk tawh zat hi - hei, kum a tawp dawn a, financial year ni rei lo tein min dal tawh a. Hemi chhunga kan puk tur hi chu kum tira puk a tha e kan tih chin kha a ni mai a, khami bak kha pelh kan tum lo. 'Hei hi chu puk a ngai' kan ti a, budget ah kan lo passed tlang tawh a; khami chhungah khan kan inkhung e. Pu Speaker ka lawm e.

SPEAKER : Aw le; zawhna dangah kan kal ang.

Starred Question No. 183: Sorkar leiba chungchang.

Zawhna Neitu: Pu C. Ngunlianchnunga, Lawngtlai West Bialtu.

PU C. NGUNLIANCHUNGA: Pu Speaker ka lawm e. Ka zawhna Starred Question No. 183 - Finance Department changtu kan House Leader zahawm tak chhan atana ka zawhna chu -

- a) Kum 2023-2024 Financial Year tawpah Mizoram Sorkar leiba eng zat nge?
- b) Kum 2024-2025 Financial Year tawpah Mizoram Sorkar leiba eng zat nge?

SPEAKER : Chhang turin Finance Department changtu Chief Minister ilo sawm ang.

PU LALDUHOMA, CHIEF MINISTER: Pu Speaker, ka chhanna chu –

- a) Kum 2023-2024 Financial Year tawpa Mizoram Sorkar leiba zat chu ₹12082.26 crore a ni.
- b) Kum 2024-2025 Financial Year tawpah Mizoram Sorkar leiba chu budget estimates-ah chuan crore ₹10,434.76/- ni tura chhut a ni a. Amaherawh, chu hei hi a danglam chho zel thin a ni.

SPEAKER : *Zawhbelhna* kan la ang a. Zawt turin –

1. Pu C. Ngunlianchnunga, (Zawhna neitu),
2. Pu T. Lalhlimpua.

PU C. NGUNLIANCHUNGA: Pu Speaker, ka zawhbelhna chu –

- i) FRBM Fiscal Responsibility & Budget Management, Act 2020 target kha a phak lo nasa si a; engtia tih nge an tum? Amend-a siamthat leh mai sorkarin tumna a nei em? ii)

Tum lo se, leiba tihthem tuma dan awm sa zawm thei lo a nih kha a inpawm mai thei tihna em ni?

- iii) Hei, sum bawm khawihthu a ni tho a; nimin lama *Zawhna leh Chhanna* kan ngaihthlak angin centrally sponsored scheme te pawh ni se, sum leh pai Central a tanga release a nih loh chuan heta tangin kan lo pe lawk a, a lo kal leh hunah khan kan chilhkhat

leh mai a ni tih kha Vety Department-a kan sawina ah khan kan House Leader khan a chhanna a ni a. Ni 100 inhlawhna, kan thingtlang miretheite te-te December a an thawhna kha vawiinni thleng hian an la la lova, kha eng vang nge? Central a tanga pawisa la hmuh loh vang nge ni, estimates an pek that loh vang? Hei, school admission tih te a lo hun leh dawn a, kan sorkar hian, Central a tanga a lo kal lo anih pawhin chhunkhah leh mai tur a tan a pe mai thei ang em?

iv) NREGS Staff te hlawh hi January thla a tangin tunthleng hian an la la lova, an khawngaih thlak khawp mai a. Hengte hi remsiam sak theih dan a awm ang em? (**Hon. Speaker:** Eng department nge i tih?) RD hnuai a mite an ni a, kha kha Pu Speaker, ka zawhbelhna a ni e. Ka lawm e.

PU T. LALHLIMPUA: Pu Speaker, ka lawm e. Kan Finance Department changtu Minister leh kan House Leader zahawm tak chhan a tana kan zawhbelh chu –

Kha, leiba khatiang zat kha kan nei a ni a. Chumi karah chuan, CM-Special Package kha pek theih kan inbeisei em? Kan inbeisei chuan, tun financial year ah hian kan inpe thei dawn em? Ka lawm e.

SPEAKER : Aw le. A chhang turin, Finance changtu, Chief Minister ni bawk Pu Lalduhoma ilo sawm ang.

PU LALDUHOMA, CHIEF MINISTER: Zawhna ka chhanna kha Pu Speaker, kumin financial year budget kumtira kan sawi laia budget estimates zatin ka chhang lo thei lova; kan BE tur pawh crore ₹4,000/- vel zet ni turin Budget Session ah khan kan pass kha a ni a. Amaherawhchu, he sorkar hian inrenchemna te theihtawpin an kalpui a, kan leiba hi a theih anga tamin tihnam ang kan ti a. Tichuan, hei kum tawpawh chuan revised estimates tunah hian kan lo nei ta a. Tuna kan leiba chu crore ₹13,330.82 a ni a, kum tira bat kan lo tum kan tin zawn ai khan crore ₹1,003.94 in a tlem ta zawk a ni. Hetiang sorkar hi ka hriat chinah chuan ka la hre miah lo Pu Speaker. Tun hma kha chuan leibat tum, leibat tura chhut kha kum tawpawh a aia tam bat a ni ziah a, ZPM sorkar erawh chuan kum tira leibat a tum aiin vaibelchhe sang chuanga a leibat a titem thei a ni. Hei hi record tling a ni.

Tin, CM-Special Package hand-holding hnuai mi kha tunah hian engzah chiah nge lo lut ka hre lova, ka hnen hi a lo la thleng lova. Department-te chuan Planning ah an thehlut tawh ni awm tak a ni a, an thehlut kim tawh em ka hre lova. Tichuan, Planning a tangin Finance ah a lo kal chho ang a, tuna an thlan hi thlan theih tur chin kan tuk vek a ni, department hi. A diltu tam deuhna ah chuan heti zat progress partner hi in thlang thei ang kan ti a, kan pe tam deuh a. Department thenkhat diltu nei tlem deuha kha chu sum kan pe tlem deuh a; chutianga chuan fel takin kan sem a ni. Chuta kan bituk ang zat zel chu an tichho dawn a, kan final ang a, kan sum hian a daih dawnin ka hria a. Department-in a an rawn tih bakah hian ngaih pawimawh zual eng emaw zat chu kan la pe tel thei awm mang e kan ti a ni. Tuna an rawn thlan zawng zawng hi kan pe vek ang; harsatna kan nei lo.

Tin, *Ni 100-inhlawhna* hi chu ka chan loh lam a ni a. Amaherawhchu, ka hriat chin chu, thingtlangah te kan han zin a, signal awm lohna ah hian *Ni 100 inhlawhna* hi an ti ve thin a ni. Online a report zel tur kha a ni a. A tuka an report kha an pawm tawh bawk si lova, chu chuan a tibuai nasa em em tih kha chu ka hriatpui a. Khang avang te pawh khan thawk reng si, a portal lama an upload si loh avangin a thawkte khan an hmu lo tlat si a ni. Chu chu Mizoram hmun kilkhawr deuh hlek, signal that lohna hmuna kan harsatna kha a ni.

Chungte pawh chu a ni mai thei a, naktuk-ah demand kan chai dawn a, chiang zawkin kan hre thei turah ngai ila.

Tin, an hlawh pawh chutiang bawkin Central atanga direct-n anmahni account a lut anih avangin, advance in kan lo pe lawk thei lo. Advance a kan pek theih chin chu Pu Speaker, anmahni mimal beneficiary hnena Central-ina direct hlawh a rawn pek an account a thun kha direct-a kal anih avangin kei niin advance in kan lo pe thei lova. Amaherawhchu, tunah hian Central pawhin a rawn tichho tawh a, January thla hi chu a rawn released tawh a, a piahlam erawh chu la released loh a ni awm e. Kha kha RD hnuai 'January a tanga hlawh la lo' tih nen khan a thuhmun mai em aw? A thuhmun tho chuan, kha kha ka chhan theih dan a ni e, Pu Speaker.

PU C. NGUNLIANCHUNGA: Pu Speaker, ka zawhna kha min chhang miah lo mai ka ti. FRBM dan Amendment, 2020 ami kha kan phak lo nasa si a; kha kha amend leh tumna a awm em? Awm ta lo se, kha kha leiba tihlem kawnga dan awm sa zawm theilo nih kha kan inpawm mai tihna a ni em?

PU LALDUHOMA, CHIEF MINISTER: Pu Speaker, FRBM Acts hi amend theih a ni a, Central pawh khuan an amend reng mai a. Tin, an zawm thei bik lova, Central pawhin; State dang pawn an zawm thei lova. Keini pawh chutiang tho chu kan ni a. A chhan chu, leiba te kan lo tihlem a, kan GSDP te kan lo tihlem phehi hi chuan kan fiscal deficit zawng zawngte pawh a lang sang ta ur mai a ni. Chuvangin, khami mila kan inher rem ve deuh a ngaih dawn avangin FRBM Acts hi a tul dan angin kan ennawn chhoh ve a ngaih ka ring.

SPEAKER : Zawhna dangah kan kai ang a.

Starred Question 184: Mizoram Public Service Commission (MPSC) chungchang.
Zawhna Neitu: Pu Robert Romawia Royte, Hachhek Bialtu.

PU ROBERT ROMAWIA ROYTE: Pu Speaker, ka lawm e. DP&AR changtu Minister zahawm tak chhan atan Starred Question No. 184 hmanga ka zawhna chu –

Mizoram sorkarin Public Service Commission tihchak dan tlangpui, heng points ang hian min hrilh thei em? –

- a) Thawktu lakbelh zat;
- b) Office facilities leh equipments siam belh/pek thar zat.

SPEAKER : Chhang turin, DP&AR changtu Minister Pu K. Sapdanga ilo sawm ang.

PU K. SAPDANGA, MINISTER: Pu Speaker, Hachhek bialtu Member zahawmtak Pu Robert Romawia Royte zawhna chhanna chu -

- a) Kum 2024 chhunga MPSC thawktu lak belh tawh zat: -
 - Assistant Grade - 2 nos.
 - UDC - 1
 - Total - 3 nos.

Kum 2025 chhunga written test result nghah mek te -

- Assistant Grade - 1 no.
- LDC - 5 nos.

Group D - 5 nos.
 Total - 11 nos.

- b) MSSSB thiah a nih tak avangin an bungrua zawng zawng MPSC-in a hmang chhunzawm a ni.

SPEAKER : *Zawhbelhna* zawt turin –

1. Pu Robert Romawia Royte (Zawhna neitu),
2. Pu V. Malsawmtluanga,
3. Pu VL Zaithanzama.

PU ROBERT ROMAWIA ROYTE: Pu Speaker, DR&AR Minister zahawm takin chiang deuhin MPSC an tihchak dan te a rawn sawi a, hmalak loh ai chuan a tha a. Mahse, an hna workload MSSSB hnathawh zawng zawngte an han thawh takah hian thawh tur tam tak an nei a, tihchak nasat a ngai a ni tih te he House-ah pawh hian sawi tawh a ni a. Mahse, tun china an han tihchak dan kha a lawmawm em em tho rualin, an mamawhna a phuhru lo deuh em aw tih rilruah a awm a.

MPSC hi dik tak, fair tak leh efficient taka an thawh theih nan an mamawh tawktu chungchangah te, facilities chungchangah te sorkarin kan pek ngei ngei hi a tul a ni tih ka sawi duh a. A chhan chu, kan sorkar leh kan ram inngahna, Constitutional body pawimawh tak anih avangin, tuna result la chhuak turte a chhuah hnu ah pawh khan needs assessment fel tak neiin leh efficient taka an thawh theihna turin MPSC hi thuan an tum a ni tih kha a sawi a. Tuna kan Minister zahawm takin a sawi lan erawh kha chu a la tawktu lo deuh ang a, tih ka sawi duh a ni.

Ka zawhbelhna chu - tunah hian exam conduct due tawh, hunin a daih loh avanga pending te, promotion case te MPSC ah refer ngai a ni tih kan hria a. Khang kha agency pahnihin an tih thin pakhatan an tih kha chuan time-clash kha tam tak a awm lo thei lova; khang avanga harsatna tawh te a awm em? Pu Speaker, ka lawm e.

PU V. MALSAWMTLUANGA: Pu Speaker, ka zawhbelhna chu:

- i) Tunah hian MCS (Junior Grade) post hnawhkhah loh engzat nge awm?
- ii) Kuminah MCS lakthar tumna a awm em?

PU VL. ZAITHANZAMA: Pu Speaker, DP&AR Minister zahawm tak chhana tana ka Zawhbelhna chu -

- i) Special Retirement Scheme kha hman theih a ni tawh em?
- ii) Tute tana hman tur nge anih?
- iii) Sorkar hnathawh duhthlanaa an hman tur nge, sorkarin tihluhnaa hmantir tur?
- iv) Special Retirement Scheme hmanga retire an awm tawh em?

SPEAKER : Aw le. A chhang turin, DP&AR changtu Minister zahawmtak Pu K. Sapdanga ilo sawm ang.

PU K. SAPDANGA, MINISTER: Pu Speaker, ka lawm e. Zawhna neitu Pu Robert Romawia Royte hi a zawt chiang thiam thin a, zawh hma hian a chhanna tur te pawh chiang sa deuh vek hian a sawi thiam thin a, a lawmawm em em mai a; a zawhnate pawh chhan a nuam bik thin a ni.

Hei, min veipui thu te pawh an sawi hmahruai a, a lawmawm tak zet a ni. MPSC in mamawh a thlen chu sorkarin tihloh a nei lo; mamawh dang a neih pawh ngaihtuah mek zel a ni. Tin, exam conduct due tawh promotion khaihlak tun dinhmunah chuan hriat a ni lo. MPSC hian calendar mumal tak a nei a, nodal deptt. ah harsatna a thlen thu te kan hre thin a, a tahtawlin kalpui zel a ni e.

Tin, Lunglei 'N' bialtu Member zahawmtak Pu V. Malsawmtluanga zawhna kha - Tuna MCS Junior Grade awmzat - 82 nos;

- i) Post hnawhkhah zat - 32;
- ii) Post ruak - 50 nos. (61%);
- iii) Kumina hnawhkhah tum zat - 15 nos.

Han sawibelh hlek ila, Pu Speaker. MCS lak hi a langsar viau mai a, mipuite pawh hian kan sawi nasa a. Mahse, a tak takah chuan MCS ang tho officer dang cadre hranga mite lak dan kum 2010-2024 inkara recruitment siam dan hi House hian han hre ve mai mai se a thain ka hria a: -

- 1) MIS - 22;
- 2) MFAS - 105;
- 3) MCS - 130;
- 4) MPS - 190;
- 5) Asst. Prof. (Lecturer) - 198;
- 6) Doctor Health Service - 223;
- 7) Engineer (MES) - 282;
- 8) MSS - 314;
- 9) ZMC atan MPSC kaltlangin - 105.

Zawhna siamtu khan MCS chauh kha a rawn sawilang a, mipui rilru ah pawh MCS hi a langsar viau mai a. Amaherawhchu, tunah hian post ruak 50 a awm a, hnathawh pawh a ti harsa angreng khawp mai.

Tin, Aizawl West-III bialtu zahawmtak Pu VL Zaithanzama zawhna *Special Voluntary Retirement Scheme* chungchang kha - hman thieh a ni tawh a, sorkar chuan gazette ah 21.1.2025 khan a chhuah tawh a ni.

Tute tana hman tur nge tih kha, *Central Civil Service Pension Rules, 1972* leh *The Mizoram New Defined Contributory Pension Scheme, 2010* NPS hnuaia invalid pension, voluntary retirement leh Compulsory Retirement under Fundamental Rules FR 56 (j) hnuaia qualifying service neih loh vanga chhuak theilo, hnathawk thei tawh chuang si lote tana hman tur a ni.

Tin, 'sorkar-hnathawkin a duhthlannaa a hman tur nge sorkarin tihluinnaa a hman tir tur' tih a ni a. A chhanna chu - sorkarin a ti lui thei lova, mimal hnathawk theilote khan an dil tur a ni. Tin, 'special retirement scheme hmanga retire an awm tawh em' tih chhanna chu - DP&AR in a hriat chinah chuan an la awm lova, he scheme hnuaia chhuak turte chuan Finance Department-ah dilna an theh lut tur a ni tih a ni e. Ka lawm e.

SPEAKER : Aw le. Zawhna dangah kan kal ang a.

Starred Question No. 185: SAMAGRA chungchang.

Zawhna Neitu: Pu Lalrinsanga Ralte, Serlui Bialtu.

PU LALRINSANGA RALTE: Pu Speaker, ka lawm e. School Education Minister zahawm takin a chhan atana ka zawhna chu -

- a) Tun sorkar kum kal mekah hian SAMAGRA teacher-te Cabinet meeting-in regularize tura a passed tawh kha engge a thlen chin?
- b) An seniority tihfel a ni tawh em?
- c) Kum eng zat service chin nge dah ngheh tum a nih?

SPEAKER : Chhang turin, School Education Department changtu Minister Dr. Vanlalhlana ilo sawm ang.

DR. VANLALHLANA, MINISTER: Pu Speaker, Serlui Bialtu zahawm tak Pu Lalrinsanga Ralte zawhna chhanna chu -

- a) SAMAGRA teacher te Cabinet meeting-in regularize tura a passed tawh chu Education Department-in a bawh zui nghal a, Addl. Secretary, School Education Department, Govt. of Mizoram chairman-na hnuaiah a zir chiang tur study team dina zir chian mek a ni.
Pu Speaker, kan sawi belh lawk ang a. Kan meeting zawh a tuk tukah officer-te ho kan han inko khawm a, study team pawh hi kan indin hmasa berin ka hria a.
- b) An seniority chungchangah hian provisional cadre-wise inter-se-seniority Ni 21.9.2024-ah tihchhuah a ni a. Hemi chungchanga representation dawnte hi a tam tham deuh avangin zir chian mek a ni a, tun dinhmunah *seniority* hi tih fel a la ni lo. Inter-se-seniortiy hi kan tar chhuak vek a, SAMAGRA website-ah khan a en theih a ni.
- c) Kum eng zat service chin nge dah ngheh tum tih kha - he scheme in a duh dan angin hna hrang hranga tling an nih chuan, kum 10 service tlingte tana hman theih tura siam a ni e.

SPEAKER : *Zawhbelhna:* -

1. Pu Lalrinsanga Ralte (Zawhna neitu),
2. Pu Lalmuanpuia Punte,
3. Pu Robert Romawia Royte,
4. Pu W. Chhuanawma,
5. Pu K. Hrahmo.

PU LALRINSANGA RALTE: Pu Speaker, Education Minister ka zawhbelhna chu:

- i) Kum tam tak SSA anih lai atanga lo thawk tawh, advertisement chhuah mumal chiah loh tul bik thil leh mamawhna avanga Primary leh Upper Primary-te engagement tam tak a lo awm a. Hengte hi Sorkarin an dinhmun kan ngaihtuahsak tawh em? An ngheh ve theihna turin Sorkarin ruahmanna kan siamsak thei em?
- ii) Sorkar hmasain school tam tak lumpsum grant-in-aid te, adhoc grant-in-aid te leh provincialized tura kan lo upgrade tawh te kha eng chen nge hmalak a ni tawh? Kum 2025 leh 2026 financial year chhung hian a nihna tur ang takin an awm hman ang em?

PU LALMUANPUIA PUNTE: Pu Speaker, ka lawm e. Ka zawhbelhna chu –

- i) Kum 2024 leh 2025 chhungin advertisement tel lova zirtirtu lak an awm em?

ii) Sorkar hmasa hunlai khan advertisement tel lova zirtirtu lak an awm em?

PU ROBERT ROMAWIA ROYTE: Pu Speaker, National Education Policy, 2020 hi national level policy niin, implement loh theih loh te a lo ni. Tih tur pawh a tam a, kan minister pawh a hah hlein ka hria a. Minister hmasa hun laiin Education-ah hmasawmna lian tak tak tam tak a awm a. tunah pawh sorkar thar an lo piang a, theihtawp chhuahin Minister-in tan a la tih pawh kan hre hlawmin ka ring a.

Chutih mek lai chuan, ka zawhbelhna chu -

- i) 'Work supervisor' tih hi engnge ni chiah? Engnge an thawh dan condition?
- ii) Hei hi official-a an hming lang lovin department committee hming hian work supervisor tur khan ZPM party lama an miduhsak zawngte ramhuai hnawhchhuah nan hian an hmang mai em ni?
- iii) Work Supervisor te hian GST-te an pe ve em? GST Registration te hi an nei reng em? An hming hi system-ah hian a lang lo reng reng a, mi hming hian a takin hlawkna an lo tel thin mai em ni?

PU W. CHHUANAWMA: Pu Speaker, ka zawhbelhna chu –

- i) Thingtlanga zirtirtu a han awmte tan in luah mai tur hmuh a harsa thin avangin, nghet chet-chawta awm a har em em a ni. Chungte tan chuan thingtlangah quarters sak tumna a awm em? A mamawh zawng zawngte tan sak vek tumna a awm em?
- ii) Lo awm tawhin hmalak ni ta se, engzat nge sak anih tawh?

PU K. HRAHMO : Pu Speaker, SAMAGRA teacher thenkhat regularized tur tih hon. Minsiter atangin hriat a ni a, a lawmawm khawp mai a. Ka zawhbelhna chu –

- i) Budget neih dan atanga engzah vel nge regularized an nih theih ang?
- ii) Tin, SAMAGRA teacher han tih hian, primary school-a thawk teacher leh middle school-a thawk teacher an awm ve ve a. Primary hi telh ve a ni em; nge, middle chauh?

SPEAKER : A lawmawm e. A karkik ang reng khawp mai a. A theih ang anga chhang turin School Education Department changtu Minister Dr. Vanlalhlana ilo sawm ang.

DR. VANLALTHLANA, MINISTER: Pu Speaker, ni e; zawhna kha a tam ang reng a; a chhanna ngaihtuah hman pawh a ni chiah lova. A theih ang angin kan han chhang ang a.

Pu Lalrinsanga Ralte, Serlui bialtu zahawm tak zawhna kha - Ni e, SSA hnuaiiah hian advertisement tel lova lo lak kha an awm nual tawh a; Sorkar hmasa chiah pawh ni lovin, a hmasa leh lam atang tawhin eng emaw zat kha lak an ni a. Tunah hian han tihngheh dawn takah chuan DPC te, khatianga khan DP&AR lam pawh an thikthu a chhe khawp mai a.

Pu Speaker, DP&AR in Ni 18th June, 2024-ah notification “Government of Mizoram regularization of CSS Employees Scheme, 2024” an rawn tihchhuaha thil tam tak an rawn tih karah khan ‘a hunlaia Sorkarin regular-a a lak anga lak an ni tur a ni’ tih te a awm a. Tin, thil buaithlak deuh chu, kum 10 chhung khan “*same post, under the same scheme*” tih, ‘post ngaiiah scheme hnuaiiah a awm char char tur a ni’ tih kha a awm bawk a. Hetianga kan kal dawn chuan a buaithlak khawp mai a. Amaherawhchu, rei tak lo thawk tawh ten eizawn nan leh chhungkaw chawm nan an lo hmang a; khatianga, ‘nangni chu in tel thei lo’ han tih dawt

kha hrehawm tawp a ni a, a lak theih dan tur te kan buaipui mek a. Study team pawh chiang takin kan inhrilh a, kan din tirh atangin ‘thlah thlak awm lo sela ka duh ber a ni’ tih kha vawi 2-3 ka sawi a, keimah ngei pawhin.

Chutiang chuan kan hotute’n hma an la a. DP&AR te nen kan la sawiho a ngai a, file kan la tichho zel ang tih kha ka sawi theih chin ni ta mai sela.

SPEAKER : Khawngaihni; hei *Zawhna & Chhanna* hun a zo a, Minister hian chhang zo law law se la aw. Aw le. Chhunzawm rawh le.

DR. VANLALTHLANA, MINISTER: Pu Speaker, ‘upgradation’ chungchang a rawn zawhna kha, ni e, *upgradation* sawi hi chuan a ninawm lamah hian a kai tawh a. Amaherawhchu, tih tur a lo tam em a ni, Pu Speaker. Higher Secondary kan lak luh dawn chuan Jt. Director level post 12 siam a ngai a. Tin, Higher Secondary ah hian zirtirtu 15 bawr vel an awm tlangpui a, 10 hi chu a loh theih loh a ni a. Department 5, subject 5 awm a ngai a, zirtirtu 2 zel awm a ngai a. Chu bakah subject 5 aia tamte an lo nei a; chutiang chuan, 15 te an awm a, school 12 ah kha chuan tam tak, 180 vel an ni tawh a. High School ah headmaster 120 siam a ngai bawk a, chumi nen Group ‘A’ officer thar kha mi 300 vel kan nei dawn ang a ni a, chutiang zawng zawng ruahmanna siam a ngai a.

Tin, a hmaa kan sawi thin dan, ‘pro-adopt’ dan pawh a lo awm lo a, dah luhna tur a bel kha siam chawp leh a ngai a. Kan kal kan kal a, tunah hian a rules awm ang tur chu tun Session ah hian kan tifel a, kan han lay ta a. Hmalak chhunzawmna tur pawh ruahmanna kan siam a, Cabinet meeting-ah a hma thei ang bera thehluh kan tum a; kan thehluh tawh zawk a. Meeting leh ve leh kan Chief Minister zahawm tak hian a lo consider chuan agenda-ah pawh lut thei tawh turah kan ngai a, chutiang chuan kan inbuatsaih a ni.

Tin, Pu Lalmuanpuia Punte, Hrangturzo Bialtu zahawm tak rawn zawhna kha - kan sorkar hnu hian advertisement tel lova zirtirtu lak kan la nei lova; 1507, kan chhinchhiah danah chuan lak kan nei tawh a. Zirlaite theitawpin lehkha an zir a, chutah chuan ‘fair takin an tan hmun kan siam tur a ni’ tiin kan au a, chumi tih lan nan chuan advertisement kaltlang vekin kan la a ni; advertisement tel lova lak an awm lo a ni.

Zawhna dawt leh ‘advertisement tel lova lak engzatnge’ tih kha, zirtirtute pawh a ni ang a, Samagra hnuai ah sorkar hmasaah pawh khan website-ah te an tilang tho a, RTI zawhnate rawn dahchhuah a ni a. 2022 ah khan mi 500 leh tih an awm tawh a. Hmanniah zawhna a rawn kal ve leh a, chutah chuan ka lo thlek a, sorkar hmasa ah kum 5 chhunga Samagra hnuai ah advertisement tel lova hna lak kha 650 chuang an ni.

Tin, Pu Robert Romawia Royte, Hachhek bialtu zahawm tak zawhna kha work supervisor chungchang a ni a. Pu Speaker, kan han sorkar chho a, ‘work supervisor ruat tur a ni e’ kan han ti a, kan han ruat a; sorkar hmasain an lo tih ngat ngat dan khan kan han tichho ve a ni a. ‘Chutah chuan dah a ngai e’ an ti a, kan han dah ve thawr a. Kan han tih takah chuan GST pek a lo ngai a, an pe vek a ni. A hmian lak a ni ngai lo a, amaherawhchu, services-ah hian nuai 10 chinah miin a contract anga a lova thawk a nih chuan GST ah 8% a pe tur a ni, chumi atang chuan. Nuai 10 chinah tikhan an pe a. Tin, Pu Speaker, Samagra Sikhsha hnuai ah hian nuai 30 hnuai lampang hi SMC/SMDC kaltlangin a pek theih a, a nih loh chuan work contractor a pek theih a ni. A *Dan* kha en theihin a awm vek a, ‘contractor pek

theih a ni' tih te a ni a, chu chu 'work supervisor' tiin lo dah thin a ni a, keini pawhin kan chhawm ve mai a ni. Chutiang chuan, kan danglamna erawh chu GST pek a ni tih kha a ni a. GST an pe tak tak a, kan in umzui a, tunah hian tihchhuah leh te pawh a ni ang a. Chungah chuan a tul anih chuan kan pe zel ang a. Amaherawhchu, *purely departmental* ang a kala, SMC kaltlanga tih te anih erawh chuan a ngai lem lo a ni tih kha kan hriat atan ka'n tarlang duh a.

Tin, 2019 ah khan Taxation Department-in notification a rawn tichhuak a, chutah chuan composite scheme a awm a, kum khata nuai 50 thawk tling lo khan 6% chauh an pek theih dan a awm a. Chumi hmang chuan a thawktute kan han inen a, sorkar hmasa hnuai lo thawk tawhte pawh ti khan Taxation Department-in an umzui vek a. Hming pakhatin hna 100 chuang thawk te an lo nei a, a thenin 5-6 te an lo thawk a; khang belkhawm khan nuai 50 aia tam a nih chuan 6% ni lovin, 8% an pek a ngai ta a ni; khatiang khan tunah hian inumzui mek a ni. Dan anga kal kan duh a, chutiang chuan kan kal chho mek zel a ni.

Pu Speaker, Pu W. Chhuanawma, Tuichang Bialtu zahawm takin a rawn zawhna zirtirtu quarters chungchang kha - kan han sorkar a, kan Chief Minister-in a ngai pawimawh khawp mai a. *Zirnaa transfer and posting* kan buaina chhan lian ber pakhat chu, 'zirtirtute'n awmna tur tha an neih loh vang a ni' tih a rawn sawi a; min veipui khawp mai a. 'Rawn dil rawh u' a ti a, kan han dil nghal a. Chutah chuan a tirah chuan hmun 120 ah tih kan tum a, estimate kha a lo hniam deuh a, kan han tisang leh a; hmun 62 ah sak turin ruahmanna kan siam a. Amaherawhchu, MLA-te rawn a tha ang tih ngaihdan kan han nei leh a, MLA-te kan rawn leh vek che u a, avaiin kan ti thei lo a. Amaherawhchu, nakinah tih zelna tur atan a tangkai dawn a. Pakhat tal hi chu MLA-ten an rawt hi in dah tur a ni tiin kan siamthat tir leh a ni.

Kan han siamthat tawh hnuah kan han en leh a, Samagra Sikhsha hnuai hian 2010 leh 2011 atanga teacher quarters sak tawh hi hmun 72 ah, tuna 4-5 sak loh la awm nen hian a lo awm reng a. Chu chu helaia School Education Department Directorate leh Samagra Sikhsha khan an lo inhrilh tawn si lo a; 'hetiang chuan a fel lo e' tiin, kan enthat tir leh a. Samagra Sikhsha hnuai teacher Quarters nei tawh khuate kha 'a then hi chu lo paih mai rawh u' tiin kan siamtha leh a. Kan Chief Minister pawh a zahawm khawp mai a, a scheme kan dilnaah pawh khan a tlai ber pawlah khan kan awm a. A chhan erawh chu, information sharing a awm tawh thin loh vang a ni a.

Chutiang chuan, kan siamtha leh a. MLA-te kan zah em em che u a, in rawn ziah ho kha Samagra a lo awm tawh te an ni fur mai a. Tin, a khawpui lutukah khan dah kan duh lo a, khawpui in 200-300 aia tam awmna ang kha chu tih loh hram kan duh a. A hla deuh, pan harsa deuh, in nei tlem ho kha kan han duhsak deuh bik a ni. Chutiang chuan, tunah hian hmun 62 a sak tum mek a ni a. In ziah ang kan rawn ti lo a nih pawhin, Samagra Sikhsha hnuai hian khan sak a lo ni tawh hlawm a ni tih kha min lo hriatsak ula. A list te pawh remchangah inpek te pawh kan tum awn nia.

Tin, Pu K. Hrahmo, Palak Bialtu zawhna CSS regularization chungchang kha, nichina ka sawi ang khan thil hautak tak a awm a. Samagra Shiksha website-ah khan *inter se-seniority* kha han en ula, a then chu 2013 atanga MTET kan neih chhoh 2015 ah chuan 'a ngai ngei e' kan tih tawh hnuah pawh qualification la neilo, a then chu B. Ed pawh nei lo, a then chu MTET pawh neilo, D. El. Ed pawh neilo zirtirtute kan awm a. Kum sawm aia tam lo thawk

tawhte an ni si a. Health & Physical Instructor tihah te, health lampangah te pawh GNM nei kha chu tlemte an ni a. Physical instructor-ah B.P. Ed pawh neilo eng emaw zah kan lo la a, Art Instructor-ah. Art lampangah thiamna nei miah lo tam tak kan la a, kha kha an nihna nen a inhen em tiin zirchian ngai a awm a ni.

Thil tam tak pawh sawi tur a awm ang, Pu Speaker. Hengho hi khawiah nge kan lo dawnawn dawn; a post kan nei em, tih te en a ngai bawh a. WE teacher kan neih hovin a daih bawh si lova, a dawh thleng kan lei a ngai a, a hautak khawp mai, tuna mi hi chu. A zirtirtu ngau ngau UPS zirtirtute, PS zirtirtute, Secondary zirtirtute, khangho kha chu tih dan a la awmin kan hria a, post ruakte a awm a. Khatiang khan a dawh thleng kan neih a ngai a, a bak ho hi engtin nge niang tiin kan zir Chiang a; resource person te pawh a hma chuan SSA-ah zirtirtu an ni thin a. Zirtirtu an rawn peka allocation kha a daih tak loh avangin RP ah a then kan dah a, a then zirtirtuah an awm chhonzawm ta a. ‘Khang hote kha engtin nge an awm chhonzawm tak ang’ tiin ngaihtuahna kan seng mek a ni a. A hautak khawp mai a, wawi 10 aia tam hi kan thuho tawh a ni.

Chutiang chuan a ngaihtuahtu, a buaipuitute lu a hai khawp mai a. Samagra Shiksha hi chinfel thut theih pawh a ni lova. Amaherawhchu, a lo thawk tawh sa, rei tak lo thawk tawhte paih thlak nghal ngawta, duh duha han thin phara chu kan tum lova. Mi harsatna ngaihtuah chungin theih tawp chhuahin kan buaipui mek a ni tih kha ka chhanna a ni e. Ka lawm e.

SPEAKER : A lawmawm e. Ti kha chuan Zawhna & Chhanna hun kan duh tawh ang a, business dangah kan kai dawn ang a.

Hei kan zingah member zahawm tak takte - Pu F. Rodinglana, taksa lam harsatna avangin wawiin a rawn tel thei lova. Tin, nimin lama kan puan tawh ang khan Pu PC Vanlalruata leh Dr. Lorrain Lalpekliana te kha rokhawhna avangin kan zingah an awmlo bawh a ni. Chu chu House hriatah ka'n sawi ni sela.

Nichinah khan ‘*Point of Order*’ chungchang kha kan sawi a. In dawhkanah khan en ula, Rules No. 334, para 6 (a) leh (b) kha kan han sawiri kha a ni a. “A Member shall not raise a point of order (a) to offer information or (b) ‘to explain his position’ tih kha a ni ta a. Khatah khan a mizo-tawng chuan awlsam zawngin han sawi ta ila. ‘Zawhna atan *Point of Order* kha a hmang tur a nilo’ tih leh, ‘a dinhmun sawifiah nan a hmang tur a nilo,’ tih kha a ni ta a. Chutih lai chuan kan memberte eng emaw hriat belh duh kan neihah inkhapburna ang deuha kan lo ngaih palh ka hlau deuh a. Chuvang chuan, eng emaw zawhna leh statement te kan han siam a, khata hriatfiahloh leh hriat belh duh kan nei anih chuan, helaia thute Speaker a ni emaw, Dy. Speaker a ni emaw, Panel of Chairman te emaw hnenah khan, *khalai kha hriatbelh theih a ni ang em; ka zawt thei ang em*, emaw te rawn tih ni sela. Tichuan, helam atangin, *han zawt ta che* kan ti ang a; chutiang chuan chuan kalpui ila thain ka hria a. Kha kha inkhapburna a ni lem lova. Amaherawhchu, kha *Zawhna* kha, zawhna awm tak ni rawh se.

FINANCIAL BUSINESS

Financial business-ah kan kal ang a. Wawiin hian Minister zahawm tak tak pahnihte - Pu Lalthansanga leh Pu B. Lalchhanzova te demand kan sawiho ang a, pass nghal kan tum dawn a ni.

Hun kal taa kan lo tih thin danin Minister pahnihte demand hi a rualin kan la ang a. Tunah Minister zahawm tak Pu Lalthansanga kan sawm dawn ang a, House-ah a demand te: -

- 1) Demand No. 33 - Land Resources, Soil & Water Conservation;
- 2) Demand No. 35 - Fisheries;
- 3) Demand No. 36 - Environment, Forest & Climate Change;
- 4) Demand No. 41 - Sericulture;

Hengte hi sawiho turin rawn move nghal turin ilo sawm ang u.

PU LALTHANSANGA, MINISTER: Pu Speaker, Governor of Mizoram recommendation leh i phalnain, heng ka demand-te: -

<i>Demand No.</i>	<i>Department</i>	<i>Amount in ₹</i>
33	Land Resources, Soil & Water Conservation	18,99,76,000.00
35	Fisheries	11,01,80,000.00
36	Environment, Forests & Climate Change	1,48,83,68,000.00
41	Sericulture	16,03,24,000.00
TOTAL		1,94,88,48,000.00

te hi kumin 2025-2026 chhunga ka department chante inrelbawlina tura hman atan he House zahawm takah hian ka rawn submit a, sawi ho turin ka rawn move nghal e.

SPEAKER : Khawngaihin han sawi leh lawk teh, Demand No. 36 a amount kha? (**Pu Lalthansanga, Minister:** Pu Speaker, Demand No. 36 - Environment, Forest & Climate Change amount chu ₹ 1,48,83,68,000/-).

Awle, a lawmawm e. Tikhan kan Minister khan a rawn move ta a. Tunah kan Minister zahawmtak Pu B. Lalchhanzova'n heng a Demand te: -

- 1) Demand No. 6 - Land Revenue & Settlement
- 2) Demand No. 17 - Food, Civil Supplies & Consumer Affairs

House-ah submit-a sawiho turin rawn move se ilo sawm ang u.

PU B. LALCHHANZOVA, MINISTER: Pu Speaker, Govt. of Mizoram recommendation leh i phalnain, heng ka Demand-te: -

<i>Demand No.</i>	<i>Purpose</i>	<i>Amount in ₹</i>
6	Land Revenue & Settlement	36,58,23,000.00
17	Food, Civil Supplies & Consumer Affairs	2,78,68,80,000.00
TOTAL		3,15,27,03,000.00

kum 2025-26 chhunga heng ka department chante inrelbawlina hman atan he House zahawmtakah hian ka rawn submit a, sawiho turin ka rawn move nghal e. Ka lawm e.

SPEAKER : Aw le. kan Minister zahawm tak takte'n an demand-te an rawn submit ta a, sawihona kan tan ang a. Minute 10 kha a tha leh mai em? (*House-in tha a ti a.*) Minute 10 zel kan ti ang a, minute 8 zelah warning bell kha kan rawn hmet ri leh dawn nia. Aw le, tunge han sawi hmasa ang le? (**Pu K. Hrahmo:** Pu Speaker, chawhnu lamah tih tur

ka neih avangin ka'n ding hmasa ber mai ang e.) Aw le, Pu K. Hrahmo ilo sawm ang.

PU K. HRAHMO : Pu Speaker, ka lawm e. Kan Minister zawhawm takte pahnih chan department 6 demand sawiho theih a ni hi lawmawm ka ti a, a hmasain ka support hle a ni tih ka sawi duh a.

Nimin lamah khan Dampa MLA zahawmtak Pu Lalrintluanga'n Pu Amit Shah lo thlen laia a thil tawn a sawi ang khan, tlem han sawi ve zawk ka duh a.

Kan CM zahawmtak hnen atang hian khami program-ah khan tel ve tura sawmna ka dawng a, ka lawm khawp mai a; tel ve ngei pawh ka tum a ni. Tichuan, office lam atang pawhin min rawn phone a, 'i invitation card kha i rawn ken ngei ngei a ngai a ni' min rawn ti a, 'aw le, ka rawn keng ang e' ka ti a. Khami ni tlai dar 3:30-a program tan tura tih kha, 'dar 2:30 PM ah i thutnaah i thut a ngai a ni' min rawn tih avangin hmanhmawh takin ka insiam a. Mahse, ka card kha ka theihngihl ta tlat mai a, ka theihngihl tih pawh ka inhre lova. Tichuan, ka han kal kha, check gate thlen dawnah ka hrechhuak ta a ni. Engtingge ka tih ang aw; check gate-ah central lam police te an duty chuan MLA ka nih min hre dawn si lova, ka lut thei lo ang a; helaiiah hian ka ding tawp ang a, Pu Amit Shah a lo kal ang a, 'khangho zingah khan engatinge i din' min rawn tih hlauh chuan, ka chanchin ka lo hrilh mai ang a, ka lut ve thei mai ang tih beiseina nen ka awm tawp a ni.

A pahnihnaah chuan, gate-ah zu kal ila state officer-te an lo duty hlauh anih chuan, ka theihngihl thu te hrilh ila, luh minn phalsak ve mai ang chu maw, te ka ti a. Tichuan, ngaihdan pahnih nei chungin gate ka va lut ve a. Detector ka va paltlang chiah a, step hnihthum ka'n pen chiah tihah khan kan police officer fel takin 'Ka pu, invitation card i rawn keng em?' min lo ti a, 'ka theihngihl tlat mai, a pawl lutuk; engtin nge kan tih ang' ka ti a; 'card lo chuan a luh theih hleihnem' a ti a. 'Ka hria a, min rawn hrilh tawh; mahse ka theihngihl hlauh mai a engtinge kan tih ang', ka ti leh a. Ani chuan, 'a nih leh zuk la leh lawk mai la' min ti a. 'Ni e; ka zuk la thei a lawm; amaherawhchu, Pu Amit Shah a lo thleng ang a, program hman zawhah ka rawn thlenpui thei chauh ang; kan awmna hi Luangmual daih a ni si a', ka ti leh a. 'Chutiingin a theih loh ang' min ti leh a.

Ka let leh mai dawn em ni ang tia ka inngaihtuah laiin, kan Education Minister zahawmtak Dr. Mathlana a lo kal a, min rawn beng a; "Pu Hrahmo, hetah hian ngatinge i din reng?", min rawn ti a, "hei, card ka ken theihngihl a, luh min phal lova", ka ti a; 'kei pawh ka theihngihl hlauh mai', a ti a, engtingge an inbiak zui ka hre tawh lova. Ani chu a lut mai a, engtin nge a luh bik ka hre lova; card kha a keng a ni ang a, tikhan an luhtir mai a, kei erawh chu tikhan gate-ah khan ka ding ve reng mai a ni. 'Anih leh chutia luh in phal si loh chuan ka let mai ang e' ka ti a. "Ka pu, i chhungte phone la, whatsapps in rawn thawn rawh se" an ti a; 'chutiang chuan in pawm em ni?' tiin ka zawt a, "aw, pawm e" a ti a. Ka chhungte ka va phone a, whatsapps-ah min rawn thawn a; hei hi a ni e", ka tih chuan, "aw, i lut thei tawh e" min ti a luh min phal ve a ni.

Hetiang hi ka vawikhat tawna a ni lova. Delhi-ah pawh 6th July, 2023-a Pu Modi-a tun sorkar thara an lakluh ni kha niin ka hria. Dr. K. Beichhua nen kan zuk kal ve a, invitation card kha ka awrh ve a, mahse security ho thlen hma khan mi an tam lutuk a kan innawr buaina lamah an pawthla ta a niin ka hria; a hrui chauh kha ka lo awrh a. Mahse ka han kal a, security gate ka va thlen khan, 'hei ka'n ti chu, ka card kha a lo awm tawh lo a ni.

Mahse, BJP MLA ka nih thu leh Pu Modi min sawm ka nih thu ka han hrilh khan leh, Pu Speaker, i card min siam sak kha, kha MLA card kha ka lo ak hlauh a, ka hmuh takah khan min luh tir thei ta hlauh a ni. Chhawng thumah harsatna nei lovin ka lut mai.

Helaia kan state officer-te kha an strict bik nge ka hre lova, Delhi khu BJP lalna *First Kingdom*, kan lalna anih avanga min hrethiam zawk nge ka hrethiam lo a. Tichuan, khalai kha ka paltlang a, thutna tur kha ka va hmu mai lova, ka rilru-ah chuan, 'card hi an ngaihpawimawh hmel zawk si a; thutna te min pe ve anih chuan, kei aiah card hi thutnaah khan dah ila kei hi chu ding zawk ta mai ila' emaw, 'card hi dah ila kei hi chu let leh mai ila' tia ka inngaihtuah lai tak khan Pu Amit Shah leh Kan CM kha an rawn lut thut a, tikhan rilru nuam takin khami ni kha chu ka hmang ve a, ka hlim khawp mai tih kha ka sawi duh a. Hei hi tumah mawhpuh tur an awm lova, a bul ber chu keima dik loh a ni. Card ka theihngilh vanga khatiang kha tawng ka ni tih kha ka'n share ve che u anih chu.

Pu Speaker, minute 5 kha a kal tawh a, kha kha i belh loh turah ka lo ngai tawp mai a. Engpawh nise, sawi tam ka tum lova, Pu Lalthansanga, Minister zahawmtak department chan demand 4-te hi ka thlawp a, tha ka ti a.

Demand No. 17 - Food, Civil Supplies & Consumer Affairs Department:

Pu B. Lalchhanzova, Minister zahawmtak chan department hi a hma pawh khan ka sawi tawh a. Food, Civil Supplies & Consumer Affairs Minister hi ka fak nawn leh duh a. Ani hi la thalai tak, mahni chan portfolio-a inpe tak niin ka hria. Ka fak ve em em chhan chu card var ₹15/- atanga ₹30/-ah huaisen taka a dah chho ngam kha ka fak a, a hma pawh khan ka fak tawh a ni. Amaherawhchu, kg-a ₹15/-a nih laia a leina tura harsatna awm lem lo kha kg-a ₹30/- an nih tak avang lei harsa ti chhungkua eng emaw zat an awm a ni. Chuvangin, sorkar-hnathawk leh mi-awmthei deuhte tan kha chuan kg-a ₹30/- hi a tha mai a, mahse kg-a ₹30/- anih taka lei harsa tite an awm avangin, khang te kha en tha leh sela, a man man zawk leh tlawm zawkin min siam sak thei se tiin ka ngen a ni.

Tichuan, kan Minister zahawmtakte department chan 6 pawmpui tura an chhawpchuhahte hi hi Pu Speaker lawm takin ka thlawp e. Ka lawm e.

SPEAKER : A va lawmawm ve. Kha, kan BJP-MLA, BJP member zahawm tak khan dawt min sawitir lek lekin ka hre deuh a. Keiniin 'BJP-MLA an ni a, Delhi-ah chuan an lal khawp mai' kan lo ti a. Amaherawhchu, kha, an lo dan deuh thu te kha a sawi a. Tha bera ka rin chu, in kal leh dawn anih chuan kurta ha la, tichuan, i tlang zawt zawtin ka ring deuh a ni.

Tunah tunge sawi leh ang? Pu VL Zaithanzama ilo sawm ang.

PU VL. ZAITHANZAMA: Pu Speaker, ka lawm e. Vawiinah kan Minister zahawm tak tak pahnih - Pu Lalthansanga leh Pu B. Lalchhanzova te demand kan sawiho dawn a ni a. Anni pahnih Demand hi tha ka tih thu ka sawi hmasa duh a. Pu B. Lalchhanzova Demand-ah ka lut hmasa ang a.

Demand No. 6 - Land Revenue & Settlement Department:

Pu B. Lalchhanzova chan demand-ah hian kalphung-thar kan hmu avangin ka'n lut hmasa duh a. Thil thar hmuh tur tam tak a awm a, kan sawi vek seng lo anga.

Revenue Department-ah hian mipui kan buai thin em em mai a. Surveyor-te an indaih lova; kan mamawh hunah ni lovin, an hman hun nghah ngaiin rei tak tak kan buai thin a ni. Chutiang siamrem nan chuan empaneled survey firm 13 lai ruat an ni a. Ram dilna te, ram thendarh te leh extension ti duhte tan mahni in lum atangin *e-RAM* online software hmanga dilna theh luh a theih ta te hian mipui min chhawk nasa dawn hlein ka hria a. Mahni in luma ti ve thiam lote tan veng leh khaw tam tak community service centre hmang tangkaia ram dilna leh ram teh that dilna online-in a dil theih zel bawk a.

Tichuan, Aizawl hi mipui tam ber chenna khawpui a ni a, Aizawl District chhungah Revenue District Office pakhat chauh awm thin chu pahnih-ah then niin, Settlement Officer Aizawl South leh Aizawl North siam a ni ta hian mipui remchanna eng emaw chen a siamsak a, mahni veng hnaih deuha dawr tur office a lo awm ta a. Office pakhata pending tam lutuk avanga mipui manganna hei hian a sukiang dawnin a lang a, *kalphung-thar* tha tak niin ka hria a ni.

Ram pek tur recommend tu Land Committee mumal chu khaw hrang hrangah din a lo ni leh zel te hi tha ka ti tak zet a. District tina Dy. Commissioner leh Revenue Law lama District Collector tih anga Settlement Officer te mumal zawk leh fel zawka DC kaihhruaina hnuaia kalchhoh tum mek a ni te hi tha ka ti a. Tin, Development Project hrang hrang highway te road leh infrastructure hrang hrang Central Sorkar leh Mizoram Department hrang hrang hmalaknaah Revenue Department in a theih tawk thawha hna a thawk hi mipuite tan awlsamna leh hlawkna a ni chho zel dawn a ni.

Hmanni lawkah Pu Speaker, Land Acquisition Act thar '*The Right to Fair Compensation and Transparency in Land Acquisition Rehabilitation and Resettlement Act, 2013*' mipui tana hlawk zawk tur legislature-in a adopt ta te kha lawmawm ka ti hle a ni. Tunah hian Mizoram tan chhiah tlingkhawm ti tha turin Revenue Department hian *potential* a nei tha hle a, a lak luh hi sorkar tan hlep tha tak a ni. Revenue Department hnuaiah Revenue Court te pawh notify thain, siamthat mek a ni a. Civil Court-a ukil rawihna sum tam tak sen ngai lova Revenue Court thumthat mek zel a ni te hi mipui tan thil lawmawm tak leh *kalphung-thar* tha a ni.

Demand No. 17 - Food, Civil Supplies & Consumer Affairs Department:

Hei hi a hmasa Revenue ai mah khan kalphung-thar a tam a ni awm e; mipui sawi pawh a hlawh a, House-ah pawh sawi hlawh a ni. *National Food Security Act* in a huam ve loh chhungkua atangin buhfai man (nichina kan ngaihtlak tak ang khan) kg-ah ₹15/- atangin ₹30/-a tihsan a lo ni ta hian sawi a hlawh hle a.

Kan Revenue Minister hian huai takin decision a rawn siam a. He thil hian sawi hlawh viau mahse, hetia kan han kalpui tak atang hian October 2024 - February 2025, thla 5 chhung hian crore ₹20 kan hum thei ta a, hei hi thil tha tak a ni. A chhan chu, State dang lian pui pui intodelh leh haus a tak takte khuan *card-var* hi an lo siam lem lo a. A nihna takah chuan dan dik tak angin *card-eng* leh *card-pawl* nei tur dik takte hian nei ila chu, a bak la chuangte hi chu ration buhfai ei tha duh vak lo, buhfai tui zawk to zawka lei theite kan ni tlangpui tawh a ni tih hi a chiang a. Amaherawhchu, *card eng*, *card pawl*, *card var*-te hi a nihna anga siamrem, duhtusam ang a la nih lohna hian tlem phun a titam deuh mai niin a lang a ni.

Entirman: card pawl neite chu harsa tak taka mi inluahte an ni a. An han pem a, an inluah te an sawn a, Aizawl chhim lam atangin Aizawl hmar lamah te an va kal a; an *card-pawl* kha an chhawm thei ta thin si lova; an *card-eng* aiah te kha an va luhnaah khan *card-var* an lo pe ta thin a. Chuvang chuan, *card-pawl* emaw, *card-eng* emaw nei chhungkaw harsa si lo, mahnia inchawm zote tan chuan kan card te surrender thuai thuaia, khang mi-harsa zawkte kan ken khan a-kristian a, rawngbawl na tha tak a ni. Ration card surrender chhungkaw 212 lai an awm tawh a, la awmbelh zel tura ngaih a ni nghe nghe a. Heti lek tur hi a la ni lo tih hi a chiang a, kan la pung zel turah ngai ta ila. Tunah April, 2025 thleng buhfai quota te chinfel a ni tawh a, department lam pawh hna an thawk tha hle a ni. Tin, retailer-te buhfai hralh bang hralh phal a nih tak loh avangin, thla 12 chhungin buhfai quintal 46,000 zet hum a ni ta bawk a, hetiang hian Supply Department sum senso eng emaw zat sorkarin a hum thei ta hi, kan Minister-in kalphung-thar huaisen taka a kalpuina zar a ni tih a lang a ni.

Thil tetham tea ngaih hemi ka sawi lai hian ka rilruah a lo lang a. Anganwadi-sikul naupang mid-day meal, an chhun chaw ei tur te chatlak lova pek an han ni zel thei te hi lawm awm ka ti a. Ka'n zawt chiang a, Northeast ah hian Supply Department chet velnaah a ti tha ber Mizoram hi kan ni nghe nghe awm e. Chuvang chuan, Anganwadi-chhunchaw ei turte kha retailer-te kaltlangin a thlawnin, an tana lak harsa lovin kan lo chhawp chhuah sak zel thei te hi a lawmawm ka ti bawk a.

Demand No. 36 - Environment, Forest & Climate Change Department:

Ramngaw kan nei tha ta lo hle; kan mamawh em em mai si a. Vansang atangin a hring dup hi chu Mizoram-ah hi chuan kan la ngah; ngaw emaw tih mai tur hi. Amaherawhchu, ngaw chhah - *virgin forest* hi ka hriatsual loh chuan 1% pawh kan nei ta meuh lova. Chuvangin, ngaw humhalh kawngah hian tan kan lak a ngai hle a ni. Tun anga a tlem chhoh zel lohnan ramngaw humhalh kawngah hian nasa zawka tan kan lak angai a ni. He House-ah hian ka sawi tawh a. Ngaw kan thiat thin a, Chalfilh Reserve Forest chhunga tourist compact siam nana ngaw kan han thiat te kha a uiawm a. Khaw tam takin Chalfilh tlanga tui khi an ring a ni a. Kan ngaw thiah chu National Green Tribunal atangin notice te kan hmu a. Chuti chung chuan ka rilrua a lan dan tak chuan, Central lam hian kan ngaw te hi minrawn thiah sak sela, keini hian lo humhalh ila, tih kha ka ngaihdan a ni a. Amaherawh chu, keinin kan thiat a, Central lamin minrawn khap zawk hi kalphung tha lo tak a ni. He department hi tui-humhalhtu tha tak an ni a, tui-humhalhna kawngah nasa lehzualin tang sela, tih kha ka rilruah awm a ni a.

Demand No. 41 - Sericulture Department:

Kuminah Cocoon thar chhuah hi a pung nasa hle mai a, metric tonne 612.27 zet ah a lo pung a, kum January 2025-a hralhna rate lah kha kum hmasa aiin 15% laiin a pung chho a. Sericulture hetitaka hma a sawn hi lawmawm ka ti a. State pawnah Metric-tonne 17.97 zet thawnchhuah a lo ni te hi lawmawm ka tiin, pangang-khawia eizawngte hma sawn zel turin duhsakna kan hlan a ni.

Tichuan, Pu Speaker, kan Minister zahawm tak takte pahnih - Pu Lalthansanga leh Pu B. Lalchhanzova demand te hi tha ka ti a, pass ngei turin duhsakna kan hlan a ni e. Ka lawm e.

SPEAKER : Tunah chuan Member zahawm tak Pu Lalrinsanga Ralte ilo sawm ang.

PU LALRINSANGA RALTE: Pu Speaker, ka lawm e. Hei vawinah kan Minister pahnih - Pu Lalthansanga leh Pu B. Lalchhanzova te demand kan han sawiho leh thei hi a lawmawm hle a. Ka'n sawi hmasak ber duh chu –

Demand No. 33 - Land Resources, Soil & Water Conservation Department:

Pu Speaker, he department hi Sorkar hmasa emaw, hmasa leh emaw, Sorkar kaltawh leh vawiin ni thlenga tuna kan Sorkar pawh hian kan ngaihthah deuh-department niin ka hria a, hei hi a pawh hle mai a. Tuna kan Sorkar hi kut-hnathawktute lam hawi kan nih dawn chuan, Soil Department pawimawhna hi kan hriat viau a tulin kan ring a ni. Agriculture leh Horticulture lamah engang pawhin hma la nasa dawn mah ila, Soil Department pawimawhna leh tangkaina kan hriata, anni tello hi chuan hmasawmna tak tak kan buh leh bal thar chhuah ah a ni emaw, kan thlai thar chhuah ah emaw hian a thleng thei dawn lo a ni. Chuvang chuan, kan leilung hausakna te kan leilung that leh that loh te, a hmunhma zira engkim thiamna nei Soil Department atanga an en hi a tul hlein ka hria a ni. Chuvang chuan, kan Soil Department te kan thuan chak deuh hi a tulin ka hria a ni.

Directorate hranah a awm a, an officer leh staff awmte an indaih lo hle mai a. Tin, District Office-te pawh a hmunhma a chhiain a hmuhtlak loh hle a; Mizoram Department-ah hi chuan kan ngaihthah deuh ber niin ka hria. Chuvangchuan Soil Department hi kan Sorkar hian kuthnathawktute lam hawi kan nih phawt chuan, Agriculture leh Horticulture lam kan ngaihpawimawh ang hian Soil hi kan ngaihpawimawh a ngai takzet a ni. Tin, Kolasib District Soil office hmunhma khu a nuam a, mahse a building a chhe tawh hle mai a. Heng te hi sak that theih ni se a thain kan hria.

Demand No. 35 - Fisheries Department:

Pu Speaker kan district hi sangha hmunpui deuh a ni a, leilet leh dil hmun tamna a ni a. Session hmasa khan kan Minister hi kan zawt tawh a, kan dil tawh a. Tuirial tuikhuaha case culture tihna tur ruahmanna te kalpuiin, a hlawhtlinna kan han hmu chho ta a. Tunah hian society te pawh an account-ah an pawisa a lut tawh niin ka hria a, a lawmawm hlein ka hria a ni. Tin, sangha-chi supply-ah te kan fimkhur hle a ngaiin ka hria a, a ti thang, tlema chinchang hriate'n ruahmanna an siampui hi a tul hlein ka hria a. A bik takin hei kan Minister hnenah hian thu thlen ka nei tawh a; ramria harsatna kan tawh avang khan chhuzana ramri venna tura kawng kan laih khan mi sangha dil tihchhiatsak kan nei nual mai a; chung zinga mi pawh chu kan Minister hi kan rawlhruk zauh tawh a. Siamthatsak leh ngai a ni a, tunah hian sangha dil khuah tharna tura tanpui dilna te kha an hawng mekin ka hria a, chungah te pawh chuan a hnena ka thehluh, kan ram himna tura an sangha dil lo chante han siamthatsak leh kha kan minister hian min ngaihpawimawh sak se ka duh bawka ni.

Demand 36 - Environment, Forest & Climate Change Department:

He department hi force angreng deuha awm ve tho an ni a. Tin, thil thalo eng eng emaw ramdang atanga Forest dan kalha an lo ken luh lo man hi an ngah ve hle a, hei hi a langsara puan a ni lo zawk nge ka hre lova; ka bial Vairengte-a Forest Department te an thawk tha takzet a ni tih kan sawi duh a. Chuvang chuan, department pawimawh tak a ni a, amaherawh chu an hnathawhna hmun hi ramhnuai a nih thin avangin duhsak an phu viauin ka hria a ni.

Ka bialah Pawlreng Sanctuary kan nei a, North Hlimen ah khuan a awm a. A khua in ram zau tak mai sanctuary tur hmunhma te kan han pe a, Sorkar hian a nihna tur anga kan

enkawl zuipui hi a tulin ka hria a. Tin, cheithat te pawh a tul hle tawh a, kan Minister-in heihi min hriatsak se tih kan sawi duh a ni.

Tin, Forest a han sawi leh kan duha chu, Serlui kaiah khuan balu kan lachhuak a ni. Khumi atanga kawithum-kawili velah khuan Assam lamin balu an rawn la ve a, chu chu 'Bhaga balu' kan tih hi a ni ta a. Bhaga balu khu awlsam takin an la dur dur thei a, a chhak kawili-kawingaah khuan Bhaga balu aia fim tha, hemi Serlui-in a ken thlak vek tho a nih chu, kawili-kawingaah mizoin kan lo la chhuak ve a; amaherawh chu Forest Department lam hi duh aiin an khirh deuh em aw ka ti a. Hei hi tlema thlah-zalen deuh theih dan a awm em? Khumi Serlui-a balu lakah hian Forest Department hian harsatna min siam fo mai a; tunah hian Mizoram chhunga development hrang hrang leh kawng siam te pawh kan nei a, heng atan pawha balu tha a ni a. Chuvang chuan, Serlui-a kan balu lak hi tlema khuahkhirhna thlah dul deuh dan te, kan Minister leh Forest Department lamin an hriat chuan a lawmawm hle ang a.

Tin, Sericulture Department hi, hei cocoon thar a pung a, a lawmawm khawpin ka hria. Tin, State pawna thawn chhuah te a ni a. Kan bial hi kan chikim khawp a, pangang khawi hi kan tam a. Tumkhat pheih chu Rengtekawn-ah bial kan fanin kan thianpa pangang khawina room bulah khan kan mu a. Kan thian pakhat hi a mu ngam lova, thu tlaivar zak khawpa awm a ni tawh a. Pangang hi kan khawi nual mai a, Bilkhawthlir te, Rengtekawn ah te. Chuvang chuan, eng emaw han puinha tur hi Hand-holding-ah te khan a lut thei turah ka ngai a; chungah pawh chuan kan Minister-in pawimawh kan tih kan rawn ngente a awm anih chuan, min han duhsak thei se a lawmawm hlein kan ring a ni.

Demand No. 6 - Land Revenue & Settlement Department:

Hei hi a pawimawh hlein ka hria a. Kan Minister hi a fakawmin ka hria a, department hmalakna te kan hmu a, huaisen takin an bei a. Revenue Department hian Court te hi an hawng a ni deuh ber maiin ka hria a, buaina a tam viauin a hriat a. Chung zawng zawngah pawh chuan kan Minister hian tlin tak leh lai takin ro a rel thin niin a hriat a a lawmawm hlein ka hria a ni. Tin Pu Speaker, kan bialah chuan Home Department nen hian inzawmna nei deuh hian ka hria a. Ramri chungchanga harsatna kan tawhin Assam lamah chuan *periodic patta* inpekthe an awlsam phian mai a. Chunga kan ramri hrang hranga kan buaina Mizoram chhung si ah chuan, kan huan neitute hian periodic patta neih te hi an duh ngawih ngawih mai a ni.

Tin, kan bialah Vairengte leh a chheh vela khaw lian ber a ni a; khaw dangah pawh revenue pass neih te hi kan duh ngawih ngawih a. Chu chu, sorkar hmasaah khan awlsam zawka a kal theihna turin farm han rawih theihna tur te pawh kha kan siamin ka hria a. Tunah hian khang farm te kha an function tawh em? Khatiang anih chuan vawiinniah hian sorkara kan sum chhunluh pawh hi tamtak a pun belh thei ka ring a. Chhiah, Zoram-chhiah bak pe lo helai kan ram chhunga in leh lo, in-hmun revenue pass nei chiah si lo hi kan em em mai a ni, thingtlang lamah chuan. Chuvangin, kan Minister pawh chak leh zualin Revenue Department lamah, a bik takin thingtlang ramri area velah hi chuan inhmun leh periodic patta te pek kha han awlsam theih deuh se chuan a lawmawm hlein kan ring a ni.

Tin, 2003 atang khan Bilkhawthlir khaw zauhna ni pahin Bilkhawthlir-Kharzawl ah in eng emaw zat a ding tawh a. Chutah chuan biak-in hmun te, sorkar sikul te, sorkar office te leh thil pawimawh hrang hrang petrol pump te pawh a awm vek tawh a ni. Chu chu, pass hi

kan dil thin a, mahse a buaithlak khawp mai a. Sorkar hmasa Pu Ruatkima Revenue minister a nih lai khan min buaipuiin, theihtawp chhuaha hma lak a ni a, Bilkhawthlir-Kharzawl ah. House pass dilna form min han pe chhuak a, chu chu SSA, BSAAB, 'land committee' kan tih mai BDO chairman-na hnuai kaltlanga house-pass dil mi 14 teh sak an ni tawh a ni. Chumi chhungkaw 14 tehsak tawhte chu house-pass pek theih maiin a awm em? Khawngaihtakin kan Minister-in min enzui sak ta se; he chhungkaw 14-te hi an in-hmun tehfel sak an ni tawh a, a theih hram chuan min pek chhuahsak vat thei se. Nikum September thla vel khan tehsak an ni tawh a. Hengte hi pekchhuak annih vatna turin kan Minister-in ruahmanna min siamsak thei se a lawmawm ngawt hle ang.

Demand No. 17 - Food, Civil Supplies & Consumer Affairs Department:

Pu Speaker, a tawp berah chuan, buhfai man to hi, ni e, kan sawi thin a; Aizawl-ah hi chuan kan tithei mai niin a lang a. Thingtlangah hi chuan ₹15 atanga ₹30/-a to kha a harsa khawp mai a, thingtlang bialtu tan chuan. Chuvang chu anih ka ring a, kan Minister hian remruatna dang te neiin, *card-sen* kha a siam leh niin ka hria a. Kha *card-sen* kha engzat nge siam a niha, *card-sen* neite hian buhfai kg-ah engzatin nge an lak tih te min hrilh theih chuan ka lawm ngawt ang. Tin buara-ip retailers atanga sorkarin kan lak let sak leh te hi enga tana hman nge a niha, a rawn return tha em, tih te pawh hriat a chakawm baw k a.

Tichuan, Pu Speaker, kan Minister pahnih-te Demand hi tha ka ti a, ka pawmpui thu ka rawn sawi a ni e. Ka lawm e.

SPEAKER : Member zahawm tak Pu R. Rohmingthanga ilo sawm ang.

PU R. ROHMINGLIANA: Pu Speaker, ka lawm e. Pu Speaker, wawinah kan Minister zahawm tak tak pahnihte - Pu Lalthansanga leh Pu Lalchhanzova te demand sawi theia helaia ka rawn ding ve thei hi ka lawm hle a ni. Pu Speaker, a hmasa berah chuan –

Demand No. 35 - Fisheries Department:

Fisheries Department hi kan ram tan a pawimawh hle a. Sangha chaw subsidized rate leh sangha note an han pe te hi keini ang thingtlang bialtute tan chuan a manhla takzet a. Hei hi kal zel se kan duh a, a tangkai kan ti a. Chumi anih rual erawh chuan, a khawpui chauha ti lovin, a thingtlang lamah te hian han kalkual ve thei sela a lawmawm ngawt ang tih kha, rawtna ni pah fawmmin ka'n sawi ni sela.

Demand No. 35 - Environment, Forest & Climate Change Department:

Hei kan ramah thing leh mau kan vat duai duai mai a, kawng kan nei theuh tawh a; kan kawng neihte an tha emem hlei lova. Kawng thar kan han rek belh hian thing leh maute kan suat nasat phah em aw te ka ti a. Chuvang chuan, he kawng thar han rek vak vak aimah hian kawnglhui kawng kan neih mek te tangkai leh tha zawka tiha kan han thum chak hian forest kan reserve-pui a ni em, tih lai te kha rilruah a awm a.

Tichuan, Pu Speaker ka bial chhunga Dampui khua hi Forest lamin Wildlife Sanctuary-ah an rawn rin lut a, an chhuak hreh ngawih ngawih a. Amaherawh chu, loh theihlohin an chhuak ta a; thenkhat phei chu an inkhelhnaah te khan 'compensation in duh em?' tiin an sign tir mai mai a; thenkhat lo sign lote pawh an awm a, hhangho khan hmulo angin ka bulah an rawn sawi a ni. Khatiang khan a then chhuak duh lo chhungkaw 11 an awm a. Tichuan, hmanni lawkah chhungkaw 6 chu 'nuai 11 zet lak tur in nei alawm' tiin, hun rei

tak hnu ah an chhuak ta niin ka hria. Amaherawh chu, chhungkaw 5 te chuan lak tur an nei ve tawh lawi si lova, anni ringawt awm kha hrehawm an ti bawk si a; tin, sokar dan zawmlo an ni bawk si a. Sikul awmte pawh an lo thiat a, khatiang khan chhungkaw-nga te tan hian eng emaw department lam atangin tanpui theihna te hi a awm thei em? An chhuah dawn chuan, “MLA fund atangin rangva in in-chung tur chu ka pe ang che u” ka ti a ni. A bak deuhte pawh kha, mihring ve tho an ni a, an khawngaihthlak khawp mai a. Eng emaw Forest Department lam atangin hian inpuih theihna te hi a awm se. Pu Speaker, min rawn tihsak theih chuan lawmawm hle ang a.

Pu Speaker, Land Revenue & Settlement chungchangah kan Minister zahawm tak khan min lo chhinchhiah sak sela; ‘Govt. Complex’ kan tih thin tuna ‘Ainawn Veng’ ni ta hi eng ang chinin nge tun kan sorkar hian hma a laka, eng ang chenin nge LSC te a release tih kha hriat a chakawm hle mai a. Zawhna te pawh ka siam a, a chhuak ve thei si lova. Pu Speaker helai hi a wind-up hunah min han sawifiah sak ka duh hle mai.

Tin, Pu Speaker, Mizoram-ah kan budget pharhah pawh State-in a kan thawhchhuah tura kha tam tak, crore 2000 chuang a awm a ni. Khaw thenkhatah VC pass in-hmun te kan han pe a; heng te hi Cadastral Survey chak deuh hleka han tiha LSC-a han daha, tax revenue a lo luh theihna tur ang chi zawng zawngah te hian hma kan lak chak hi a tul em em a; chu chu a Mizoram ram pum huap angin kan sawi ve duh a ni.

A tawp bera ka sawi duh chu survey firm chungchang a ni a. Chempui hriam tak pawh hi thil tha taka kan hman chuan tangkai tak a ni a. Amaherawh chu, tha lo zawnga kan hman chuan thil tha lovah a chang ve thei tho tih hi kan hriat a tulin ka hria. Survey firm te hi han en thuak chuan tha ka ti hle mai a. Amaherawhchu, a hman danah hian thil famkim lo deuh kan la nei em aw tihna rilru te chu ka pu a. PWD-ah tender kan chhan chuan, tender chhangtu contractor khan PWD-ah chhungte a nei em; a neih chuan an disqualified thin. Chu chu PWD tender zawng zawngah ka tihna a ni lo, thenkhatah chuan a ni. Chutiang deuh chuan danah pawh hian kan intlawh khalth deuh ngai te hi a awm em? Chutiang anih loh chuan, thil tha tak pawh hi thil thalo zawngin a kal palh thei ang a; inlungualna tichhe theitu te a ni a. Kan Minister hian uluk deuh hlekin helai hi min ensak se a thain ka hria a ni.

Demand No. 17 - Food, Civil Supplies & Consumer Affairs Department:

Pu Speaker, budget session hmasa khan e-POT chungchang ka sawi tawh a. Ka bial chhung internet awmlohnaah chuan ‘e-pot hmet turin tlangah te an kal’ ka ti; ‘Ka kalpui’ ka tilo. ‘Thingkungah te an lawn’ ka ti; ‘ka lawnpui’ ka tilo. Vawiin niah pawh tlangah te an la kal tho a nia; bukta te an han sa a nia. Chuvang chuan, ration la tur hian a hautak lutuk a ni. Hei chu engemaw zawnga min tihsak theih dan Pu Speaker, kan Minister hian nei ta se la a lawmawm hlein ka ring a.

Tin, Pu Speaker, lo an vat zo a, fur a intan chho dawn a. Ka bial chhungah chuan sorkar hmasa hmalaknain PMGSY kawng kan lai fer fur a ni a. Sorkarin theihtawp an chhuah chho a, hma kan la nasa, sawlai ah sawn. A nal avangin furah hian an kal hlei thei dawn lo. Chuvang chuan, sawlaia buhfai ration la tur pawhin tihngaihna a awm dawn lo. Fur anih hma hian kan Supply minister zahawm tak khan arrangement khaw tinah min siamsak dan a awm thei em?

Tin, buara an lak let chungchang hi min sawifiah sak se ka duh hle bawk a. Tin, bukna

diklo hi a huatthlalaawm a. Amaherawhchu, retailer te hian kudam atanga an lak hian an hmanhmawh tawh thin si a, a buk tute hi. An han thleng pheh a an khuaah, a dik si loh chuan ka bial chhunga khaw pakhat pawh, vawikhat chu YMA leh NGO ten an bukpuh a, a tling tlat lo a ni. Kha vang khan a daih thei tlat lo lai te pawh kha a awm ve thin a ni. Heng te hi engtiang zawngin nge min tihsak theih ang tih kha Pu Speaker, tawi tein ka'n sawi a.

Demand No. 33 - Land Resource, Soil & Water Conservation Department:

Pu Speaker, hmunphiah ka bial chhungah a tam; ka sawi ngun tawh e helaiah pawh hian. Kuminah pawh hmunphiah leisak an la ni meuh lo, ka bial chhungah chuan. Tun ZPM sorkar hnuah hian Pu Speaker, sorkar hian a la lei sak lo ti ila kan sawi soal tam puin ka ringlo. Nikum lamah a lei lo; 'kuminah lei an tum ve' an ti a, mahse ruah sur an hlau bawh si a, an nghak hman lo a ni. Tunah an hralh nawi, vai hnena an hralh ho kg ah ₹80/-, sorkar lamin an tirh an nih an ring a, ZPM mite an ni an ti a; an leisak a, chu chu an la ba vek vawinah hian. Khang te kha min peksak teh se. Sorkar lam an chet muan avangin a ro kg ah 30-40-50-60-70/- han hawlh te pawh an awm; chutiang chuan vaiho hnenah an hralh a ni. Tun khaw hnuah ₹80/- in an zuk la a, mahse a tam tawhlo kha kha chu; chu pawh an la ba.

Tin, Pu Speaker, vawinah hian a rem chuan wind-up hunah hmunphiah grade A leh B chungchang hi min hrilh fiah se kan duh. Keini bial te chuan kan thliar thiam lo a nih hi. Grade A leh B thliar kha har kan ti lutuk keini bial lam chuan. Chu ai chuan tun sorkara Adviser to CM ho hi Grade A leh B-a thliar tur ni ta se kan thiam zawk mai thei asin; kan tidik zawk mai thei a ni. Chutiang khawp chuan thliar har kan ti ve tlat. Chuvang chuan, Pu Speaker, engtiangin nge helaiah *kut-hnathawktute hamthatna* kan tih reng lai hian a grade A leh B thliar dan te min hrilh sela, a lak hma theih dan te sawikhawm ni sela kuthnathawktu te nen, tih kha Pu Speaker, ka'n sawi duh bawh a.

Pu Speaker, kuhva chungchang tawi te han sawi leh lawk ka duh a. Hei, research base-a kal kan ti a. Kan House Leader khan tlem lai deuh khan he House-ah ngei kuhva chin phal loh chungchang kha a rawn sawi a, kha kha chianguang deuha hriat kan chak a. Kan bial khu khua a lum ve a, kuhva te tunah hian kan ti nasa em em a. Kha lai khan min tizam leh deuh a. 'Engang chin chiah nge' tih kha ka hre duh bawh a ni.

Tichuan, Pu Speaker, sawi tur chu la awm tam viau mahse, la hun hman dik ka tum ve tawh a. Chuvangin, Pu Speaker, kan Minister zahawm tak pahnihte demand hi pass ka remti e. Ka lawm e.

SPEAKER : Aw le. Tunah chuan, Member zahawm tak Pu Jeje Lalpekhlua ilo sawm ang.

PU JEJE LALPEKHLUA: Pu Speaker, ka lawm e. Vawinah kan Minister chhuanawm tak pahni Pu Lalthansanga leh Pu B. Lalchhanzova te demand kan sawiho tur hi a lawmawm hlein ka hria. Hun a tam loh avangin ka sawi nghal zung zung mai ang a.

Demand No. 6 - Land Revenue & Settlement Department:

A changtu Minister zahawm tak Pu B. Lalchhanzova a tang em em a, Minister anih hnuah hmasawna nasa tak hmuh tur a awm a; mipui kan vannei takzet a ni.

Kan hriat theuh angin department hrang hranga thawktu indaihlohna a nasa em em a. Kan

State sum dinhmun ten a zirloh avangin mamawh khawp thawktu lak thar a har em em a. Revenue Department ah hian thawktu indaihlohna a nasat bakah land record & document tam ber te tunah hian manual hmanga thil engkim thawh leh dah that a ni thin a, hei hian hna a timuang em em thin a. Khawvel changkanna mila kan inher danglam vel zel hi a pawimawh ka ti hle a. Kan Minister hmalaknaa land record leh document hrang hrang digitised a ni chho zel te hi lawmawm ka ti hle a. Hei hian hnathawh a tihawlsam bakah ram lei leh hralh thu ah te, ramri buai chungchangah te awlsam takin a chinfel zung zung theih tawh dawn a ni.

Pu Speaker, Aizawl khawpui chhungah ringawt pawh hian mahni ram teh turin surveyor te koh a har thin em em a, hei hi thawktute indaihlohna avang te pawh a ni a. He kan harsatna sukiang tur hian kan Minister-in theitawp a chhuah a, empaneled firm hmanga mipuite mamawh dan ang zela ram kan teh chho zel thei tur te pawh hi a lawmawm hlein ka hria a. Thingtlang lam bialtu ka ni a, kan bial khawchhung hrang hrangah pawh hian mahni in leh lo ram, huan thlengin LSC te kan duh ve tawh a. Amaherawhchu, thawktu te indaihlohna avangin thingtlang lama awmte tan thil a harsa leh zual em em a. Tin, Pu Speaker, MLA campaign lai te pawh khan ka bula an lo thlen tam ber a ni thin a, heng chungchang hi. Hemi kawngah hian a changtu Minister-in theitawp a chhuah a, Survey of Village, Agri and Mapping with Improvised Technology in Village Areas (SVAMITVA) scheme hnuaiah drone survey hmangin thingtlang khua a ram neitute nihna (property card) pekchhuah a ni chho zel tur hi a lawmawm ka ti hle a. Hei hi mipui tan thil lawmawm anih bakah sorkar tan pawha chhiah (tax) hmuh belhna tha taka ni dawn bawk a ni.

Pu Speaker, mahni bial lam han sawilan ve leh ka duh a. A changtu Minister hi a tang khawp mai a, theitawp min chhuahpui a. A bikin Hnahthial District-a Land Revenue & Settlement Department hi a la changtlung lo hle mai a, hemi kawngah pawh hian theitawp min chhuah sak a. Mipuite'n Hnahthial hmun ngeia kan harsatna in leh lo, hmun leh ram te mahni awmhmun ngeia chingfel theih tur hun hi kan nghakhlel em em a. Hemi kawngah pawh hian theih tawp min chhuahpui tawh a, min chhuahpui chhunzawm zel turin a changtu Minister ka'n ngen chhunzawm duh bawk a.

Demand No. 17 - Food, Civil Supplies & Consumer Affairs Department:

Pu Speaker, Palak bialtu khan a changtu Minister a huaisen chungchang te a rawn sawi a. He department pahnih - Land Revenue & Settlement Department leh Food, Civil Supplies & Consumer Affairs Department te chang tur hian huaisen a ngaiin ka hria a. Kan hotute, a bikin kan Chief Minister/House Leader hian a changtu tur dik tak a ruat niin ka hria a.

Kan Minister chhuanawm tak hmalaknain tun hnaiah pawh retailer ten an buhfai sem bag an hralh thin tihtawp a ni ta hial te pawh hi a lawmawm ka ti a. Heng avang hian Mizoram Sorkar sum luangral mai mai thin kha tunah chuan tlem berah thla tin 1.40 crore vel lai kan hum theih phah hial a ni. Tin, kum 2021 vela Covid hrileng avangin chhiarpui/census neih theih a ni lova, kum 2011 census behchhanin ration buhfai a thlawna dawng thei chin quota ngai rin a la ni a. Hemi avang hian chhungkaw tam takin harsatna kan tawk a. Pu Speaker, i veilama thu member chhuanawm tak Pu Rinsanga pawh khan a rawn sawi a. Hemi chungchang ah hian a changtu minister-in theitawp a chhuah a, *ration card sen* an duang chhuak leh te pawh a lawmawm ka ti a. A changtu minister hmalakna hi a chhuanawm ka tih zia he House zahawm takah hian kan sawi lang ve leh duh a.

Demand No. 36 - Environment, Forests & Climate Change Department:

A changtu Minister chhuanawm tak Pu Lalthansanga hmalaknain mipui vangtlang tana hmasawna hna pawimawh hrang hrang - Tlabung-Kawrpuchhuah kawng laih leh a dangte, hun rei tak chhung forests clearance hmuh theih anih loh avanga pending anih hnuin, Principal IPA leh finance approval Ministry of Environment of Forest & Climate Change atanga hmuh a ni ta te hi a lawmawm ka ti a.

Kan hriat theuh angin, sorkar laipui atangin MoEF & CC in *Forest Conservation Act, 1980* leh *Forest Conservation Rules, 2023* hmanga dan a zam angin hmasawna hnathawh tur leh ramngaw la hek emaw, ramngaw hreuh chhe zawnga hmalakna a tel chuan *forest clearance* a tel phawt a ngai zel hian hmasawna thawh tur hrang hrang a tihmuan phahin, hnathawh tur hrang hrangah harsatna a awm phah a. Hemi chungchangah hian a changtu Minister-in theih tawp a chhuah zel a, forest clearance kan nei zung zung theih zel pawh ka beisei tlat a ni. Hemi chungchangah hian kan bialah te pawh harsatna eng emaw neuh neuh kan han nei a, amaherawhchu min changtu minister-in theitawp min chhuahpui a, hmalam te pawh kan pan zel a ni tih kha, House zahawmtakah hian ka sawilang ve duh a.

Pu Speaker, kan hriat theuh angin, Mizoram hmun hrang hrangah hei, tunhnaiah lo hal a ni a, kan bial chhung hmun thenkhatah pawh kangmei chhuak a awm zeuh zeuh a. Tin, thla hmasa February Ni 28 khan Reiek Tlang kang kha kan hre vek awm e; heng kawngah hian mipuite kan fimkhur leh zual a ngaiin ka hria a. Kan duh leh tum reng vang ni lova kangmei chhuak palh hi a awm thin a. Amaherawhchu, kan fimkhurloh vanga kangmei chhuak ta te pawh a awm thin a. Hemi kawngah hian mipuite pawh fimkhur leh zual zawk turin he House zahawmtak kal tlang hian ka ngen duh nghal baw k a.

Pu Speaker, Hnahthial District lam hi tan a na a. District thar te kan ni a, hmasawna tur hmabak kan la ngah si a, hemi kawngah hian min hrethiam tur pawhin ka ngen duh che u a. Forest Division kan la neih loh avangin Lunglei Forest Division hnuaiiah Hnahthial leh South Vanlaiphai Range te hi kan la awm a. North Vanlaiphai Forest Division hnuaiiah South Chawngtui, Thingsai leh Cherhulun Forest Range te hi a la awm mek baw k a. Hnahthial District chhunga Forest Range zawng zawngte hi Zone khata kan awm theihna turin Pu Speaker, a changtu Minister hian theitawp min chhuahpui, Hnahthial District-ah division thar kan neih theihna turin hma min laksak chhunzawm zel turin ka ngen nghal duh baw k a.

Tin, kan hriat angin Hnahthial ah hian Denlung khua kan nei a, *Lalnu Ropuiliani thlan* a awm a. He hmun hi Birds Sanctuary siam theihna tur khawpin sava leh nungcha humhalh kawngah hian an titha hle a. Bird Sanctuary siam theih ni se, tourism tihhmasawnnan leh Mizoram tan rohlu tling thei tur khawpin an khua hian potential an nei tha a. Hengah te hian hmalakna awm thei se a lawmawm hle dawn a ni.

Demand No. 35 - Fisheries Department:

He Department hi a pawimawh a. Kan ramah pawh kan hriat angin sa ei chungchangah te pawh mi tam tak chu kan in control tawh a. Hemi kawngah hian sangha hi a hrisel an ti thin a. Kan ram tharchhuah hian kan mamawh hi min la phuhru tawklo ni te pawhin ka hria a. A bikin Hnahthial District ah hian theitawp kan chhuah a, kan DFO leh a staff te an tang em em a, tunah hian hma kan sawn chho ve zel a. Mizoram-a sangha thar tamna ber Mamit leh Kolasib District-te pawh theitawp chhuaha khum ngei kan tum tlat a ni.

Tin, tunhnai ah Hnahthial ah hian lui pawimawh tak tak - Tiau, Tuipui, Tuichang leh Mat te a awm a. Kan lui dung humhalhna kawngah hian department leh YMA ten theihtawp an chhuah a; Tuipui 'D' khawtlangin sangha an humhalh te hi Mizoram mipuite hmuhnawm tih a tling a. Tin, YMA Branch hrang hrangte'n lui dung humhalhin zanrei tak tak thleng, a then pheih chuan riak meuhin sangha te an veng a; tunhnai ah chuan hmuhtheih khawpin sangha te pawh an pung a. Hemi kawngah hian Pu Speaker, i remtihain he House zahawmtak kaltlangin, department bakah YMA Branch hrang hrang leh NGO hemi kawnga hmalatute chungah hian lawmthu ka sawi duh a.

Pu Speaker, Hnahthial District Fisheries Department hi thumchak turin kan Minister zahawmtak hi ka ngen duh a; tunah hian mimal building luahin an awm mek a, department in ram pass fel tak an nei tawh a. Office building leh staff-quarters sak thuai a nih theihnan hma min laksak turin ka ngen nghal duh bawk a.

Demand No. 41 - Sericulture Department:

He department hi ramngaw tichereu lo zawnga eizawna tha tak a ni a. Pangang-vulh hi kum lama upate tan pawh thil harsa a nih loh avangin eizawna tha tak a ni a. Tin, phai lamah demand a san em avangin a hralhna kawngah hi chuan harsatna a awmlo a. Tin, Govt. approved rate nei sa thlap a ni a. Pangang-vulhna lamah hian rampum huapa hma kan lak chhoh zel te pawh hi Pu Speaker, a pawimawh hlein ka hria a. Hnahthial District hi tunhnaiah hian hma kan sawn nasa em em a. A bikin Sericulture Department officers & staff ten theihtawp an chhuah a. Tunah hian Hnahthial District ah hian pangang-vulhna hmun, Govt. Mulberry Seeds Farm kan nei a. Heta tang hian kum 2024-2025 chhungin pangang-chi hi 8058 semchhuah tawh a ni a. Pangang-chi vulhtu bikte hian pangang-chi tha atan bik liau liau pangang-tui 818 an vulh tawh a. Chuta tang chuan pangang-chi tur cocoon 31,467 an rawn tharchhuak tawh bawk a ni.

Tichuan, Pu Speaker, kan minister-te pahnih - Pu Lalthansanga leh Pu B. Lalchhanzova te demand hi ka pawmpui a, he House ah hian pass ngei ni se ka ti e. Ka lawm e.

SPEAKER : Aw le, tunah chuan member zahawmtak Pu Lalramliana Papua sawm ang.

PU LALRAMLIANA PAPIA: Pu Speaker, ka lawm e. Vawiina kan Demand sawi turte hi kan Minister Pu B. Lalchhanzova chan Department atang hian ka han tan ve thung ang a.

Demand No. 33 - Land Revenue & Settlement Department:

Kan budget estimate te han enin kum hmasa lampang ai chuan tlem chuan a lo pung ve leh hlek a, a lawmawm ka ti a. Department hrang hrang kan sawi dawn avang department website te pawh ka han thlir kual a; thenkhat hi chu source atana hmantlak loh tawp department website te hi a la awm a. Amaherawhchu, Revenue Department website ka han ena ka lawmna em em pakhat chu - Instruction fel tak an website ah hian hmuh theihin a awm a, lawmawm ka ti a. Mipuite pawhin kha department ah khan an mamawh leh tulah va dawr dawn sela, an duh an lo inenlawk theih turin thil tam tak, instruction fel tak mai hmuh tur a awm tih ka hria a, lawmawm ka ti em em a. Department thenkhatte erawh chu rintlak reng reng loh a ni hlawm a.

Ka thuhma ah chuan, hei hi kan sorkar pawhin a duhdan a ni a. Department hrang hrangte

pawhin online, hetiang a atangte pawha source hrang hrang rintlak kan dap theihna tur hian kan website te pawh hi kalpui tha ka ti hle mai. Ka fak a ni. Tin, e-Ram kan han kalpui chho te hi lawmawm ka ti khawp mai a. Amaherawhchu, Aizawl District bikah a la niin ka hria a, ka hresual emaw. Hei hi patta te, pass te leh hmingthlak chungchangah district dangah te pawh hian tih ve thuai hi a nghahhlelhawm hle mai a, e-Ram hi. Tin, chhiah pek te thlang a tihtheih a, chhiah pawh kan hmuhthat phah leh zualin ka ring a. Heng hi district hrang hranga tih ve turin department hian tan han la deuh sela a thain ka ring a.

Tin, survey hna kan outsource a, empanelled firm te kutah kan han dah ta a. Chu pawh helai kan Aizawl lam deuh hi a la ni mai em aw ka ti a. Keini awmna Lunglei lamah te pawh a la kal tak tak theih loh deuh em aw ka ti a, empanelled firm hmang a survey chungchang te pawh hi. Hei hi chak leh zual, a huamzau zawka thil tha kan practice hi chu, kan kalpui theih thuai thuai hi a nghahhlelhawm hle mai.

Thil pakhat ka han sawi leh duh chu, Land Revenue & Settlement hi mipui hne lo theilo department; mipui, mitin, chhungtinin kan mamawh department a ni a. Dawrtu pawh a ngah a, thawktu pawh an indaih lo kan ti a. Chutih lai chuan *Right to Public Service Act* hnuai hian he department hi kan inziaklut em ka hre lo a; ziah luh tul tak department niin ka hria a. Mipuite pawhin kan mamawhna a zira he *Right to Public Service Act* in a phuar ve tur department atan hian ka awt khawp mai a. Kan la inziaklut lo te a nih phei chuan, chutiang ti thei tur pawh chuan department te tan la deuh deuh turin ka han request ve bawka ni, he House kaltlang hian.

Demand No. 17 - Food, Civil Supplies & Consumer Affairs Department:

Hei, nakinah i veilama mite pawhin Pu Speaker, an lo la sawi ka ring a. Nikum BE ai khan kumin BE hi a tlahniam ta duai mai a. Kan Minister thlavang hauh, lainat deuha eng emaw zawnga lo sawi leh te pawh kha a awm turah ka han ngai ngawt a. Amaherawhchu, ka han zir hian a lawmawm ka ti ve thung a ni. He budget-a ka hmuhchhuah tak chu, he department thahnemngaihna leh sorkar tana a lo thawh nasat zia ka hmu a. Buhfai retailer ten an sem bang hralh phal loh te leh kawng hrang hranga strict taka he department Minister-in a enkawlna avanga sorkarin vaibelchhe tel a lo hum zia te, khang zawng zawng atang khan kumin budget-ah chuan kum hmasa lampanga kan sum sen tura kan beisei ang pawh a ngai dawn ta lo e. He department hian tan a lo la nasa a, sorkar sum renchem takin a lo kalpui thei hian ‘kan in manage thei dawn e’ tih beiseia sum dahtlem kha a lo ni tih kha ka hmuchhuak a. Chuvang chuan, a ropui ka ti a, ka fak a ni, he department hi.

Tin, kalphung-thar kan practice chhohna pawimawh tak leh hmasa ber pakhat a niin ka hria a. Sorkar chu kan hriat angin, ministry a lo inthlak chuan tute ka tihchhan bik pawh ni lovin, sorkar tharin a tih hmasak ber thin pakhat chu, retailer tanglaite tihtawpa, ruling mi leh sate retailer atan dah thar hi a ni fo a ni. Mahse, tun tum ZPM sorkara kan Minister hian party lam atang pawhin pressure tam tak pawh a dawng vein ka ring a; huaisen takin retailer-te an term kal laiah tumah titawp lovin a kentlang tir a. Heng te hi a fakawm ka ti em em a, ka sawi lo theilo a ni.

Tin, buhfai sem chungchangah hian, mipuiin kan duh ber leh hmun tina kan sawi tihlawhtling tura he department-in hma a lak mekna chu, ‘mipuite’n kan ration chan tur a buk tlingin kan dawngthei tur a ni’ tia tan a lakna hi a fakawm ka ti a. Hemi kawngah hian Minister leh department chuan an tih tur an tiin ka hria. Vawiina ka vei em em, he House

kaltlang pawha Zoram mipuiin hemi kawnga a hlawhtlin theihna tur atan hria se ka duh chu, helai tualchhung level-a mipuite leh VC, LC leh NGO-te, retailer te ho hi helai level-ah hian kan tan a ngai a ni. ‘Kudam atangin buk tling lova an lak chuan tihngaihna a awm lo’ tiin kan inchhan kual zel a, a dikloh tanna atang zel khan tihdik kan tum tur a ni. Mi-thenkhat pawti ti lova la mai mai, khirkhiap nih hlauh vanga thil diklo pawh pawisa lova namnul mai duh kan awm thin a.

Ka bialchhunga khaw pakhtah buk tling turin an inngen a, an retailer-in a duh lo deuh a. Amaherawhchu, buhfai la tura kalkhawm ho khan la duh lovin an haw leh thap a; retailer-in ngai ngam lovin a hnuah chuan mipui duhdanin thil a kal thei leh ta a ni. Khatiang khan mipuite pawh hian tithap ngam ila chuan kan sorkar hmalakna te pawh hi kan tichak thei dawn a ni. Tin, ‘weighing scale hmang lovin i ti a, ka la dawn lo’ te tingam ila; sorkar order tihlawhtling tur hian mipuiin mawh kan phur a ni tih hi uar deuhin ka sawi duh bawka a ni.

Tin, ruahmanna fel tak neiin ration card a han singsa te hi lawmawm ka ti a. Kan hotupain a sawifo thin, ‘*vawi sawmkua-pakua kan save sawi tha duh chuang si lovin, kan goal vawikhat chhuah lai an sawi duh a*’ a tih ang deuh hlek khan, hetah retheite hmakhua ngaia ration card chungchanga hmalakna zawng zawng kha an sawilang duh chuang si lova. A khawsak zia deuh chin, ‘nangni chuan in tlin e’ tia buhfai man tlema a han sang lai te kan han sawi vawng te hi a zahthlak ka ti a. Hei pawh hi kan inzirtir that a ngaiin ka hria. Hun awm sela hemi chungchang ringawt hi minute sawm vel sawi ka chak a, sawifiah theih ka inbeisei deuh a. Mahse, hun a awm si lova. Kan Minister-in tawngkam tlemte fiah deuhin lo sawifel thei se ka duh khawp mai.

Hei, lainatna nasa tak nen *card-sen* te an siam leh a. Tin, a man tlawma an luh theihna turin kawng te a hawng hmasa te te a. Chutah chuan, ‘hengho hi chuan intlin zan e’ tih tur chhungkua ho kha a man tovin an dah a ni mai a. Heng te pawh hi Minister ruahmanna fel tak a ni a, a fakawm ka ti a ni.

Demand No. 41 - Sericulture Department:

Nichina Pu Jeje-a sawi ang khan, Sericulture hi department tha tak a ni a, a chhenfakawm a ni. Thingtlangah pawh hei hi income regular taka kan lakluh theihna a ni a, a market lamah buaina a awm lo a ni. Ka sawi thui hman lo. Kei pawhin a thatzia hi ka hmu fuh a. Ka biala khaw pakhat chu *Sericulture adopt village*-ah kan nei a ni. Hmanniah director te pawh ka han kawm a, office-ah te pawh ka han leng hial a ni. Hei pawh hi sawi tur tam tak ka nei a, mahse hun a awm tawh si lova.

Demand No. 36 - Environment, Forests & Climate Change Department:

Environment chungchangah hian ramngaw chereu chak lutuk hi ka rilru a tihah a. ‘Engatinge aw’ ti a ka chhui ka chhui hian thil pakhat ka hmuhchhuah ve, ka rilrua awm chu - Chainsaw rawn chhuak hi a ni. Chainsaw hian kan ramngaw hi a tichereu chak lutuk hian ka hria a, ka bialah pawh hian. Hei hi engtin nge ni ang aw tiin Dan lam te ka en thin a; Dan lamah te pawh hian chainsaw registration rules te pawh hi a lo awm ve a. Hemi hmang hian department pawhin a control-in, a khuahkhirh te pawhin ka ring a. Ramhnuaiyah pawh kal ila, bial fannaah pawh hian chainsaw ri pawh hi a ri reng tawh mai a. Heng te pawh hi strict deuhin rules hrula kalpui te pawh a thain ka ring a ni.

Demand No. 35 - Fisheries Department:

Pu Speaker, Fisheries fakna lam chu kan sawi hman tawh lovah ngai ila. Suggestion pakhat chiah sawi ve ka duh chu – department-in fish pond te kan siam a, mahse kan enkawl zui leh tak lohte a awm a ni, ka bial Lunglei South-ah te pawh. Hei hi outsource emaw, privatize emawa enkawl peih an awm chuan kan tihtir zung zung a thain ka hria. Kei pawhin thenkhat chu ‘mimal kutah lo enkawl tir mai rawh u’ tia department-a ka lo ziahpuite pawh an awm tawhin ka hria. Chuvang chuan, heng ruahmanna kan neihsa, kut hnathawktute’n chhenfakawm leh zuala an sawtpui theih tur ang te hi department te pawh tlemin lo inhawng zau thei deuh ula a tha khawp mai tiin request tawite ka siam a ni e.

Vawiinah hian kan Minister zahawm tak Pu Lalthansanga leh Pu B. Lalchhanzova chan demand-te hi he House hian lungrual taka a pawmpui tha ka ti a. Kei pawhin ka thlawp a, ka pawmpui e. Pu Speaker, ka lawm e.

SPEAKER : Aw le. Member zahawm tak Pu Ramthanmawia ilo sawm ang.

PU RAMTHANMAWIA: Pu Speaker, ka lawm e. Vawiinah Minister zahawm tak te pahnih Pu Lalthansanga leh Pu B. Lalchhanzova te demand kan han sawiho leh thei a, a lawmawm ka ti hle mai. A hmasain kan Minister zahawmtak Pu B. Lalchhanzova chanah ka’n lut ang a.

Demand No. 6 - Land Revenue & Settlement Department:

Kumin a budget hi nikum aia a tamna chu crore 1,69,40,000-in a tam a, a lawmpuiawm hle mai a. Hei hi tangkai takin a hman kan ring a ni.

Pu Speaker, kum sawm kalta velah khan veng hrang hrang, veng hnih-thum velin ruahsur avangin leimin kan tuar a; Laipuitlang ah te, Ramhlun-ah te pawh a ni a. Chungcho chuan an inhmun te kha luahlum thei tawh lovin tlanchhuah san a ngai a. Tichuan, sorkarin Chite ramah khuan rehabilitation hmun ‘Government Complex’ tiin chhungkua 100 dawn lai plot te siamin a dah ta a. Chu chu house pass pek chi te direct-a an LSC surrender te chu direct-a LSC pek tura tih te an ni hlawm a. Chhungkaw 70 vel chuan in leh lote dinin puk chawpin tiang chuan khulaiah khuan an inbengbel tawh a ni.

Pu Speaker, hei hi kan Minister chak tak hian a hriat tawh ka ring a. Tunah hian khung chhungkaw 70 vel (100 dawn lai) an inhmun, house pass emaw, LSC emaw pek chhuah theih ni se sorkarah revenue thahnem tak a lo lut dawn a. Tin, anni tan pawh he LSC hmang hian loan te pawh an la ang a, in sak nan leh thil danga dah kham atan te tangkai takin an hmang thei dawn a ni. Hei hi kan Minister hian tun hnaiah min lo ngaihtuah sak sela, a bialtupa hi ka rawn lo na a, kan sawi a ni. North-II ah an awm a, an khawngaihthlakna a rei tawh em em a; hmun danga in nei tawh lovin khulai ah khuan an inbeng bel a. In 100 dawn laiin tunah khuan in leh lo dinin an khawsa mek a ni, Pu Speaker.

Demand No. 17 - Food, Civil Supplies & Consumer Affairs Department:

He department pawimawh zia, a tel lo chuan Mizoram mipuite ei leh barah kan mangang nghal mai a; kan dinhmun kan hria a. Chutiang khawpa department pawimawh chu a ni a. Kan Minister pawhin nasa takin tan a la a, a lawmawm a. Pu Speaker, Budget Speech ah khan in non-NFSA tana buhfai man khan kg ah ₹15/- tanga ₹30/-a tihsan a nih avanga sum crore 20 kan hum thu kha alo lang a ni. Vaibelchhe 20 kan huma kha inrenchem avang a

ni lova, buhfai kan tih to avanga a punna tanga sum lo lut a ni. Chuvangin, hei hi lawm viau tur nge lawm loh tur tih hi ngaihtuah tham a tling a ni. Kan mipuite hnen atanga buhfai man kan tihpun atanga sum lo luta kha chumi avanga budget ah pawh crore 20 lai kiam ta niin a lang a, hei hi kan mipuite atanga kan khawn a ni tih kha kan sawi duh bawk a.

Pu Speaker, chu mai ni lovin, oil man hrang hrang leh lei chhiah kan tipung bawk a, chu chuan mipuia harsatna tam tak tunah hian kan tawk a ni tih hi zep rual a ni lo. Thil phurh man a lo to a, bungraw man a lo sang a, hei hi tunah hian mipuiin kan tawk mek a ni. Khalai kha chu ka sawi zui lo ang, Pu Speaker.

Demand No. 35 - Fisheries Department:

Fisheries ah hian a lawmawm ka ti a; department lian lo mah nise hma kan sawnin ka hria a. Kan bialah pawh sangha khawi an intihhmuh a, a thei deuh chuan sangha khawina tur hmun an dap a, sorkarah te pawh dil siamna tur te an dil a. Hei hiepartment lam te pawhin min hriatpuia, min ngaihsaka, sangha dil laihna tur te, a chi siamna tur te hi sorkar kalta pawh khan eng emaw zat min pe a, kan lawm khawp a. Hengah hian lo tang zel sela kan minister hi. Han zin nikhuaa sangha engtik lai pawha lei tur awm hian zoram hi hma kan sawn a ni tih a hriat a, hei hi lawmawm ka ti a.

Sangha phai lam atanga lo kalte hi kan han sawi thin a; ‘a hrisel lo ang; ei chi a ni dawn em ni’ tih te kha a awm a. Helaiyah hian Pu Speaker, han endikna tur te a awm em; laboratory ah a finfiah theih em; a him tawk em tih te hian kan han insawi thaih mai mai nge, a lo him lo reng tih te pawh kan Minister zahawmtak hian a windup ah min hrilh theih chuan a lawmawm khawp ang.

Demand No. 41 - Sericulture Department:

Sericulture ah hian nikum budget aiin nuai 82,40,000/- in a pung a, lawmawm hle mai. Pangang-khawi hi eizawna tha tak a ni tih hi kan la hrechiang lovin ka hria a, Zoram mipuite hian. Kan bial - Khawbung, Vaphai, Khuangleng, Dungleang ah te hma an la ve a, Champhai District-a tuna project kalpuina Khawbung ah tunah hian an tuam mek a, lawmawm ka ti. Hei hi eizawnaa hmangete chuan an zawngchhang em em a ni.

SPEAKER : Khawngaihin, lawk. Chhun chawlh a lo ni a, member hian sawi zo law law rawh se aw? (*House-in a sawi zawh a remti a.*) Aw le, chhunzawm rawh le.

PU RAMTHANMAWIA: Ka lawm e, Pu Speaker. chuvang chuan Sericulture Department hi Zoram mipuite tan eizawna ngelnghet min siamsak thei a nih avangin, department pawh hian bial tinah tan la zel sela. Hei hi eizawna tha a ni tih an hriat loh avanga tilo tam tak an awm a, chung te chu awareness emaw, department te pawh hian la nei sela kan tangkai pui zel tur niin ka hria a ni.

Demand No. 33 & 36 - Land Resources, Soil & Water Conservation; Environment, Forest & Climate Change Department:

He department-pahnihte hi han sawi kawp ta mai ila. Ka sawi duh ber chu, ramngaw humhalh leh water conservation lai hi a ni a, han sawi hran theih lutuk pawh a ni lo a. Tuiren a ngaih zia tun kan dinhmunah kan ram boruakah a chiang reng tawh a. Ruahtui tla tlem zel te, ram chereu zel te hian tuihna humhalh a tul zia leh tuihna tipung thei zawnga

hmalak a tul zia vawiin ah hian ka sawi duh a ni. A hming mai ni lovin nasa leh zuala project lian tham siama hmalak vat a tul a ni. Kan budget Speech ah leh kan Governor thusawiah te pawh helam hawia chhiar tur a awm rih lo a, a pawimawh hle si a. Heng ah hian sorkar hi kan harh thara, helam hawia hma kan lak hi a ngai tak zet tawh a ni. Tun hnaia kum 30 chhung, kum 10 zela chawh ruala ruah tui tlak dan te pawh hi Pu Speaker han tarlang lawk ila -

- 1992 - 2001 chhungin 2559.5 mm;
- 2002 - 2011 chhungin 2492.405 mm;
- 2012 - 2021 chhungin 2090.364 mm.

A awmzia chu, kum 10 kalta ai khan 402.01 mm in ruahtui hi a tlem ta zel a ni. Hei hianin kan ram dinhmun (khawvel pawh a ni ang a) a nghawng avangin, a ngaimawh awm a. Helaiah hian kan rilru pawh ruahtui tla tlem zel hian min nghawng dan tur leh harsatna kan tawh dan tur te hi kan ngaihtuah tlan a ngaiin ka hria a ni.

Tichuan Pu Speaker, Forest Survey of India in ram chhung hmun hrang hranga ram ngaw dinhmun zir chianna thar ber, State Forest Report 2021-in a tarlan danah chuan, 2019 nena khaikhinin kum 2 chhung lekin 186 sq. km lai kan hlauh hman a ni. Kan ramngaw dinhmun te han zirchian hian rin ai hian kan dinhmun a lo tha lo hle a ni. Tuihna kang chho zel chhan leh ruahtui tlak tlem zel chhan ber chu, kan ramngawte tihchereu zel vang a ni tih hi a dik viauin a rinawm a. Kan ram a lo bua zel a; ramngaw chereu chhan hi mihring kan lo pun chhoh zela hmasawna hnathawh avang te, kan lo neih danin a zir loh avang te hi niin a lang a ni.

Kum tina kan lo neih dan te hi kan hria a, tunah hian hei kan mipui ten sum hnar tha nia an hriat sawhthing te kan han chin uar pheii chuan kan ramngaw tha leh hmun tha te hi kan vat chereu nasa em em a; hei hian tuna ka sawi tak tui hna leh khatiang zawng zawng kha hei hian harsatna min rawn siam zel dawn a, ram a tichhe bawk si a. Hei aia eizawna kan mipuite kan kawhhmuh thei lawm ni? Sawhthing ni lo deuh, ram tichereu, tibua lo tur ang chi hi kan ram mipuite hian an hmalakna, eizawna tura hmachawp kan siampui hi a ngai hlein ka hria a. Hmasawna hnathawh te pawh hi environment tichhe lo thei ang bera kan thawh thiam a tul khawp mai. Kan ramngaw leh lui, thing leh mau te chereu chho zel hi kan vei a hun takzetin ka hria a ni. Hengah hian theihtawp kan chhuah loh chuan ruahtui tla tlem telh telh leh tuihna kang chho zel hi kan hmachhawn dawn a ni.

Chuvang chuan hei hi, kei ka bialah ka kal pawhin ka vei a. Tunah hian Pu Speaker, Central scheme JJM atangin solar pump an ti a, khaw tinah min pe a. Mahse, tuihna a kang a, pump tur hi kan neilo tep. Chuvangin, ram pum ang pawha kan vei a ngai takzet a.

Tichuan, kan Minister zahawm tak takte pahnih - Pu Chhanzova leh Pu Thansanga te demand hi kha pass-pui ngei tha ka ti a, ka rawn thlawp a ni. Ka lawm e.

SPEAKER : Tunah chuan chhunchawlh kan hmang ang a, dar 2:00 PM ah kan thukhawm leh dawn nia.

(Recess at 1:06 PM)

2:00 PM

SPEAKER : Discussion kan chhonzawm leh ang a. Tunge han sawi leh ang? Awle. Member zahawm tak Pu T. Lalhlimpuia ilo sawm ang.

PU T. LALHLIMPUA: Pu Speaker, ka lawm e. Vawiinah hian ei leh bar kawnga mipui thleng phak, kan hmabak kengtu department-te changtu Minister - Pu Lalthansanga leh Pu Lalchhanzova te demand kan sawiho leh a ni a, a pawimawh zual hlein ka hria a ni.

A hmasain Pu Speaker, ka'n sawi duh chu, I veilama mite nen hian kan thil thlir dan hi a inang lo hlek hlekin ka hria a, tun tum Session ah hian a lang zual deuhin ka hria a. Chulaia han tarlan ve hlek ka duh chu, mizo mipuite hi chawmhlawm, tanpuingai, thawh chhuah nei lo, puih ngaih ngawih ngawiha kan awm hi kan duh zawk em maw ni aw, tih turin kan sawi fo a. Nimahsela, keini lam, kan House Leader ho hian chhanchhuah an ngaihna lai leh an potential, an theihna te hmu hian kan sawi ngar ngar a. Tichuan, Zoram tana contribution kan neih tur ang te, zoram tana kan theihna leh kan tangkaina te kan sawiho a, khang sawrchhuah kha kan mawhphurhna a nih thu te kan sawi a. Vawiina heng demand-te kan sawi rual hian chung te chu a lang tam hlein ka hria a ni. Chutiang chuan, kan thlir dan azir hian kan sawi te pawh a rawn keng tel bawkin ka hria tih kha, vawiinah hian ka'n tarlang hmasa duh zawk a ni.

Demand No. 36 - Environment, Forest & Climate Change Department:

Vawiin chu mahni bial demand hi han sawi tam deuh hlek ka duh a. Ka bial Buarpui ah Post Tlang a awm a, chu chu tihhmasawna, intihhlumna hmun tha deuh tur a ni a. Kum 1970 chho ah khan hetah hian Indian Army khan station an din a, a hnu kum 1988 vel khan an chhuahsan a. Army in an chhuahsan hnuah VC ten an enkawl a; helipad hmun hlui te, barrack hmun hlui te a awm a. He rohlu humhalh hi a tul tih hriain YMA te'n tunah hian an enkawl a, a ram pass te pawh VC ten YMA hnenah an hlan tawh a. Hemi hmun hi eng emaw park atan te a tha hle mai a. Chutih rual chuan, he hmun ka rawn sawina chhan chu, YMA hian forest reserve-ah an puang a, tunah hian hmun nuam tak mai, ngaw khup mai a ni tawh a. Tin, a chhungah te hian *kacha road* kawng te a la awm a, hrei hi kan Minister hian concrete pavement te hian min han siamsak thei sela chu hmun nuam lutuk tur a ni a. Vawiinah hian chu chu ka'n tarlang duh a ni.

Demand No. 41 - Sericulture Department:

Nichina ka hmaa member zahawm tak takte'n an sawi tawh ang khan, Sericultural amah hian output a awm chuan, a market chu a buai loh avangin mahni bial theuhah MLA chuan a theih ang angin department te tanpuinain hma kan la ve a. Chutah chuan Silk Samagra-II hnuaiyah hian Thuampui-ah *Tashar* leh *Eri* pangngang- khawia hmalak mek a ni a. Kan Minister hian min lo chhinchhiah sak ta sela, hengah hian potential lian tak kan nei a. Tin, a ram te pawh a zau a, area pawh kan nei bawk a, chungah te chuan hmalak hlek a ni a, a department nena kan tan kawp chuan thil awlsam te a ni dawn a. Kan mi leh sate potential hi heta tang hian a contribute theih dawn tih hi ka hmu a, vawiinah hian chu chu ka tarlang duh bawk a ni. Tin, Sertlangpui-ah hian Thingtheihmu-pangngang khawi thin mi pahnih kan nei mek a, an beidawn mai te a hlauhawm em em a. Chu chu kan Minister hriatah pawh ka sawi duh a ni.

Tichuan, sangha dil laihna newborn siamna tur chungchangah vawiinah hian han tarlan

belh leh ka duh chu, kum 2023-24 leh 2024-25 velah ah engemaw zat thlan tura ruahman te pawh a niin ka hria a. Hetah hian central lam portal-a registration te tiin, aadhaar nena in-link vek niin ka hria a. ZPM sorkar hnuah hian a hmaa hma la tha tak takte kha pek tura ruahman zingah an awm em/awm lo em, tih chu vawiinah hian huai takin ka sawi ngam lo nachungin, vawiinah hian a changtu hian hma latha, potential nei te hian he hmun hi thleng ve tawh sela; he tanpuina te hi dawng ve tawh sela, tih hi ka rilruah a lian em em a. Ka bial Lunglei West ah pawh chutiang dawng tura dawmkan hleka, an bana kaih chuan mi-hlawhtling tak tak tur hi kan nei ve a ni. Vawiinah hian heng mite hian an chanvo hi chang thei se ka duh hle mai.

Demand No. 6 - Land Revenue & Settlement Department:

He department hmalaknate hi a chhuanawm hle a. Vawiinah hian kan Minister-ina heng online registration te ngaihtuah chhuaka kan ram chhinchhiah lak a ni tur hi a lawmawm ka ti a.

Hman zan lawk khan kan thenawma meikang avangin office thenkhatte a kang tel a. Chungah chuan document engemaw zat a kang chhia tih kan hria a. Heng online-a registration tih a nih tawh chuan kang thei lo, bo thei tawh lo tur min han ngaihtuah chhuahpui hi vawiinah hian kan Minister hi a chhuanawm ka ti a. Chutih rual chuan, zoramah mimal, chhungkua, NGO leh Biak-In, Kohhrante rambuai leh ram teh that ngai hi a tam em em a. Tunah hian empanelment tih mek a ni a. Khang farm thenkhat ten thawh an duh em em laiin, thenkhat erawh chu ti hlei theilo kan awm mai thei tih thu te hria a ni a. Vawiinah hian kan Minister pawh ka ngen duh chu, hun a rei si lova, heng hunah hian theih tawp chhuaha, hun reilote chhunga tih zawh thuai a duhawm em em mai a, vawiinah hian kan minister pawh chu chu ka ngen duh bawka ni.

Demand No. 17 - Food, Civil Supplies & Consumer Affairs Department:

Kan Minister kaihhraina hnuaiah nikum lamah khan Mizoram in ei leh bar chungchangah, a bik takin buhfai supply chungchangah cyclone *Remal* kan tuar a. Chung karah chuan rel kawng te a chhia a, rei tak tak supply a khaihlak a. Nimahsela, chuti chung chung chuan nikum 2024 khan Mizoram-in harsatna nei lovin kan Minister hian min khai ding a, min khai chhuak a, a chungah pawh lawmthu ka'n sawi bawka ni.

Tichuan, *standing-fee* nikum lamah kan pass kha a ni a. October, 2024 atang khan hman tan ve a lo ni ta a. Vawiina ka'n tarlan duh chu, kan Minister ngei pawh hi hemi duty, anmahni chhiah ngei pekna tur a han pharh ngam hi ropui ka ti a. Chutah chuan kan sum hmuh pawh za zelah 163% lai mai a ni te hi a ropui hle a. Hengah te hian kan ramin hma a sawn dawn niin ka hria a.

Tin, Food, Civil Supplies & Consumer Affairs Department hnuaia Legal Meteorology te pawimawhna hi han tarlan leh hram ka duh a. Tuna kan sorkarin bukna dik kalpui, kawng dik zawh turin leh buhfai buk dika pechhuak turin hma kan la mek a, staff indaih lohna leh hmanrua thil chihrang hrang kha chu awm ve bawka mah sela vawiinah hian kan mamawh em em chu, kan kal dikna tura a sulsutu, a driver ber *Legal Metrology* hi thuam chak a tul hle mai a. Anni kan thuam chak hian hma kan sawn ngei ang tih pawh a rinawm a. Dik zawkin anni department hian hma min lakpui thei ang tih beiseiin ka'n tarlang hram a ni.

Tichuan, Pu Speaker, vawiina kan minister pahnih - Pu B. Lalchhanzova leh Pu

Lalthansanga te demand hi he House-ah hian pass ngei anih theihna turin ka rawn thlawp a ni e. Ka lawm e.

SPEAKER : Awle. Tunah chuan Member zahawm tak Pu Lalrintluanga Sailo ilo sawm ang.

PU LALRINTLUANGA SAILO: Pu Speaker, ka lawm e. Demand-a ka luh hmian, nimin lamah vanduaithlak takin thenawmah kangmei te kan tuar a, chuvang chuan nimin lamah House thutkhawm te pawh duh angin a hun takah kan tan thei lo a, a pawh hle a mai a. Chutih rual chuan kan PWD leh P&E te hnathawhna avangin vawiinah pawh boruak nuam takah Session rorelna tha tak kan nei thei hi, hna thawktute chungah Pu Speaker, MNF Legislature Party Dy. Leader ka nihna angin lawmthu ka sawi duh a. Tukin zing House kan luh dawn thleng khan an la buai a, chhin khat mah chhing lovin hun an hmang a, keini tui taka kan mut theih nan te leh tha taka ro kan rel theih nan kan aiawha hnathawkte hi fak tlak an niin ka hria a, chu chu vawiinah hian kan tarlang hmasa duh a ni.

Demand No. 36 - Environment, Forests & Climate Change Department:

He department-ah hian zawhna tawite, a minister khan min lo chhinchiah sak sela - Mizoram Pollution Control Board hi pangngai takin a function tih ka hria a. Amaherawhchu vawiin thleng hian anni ho hi tihchak an ngai hle a. Nikum aiin kuminah pollution kan ngai pawimawhna a zual zel a. Chuvang chuan, an staff-te tihngheh dan emaw, lak belh dan emaw a awm em tih kha, Minister-in a wind up hunah min hrilh thei se ka duh khawp mai. Hei hi Supreme Court-in a ngaih pawimawh em em thil a ni a, pollution kan ngaih pawimawh avangin vehicles-ah te pawh nasa takin tan kan la a. Helai a enkawltu ber Board-a hi hnathawh theia kan tihchak zel hi a pawimawh hle mai.

A dawt lehah chuan, nichinah member zahawmtakte'n an sawi a. Kei pawh ka bial hi forest area tamna a ni a, chuta kan thing leh mau kan suat tamna ber chu chain saw a ni. A dan kha chhete chu kan neiin ka hria a, hei hian thing feet 5-6 lek a ngil laia awm chuan, a dang kawi mahsela awlsam takin an kit a, a thalai an la a, tiang chuan kan tichereu hneh hle mai te hi pawh ka ti a. Chuvang chuan, he department-ah hian kan 'ecological balance chungchangah pawh nasa takin hmalakna a ni dawn a ni tih kha a langin ka hria a, ka ngai pawimawh khawp mai.

Demand No. 33 - Land Resources, Soil & Water Conservation Department:

Ka bial hi a victim nasa tak kan ni a, 'kan lei ang', tihah khan kan innghat a. Ka hresual anih loh chuan, kan House Leader khan, "lei chiah hi chu kan tum bik lova' a ti a. Loh theihlohnain a nawrthlu a, zankhat chu an zu lei ve a, a ba in.

Ka bialah khuan hmunphiah hi kan ching nasa em em a ni. Tichuan, a sorkar lam pawh ka advice duh chu, hmunphiah hi chu sorkarah hian tih vak a ngai lova. A tira in thupuan a dik loh avangin kut-hnathawktute an buai a ni. Kum hnih chung hei budget vawihnih kan passed pui tawh che u a, in la lei hlei thei lova. 'Kan tum ang' tih hian kum nga a liam dawn emaw ni chu, a tih theih a. Kan dam anih chuan budget vawihnih hi chu kan pass leh ang a, vawithumna hi chu in hmang hman miah dawnlo a nia. Kan sorkar lai pawh khan kan ti a, kan inzir ve a. Forest-ina royalty kan lak loh khan an hlawk em em mai a ni. Anmahnia dah mai a tha ber. Tute emaw RR associate-te kan han mawhpuh a, 'hnar hnuaiyah phatna a bo lo a ni' tih he sorkarah hian a langchiang hlein ka hria. Pu Speaker, i

dinglam leh i veilama mite thil thlir dan a inanglo an ti a; a in anglo ang chu. Thutaka hrin kan ni tlat a ni, keini hi chu. Chuvang chuan, thil inang thei a ni lo tawp tih kha lo zir chiang teh se, i dinglama mite khan.

Demand No. 35 - Fisheries Department:

Fisheries han tih hi chuan, kan House Leader hi alo lang thin a. Pu Speaker, aw puam deuh, thum tak maia Fisheries Department atanga an enkawl tur thu te, sawlaiah hma an lak dan tur thu te a han sawi kha chuan, keini thu taka ding tlatte pawh hi kan awn lek lek a ni. Amaherawhchu, a tak a lo lang zel a, vawiinah hian hma lak a ni em, kan lo judge zel dawn a ni.

Demand No. 41 - Sericulture Department: -

Sericulture-a hmalakna budget-a a lo lang hi lawmawm ka ti a. Ka bial Darlung tlangdung hi he Sericulture-a inngahna thuk tak nei area kan ni a. Kan Minister hi tui-let hnuah a la kal lovin ka hria a. Lo zu tlawh chhuak ve sela, kut hnathawktute thawh nasat ziate. Kei hi chuan pangang hi ka hlau ni lovin, ka hnaih vak ngai lova, thingkung ka lawn pawhin pangang hi chu ka ten deuh avang hian, ka vawna a san leh ka tla sang a ni mai a. Amaherawhchu, bial mipute'n tha an tih chuan zanah kan mu hlei theilo. Pangang hi a mak khawp mai a, ka lo hre ngai lova; an khawi kha ni thumte an lo muhil a; an rawn thanharh tawh hi chuan an ri sung sung mai a, thawm hi an nei lian em em a ni. A enkawltute pawh an pachang hlein ka hre thin a, duat takin an enkawl a. Chutiang karah khuan eizawna mumal tak a lo awm chho zel te hi a tha mang e ka ti a. Kan Minister hi (khulam bial a fan vawikhatna pawh a ni ang a) kal ve hrim hrim sela, a taka hmalatute puih an ngaih nasat zia te, khutiang kara an lo survive dan te pawh min lo hmuh sak ang a, tih te ka ngaihtuahnaah a awm a ni.

Demand No. 33 & 17 - Land Revenue & Settlement leh Food, Civil Supplies & Consumer Affairs Department:

He department te hi a pahnihin ka sawi kawp ang a. Pu B. Lalchhanzova chan demand hi kan ram hnuk khawih thil a ni a. Ka ngaihtuaha ka thinlunga thil lo lut pakhat chu "*thu mak ka sawi nin theih loh chu ZPM consolidation an puan a hi a ni*", tih hi a ni a, thu mak tak a ni. A tangkai zia, crore 20 a hum chungchang te, *year of consolidation* kan puan atanga hmalakna ropui zia te in han sawi a. A ropui ang chu maw le. Mi-rethei mahni thawhchhuah pawh khamlo, sorkar subsidy-a inngat tam takte namen lovin public contribution system hnuahia *National Food Security Act* in a huam loh zawng zawng State ina a pek tur ang chi ah khan in subsidize thei ta lova, a let zahnih tein in tipung a; stamp act chungchangah te, buhfai, petrol leh diesel ah te a lo ni ta a. Hetah hi chuan, tu pa-in emaw a sawi 'veng khata pa buh tak pawhin he department hi enkawl sela, vaibelchhe 20 chu a hum ang chu maw le' a tia. Chuta ka hriatchhuah chu, vawiinniah hian i dinglama mite pawh hi Pu Speaker, mahni bialah han zin han zin sela, kum li ah chuan an insawifiah an insawifiah ang. Kum 51 chhung kan hruaitu hmasate'n kan intodelh loh zia, Aizawl-pa pawh pawisa ngah mah sela, ei leh inah a intodelh loh zia hriain; kan ramah lo neih te a buaithlakin a harsa tawh a, a hlawk tawh si lova; subsidy a inngat tam tak kan hrek a. Hei hi insawi theihna chi ah ka ngai lova. A chhan chu, mi-mirethei leh zual zawkte sawrfuna policy a ni.

Chuvang chuan, helaiyah hi chuan hun a lo kal hretah thiamchan in tum ang a, in sawi in sawi ang a. A hmaa kan minister thenkhatte leh dinglama mite sawi angin, 'chutih laia mi

Liana pawhin a tisuai; Mawia pawhin a in ve tho; Thanga pawhin a in ve tho' an ti leh zuah zuah hlawm ang a. Chuvang chuan, Pu Speaker, mahni mawhphurhna a dah ngam lovin midang hnena ben per hi kan ching laklawh a, i dinglam a mite hian; an beng per zung zung mai a, a buaithlak khawpin ka hria. Hei hi kan chin dan anih chuan, kan ram mipuite hian reiloteah tute nge kan nih; kan enchhina te hi kan enchhin fuh em, tih hi a takin an tilang dawnin ka hria. Chuvang chuan, mawhphurhna sang tak i veilama mite hian kan nei leh dawnin ka hria a, a huphurhawm khawp mai. Vawiinniah hian thumak kan sawi nin theih loh chu he *ZPM policy* in chhuang em em mai hi a ni. Thil chhuan tlak loh hi chu i chhuang lo mai ang u.

Thingtlangah bial fana in zin pawhin, buhfai a let zahnih-a tova in leitirte chaw kha a ni in ei thin ni; in fund atangin in pe phal leh mang bawk si lova. In zin tam tulh tulh ang a, thil tuihnai in hre tulh tulh ang a, harsatna in tawk tulh tulh ang; hei hi a taka lo hre tawh tute kan ni. Chuvang chuan, vawiinniah hian '*kan ti diklo a ni e*' tih hi a thunawn in sak fo tur a ni dawn a ni tih hi ka hria a ni. Vawiinniah hian heng kan demand te hi han in-pass pui loh tawp te kha a gentleman lo deuhin ka hria a, tui vak lo chungin ka support cheu a ni, Pu Speaker.

Chuvang chuan, hei hi thluak tiche hmasain; thluak tiche hmasa lova hmui ti che mai lovin, 'kan ram tana kan inpekna zawn hi i inen ang u' tiin he demand hi ka'n sawi a ni e. Ka lawm e.

SPEAKER : Demand lai chu a tam em em lem lo maw; a tha vek e. Aw le. Tunah chuan Member zahawm tak Pu W. Chhuanawma sawm teh ang.

PU W. CHHUANAWMA: Pu Speaker ka lawm e. Vawiina kan sawiho tur Demand pahnihte hi a phurawm hle mai a. Pu Lalthansanga Demand atangin ka'n tan ang e.

Demand No. 36 - Environment, Forest & Climate Change Department:

Ka hma a sawitu khan zawhna a rawn zawh zeuh kha kei pawh ka ngaihpaawimawh lai tak a ni a. Hemi hnuaiah hian Mizoram Pollution Control Board hi a awm a. Pollution Control Board hnathawh ropui zia ngaihtuahin, ngaihthah a hlawh em em a. Soil ah te, water ah te, air pollution chungchangah te hna nasa takin a thawk thin a ni.

Amaherawhchu, a member-te zingah chairman leh secretary tih loh hi chu Mizoram sorkar hnuaiah hian thawktu mumal an la awm lo hle a ni awm e. Chuvangin, hei hi tihchak ngai tak a ni a. Tunhnaiah environment humhalh kawngah ram leh mipui kan thanharh nasat tak avang leh, court ruling pawh tam tak a awm chhoh tak avangin MPCB mawhphurhna a nasa leh zual a, hnathawh tur tam tak a nei a. Kan hriat angin, NHIDCL te leh midang pawh a hmun lova bawlhhlawh paih avanga chawi turte pawh a tam tham hle awm e. Chutiang te chu anih avangin tihchangtlun a ngai em em a ni.

Kan sorkar hnuaiah hian hna thawkin a kal ve tawk tawk a, a board ruhrel leh thawktute inrelbawlina tur Dan - service rules leh post creation te hi siamfel a la nilo niawm tak a ni a. Dik leh felfai taka hnathawh tur chuan, a thawktute dinhmun hi chin fel a ngai em em a ni. Hetiang taka ngaihthah anih vang hian Supreme Court pawh hianin thawktute lak fel thu ah hun tiam a siam nghe nghe a ni awm e; chu chu 30th April, 2025 thleng khan a ni awm e. Kan thenawm state Meghalaya ah chuan post 119 an siam a, Manipur ah post 152

vel an siam baw k a. Hei hi Mizoram-ah pawh hian tih hmanhmawh a ngai hle awm e. Kan luidungte humhalh a ngai em em a ni.

Entirnan: Sangha mantu reng reng ten hmanrua eng eng emaw, dynamo leh tur te pawhin an hrai thin an ti a. Hengte hi ngun taka ngaihtuahin, a thawktu duty-te daha tih a tha khawp mai. Hemi bultanna atan district tin anmahni area chung theuha lui humhalh tur bik te hi thlang ta ila, DC kaihhruaina hnuaiah EF and CC te, Fisheries Department te, VC leh NGO te nen engtin emaw model village kan han thlang ang deuh hian kan district tinah lui-model te hi thlang ve ta ila. Chutiang chuan system fel takin *model-river* te hi awm ve ta sela a tha awm mang e, te ka ti a.

Demand No. 33 - Land Resources, Soil & Water Conservation Department:

Soil demand-ah hian kan bial bik han sawi lawk ila. Kan District Office building leh staff-quarters te a hlui chhe tawh hle a, a ranglam a repair emaw, sak that emaw a tul takzet a ni. Tin, hna chak zawk leh tha zawka thawh anih theih nan Dist. Hqrs. ah ngei hian Soil Ranger thu sela a tha awm e. Chu chu kan Minister zahawm tak hian min chhinchhiah sak sela. Tin, hna khi a tlem em em mai a, hnathawh tur Soil Deptt. hian an nei lo emaw tih tur hian a awm a. Chuvangin, works min pe tam ve deuh sela, engtin emaw khi lamah khian hmalak dan turte a awm lawm ni ka ti a ni.

Demand No. 35 - Fisheries Department:

Fisheries hi Khawzawl bikah, Khawzawl Fisheries Department ram anga lo pek tawh DC Bungalow leased area a rinluh a nih leh tak si ah chuan, DFDO Office Khawzawl ram tur hmun dangah a ranglama ngaihtuah leh theih ni se a lawmawm khawp ang. Tin, DFDO Office Ni 23.3.2023 a din tawh tun thlenga in-charge ringawt in a la awp hi DFDO puitling ah hlankai ni se. Chu chu kan pianpui district thar Hnahthial leh Saitual te pawh kan sawi kep nghal anih chu.

Demand No. 41 - Sericulture Department:

Sericulture hi Session hmasa ah khan ka sawi tawh a, Sericulture leh Handloom te hi amalgamate ka rawt tawh a, ngaihven a hlawh lo hle a. Hei hi financial implication a awm loh avangin a hautak lo a. Senso ngai pawh ni sela, a tulna a vang zawk hian amalgamate ngei ngei chi zawk a ni a. Chuvangin, he thil hi chu kan ngaihsak a thain ka ring.

Nikum khan Delhi ah Commerce & Industries Secretary nen kan inhmu a, House-a ka sawi kha hmalakna in nei em ka ti a, hmalakna fumfe an neih loh thu min hrilh tlat mai a ni. Chuvangin, Sericulture nena amalgamate tur hian a changtu Minister hian hma min laksak sela, nakinah Commerce & Industries chungchang kan sawi hunah pawh a tul chuan ka sawichhuak leh mai ang.

Tin, kan hmeichhiate puan bih tam ber hi a tlangpuiin a la hi a *acrylic-yarn* 100% chemical a ni a, a hrisel lova, a thalo. Sericulture ah hian *muga silk* kan tih te leh silk chi hrang hrang chin leh zual a tha ka ti a, hengah te pawh hian Handloom leh Sericulture hi awm kawp ngei sela a lawmawm hle ang.

Demand No. 6 - Land Revenue & Settlement Department:

Land Revenue & Settlement han tih hian kan rilrua lang ber thin hi chu, heng ram teh leh ilo vel hi a ni a. Ram tehtu Surveyor te indaihlohna hi a nasa em em a. Khing Khawzawl

te pawh khawpui a lo ni ve tawh a; tin, Khawhai te pawh *Notified town* a ni a, ram teh tur a tam em em mai a. Amaherawhchu, Champhai atanga enkawl kan la nih avangin a buaithlak em em mai a, ram teh tur hian an insen teuh teuh a ngai a. Chutianga insen a ngaih bakah hunrei tak nghah a ngai thin a ni. Khatiang kha awm tawh lo turin tunah ram tehtu tur *Empanelled firm* te siam a lo ni ta hi a lawmawm ka ti em em mai a, a tha ka ti hle a ni.

Tin, kan bial khi district tharlam ngang khi a ni a. District thar 3 ah hian thawktu awm tura sorkarin a tih te chu –

1. ASO (promotion-a fill-up tur) - post 1;
2. Surveyor (pay level 7, contract-a fill-up) - post 1;
3. Surveyor (pay level 6) - post 2;
4. Revenue Assistant;
5. LDC;
6. Peon. Hengte hi khawngaih takin min fill-up sak theih chuan kan lawm khawp ang.

Ticuan, Pu Speaker, vawiina Demand 2-te hi pass ngei tha ka tiin, ka rawt a ni e. Ka lawm e.

SPEAKER : Tunah chuan, member zahawm tak Lt. Col. Clement Lalhmingthanga ilo sawm ang.

LT. COL. CLEMENT LALHMINGTHANGA: Pu Speaker, ka lawm e. Pu Speaker, i thu awih em em si hian thahnemngaihna avangin hun ka lo bawhpelh leh thin a, hun hmasa lamah te. Kei deuh deuh hian hrehawm ka ti a. Chu chu ngaihdam dil pahin kan sawi hmasa duh a ni e.

Pu Speaker, nichina i veilama MLA zahawm tak Dampa Bialtu, a mah pawh ka ngaihsan em em mai leh a chanchin pawh ka sawi ve fo thin khan, *‘thudik tan tute kan ni’* a ti a. Tin, mi inchhiar-zau a ni a, a hmasa lama ‘Habaka Bung 2’ a rawn tih te kha, kan Bible ah chuan a ti miah lo a nia. Mi-inchhiar zau a ni a, khang chanchintha ziahna *Ramayan* leh *Kuran* te pawh a awm a; khatah khan ‘Habaka Bung 2’ chhiar tur te kha a lo awm reng mai thei a nia. Keini ang rual chuan kan hre pha ve miah lova. Chuvangin, ka ngaihsan thu kan sawilang hrim hrim duh a ni e.

A hmasa berahah chuan, kan Minister zahawm tak pahnih - Pu Lalthansanga leh Pu Chhanzova te Demand vawiinah kan khel dawn a, a bul tanna atan Pu Lalthansanga chanah ka’n lut ang a.

Demand No. 36 - Environment, Forests & Climate Change Department:

Mizoram-ah hian mihringte damchhuahna atan hian tui intur, tui tlan tur kan mamawh a; chu tui tlan tur a awm theihna tur chuan kan ramngawte a pawimawh hmasa a. Kan ramngawte hian sik leh sa ah kawngro a su nasa em em a. India ram pumpuia forest cover area hi 25.17% a ni a. Chuti chuan, India rama forest coverage nei zau ber Lakshadweep hian 91.33% a nei a, a pahnihna Mizoram kan ni a, 84.53% forest coverage kan nei a ni. Mahse, chuti chung chuan tuihna siamtu forest kan ti a, tui hnianghnar in tur/tlan tur hi kan nei tam lova. Hei hi nia kan hriata chu, heti zet ramngaw hringdup nei si hian, kan ram tuihna a siama te kawrah a rawn luangthla a, kawr lian zawkah a luang lut a, kawr a lian tual tual a, lui lian zawk phai ramah a zu pawh daih mai a. Tichuan, keimahni tlan theih tawka awm chu kan chenna bul, environment hnaivai kan chhak tlangte, kan bul vel tlangte

atanga tuihna lo chhuaka kha kan tlan phak tawh a nih miau avangin, kan bul hnai forest te kha kan humhalh a ngaiin ka hria a.

Tin, forest kan mamawh kan ti a, thing phun thar te kan han ching a, *Green Mizoram Day* te pawh hlawhtling takin kan hmang thin a. Hetah hian organization chi hrang hrang NGOs, YMA te leh zirlai NCC, NSS thlengin, khawtlang hruaitute leh department hrang hrang in-organize in thing kan phun a, thingphun kan uar a, kan VIP te pawh thing kan phun tir a, thla te kan la a. Kha event kha kan hmang a, a zo mai thin. Mahse, kha event kha khatah khan a tawp lova, kan tan chiaah zawk a ni. Kha kan thing phunte kha enkawl zuia tui pek anih loh chuan a ro a, thing a pun phah thin lo a ni. Chuvangin, he House zahawm tak kaltlangin, 'kan thingphunte hi kan duat chhunzawm a tul hle a ni' tih hi public ah ka han appeal duh a.

Tichuan, Forest Department leh kan Minister ten chak taka hma an lakna zarah *Self-Learning Center*, Zotlang, ka bial chhungah khian an rawn din a, a lawmawm ka ti a. Khilai Zotlang khaw hmunhlui rawn chei thatnan kha centre kha an rawn din mai ni lovin, tunah hian khawl changkang tak tak, tunlai khawl 'State of the Art' kan tih mai hmangin an rawn din a. Khi khi self-learning center anih ang khian kan ramhmul - thing, mau leh thlai a hming pawh kan hriat loh leh engnge a nih tih pawh kan hriat lohte a sample nen a awm vek a. Tin, a hming kan hriat, engnge anih tih kan hriat si loh, a lan dan engtingge tih kan hriat lohte hriatchian theihna turin khilai ah khian a sample nen a awm a, chu chu tlawh tlak a ni a. Tu tan pawh hun remchangah khing te khi a tam thei ang berin lo han tlawh ila a tihlu leh zual dawn a ni.

(Dy. Speaker-in Chair a la a.)

Awle. Pu Dy. Speaker, hun min pek belh pawh ka ring a. Khilaila Self-Learning Center-ah khian thing leh mau, thlai mai piah lamah nungcha - khuai, phengphelep, sava leh ransa chi hrang hrangte pawh anmahni sample hriatthiam theihna turin museum satliah mai nilo khan din a lo ni a, a lawmawm ka ti em em mai a. Kan Minister leh kan deptt. te hmalakna ah lawmthu ka han sawi bawh a ni.

Tichuan nungcha te kan han sawi hian, Pathian hian khawvelah hian mihringte chauh hi cheng turin min dah a ni lo a, nungchate nena nung ho tura tih kan ni. Chuvangin, nungchate hi kan duat ve tur a ni. Mihringte kan dam khawchhuahna tur hian nungchate hi an pawimawh a, savate hian ransate'na theirah an tlan kha hmun dang an vah velnaah te an va ti tiak leh thin a ni. Chu mai piahlamah phengphelep, khuai, sava tih te hian pangpar zu an tlan a, pangpar atang khan a chithlah lehna tur pollen te an pu darh a; pangpar danga an va dah leh khan rah a rawn chhuah thin a. Khang rah a chhuah atang khan mihringte kan dam khawchhuahna tura kan mamawh em em mai thlaira min siamchhuah saktu anih avangin heng - khuai, phengphelep, sava nungcha te hi kan tan an tangkai a. Anmahni hi zuahin kan duat tur a ni tih kha ka sawilang duh bawh a ni.

Demand No. 35 - Fisheries Department:

Fishery hi ka bial Champhai lamah khian eizawna atana hmang chhungkua tamtak an awm a, khilai khi Mizoram chhungah pawh chhungkua sangha khawia ei zawng tamna hmun a ni. Tunah hian kan Fishery Deptt. hmalakna in hatchery te an rawn hawn belh dawn niin ka hria a, hma an la mek niin ka hria a, chuvangin, Hatchery-a hian kan mamawh

a, a chhan chu khilaila chhungkaw tamtak ten a sangha chi, sangha note tun dinhmuna local- a an siamchhuah hi khilai sangha khawitu leh eizawngtu te tana an duhdan 50% pawh a chawm pha lo a ni. Chuti anih avang chuan phai lam atanga a innghah a ngai a, phai Silchar, Karimganj tih vel atanga an rawn thar chhuah ho hi kan lei a ngai a, khang kan leiah khan sangha chi hi a him thin lova, a then phei chu thang ngai reng reng lo te, a chi te pawh a lo origin loh avangin an lo than len hunah chauh a diklo a ni tih a hriat theih si a.

Tichuan, nikum hmasa lamah khan sangha khawitute thil sawi ka hriata chu, nikum hmasa lam December chhung khan sangha chi phai atanga lo chho hi belin an kawt liau liau a. Khang sangha chi supply tu vai 3 pawh khan nuai 10 chuang man an rawn hralh an ti daih mai a. Chuvangin, keimahni ina kan tharchhuah hi a pawimawh a ni.

Tichuan, Sangha dil tanpuina te pawh hi a hun takah hmu thei ila. Sangha dil siam hunlai chu tun thal hun a ni a, fur ruahtui tlak hun atana lo in prepare lawk nan a nih avangin a ni.

Demand No. 17 - Foods, Civil Supply & Consumers Affairs Department:

Pu Dy. Speaker, FCI Godown, Champhai ah weigh-bridge dah a ni a, hei hi kan sorkar atanga kanhmuh chinah a la tha ngai reng reng lo a ni. Session hmasa lamah khan repair turin kan han appeal ve a, amaherawhchu repair tur pawh a awm tawh lo. Truck-in buhfai a rawn phur hian over-all-a a weight kha hriat phawt a ngai a, khata tang khan a bag mal weight chu SK-te mawhpurhna a ni a, chutah retailer te ah a kal leh a. Weigh Bridge a awm chuan Godown-a buhfai rawn lutte dik takin a lo dawn theih dawn avangin, a tangkaiin a pawimawh em em a ni.

Demand No. 6 - Revenue Department:

Revenue Deptt. hian thil pawimawh tak mai a rawn hmuchhuak a, software thar 'e-ram' kan tih tihlawhtling tura surveyor indaihlohna phuhruk nan private farm 13 zet mai a empanelled a, hengte ang pawh hi nakinah kan chhawr theih hunah chuan mipuite'n tangkai takin kan la hmang dawn a ni.

Tichuan, pawimawh ka tih em em mai chu - Revenue Office, New Champhai-a awm hi Keifang Tlang, DC Office awmna complex ah sawn tura ruahmanna a awm a. Hei hi a mipui leh khilai bialte chuan strong takin kan appeal a, kan ngen ngawih ngawih a. A changtu Minister hnenah hian hei hi sawn chhuak reng reng lo turin kan ngen a. Kan ngenngawlina em em pakhat chu, kan Minister hi mirethei leh harsa zawkte ngaihsaktu minister nia kan hriat vang a ni. Khitah Keifang Tlang-a sawn anih chuan, hmun lailia awm thina kha hmun fianrialah an awm dawn tihna a ni. Office dawr duh pawhin lirthei nei ve lote chuan lirthei hire te a ngai dawn a, khita tanga rawn let lehna tur taxi lak tur a awm tawh lo a, a buaithlak hle dawn a ni. Kea let tur chuan khilai kar khi ngaw a ni a, a him lova; hmeichhe tan te phei chuan let leh ngaihna a awm tawh lo a ni; DC office ah riahna tur an ruahman te anih ngawt loh chuan. Tin, khilaila office han dawr tur chuan a tlem berah ₹500-600/- a ngai dawn a, abikin thingtlang atanga office daw tura lo kalte tan phei chuan senso tur a tam em em dawn ni.

Chuvangin, vawiinah hian ka bial mipuite aiawhin an thu leh hla hi keimah kaltlangin ka rawn puang chhuak a. Kan Minister hian ngun takin min han ngaihtuah nawn sak leh turin ka rawn ngen a ni e.

Tichuan, Pu Dy. Speaker, kan Minister zahawm takte pahnih - Pu Lalthansanga leh Pu B. Lalchhanzova te demand hi ka pawmpui a, ka support a ni tih ka rawn lantir e. Ka lawm e.

DEPUTY SPEAKER: Tunah chuan Mamit bialtu, MLA zahawmtak Pu H. Lalzirliana ilo sawm ang.

PU H. LALZIRLIANA: Pu Dy. Speaker, ka lawm e. A Kolasib ang zawngin rilru zau tak nen indawngsawng ila a tha ang e.

Pu Dy. Speaker, vawiinni ah kan Minister zahawm tak tak Pu Lalthansanga leh Pu Lalchhanzova demand sawi theia ka awm hi ka lawm khawp mai. Hei, Pu B. Lalchhanzova demand hi han sawi hmasak ka duh a, deptt. 2 chauh a ni nang a, '*It is a very challenging department*' a niin ka hria a. Hei, amah hi kan sorkar lam hian "*Enteh u! ani saw khawvel sual kalpui tur tur saw!*" tih ang deuhin, own-tax revenue kan lakluhna tur zawng zawng hi amahah hian an bel deuh ni te hian ka hria a, ka khawngaih angreng khawp mai a. Amaherawhchu, michak mi efficient deuh a niin ka hria a, a tlin hle pawhin ka hria a. churang chuan, a demand han sawi hmasak pawh a phuin ka hria a ni.

Demand No. 6 - Land Revenue & Settlement Department:

Hei, kan budget bu-a rawn lang Land Revenue-a kan revenue hmuh tur te, stamp and registration fee a kan hmuhtur te, tax on sale trade atanga kan hmuh tur te hi tam tham khawp mai a. Kan sorkar hian revenue kan hmuhna tur hi Pu Chhanzova Deptt. ah hian a pem buh bel nasa riau mai a, hei hi han sawipui ka duh a ni.

Land Revenue-ah hian kan sawi ang khan, development thawh dawn chuan *Land Bank* hi a ngai a ni. Central atanga development infrastructure rawn bun tur pawhin Land Bank kan neih a ngai, anih loh chuan a theih loh. Hei, *e-RAM* te hi thil tha tak niin ka hria a. Heng thil te hi *good-initiative* a ni a, lawmawm ka ti a, Minister kha kan fak duh a ni. Revenue district office Mamit-ah a awm ve a. Term hmasa atang pawhin kan sawi tawh thin kan office khu a tawih em em a ni. Tui-put avangin instrument lei thar te, computer te pawh a chhe lehzal a. Hei hi kan minister hian a tlawh tawh pawhin ka hria a, ani pawhin a dinhmun chiang tak a hriat ka ring a. Heng te hi khawngaih takin kan sorkar chak tak hian min han tihlawhtlin sak se.

Demand No. 17 - Food, Civil Supplies & Consumers Affairs:

Hmanni khan ka sawi tawh a petrol/diesel hi 1.9.2024 atang khan kan tax rate, VAT tihsan a ni a. Petrol hi 16.36% atangin 18% ah a jump a, chu chu a average lakin ₹5/- ang a ni ta a ni. Tin, HSD hi existing tax rate 5.23% atang khan 10% ah a jump a, a average lakin ₹7/- a lo ni ta a ni. State hrang hrangte han khaikhin hian Mizoram leh Tripura phei chu petrol rate revised hnu ah hian ₹1.41/-in kan tam ta a; a hmaa tlem reng thin kha; diesel hi ₹1.33-in. Meghalaya, Assam nena inrina Khanapara Jorabat belt-ah phei chuan Mizoram nena kan rate danglamna hi petrol-ah ₹3.15 leh diesel-ah hian pawisa 73 a ni. Khanapara Jorabat belt khu motor-a kan zin thin chuan kan hria ang a, veilamah kalin Assam, dinglam Meghalaya. Khumi kar kawng khu a laiah a tla ta a, kawng leh kawng inkarah khuan rate hi a danglam em em a ni. 'Engati nge khulaiah khuan petrol pump leh zu-dawr a intlar thup?' kan tih chuan, *tax-difference* vang a ni.

Churangin, vawiinah hian, ni e; a situation-in a demand avangin revenue kan earn a ngai

a, tin mipuite pawhin ‘kan afford tawh alawm’ kan ti a ni thei a. Amaherawhchu, kan sawi bera chu, hmanni *General Discussion*-a ka sawi tawh ang khan, vawikhat jump-a han tihah chuan a sang lutuk deuh lo maw, tih kha ka rawn din chhuah chhan a ni a. Vawikhata ₹5-7/- em em hi chu hmundangah pawh an practice ngai loh, ‘mipuite tan a burden lutuk em’ tih te hi ennawn leh atan a tha em tih te a ni.

Mi tam tak chuan, ‘scooty em pawh ka nei lova, pick-up pawh ka nei lova; lo sang mai mai ang hmiang, engmah min effect ve hlei nem’ kan ti a ni mai thei. Amaherawhchu, a effect tur tam zawk chu heng neilo-ho hi kan ni - mirethei ho, sumo-a chuan ngaite; nitin alu dal lei ngaite. Heng zawng zawng lo pung tur hi general-in mipui a effect em em a ni. Chuvang chuan, kan sorkar hian hei aia hniam deuh te hian revise dan te hi a awm em tih te ka’n rawn sawi duh a ni.

Tichuan, buhfai pawh 100% teh meuh maiin an pung a, heng te hi COVID laia kan buhfai supply chungchang te kha mitthla ah a lo lang ur ur mai a. Keini bialte phei chu zankhat lock-down anih tawh te phei chuan, ‘ka pu, eitur kan nei tawh lo’ ti kha kan tam riau mai a ni. Chuvang chuan, free ration te pawh kha tih a han ngai a, rel wagon-a buhfai rawn thleng unload tu tur awm lo, khulai Bairabi YMA han request ngaih chang te pawh kha a awm a. Engpawh ni sela, hengte pawh hi mipui lamin kan tlin anih chuan, state revenue earn-na tur a ni a, a thaah te pawh han ngaihsak ta ila.

Tin, Mizoram-ah hei oil depot mamawhna a sang a, kan sawi thin a. Oil Industry lam emaw, company lam emaw pawh hian rawn din hi an duh reng, amaherawhchu kan buaina ni fo thin chu *Land Bank*-ah a ni; ram a awm lo. Aizawl leh a chhehvel te, Bairabi phaizawl area te mi hausa ram deuh vek mai a lo ni tawh si avangin, ram hi a buaithlak em em mai a ni. Tunah hian kan Minister chak takin na takin a bawhzui niin ka’n hria a, a lawmawm a. Hei hi tihhlawhtlin thuai theih ni sela a lawmawm hle ang.

Tin, Mualkhang LPG bottling plant hian OISD norms a meet loh avangin thawk khat lai khan khar a ni a. Chutiang chuan, eng eng emaw hnuah ram te leih belha han tih hnuah khan tunah hian a function leh tawhin ka hria a. Han tih zauh leh han renovate te pawh a ni a, upgradation te pawh an han ti a, a lawmawm hle a ni.

Tin, kan sawi duh chu, Legal Meteorology chungchang hi. ‘*Bukna diklo chu Lalpa mit hmuha thil tenawm a ni*’ tih a ni a; ₹1/- hu ka lei chuan, ₹1 value kha ka hmu tur a ni; chu chu kan nunpui tur a ni a. Vawiinniah hian Legal Meteorology hi a pawimawhna ang tak hian kan la function lo ni hian ka hria a. Mamit District-ah khuan Legal Metrology Office a awm a, tunah hian Grade-IV hovin an thu ve a, an hawng ve tek tek a ni. Aizawl atangin hmui a la ni a; heng district tinah te hi chuan mumal deuh hleka, Inspector te nena han function te hi a tha lawm ni ka ti a. Petrol pump te pawh a lo tam chho a, tin eng eng emaw sumdawngte pawh an lo pung zel a. Hengah te hian mipuite tana rawngbawltu pawimawh tak he department hnuai a awm anih avangin, chung te chu han ennawn ni se la a tha lawm ni, tih te ka ngaihtuah a ni.

Demand No. 36 - Environment, Forest & Climate Change Department:

Keini bialah hian Dampa Tiger Reserved Sanctuary kan nei a, khulai Dampa-Teirei ah khuan. Tiger awmna anih avangin central pawhin an rawn ngaipawimawh thin khawp mai a, amaherawhchu, thawm that a ngai khawp mai. Tin, Wildlife Guard kan te pawhin hlawh

an hmu tha hleihthei lova, khawngaihin min han enfiah sak sela. Tin, BRTF te hian kawng tha deuhin min siam sak tawh a, lei pahnih RCC bridge approach khumi reserved chhung han khawih ngai si ah khuan NOC an la hmu hlei thei lo a ni. Hei hi khawngaihin min lo hriat sak sela. Zau han laih pawh ngai lova, motor lian kual theihna tura siam kha a ni mai a. Heng hi min han tihsak thuai se kan duh a.

Tin, forest clearance avang hian project lian deuh deuh ka bialah pahnih-pathum, NIT Lengpui te khaihlak vawiin thlengin kan la nei a. Tin, 132 kV line Bairabi - West Phaileng via Mamit laia forest clearance erawh chu kan pe tawh a; penalty pek tura an rawn tih leh kan pek theih loh kha khawngaih takin department lam leh kan House Leader zahawm tak pawh ka sawipui tawh a, ani pawhin min hriatsak a. Hei hi khulai tlangdungte an nghahfak em em a ni tih kha min hriatsak ka duh a. Tin, NH-44A thuanthutna chhan pawh kha chutiang chu a ni. Tunah hian NH-06, Bairabi - Mamit Highway thar kan han nei leh dawn a, hengah te pawh hian thil tul a ni a.

Demand No. 33 - Land Resources, Soil & Water Conservation Department:

Pu Dy. Speaker, kuhva, rubber, hmunphiah te hi he department hnuai awm an ni a. kan district te, kan khawthlang leh kan bial te kan ngah ve lam tak a ni. Kuhva te pawh kan ngah; rubber te pawh kan ngah a ni. Kan district office ber pawh khu kan pachhe em em mai a, thawktu pawh awm mumal lo kan ni a. Khung te khu min han tihchak sak ula ka ti a ni.

Tin, kan appeal duh chu - hmunphiah hringa kan policy hi nakum atang chuan min thlak sak ula; a ro ni lovin, a hring; a man chu engzah pawh ni sela. Khatiang zawnga lei dan kha min ngaihtuah pui ula tih kha kan sorkar chak tak hi kan bial mite tan kan ngensak a ni.

Demand No. 35 - Fisheries Department:

Fisheries ah hian, hi hei sangha hi a tui a; (**Dy. Speaker:** A zawh theih dawn tawh em aw) a tha a. Kan bialah pheih khu chuan an zalen em em a, an leng del del a ni. Khulama in rawn kal chuan Tut Lei-ah te khuan dingin, a hnuai kha han en ula, sangha hi an tleh del del mai a. Nakinah a man runpui te pawh kan la rawn siam leh dawn a ni. Engati nge Bengali hi an fin em em bik, kan tih chuan, sangha an ei tam a ni. Chuvang chuan, Fisheries Deptt. lam hian sangha chi tha min pe sela, kan lo vulh ve ang e; kumin ah te pawh tiin ka'n request a ni e.

Pu Dy. Speaker, kan Minister zahawm tak takte pahnih demand hi ka pawm a, ka rawn thlawp a ni e. Ka lawm e.

DEPUTY SPEAKER: Pu Zira hi Kolasib makpa a ni a, ka duhsak deuh bik emaw kha in ti ang e.

Tunah sawi leh turin Lunglei North bialtu MLA zahawm tak Pu V. Malsawmtluanga ilo sawm ang.

PU V. MALSAWMTLUANGA: Pu Dy. Speaker, ka lawm e. Kan Minister Pu Lalthansanga leh Pu B. Lalchhanzova te demand han sawi hi chakawm hle mai a. A hmasa berah chuan: -

Demand No. 33 - Land Resources, Soil & Water Conservation Department:

Hei hi kan hriat angin ZPM sorkar chuan kuthnathawktute chawikan/dawmkana leirem an rah theihna tur kawng hrang hrangin ruahmanna a sam a. Chutah chuan he department hi a pawimawh em em a. Chutiang chuan, kan minister-in kawng hrang hrangin hma a la mek zel a. Kum 2024-2025 Financial Year ah pawh RKVY Scheme kaltlangin Soil & Water Conservation lamah kawng hrang hrang - check dam siam te, terrace te, water harvesting tank siam te tiang khan hma a la chho mek zel a. An hmalakna hi a hlu hle a, heng an hmalakna ah hian ₹222.61 lakh lai mai loneitute tan a tangkai thei ang bera hman a ni nghe nghe a ni.

Tin, kan hriat angin lei chunglang kal ral tur ven hi he department ngaih pawimawh tak a ni a, khawvel hian a buaipui mek a. Kum 2014 atang khan December Ni 5 apiang hian *World Soil Day* hman a ni nghe nghe a. Nikum December Ni 5 - *World Soil Day* thupui chu '*Caring for Soils Measure, Monitor, Manage*' tih a ni a.

Tin, Food & Agriculture Organisation (FAO) chhut danah phei chuan second 5 tin hian leichung lang hanna football field tiat vel hi luangral renga chhut a ni a. Heng te avang hian he department pawh hian lei chunglang hanna luangral tur venna kawngah hian tun aiin tan han la zual leh deuh sela. Tin, heng te avang hian thlai thar pawh a tlak hniam phah hlea hriat a ni. Tin, lawmthu Minister chungah ka han sawi duh nghal bawh a - hei Soil Department kaltlangin Ngopui-zau link road, Mausen kawng km 6 lai mai min laih sak mek a, nuai 67.6 mai min dah sak hi a chungah lawmthu ka sawi a ni.

Demand No. 35 - Fisheries Department:

Kum 2024-2025 Financial Year chhungin development hrang hrang hmuh tur a takin a awm a. State-in sangha kan tharchhuah te a pun zel theihna turin kumin financial year chhung ringawt pawh hian sangha dil a thar hlak hectare 125.5 lai siam belh a ni a. Chu chang a ni lova, hatchery - sangha chi tharchhuahna kawngah te pawh kawng hrang hrangin hmalak a ni a. Hatchery 10 bakah tunah 3 siam belh leh tum a ni te hi a ropui hle a. Sanghaa kan intodelh loh zia te chu sawi tam ngai lovin ka hria a, Pu Dy. Speaker.

Tin, Haulawng-ah Huisih-zau te, Chite-zau te kan nei a. Tin, Ramlaitui ah Thingva-zau te, Zotuitlang lamah Damte-zau leh Kaikuanglui-zau te hian chhungkaw eng emaw zatin sangha dil hmangin eizawna tunah an kalpui ve mek a. Hengah hian mamawh hrang hrang an nei a - tuikawng siamthat te, tuikhuahna tur laih that te, tui lakna tur leh sangha chi tha te pawh an mamawh a ni. Hengte hi kan Minister-in khawngaihin min lo chhinchhiah sak te.

Lawmawm ka tih em em chu, a bik takin sangha lama eizawngte tan he sorkar hi a thlamuan thlak hle a. Nikum 2024 *Cyclone Remal* avang khan sangha dil eng emaw zat a chhia a, chungah chuan hectare 301 chuang siamthat a ni a. NDRF kaltlangin nuai 54.47 lai mai chhungkaw 334 hnenah tanpuina sem a ni te hi, he sorkar hi thlamuanpui tham a niin ka hria a ni.

Demand No. 36 - Environment, Forests & Climate Change Department:

Kan hriat angin, kan NGO ten tlawmngaiin leh hlawh beisei lovin lui humhalhin ke an pen mek zel a. Heng NGO-te tan la beitham viau mahse he sorkar hian a ngaih pawimawh em avang hian 2024-2025 tun Supplementary Demand-ah khan cheng nuai 4 lai mai (a zawng zawng chu tanpuina pe thei lo mahse) a lo sanction te hi a hlu hlein ka hria a. Tin, kumin

2025-2026 budget ah cheng nuai 5 lai mai dah a ni te hi Pu Dy. Speaker, heng kan NGO tlawmngai pawl te hi he sorkar hian a hre reng a ni tih kha ka han sawi lang duh a ni. Tin, a aia tam zawk te pawh engtik ni ah emaw chuan kan la dah theih ngei ka ring a ni.

Tin, wood-based industries ah hian kan han lut zawk ang a. Kan hriat angin wood-based industry ah hian *primary* leh *secondary* activities a awm a. Kan ram chhunga thing leh mau, ramngaw hausakna kan haichhuahna tur te a ni a. Chu chang a ni lova, mimalin thing te, teak te an phun a, chutiang chuan heng wood-based industry te kaltlang hian sum leh paiah chantir mek a ni a. Pu Dy. Speaker, primary activities piaah lamah hian secondary activities - furniture siamchhuahna kawngah hian ka thalaipuite leh hetiang lam kawnga ke pen mekte tan la leh zual turin ka han fuih a. Chutih rual chuan, wood-based industry license, permission nei tur hian a process hi a buaithlak em em mai a, department pahnih Industries leh Forest ah file hrang hrang kalpui a ngai thin a. Chutiang chuan a diltute pawh hian a kum tel teh meuh hmu lovin an awm thin a ni. Heng te pawh hi awlsam zawka kalpui theih dan awm se tih kha, he House zahawm takah hian ka'n sawi duh a ni.

Demand No. 6 - Land Revenue & Settlement Department:

Kan hriat angin Surveyor indaihlohna a nasa em em a, tunah empaneled firm 13 lai kalpui an ni te hi, kan minister hian a ngaihna a hre hlein ka hria a. Hei hi mipuite tan thil hlu tak a ni a, sawilan loh theih a ni lova. Tin, LSC siam chungchangah hian Pu Dy. Speaker, kan ngaihtuahna kan hman-zau a tul hle in ka hria a. Periodic pass te an han nei a, chutah chuan in leh lo ngeinghet tak neiin kan lo inbengbel tawh a ni. Tin, Mizo chu mi-tlawmngai, midangte tana luangchhuak hnam kan ni a. Chumi kawngah chuan kawng laih te a lo ngai a, khawtlang tan ram eng emaw zat an lo chhuah tawh thin a ni. Ka bial chhung kan vengah ngei pawh chutiang chuan tunah hian periodic pass nei LSC ah leh tum mek an awm a. Khawtlang tan village council ten an lo dil a, ram eng emaw zat an lo chhuah tawh a ni. Tichuan tuna an luahlum lai mek an LSC dawn a, chutah chuan 40% sacrifice-in land bankah te dah a lo ngai a. Hetiang anga Mizoram pum kan han inhrut rual pawpa hi ngaihtuahna zau kan sen a va tul em tih hi, he House zahawm takah hian ka sawi duh bawk a ni.

Tin, Demand No. 17 - Food, Civil Supplies & Consumers Affairs Department:

A hmasa berah chuan, kan Minister chungah lawmthu ka sawi duh a. Chhipphir godown fencing min siam sak dawn a, a chungah Chhipphir mipuite leh bial aiawhin lawmthu ka sawi a ni. Pu Dy. Speaker, buhfai buk dik tura sorkar hmalaknain godown tinah digital weighing scale dah a ni hi a hlu hle a. Chu chang a ni lo a, retailer-te lawmman October, 2024 atang khan tihsan a lo ni ta a, hei hian retailer-te a tiphur em em a. Kan sorkar hian tan theih tawp a chhuah zel a, mipuite tan tuna retailer-te hlawh han pun a ni te hi sorkar hmasa tih theih loh kha huaisen takin kan Minister-in hma a la chho hi a lawmawm hlein ka hria a ni. Kan hriat theuh ang khan retailer-te sorkar kum tirah kan inthlak fo thin kha a ni a, term tawp hmian; keini sorkarah chuan khatieng hriat tur a awmlo hi a lawmawm hlein ka hria a ni.

Tin, thil pakhat - retailer-te an han inthlak a, dawr sawn te a lo ngai a, luah man tharte an inzawn chawp a lo ngai a. Henga rilrua awm pakhat chu - permanent fair-price shop hi a hranpa tawpin sorkar hian siam ta ila; tute pawh an term lo tawp se, khang te kha luah chhunzawm ni ta se tih te kha ka han sawi duh hrim hrim a ni.

Awle Pu Dy. Speaker, sawi tur tam tak chu la nei mah ila, heng kan Minister pahnihte

demand hi tha ka ti a, ka pawmpui a; pass ngei turin ka ngenpui bawk a ni.

DEPUTY SPEAKER: Tunah West Tuipui bialtu kan MLA zahawm tak Pi Prova Chakma ilo sawm ang.

PI PROVA CHAKMA: Pu Dy. Speaker, ka lawm e. Hei vawiinniah hian a tel lova kan nung theiloh department pawimawh tak takte demand kan han sawiho a ni a, a lawmawm hle mai a. A hmasa berah chuan -

Demand No. 17 - Food, Civil Supplies & Consumer Affairs Department:

Ka bialah hian godown sak mek a ni a; chuang chuan, a hmasain lawmthu ka sawi a. Kan minister leh department chungah pawh lawmthu ka sawi duh a. Chutih rual chuan lawmthu lo deuh te pawh hi a awm ve a. Ration buhfai man tihsan chungchang hi, kan bial chu mirethei awm khawmte kan ni tlangpui a, kg-ah ₹15/- pawha an khul theih loh lain ₹30/- a lo ni ta duai hi ka tawrhpuia. Hei hi hmannah pawh khan ka sawi tawh a, han ngaihtuah nawn leh se. Keimahni ang ti mai ang, sorkar-hnathawkte chuan an mamawh lo mai thei; amaherawhchu, kut-hnathawktute tan hi ngai pawimawhin hei hi han ngaihtuah nawn se ka duh a.

Tin, ka bialah monsoon stock hmun kan lo neih tawh thinna Khojoisuri leh Masuri-ah tunah hian kan nei tawh lova. Heta kan stock theih nan Tlabung mai nilovin godown pahnih kan la mamawh leh tih kha he demand sawi pahin ka rawn ngen bawk a; kan minister zahawm takin min lo chhinchhiah sak sela.

Demand No. 6 - Land Revenue & Settlement Department:

Pu Dy. Speaker, pass chungchang hi ka hmaah MLA zahawm tak takte khan an lo sawi tawh a. House pass te hi cadastral survey hmangin LSC ah hian a theih chuan revenue kha sorkar-ah chhunluh theih a ni; khata tang khan sum kan hmu thei tih kha. Chuang chuan, house-pass te pawh hi a bik takin thingtlangah hian upgrade sak theih ni se.

Demand No. 35 - Fisheries Department:

Pu Dy. Speaker, khawpuiah te chuan sangha-chi hi an hmu zung zung a. Amaherawhchu, keimahni lamah chuan sangha chi mamawhte list te pe tura an tih angin pek a ni a, amaherawhchu, kan dawng ve chuang hlei lo a, thingtlang lam a thleng pha lo a, kawng chhia leh eng emaw chhuanlamin. Tum tak tak se chuan, a thleng theih tho a. Kan Minister zahawm tak ka ngen duh chu, sangha-chi tha hi kan bial pawh hian kan duh ve a ni. Tuipui-sangha chu kan nei a, kan intodelh tawk lo a. A chhan nia ka hriat chu - fisheries hi mi tam tak hian eizawna atan tunah hian kan hmang tawh a, department lamin sangha-chi an rawn sem turah te kan lo innghat ve a ni. Amaherawhchu, kan nghah chhung kha a rei thin a, an mangangin ka hnenah lo kalin, “Madam, engatinge tun thleng hian kan la hmuh ve loh; midang chuan an hmu tawh si” te an rawn ti a ni. Pu Dy. Speaker, department lam hian hmun dangah sangha-chi an thlen theih chuan, keini lam pawh hi hma min laksak ve se tiin ka ngen duh bawk a.

Demand No. 41 - Sericulture Department:

Sericulture lam hi chu kan bialah an awm vak lo a, kan la aware te pawh a ni ang a. Chuang chuan, ka sawi lo mai ang a.

Demand No. 5 - Environment, Forests & Climate Change Department:

Heta sawi ka duh chu, kum tin hian keimahni chakma chauh ni lo mizote pawh anni a; lo hi an vat a, lo an vahah khan mahni area chin kha vah ni sela. A chhan chu lo an hal khan a piahlam, an vah bak ram te kha a kang tel thin a, a paw e mem mai a. hei hi department lam atang hian strict deuhin order te pawh chhuah ni se. Khang khan kan environment te a tichhia a; chumi kan ven theihhna tur chuan department lam hian strict deuhin hma la sela.

Shifting Cultivation hi (a bik takin keimahni chakma bikah) kan uar a; *shifting cultivation* ni lo *terrace-firming* lam hi department hian min han ngaihtuahpui theih chuan mau leh thingte hi kan preserve thei dawn a ni. Shifting-cultivation a nih kha chuan ram, hmun hrang hrangah kan hal a. Chuvangin, terrace farming hi kalpui ni se kan bialah hi chuan, tha ka ti a, chu chu ka ngen duh bawka a ni.

Tichuan, Forest Department lamah hian thil pakhat - kan bialah Khawthlang Tuipui Lei dawh mek a ni a, kan lawm em em a. Chumi rual chuan Pu Dy. Speaker, lei dawhna atan balu tam tham kan mamawh a, amaherawhchu, Forest Department lam hian an khap tlat a, balu lak an phal lova. A tam zawkte chu kut-hnathawktute, balu phura eizawng mi an ni a. Tin, balu a awm loh chuan lei dawh kha kan chhunzawm theihloh avangin department lam hian tlemin han thlah zalen deuh se tiin ka ngen duh bawka a.

Tin, kum tina Thing-phun (plantation of trees) hi kan uar deuh deuh loh chuan kan tuihna te a lo kang chat tan a. A bikin lui-hnarah hian tui siam thei ang chi thing phun lamah te hian forest reserve lam hian hma han la se, tih ka ngen duh bawka a. Keini bialah pawh hian thingphun hi kan uar em em rualin, enkawlzui hi a awm lem lova chu chu department lam atang hian awareness campaign hi min neihpui leh zual ula kan duh hle mai.

Demand No. 33 - Land Resources, Soil & Water Conservation Department:

Hetah hian *hmunphiah* hi a rawn lang leh tlat mai a. Hmunphiah hi kan bialah chuan, dik chiah chuan a chingtute hi an beidawng tawh a ni; an beidawngna hi term hmasaah te pawh khan ka sawi zing lutuk. A tlem berah 100 te kha kan hralh thin a. Mahse, tunah hian empaneled buyer pakhat chiah hian a lei a, chu pawh chu pakhat ₹60/- chauhin a lei a ni. A hring pawh hi sorkar hian min lei sak turin ka ngen a. A hringa dahna tur Tipperaghat-ah hian pakhat kan nei a, mahse chu chu kan indaih lo a. A stock-na tur godown hi kan indaih loh avangin a hringa lei kha min pawmpui turin ka'n ngen bawka a.

Tichuan, a tlangpuiin kan Minister zahawmtak tak Pu Lalthansanga leh Pu B. Lalchhanzova te'na Demand an putlul hi a tha ka ti a, ka pawmpui a. Amaherawhchu, kan bial ang, thingtlang bialah pawh hian rualkhai takin min han pe ve se kan ti a ni. Ka lawm e.

DEPUTY SPEAKER: Tunah chuan Aizawl South-III Bialtu, MLA zahawmtak Pi Baryl Vanneihsangilo sawm ang.

PI BARYL VANNEIHSANGI: Pu Dy. Speaker, ka lawm e. Member zahawmtak Pu Dawngtea ka va en a, a lo phun nasa khawp mai a; hemi zawhah chuan a chang ve tawh ang chu maw. Demand-ah lut nghal mai ila; kan Minister zahawmtak Pu B. Lalchhanzova Demand atang hian bul tan ka duh a.

Demand No. 6 - Land Revenue & Settlement Department:

Han sawilan ka duh chu, Aizawl Revenue District bifurcation chungchang a ni a. Ka

hriatsual loh chuan, kum 2018-ah khan approve tawh a ni a amaherawhchu kum 6-7 dawn hnuah a taka hman a ni a, Minister chak tak inpekna leh ngaihtuahna a sen zarah te pawh ti ila ka sawisualin ka ring lova. A changtu Minister a fakawm khawp mai a, a takin kan han kalpui ta pawh hi a directorate tan pawh hianin thawven huaina tham niin ka hria a. Ram teh leh khang hrang hranga an buaina record vawn thin administration leh direction pek an ngaihtuah hman lo thin avanga tang, khawl tam tak awm thina te kha a chhawk dawn niin ka hria a. Tin, tuna an thlir danah Chanmari atanga a chhim lam zawng MINECO-a Aizawl South office awm te; tin, a hmar lam zawng DLAO office Ramhlun-a awm te a ni a. Hetiang anih hi chuan a department te pawh mipui tana chak leh sawt leh zualin hna an thawk thei dawn niin a lang a, a lawmawm ka ti khawp mai a.

Tin, kan member-puite'n an sawi nasa tawh, *Empanelment of Survey Firms* kan sawi hi (sawi mawilo nilo sela) campaign lai te pawh khan kan lo nghakhlel em em tawh a, sawi pawh kan sawi lang nasa a. Mipui tana awlsamna hi department-in an tih tur leh an thawh leh thawh loh enchhina leh tehna te pawh a ni ve bawh avangin, kan au-hla a kan lo sawi ang ngeia tih hlawhtlin a ni hi a lawmawm ka ti tak zet zet a. Tin, hei hian a lantir chu – '*minimum government, mahse maximum governance*' kan tih kha a ni a, a phawkchhuak tha hlein ka hria a. Tha takin, heng kan empanelment titu firm-te pawh hian rintlak takin kalpui sela, hemi ram teh kawngah te, in leh lo teh fel kawngah te mipuiin lo awlsam phah se ka duh tak zet zet a. A firm leh nangmah kaltlangin duhsakna tih tak meuh meuhin ka'n hlan a ni.

Pu Dy. Speaker, hetiang a lo nih takah chuan, hna thawk nasa turin kan beisei si a, a department hi kan thuam chaka an mamawhte kan ngaihtuah sak zel loh kha chuan, 'thawk rawh u' han intih ngawt kha a theih bik lova, GPS kaltlang te, station atang tea hnathawk tur an ni tawh a. Software changtlung leh changkang tak mahse, a man lam tlawm lutuk si lo te pawh an mamawh dawn niin a hriat a. Khang zawng zawngah te khan he department tan hian an hnathawh tur te hre reengin kan rilru kan ngaihtuahna te seng ta ila; an tan, an dil ang te, an mamawh ang te thuam zel ni sela. Tin, kan minister hi hetiang kawngah hian ka ring tawh em em a, a department hi a ngaihtuah ang tih hi ring tlat a. Bengvar te pawh chhuahpui tlang zel ila a thain ka hria a ni.

Tin, Pu Dy. Speaker, SVAMITVA chungchang hi sawilan ka duh a; a lampum hi a thui deuh hlek a, *Svमितva* tiin lam ta zel mai ila. Kan bial hi kan vannei khawp a, Aizawl District-a awm mahse municipal area-ah chuan veng 3 chauh an awm a; a bak khaw 23 hi VC hnuai a awm kan ni a. Chutah chuan, pilot project-ah min hmang a, khaw 10-ah khan Svमितva scheme hi an rawn kalpui tawh a ni. Property Card, LSC nen '*a value a inhen e*' kan tih property card te pawh pekchhuah an ni a; drone kaltlang te paw'n survey te an rawn nei tawh a ni. Chutiang chuan a changtu minister leh an department te pawhin min duhsak em em a, an chungah pawh lawmthu ka'n sawi a.

Survey leh drone survey kha chu a kal zel dawn a, *resurvey* hi chu kan mamawh leh dawn a. Ka hriatsual loh chuan, a department-ah pawh hian kan bial atangin Sialsuk te hianin an rawn thlen tawhin ka hria a, khaw dang pawhin an rawn thlen tawh maithei a. Chulaiah chuan resurvey kan tih hunah pawh hian a pilot project atan min han hmang leh thei sela, a bul tan nan priority min han pe leh thei se kan duh khawp mai a; Pu Dy. Speaker, nangmah kaltlangin a changtu minister pawh ka han ngen nghal ni rawh se.

Demand No. 17 - Food, Civil Supplies & Consumer Affairs Department:

Kan Minister paw'n wawi tam tak a dinpui tawh a, *Zawhna leh Chhanna*-ah pawh wawi tam tak kan inzawtin kan inchhang tawh a. Amaherawhchu, mak ve deuh mai chu, 'kan hriat duh chin hi kan hre thei em em a, kan hriat duh loh chin erawh hi chu kan hre thei lova' tih te pawh a awm a. Helaiiah hian a technical leh a percentage lam te sawi ka tum vak lova, Pu Dy. Speaker, han sawi ka duha chu - pi leh pute atangin Mizo te hi intodelh tura thahnemngai taka thawk thin kan ni a, buh leh balah a bik takin theih tawp kan chhuah a, tanpui ngai leh chhawmdawl ngaia awm lovin, tanpui leh chhawmdawl ngai an awm anih chuan, a petu leh tanpuitu dinhmuna din kan tum thin a, chu chu kan hnam kalphung tlawmngaihna nen pawh a intluk tlang a ni.

Chutiang chu anih laiin, tunah erawh chuan *pek* leh *sem* ah te kan innghat chho ta deuh a. Tin, mihring kan lo inang lova, dinhmuna vangduaina te, khuarel chhiatna te tawh theih a ni a; tin, khawsak teh kawngah pawh tlema harsa deuh zawk te chu awm theih a ni a. Chutiangin heng AAY kan tih te pawh hi a percentage te pawh an la tam lo hle mai a, chumi anih karah chuan kan zavai mai hian intodelh lam ai hian midanga va in-depend tumna hi kan la nei em aw ka ti a, kan moral te pawh hi siamthat a tul hlein ka hria a. Sorkar hian a tih tur hi huaisen takin ti sela, mipui chuan kan ei leh bar zawna kawngah intodelh tumin theihtawp chhuah ila; chutah sorkarina min puih ngai kan awm anih chuan kan sorkar chuan min pui sela. Anni pawhin mi harsa zawk te chhawmdawl kha an tih tur a ni a, tha takinrawn ti sela, minrawn tuamhlawm se tih kha kan duh zet zet a.

Chuvangin, hemi Food, Civil Supplies & Consumer Affairs-ah hian inhniaalna tawp theilo awma hi heti ringawt tur hi a niin ka hre lo deuh a. Keini lam pawhin a dawn lam, a rethei lam, a tlawm lama awm tuma, heng hamthatna dawn tum lo hian intodelhna thinlung pua theihtawp kan chhuaha, sorkar kan backup-a, sorkarin mipui min backup hi a ngai tak zet zet ka hria a. Chu laiah chuan a lai leh a lai ah kan intawk thei dawnin ka hria a. Chutih rual erawh chuan, tanpui ngai dinmuna dingte hi thlah thlakin awm lo sela, inthleina leh inthliarna, a party rawng kaia inthliarna te awm lovin, tanpui ngai kha chu sorkar hianrawn pui zel sela. Thliarfelna, thliar hranna heng card nei turte pawh tha takin dan ang thlapin kalpui sela a him ber ang a, mipui paw'n kan sawtpui ber dawnin ka hria a ni.

Demand No. 35 - Fisheries Department:

Vawiina member-te hian sawi nuam kan ti tlangin ka hria a, kei pawh engtik lai atang khan nge sangha khawi hi ka tuipui ka hre chiah lo a. Amaherawhchu, nizan zanrei tak thlengin kan inchhiarin kan lo ti ti ve a, sawi tur ka ngah ve khawp mai a. A bul tan nan chuan, *quality seeds* chungchang hi - nursery lampang te pawh nichinah khan kan sawi lang a. Nursery te pawh hi uluk taka monitoring kan tih hi a ngai tawh tak zet zet a. A quality tha vak lo subsidy tlem te peka tlawm deuha inleitor emaw, insem ngawt te pawh hi a hun tawh lovin ka hria a. Kan ram dinhmuna en hian hei aia a lo to hret anih pawhin a quality tha zawk te pawh hi pek chhuah a hun tawh takzet a.

Tin, a growing season hi (ka sawi sual ang em ka hre chiah lova) March - September vel hi niin ka hria a. Heng karah te pawh hian sanghain a mamawh ang tui te, khang ang zawng zawnga kha kan nei thei em; kan pe thei em tih te pawh hi kan inen a ngai a. Kan sawi tum berah chuan, a quality check hi a pawimawh takzet zet a ni.

Tin, nichin lamah pawh an sawilang tawh a, Pu Dy. Speaker, *nursery tanpuina* tih kha a

ni a. Nursery tanpuina hi a tangkai hle mai a, an chhawr a, dinchhuah phah nan te pawh an hmang a ni. Chutih rual chuan pek zui tlak loh, pek nawn tlak loh te pawh hi an awm ve thei nia hriatna ka nei a, hengah te pawh hian a thawktu lam a changtu lam te hianin uluk takin enzui sela. Tanpuina atanga dingchhuak tur kan nih angin, a ding chhuaka te leh tanpuina pek nawn tlakte kha thlan leh zel mai ni sela. Pek tlaka kan awm duh anih chuan, taima tak, tha takin kan ti zel turah ka ngai a. Chuvang chuan, sorkar atanga dawn ve hrim hrim lam nilovin, kan dinchhuahpui tur zawnga kan kal a tha hlein ka hria a ni.

Tin, a vawn thatna ice plant lam te pawh hi Zo-fish fed. hian an nei a, amaherawhchu duhthu a sam chiah lovin ka hria a. Ice plant te pawh a thar dina, a thar bun te pawh a hun tawh hle mai a. Pu Dy. Speaker, nimin lamah pawh khan ka sawi tawh a, production course bawkah hian. Hetianga kan ramah chuan nei leh nei lo, thei leh thei loa kan tih avang hian kan tharchhuah te hi tui zawk, tha zawk, thianghlim zawk thin mahse, a man hi a tlawm thei lova. Chuvang chuan, Mizo sangha tui zia kan hria a, khatiang kawngah pawh khan kan in-support tawn anga, a production demand a sana a supply te a lo tam chuan, a rate te pawh nakin lamah te chuan a la hniam ve thei a. A lo hniam lo a nih pawhin, mizo leh mizo kan intawiamna kan in-support tawna, kan inthlawp theihna a ni tih hriaa, khalaiah khan theih tawp kan inchhuahpuia, kan tharchhuah kan kut kawih ngei mai kan ngaihsan kha a tha hlein ka hria a, ka'n sawi lang tel duh a ni.

Demand No. 33 - Land Resources, Soil & Water Conservation Department:

Hetah hian sorkar hian soil testing laboratory hi kan neih dan chin hi ka lo hre chiah lo a, kan neih pawhin a aia changlung zawk leh tha zawk neih hi a hun tawh hlein ka hria. Kan lo la nei lo anih phei chuan, neih a hun tawh hle a. Kan ram leilung hi, chhim hmar, chhak leh thlang kan tih te ah hian leilung hi a tlangdunga zirin a inang lova, chungah chuan huan thlaite han chin chhin vak vak, han risk vak vak hi a hun tawh lo hle mai a. Kan leilung mila kan chin theihna turin soil testing laboratory te pawh kan neih a ngai a. Chutiang tur chuan department te pawhin ruahmanna an nei turah ka ngai a. An lo nei lo palh a nih pawhin, chu lam chu hawi ve a hun tawh hlein ka hria a ni.

Pu Dy. Speaker, sawi tur tam tak a awm a; ka sawi ang khan pakhat ringawt pawh hi darkar tam tak sawi kai vek a ni a - link-road lam te, rubber plant te, areca nut plant te. Link road te pawh sial zel a ni a, hengah te pawh hian tan lak zel te ni sela, Serlui tui te pawh humhalh chho zel ni se; hei, a hnar te pawh han tihchak thar te ngai takzet zet a ni. Engpawh ni se, ka sawi telah ngai ta ila Pu Dy. Speaker. Hun hman pelh lutuk hi he House zahawmna atan hian a tha lova, House a tizahawm lovin ka hria a; chuvang chuan ka duhtawt mai ang a.

Kan Minister chhuanawm tak takte Demand pahnih tha tak hi tihhlawhtlin a nih ngei theihna turin pass turin ka thlawp a ni e. Ka lawm e.

(Speech not corrected.)

DEPUTY SPEAKER: Ka saptawng thiam 'Lady's first' tih kha kan hmang hmasa chhin ve a nih kha. Tunah chuan ka thenawm-pa Tuirial bialtu MLA zahawm tak Pu K. Laldawngliana ilo sawm ang.

PU K. LALDAWNGLIANA: Pu Dy. Speaker, ka lawm e. Vawinah kan Minister zahawm tak tak Pu Lalthansanga leh Pu B. Lalchhanzova Demand pawimawh tak tak sawihona hun tha tak mai kan nei hi ka lawm hle mai a. Sawi tur a tam thin sia, sawi tlem

kan tum ve deuh ang e kei pawhin, vawiin chu.

Demand No. 6 - Land Revenue & Settlement Department:

Kan hriat angin kan rohlu kan ram neih min enkawlsaktute annih avangin sorkar hmasa awm tawha minister zawng zawng khan harsa an tih kha a ni a, surveyor tlem avang khan. Harsatna leh buaina, chhungkaw intihbuaina tam tak awmna *department* kha a ni a.

Sorkar hmasa khan uluk takin privatized-a ‘surveyor an indaih si lova’ tih ngaihtuahna an sen kha bawhzui Zelin, tun tumah hian *e-RAM*, Aizawl District ah pilot project atan empanelled firm 13 an han thlang hi ropui hi ka ti a, hetah hian hmasawna ropui tak kan hmu a. Kum 2021-a complain tawh harsatna nei tam takte pawh kha tunah hian empanel firm 13 te hian uluk takin an buaipui a, heng te hi hmasawna ropui tak a ni, tih hi kan sawi lang tel ve duh a.

Tin, kan hmaa member sawi ang khan thingtlang lam bialtute’n kan lo nghahhlel em em mai chu, SVAMITVA scheme hi a ni a. Sawi ang khan, property card, LSC ang tluka loan an lak pawha an dah kham theihna tur ang kha kan nghakhlel khawp mai a, tunah hian project an ti mek a. Hei hi chak zawka kalpui kan beisei hle a ni.

Tin, chhiah lak hi kan duh thin a, kan mamawh bawk a. Chuvang chuan, keini Kolasib District ah hian Kolasib-ah office pakhat kan nei ve a. Chutah chuan a thawktu clerical staff pakhat chauh kan nei a; hei hi min lo chhinchhiah sak sela, dah belh kan ngai hle mai a. Tin, keini Kolasib District hian revenue nuai 65 chuang kanrawn thehltu tawh a ni tih kha karawn sawi lang tel duh bawk a.

Tin, ka bial chhung tan Kolasib zuk kala chhiah leh LSC han buaipui turin harsatna tam tak kan tawh avangin sorkar order kha a awm tawh a; Kawnpui SDO civil khu sub - Registrar tur ang order awm tawh kha a ni a. Hei hi min lo chhinchhiah sak se, lo function vat thei se kan duh hle a ni.

Tax collection ah hian kumin hi hma kan sawn hle mai a, kan minister hi a zahawmin a faktlak hle mai a, a sanna hi a tam hlawm khawp mai a. Stamp-duty ah ringawt pawh hian hma a sawn khawp mai, tih kha a tawi zawngin kan sawi lang ila. Tichuan, tax ah hma sawn kan duh a, pek tam tir kan duh si a. Hei hi ka ngaihpawimawh deuh mai chu, periodic patta te, house pass tih te hi a thih hnuah hian tax a pek theih si lova, renew vat theih dan min lo ngaihtuah sak sela.

Demand No. 17 - Food, Civil Supplies & Consumer Affairs Department:

Hei hi a pawimawh khawp mai a. Ei leh bar bakah kan vei-vahna oil te leh mipui hamthatna department a ni bawk a, sawi tur a tam khawp mai a, hmasawna tam tak kan hmu a. Kan sawi ang khan, ka bial chhung Mualkhang ah LPG - Gas bottling plant tih len tura kal mek tih te; tin, oil depot tur Sairang - rail station bula hmalakna te a ropui ka ti a.

Tin, Zuangtui godown saw a leng tawh lo khawp mai a, a sawna tur Sihhmui-ah tih a ni a. Tin, godown hrang hrang tea kan mamawh em em weigh-bridge hi tunah hian a tam tawh lova. ‘*Bukna dik*’ kan tih kha, hengte pawh hi min lo chhinchhiah sak sela. Zuangtui godown ber pawh saw tha lo kha anih deuh reng avangin, hei hi uluk zuala min lo chhinchhiah sak turin kan sawi lang tel duh bawk a ni.

Kan thlirna tlang hi a danglam a; chhiah peka pawisa han lak luh tam hi kan duh viau a, a dik khawp mai. Supply Department hi tunah chuan sumdawng ang deuh mai ah kan chhuah tan a, khalam thlirna leh helam thlirna atang chuan a dik viau a ni. Mipui atangin chhiah kan han khawn a, buhfai atang ringawt pawh hian, ration buhfai tunah pawh hian crore 20 kan han hmu ta te hi khalam atang chuan a lawmawm tawp a ni. Mahse, helam atang chuan mipui kha kum 50 deuhthaw Sorkar-in a thlawna angkhat vek maia mirethei leh haus, officer leh officer lote pawh inang khat veka ration ₹15/- an lak thin kan han up tak vak avanga pawisa lo lut a ni tih pawh kha kan sawi nawn ve leh duh hrim hrim a. Amaherawhchu, ngaihtuah chiangin card sen an han siam a, ₹5/-a han sana ₹20/- han tih te pawh hi a tha khawp mai a. Hei pawh hi han an zirchian deuh kha chuan, tiang khan card sen te pawh kan han siam a ni a.

Tin, Kolasib DCSO hi tunah hian Mamit atangin min bialtir a, a rang lama order chhuaha kan neih vat a pawimawh a ni. Tin, administration lamah, Kawnpui-ah hian Store-keeper in a enkawl a, Lungdai Inspector-in a enkawl a, Bukpui Sub- Inspector-in a enkawl thung a. Helai hi arrange that a pawimawh khawp mai a.

Tin, open market atanga buhfai kan supply hi a kal thain ka hria a. Amaherawhchu kumkhat chhung tun March thla thleng a la niin ka hria a. Nikum April - March thla khan order an han pe tawp mai a LZ ho kha, khangah khan harsatna tamtak kan tawk a, sawi leh selna pawh a tam a ni. Tunah kum te a thar tawh a, hei hi chhonzawm zel tir tum a ni em? Tin, additional turin MIFCO kha corporation atan an hmang kha tha ka ti a. A hma pawhin corporation action lak theihna ang chi kha an dah thin avangin, tunah MIFCO kutah additional thla khatah sing 2-3 te open market atanga an han leitir hi a tha ka ti a. Hei hi en uluk deuh a ngai a ni tih kha kan sawilang tel duh bawka a ni.

Pu Dy. Speaker, 'retailer Sorkar hmasa angin a inthlak ve lo' a'n ti ringawt a, bial dangte in thlir ve thin lova. Heng te pawh hi thenkhatah chuan an inthlak a nia, tih te pawh kha ka'n sawilang duh bawka a ni.

Demand 36 - Environment, Forest & Climate Change Department:

He department hi ramngaw, ramnuam, tuihna tha leh boruak tha siamtu tha em em mai a ni a. Keini biala Kawnpui-ah hian khawtlang hruaitute leh kan minister hmasa te nen khan kan visit a. Kawnpui-Zotlang ngaw hi Community Reserve Forest Wildlife-ah kan pe kha a ni a, hei hi tangkai zawka hman anih theihna nan khawtlangin kan pek a nih a, hectare 431 lai a ni a, zau hem hem tak a ni.

Pu Dy. Speaker, ka bial hian Forest lam hi kan hmang tangkai khawp mai a. Lungdai atanga tlan pheia khaw-sarih velah hian Bukpui chauh riahna kan nei a, chu pawh cBukpui Forest Guest House hi kan neih chhun a ni a. Mahse, a rei tawh khawp mai a; riahna tlak deuh hleka maintain theih lse. Tin, hei nungcha leh savate nena chengza tur kan nih avangin, Aizawl Zoological Park hi enkawl na hi a tha tawka em; visit-tu an tam em; district dangah dah belh tumna a awm em, tih te ka ngaihtuahnaah a awm a, kan tum deuh a nih ka ring a, Budget ka'n thlir vang vang a, Pu Dy. Speaker, a tamna ringawt pawh ₹837.6 lakh lai a ni a. Tin, Sorkar hian *Noise Pollution Regulation* kum 2000-a awm kha hmalak chhonzawm zel a ni em, tih te kha ka'n sawilang tel duh bawka a.

Demand No. 33 - Land Resource, Soil & Water Conservation Department:

Hmuhphiah chungchanga ka rilrua awm chu, (ka bialah chuan tam lutuk lo mahse) rampum thlir hian kan hlawhtlinglo tih kan hmu chiang a. Chuvang chuan, helai atanga leitu (Buyer) mi 7-te duh dan ni lovin, kan kut-hnathawktute duh dan leh tha an tih hunah khan a ro chauh nilo, a hring te pawh hi lei dan awm se tih kha ka'n tel duh bawk a ni.

Demand No. 41 - Sericulture Department:

Sericulture-ah hian hmasawwna tamtak kan hmu a. Tun kum kalta ah khan cocoon pangang, mulberry ah metric ton 567.36 leh mugha metric ton 17.97 tharchhuakin hmasawwna kan hmu a. Sorkarin a then a leisak a, a then chu Assam State-ah te pek tura hmalak a ni a. Ka bial chhungah pawh pangang khawitu tam tak kan nei a, hengte hi hand-holding policy-ah emaw, kan CM-Special Package-ah emaw min lo telhsak ve turin ka'n ngen bawk a ni.

Demand No. 35 - Fisheries Department:

Damlo natna chi hrang hrang neite tan pawha hlauhawm ve miah lo, kan taksa tan a mamawh em em mai *sangha* chungchang hi, hei sangha chi ringawt pawh hi tunah hian nuai 25 sem chhuah a ni a, a tha viau a. *Sem-policy* kan ti anih chuan, sem ngai hi a awm vele thin a. Chuvang chuan, a semchhuaktute lama kha, 'tute nge supplier' tih lam kha ka ngaihtuahnaah a awm a. Tin, sangha chi siamna tha te kan ngaihtuah em tih kha ka rilruah a awm deuh hlek a. Hei hi tangkai tak leh Mizoram pum kan intodelh theihna tur a ni a.

Tichuan, Pu Dy. Speaker, kan Minister zahawm tak tak pahnihte demand hi tha ka tiin ka pawmpui e. Ka lawm e.

DEPUTY SPEAKER: Tunah chuan Champhai North Bialtu zahawm tak Er. H. Ginzalala ilo sawm ang.

PU H. GINZALALA: Pu Dy. Speaker, ka hmaa thu sawitu khan Sericulture lamah mutton te arawn thar a; *mutton* chu 'kelsa' tihna a ni a; a ni lo-lo hi an thar nawk-nawk mai dawn a ni hi. Hei, thlakhat dawn kan session tawh a, kan chau tlang tawh a, sitting room nuam tak mai kan nei a. Amaherawhchu, hriselna a inchen lova, bedroom te pawh hi awm thei nghe nghe se a tha awm mang e aw ka ti a. Khum pahnih emaw, pathum emaw awm thei sela, Pu Muanpuia te pawh an mu-hahchawl duh maithei a. Chhun-pachangah palianpui-pui hi mu vum thur ila ni mai; khang te kha ka'n rawt hmasa duh deuh a.

Hei Demand pawimawh tak tak mai, Pu Lalthasanga leh Pu Chhanzova te demand kan sawiho a ni a. *Fisheries* a lo lang a, hei hi a tuiawm ka ti a. Petera portfolio a ni a, hei hi. Tin, pakhat leh chu, *Food, Civil Supplies & Consumer Affairs* a lo lang a, hei hi chu Aigupta Josepha portfolio kha a ni a, a tangkai khawp mai a. Kan Bible lam chhuikir te pawh a tha maithei a ni.

Demand No. 35 - Fisheries Department:

Hei, *Sangha* han sawi takah chuan, Mamit lam te hi mitthlaah a lo lang thin a. Fisheries-ah hian potential hi kan nei tha khawp mai a. Leilet phai te kan ti a Hnahlan leh Champhai-ah te pawh leilet kan nei tha em em mai a. Vawiina Fisheries Department chan sawi changa ka ngaihtuahnaa lo lang chu - kan Lal Isua tawngkam '*li thuk lamah len deng rawh*', tih a ni tlat mai a ni. Engnge ni a awmzia kan tih chuan, fisheries kan kalpui dan hi tlema

tihdanglam deuh ngaite a awm a ni awm mang e, ka ti a; ngaihtuahna thar kan neih tlan hi tha ka ti a. Tunah hian kan bialah chuan leilet tha hi sangha dilah kan let mek a; buh aiin a hlawk zawk a ni. Tin, farmer-te tan a hahdam zawk bawk a ni.

Hei, kan Fisheries minister zahawm tak kaihhruaina hnuaiah kan han ti chho a, a thang chak em em mai a ni. Feet hnih-khat leka thukin ka han ti a, kum khat chhungin kg 3 te kan thar a ni, tunah hian. Potential a tha hle a ni tih hi ka chiang lutuk tawh a. Hlawk si, tha zawk si hian kalphung-thar hi kan din a ngai ka ti a ni. Chuvang chuan, *li-thuk* lamah len kan den a ngai a. tunhma zawngin *li-thuk* lo lamah kan deng a, tunah chuan kalphung-thar deuha kan tih hi a va tul dawn em tih hi kan sawi duh a.

Tin, sangha hi market a tha em em mai a, tunah hian kumkhatah hian metric ton singhnih dawn kan demand mek a, kan thar erawh chu singkhat pawh a la tlinglo a ni, ka hriatsual loh chuan. A data figure dik tak erawh chu ka hre chiah lo. Ready market a nih avangin, sangha hmangin kan economy hi kan siamtha thei a ni. Chuvang chuan, ngaihtuahna thar kan neih hi a va han tul em tih hi kan ngaihtuah a.

A dawt lehah chuan, Fisheries lamah hian *contract farming* ang reng deuh te pawh kan tih hi a tha awm mange aw, kan ti a. Hei state dangah an tihdanah chuan sorkarin emaw, company in emaw sangha dilte an siam mai a, khatah khan kum khat emaw, kum hnih emaw agreement an neih angin farmer ten an va enkawl mai a, anmahni pawisain; *mahal system* ang deuh te pawh a ni ang chu. Khang te pawh kha i han ngaihtuah teh ang u. A chhan chu, kan farmer-te capital hianin a tlin lo a ni. Tamtak thar tur leh hlawhtling tak tak tur chuan kan leilet phaizawlah te hian ti tak tak ila sorkar pawisa hmangin bei ta ila. Tichuan, *mahal system* in tender te pawhin kan tihtir ve ang a, kan duhsak zawngte pawh kan pe ang a, kumkhat-kumhnih te hun kan pe ang a. Khatiang khan eizawna tha lutuk hi kan farmers te tan kan siamsak theih ka ring deuh a. Chuvangin, *li-thuk* lamah hian len i deng teh ang u.

Demand No. 36 - Environment, Forests & Climate Change Department:

Forest lamah zawhna ka siam duh deuh a, kan Forest minister min chhan atan. Dampa Forest-ah khuan *Savawm* hi engzah nge awm tih hi ka zawt duh a; *Sanghal* ka sawi lo; nge ni, Tiger lam hi kan zawt zawk dawn ka hre lova. Engpawh nise, engnge ni tuna kan dinhmun chiah tih hi ka'n zawt ve mai mai teh ang.

Forest lam hi Session hmasa khan ka sawi tawh a, roadside plantation lam hi tihdan thara tih hi a tha lo em ni, ka ti a. Kawng kamah hian thing kan phun a, sum tam deuh kan seng a; awmzia a neilo. Session hmasaa ka sawi - lo kan vahin kawngpui atangin meter 10 emaw, meter 20 emaw ve ve, a tawn tawnin reserve forest zuah mai ila a tha lawm ni, ka ti a ni. Accident thilah pawh hian a him em em mai a; kawng thlang lama motor tlan liam te pawh thing lian pui-puiin a lo dan beh chuan nunna te pawh a chhanhim thei a ni. Tin, hnim hi a thangchhak lo a, kawngkam hnim samfai tur pawh a tlem em em mai a; tin, kangmeiah pawh hian a him lehzual a ni. Tin, environment ah thing leh mau humhallhna te pawh a ni nghal bawk a. Chungte atan chuan a tul em emin ka hria a ni. Chungte pawh chu ngaihtuahna nei tlang ila a thain kan ring deuh a.

Tin, Forest minister khan min hriatsak se, Champhai-Tuipui atanga Champhai khawpui luhchhoh hma zawngah Tlaizawng-par hi phun kan tum deuh a, a tiak hi kan mamawh

khawp mai a. Sing tamtak, nuaih chuangte pawh awm thei se kan duh a ni. DFO te pawh ka sawipui tawh a, Tlaizawng-par hi a mual a mualin phun ila; Tuipui leh kawng kamah te pawh phun tumin ruahmanna kan lo siam tawh a, tourism promote tu turin. Chulai chu kan Forest minister hian min lo hriatsak sela.

Tin, tunah hian Tuipui kamah, kawng kamah roadside market din kan tum a, tourism attract-na tur ni bawh siin din kan tum a; a funding leh eng eng emaw chu kan hnuk chhuak ve tawh a ni, tlem te te chu. Chutah chuan, sangha dil, Fisheries Deptt. lam hian min pe ve se kan duh a. A sangha va mana va hralh tur tihna lam ni lovin, a tourism tan hrim hrim kawngkamah recreational center kan din dawn a; a kamah khan sangha dil mawi tak siamna tur kan nei a ni. Chutah chuan, convergence-in Fisheries Deptt. lam hi rawn tang ve rawh u, kan ti a. Minister zahawm tak hian min lo hriatsak sela. Chungah chuan sangha hi ei kher lovin dah ila. Kawng kama kal apiangte an chawlh-hahdam paha an chul heuh heuh theih tur khawpin kan siam dawn a; amaherawhchu, tumahin bomb lo ila kan ti a ni. I bomb lo ang u.

Hei Mamit Bialtu hi *bomb* han tih hian lo lang nghal ringawt a, mitthlaah hian. Engpawhnise, nichin pawh khan a rawn sawi a, '*sangha ei tamte hi an finge*', a ti a; sangha man tamte hi an hmel pawh a lo tha anih hi ka ti! An keu vuk mai a ni.

Hei Forest resource kan neih that em em mai bio-mass chungchangah rawtna chhe te ka nei a. Thingtlangah hian thingfak an hmang nasa em em mai a. Tuna kan hman technology chu *lungthu-pathum* a ni a, hei hi improved-in *chulha* ang chi hi introduce thei ila. Mahse, tuna an siam chhuah ang chi hi chu kan ram mil anih loh avangin la explore chi a ni a. 40% emaw, 30% emaw pawh lo save ta ila, thingfak 10 kan hman naah thingfak 7 kan hmang dawn tihna a ni. Atleast 30% kan save ang chu, chuan environment thlengin a nghawng dawn a ni, a tha zawngin.

Demand No. 17 - Food, Civil Supplies & Consumer Affairs Department:

Aw le. Buhfai lama han hon. Minister hmalakna chu kan sawitam tawh a. Buhfai mana kan senso hi kum dangah chuan crore 150 vel niin ka hria a, Pu Dy. Speaker. Kuminah chuan hei, kan Minister hian hma a la tak tak mai a, kum khat chhungin 70 crore bawr velin kan in manage thei mai awm mang e aw, tih kha ka hriat thawi dan deuh a ni. Ka hriatsual chuan min lo hrethiam se, amah zawk khan rawn sawifiah turah ngai ila. Tin challenging deuh mai chu, buhfai kan insem darh danah hian dik taka kalpui a ngai a ni. A buk danah te a dik tawh lo; nichin khan kan member khan a sawi tawh a, *Bukna diklo chu Lalpa tan tenawm a ni* tih a ni a.

Tin, Pu Dy. Speaker, chhiah pek chungchangah hian, Revenue Department va kal kher emaw, mahnia va buaipui kher lovin account nen hian auto-debit in tihdan a awm thei em aw, ka ti a; nge, kan ti tawh zawk, ka hre chiah lova. Khang te kha kan next step atan kan chhawpchuak duh deuh a. Auto debit-in kan account ah lo in cut zel mai se kan hahdam a ni mai; Anih loh chuan, hun tam tak kha kan loss thin a ni.

Demand No. 33 - Land Resource, Soil & Water Conservation Department:

Tin, Soil lamah hian hmalakna tur a va han tamtak em! Heng te phe chu technical thil tamtak a awm a. A biktakin rain-water harvesting lamah hian i kal teh ang u. Soil minister hian min han hriatsak se ka tih chu, tunah hian ka biala Selam leh Tualcheng-ah te

rainwater harvesting dam siam kan duh a, a siamna tur tha deuh mai kan hual tawh a (**Dy. Speaker:** A zo thei dawn tawh em aw?) Aw, Pu Deputy Speaker ka bialte tan thahnem kan ngai deuh a.

Entirnan: tuna kan kal danah diklo em em nia ka hriat chu, tanky kan siam hian RCC zawngin kan kal a, a diklo a; Earth-dan zawngin kal ila a tha ber. RCC tanky kan siam hian nuai 20-30 a lo ngai a, chutah chuan liter nuai hnih-thum bak kan stock theilo a ni. Mahse tuna ka sawi Earth-dan anga kan kala, rainwater harvesting lama kan kal anih chuan, nuai 20 kan sennaah litre nuai 20-30 kan stock thei a ni. Chutiang zawngin kal theihdan a awm a, kei pawhin hmun hnih-thum chu ka hual tawh a ni. Chungte pawh chu Pu Dy. Speaker, kan Minister kaihruaina hnuaiah kan tih theih ngei ka beisei tlat a ni.

Tin, Agricultural link road hi kan ngaihtuah lo ka ti a. Hmanni pawh khan Agriculture Department ka sawi khan ka sawi tawh a. Linkroad siam hi i ngaipawimawh teh ang u. Link Road kan siamin bir em emin kan siam a, thal khat bak daih lovin tuihawk luan kawrah kan chantir a. Link Road kan siam hi forest pawh a in develop theilo; ram pawh kan khawih a ni tih hi kan hriat a ngai. Chuvang a ni a, hmanna ka sawi ang khan guidelines hi siam a ngai. Technical thil a ni a, mahse a pawimawh lutuk. Kawng kan siamah hian hnim pawh a to tawh dawn lo; kawrah a inchantir ringawt mai a ni. Chuvangin grade tha tawka 1:20 vela kan siam a ngai, asset tling tur chuan.

Pu Dy. Speaker, thil pakhat leh lawk. Tlang chhipah hian rainwater harvesting dam nichina ka sawi ang kha kan siam chuan groundwater recharge te a ni a, a mawng lam zawng zawngah hian tui hna pawh a tipung a; khatiang zawng khan i kal teh ang u.

Awle. Kan Dy. Speaker hian min duhsak a ka lawm hle mai. Tuna kan Minister zahawm tak takte - Pu Lalthansanga leh Pu B. Lalchhanzova Demand te hi he House zahawm tak hian pass ila tiin ka rawn thlawp a ni. Ka lawm e.

DEPUTY SPEAKER: Tunah chuan Tuichawng bialtu MLA zahawm tak Pu RM Chakma ilo sawm ang.

PU RASIK MOHAN CHAKMA: Pu Dy. Speaker, ka lawm e.

Hei vawinnah kan Minister pahnih

DEPUTY SPEAKER: Ngawi lawk rawh. Dar 4 a ri a, kan sawi chhonzawm zel dawn em ni? (*House-in sawi chhonzawm a remti a.*) Aw le. Sawi tlang rawh le.

PU RASIK MOHAN CHAKMA: Pu Dy. Speaker, ka lawm e. Demand sawihonaah khan lawmthu sawi tur ka nei a. Department tam tak ah khan Pu Dy. Speaker, *Suri* leh *Sora* tih lam hi a lang vak ngai lo a, *Tlang* leh *Kawn* tih ang reng hi a tam thin a. Mahse, vawiin department demand-ah hian tlema zawng chu a lang a.

Demand No. 35 - Fisheries Department:

A hmasa berah chuan, Fisheries Department ah hian PM-Mantri Matsya Sampada Yojana a zawnin kum thum District Council min khawih tir a, achievement tam tak pawh kan nei a ni. Tun hma chuan Chawngte Bazar-ah hian sangha man hi ₹600/- aiin a hniam ngailo

reng reng; engtikah mah local sangha hia tlawm ngai lo a ni. Tunah kha scheme kha a zawna kum thum kan implement takah chuan ₹400/-ah te, ₹300 /-ah te a tla tawh a. A awmzia chu - production a tam tawh a ni.

Tin, Mara leh Lai District ah te sangha chi kha kum hnih lai kan supply a ni, kan area atang khan. Vawiinah Pu Dy. Speaker nangmah kaltlanga kan Minister ka ngen duh chu, sangha chi Lunglei vela supply tur a awm chuan, vai ram atanga chah lovin CADC ah duh tawh lei tur a awm a, kan supply teuh thei tawh a. District level-ah pawh kan register tir tawh a, selection leh ah pawh Kolasib piah lam Bagha vel atanga la tawh lovin keimahni lam min supply tir ula. Tiang chuan, fish-farmers te pawh a phur ang a, kan State sum tam tak phai lamah kal lovin kan awm tir thei dawnin ka hria a ni. Chuvangin, hengah hian lawmthu ka sawi a. Tun financial year ah pawh hian kha project kha Delhi lamah chuan an final tawh tih kha kan hria a, nikuma sum pawh min release sak loh avangin kan la hmang zo lova. Kha kha kan tangkaipui em avangin lawmthu ka sawi duh a.

Demand No. 36 - Environment, Forests & Climate Change Department:

Hman atang khan he department-a officer te hian rilru zau tak an pu thin a. Centrally sponsored scheme District Council area-a pek theih awmah ka hriat chinah chuan vawikhat mah min la hmah lova. A chhan chu, District Council budget chu kan hriat theuh angin 95% chu salary leh administrative cost ah a kal a, department chuan hnathawh awm lovin hlauh an la thin a. Khawngaihin State sorkar atangin centrally sponsored scheme district council-in a khawih ve theih te a awm anih chuan, kan officer te pawh technically a thiam vek, training chhuak vek an ni tawh a ni. Chuti lo chu khang mithiamte service pawh khan hman lohin a awm dawn tihna a ni a.

Demand No. 41 - Sericulture Department:

Dr. Beichhua, hon. Member hi a awm lova; Sericulture minister anih lai khan District Council area 3-ah khan project pakhat theuh min siamsak a, tun sorkar tharah hian a chhuak hman chia a. Kan hon. House Leader pawh hi inaugurate function-ah te pawh khan a lo tel ve a. Hei hi tunah hian implement mek a ni a, a hlawhtlin loh kan hlau hle a ni. Seiculture area ah kan awm ngai loh avngin kan District officer te pawhin a enkawl dan an thiam lo ang a. Chuvangin, hei hi uluk taka min ensak kha ka ngen duh a. Hei hi special deuhin min hriatpui sela, tih kha.

Demand No. 6 - Land Resources, Soil & Water Conservation Department:

He department hian kan district council ah hmalakna engmah a nei lo a. Ka sawi ang khan, eng emaw central sponsored scheme te a awm anih chuan, min lo hriatsak ve sela.

Hmunphiah chungchang hi helama kan member-te khan an mangan zia kha an sawi a, CADC-ah erawh chuan kan buai lo a. Tunhma chuan *mahal* zawngin kan ti thin a, farmers te khan tlemin an tuar thin a. Kuminah chuan hei, mahal lovin open market-in kan dah ta a. Khang hun laia mahal system-a kan pawh khan complaint kan dawng nasa a. Kuminah chuan hei, a reh hmak a, tunah chuan kg-ah ₹70-80 tein an hralh a avangin buaina a awm lo reng reng; nangmahniin hralh rawh u kan ti mai a. Hei hi a lawmawm ka ti a. Khatianga anmahniin an hralh khan farmers te pawh an lawm a, engmah harsatna an neilo.

Chuvangin, State sawrkarin a leisak theilo anih chuan, a kum lehah chuan khatiang khan kalpui leh kha a tha mai em ka ti a. Kan area hi Marpara te ai chuan a hla fe zawk a,

carrying cost pawh a sang zawk a ni. Mahse, khati chung pawha ₹70-80/-a an lei duh anih chuan a tha mai a; policy programme zawng zawng hi a fuh vek thei lova, khatianga kan leisaka a fuhlo anih chuan, pawm thiam ve ila. Farmers te hamthatna tur kan duh tak tak a nih chuan a hlawk zawng zawkin kan kalpui mai turah ka ngai a ni. Chu chu rawtna siam pahin ka rawn sawi tel a ni.

Demand No. 33 - Land Revenue & Settlement Department:

He department ah hian lawmthu ka sawi duh a. SVAMITVA leh Digital Land Record scheme chungchangah hmanni lawk khan meeting min neihpui a, tunah hian kan implement mek a. Pu Dy. Speaker, nangmah kaltlangin kan Minister ngen ka duh chu, hei hi strict deuhin kan district officers te hi min enpui rawh se; chutilo chuan a fail mai a hlauhawm a ni. Duh leh Chawngte lamah zin a ngaih pawhin rawn en mai sela. A chhan chu, Land Revenue hi kan source of revenue neihchhun a ni a. Tunah hian cheng nuai 80 te chu kan hmuthei a, kumkhatah. Khang kha tha taka kan implement chuan revenue crore 2 te pawh kan hmu thei a ni.

Tin, kan revenue administration hi a kal sual laklawh tawh a, tih fe loh chuan siamthat a har khawp mai a. Kei pawhin ka bei nasa a, mahse ka hlawhtling lo a ni. Hemi scheme hmang hian kan ti tak tak a nih chuan a zia chho turah ka ngai a ni.

Demand No. 17 - Food, Civil Supplies & Consumer Affairs Department:

Pu Dy. Speaker, Chawngte area hi a lian viau e ti lo chuan petrol pump hi kan la nei lova. Food, Civil Supplies & Consumer Affairs atang hian tihdan kawng min dappui turin ka ngen a. Tin, gas agent pawh hi pakhat chiah a awm a. Gas agent additional hi Chawngte, Borapansury leh Lawngpuighat-ah te kan mamawh a. CADC area ringawt pawh huamchungah Village Council 88 a awm a, voters pawh 36000 chuang kan ni a. Chuvangin, petrol pump leh gas agent kan mamawh takzet a ni. Chawngte-ah gas agent pakhat chauh a awm avangin mipui an harsa em em a ni. **(Dy Speaker: Zo thei dawn tawh em aw?)** Pu Dy. Speaker, pakhat chauh.

Demand No. 17 - Food, Civil Supplies & Consumer Affairs Department:

Pu Dy. Speaker, buk tlinglo chungchang hi tih takzetin kalpui se ka ti a. Hei hi a hma khan kan ngai serious lova, mahse a tuartute'n an tuar a ni. Retailer atanga buhfai buk tlinglo chungchang hi tun sorkar tal hi chuan champion pui sela ka duh khawp mai. Chutih laiin, buhfai man tihto chungchang erawh chu Pu Dy. Speaker, fak a har ka ti deuh a. A chhan chu a tuartute'n an tuar zia kan hria ang a. A tuartu lo chuan khawilai nge na tih kha hriat a har a. Mahse mirethei zawkte chuan an tuar em em a ni. Thingtlangah kan awm a, an ti ti a, an mangan thu leh an harsat phah thu an sawi nasa a ni. Kha chu in ti tawh a, amaherawhchu a fuhin ka hrelo. Hmalakna zawng zawngah chuan a fuhlo ber niin ka hria a ni. Chuvangin, he House-ah hian loh theihloh in sawi a tul ka ti a ni.

Pu Dy. Speaker, vawiinah kan Minister zahawm tak te pahnih demand sawina hun hi lawmthu sawina hlira ka hmang thei hi ka lawm a, ka thinlungah pawh ka lawm a ni. Department dang pawh hi hetiangah lawmthu sawi thei turin min siam teh u khai.

Tichuan, kan Minister pahnihte demand hi a tha ka ti a. Mizoram, kan ram leh kan mipuite tan tangkai taka hmang thei turin duhsakna ka hlanin ka pawm a ni. Ka lawm e.

DEPUTY SPEAKER: Pu Rasika hi muangchang hian a sawi pel leh duai mai thin a. Tunah Pu Chhuanthanga, South-II Bialtu MLA zahawm tak ilo sawm ang.

PU LALCHHUANTHANGA: Pu Dy. Speaker, ka lawm e. Hei tunah kan Minister pahnihte Demand pawimawh tak tak kan sawi mek a. A hmasa berin –

Demand No. 17 - Food, Civil Supplies & Consumer Affairs Department:

Pu Chhanzova hi a tang hle mai a. Hei tunlaiin ration buhfai lamah te, gas lamah te kan hnianghnar hle a. Mualkhang-ah gas-bottling plant kha a awm thin a, hun rei tak atangin a function ta lova. Hei hi tunah hian plant lian zawk siam tumna a awm niin ka hria a, lawmawm ka ti a. Tin, oil depot hi tunhma tang khan kan mamawh zia te kan sawi thin a, mahse tun thleng hian kan la nei lova. Tunah hian kan Minister hian hma a la chho niin ka hria a, khawi hmunah nge depot hi kan neih dawn tih te, eng chen nge hma lak a nih tawh tih te kha windup hunah kan Minister hian min rawn react thei se lawmawm khawp ang.

Tin, thil lawmawm tak pakhat - kalphung-thar sorkar a lo din atang hian buhfai, oil, gas tih chingpen thawm a reh ta duak mai hi a lawmawm ka ti a. Khamrang-ah khuan huan ka nei a, ka kal thin a, Khamrang leh a chheh velah khuan buhfai te, oil te, gas te an tichingpen nasa em em mai thin a, Central YMA pawh khan a buaipui viau thin a nih kha. Amaherawhchu, hei tunah chuan khatiang thawm kha a awm ta lova, a reh ta duak mai hi a lawmawm hle a.

FCS & CA hnuaiia Legal Meteorology hi sawitu kha kan awm vak mang lo a, hei hi a pawimawh khawp mai a. Consumers te dikna leh chanvo humhalhna leh venhimna a ni a, hei hi a mipui hrim hrim pawh hian kan ngaihthah deuh niin ka hria a. Cement te, rod te, petrol te, diesel etc. te pawh hi a thianghlim em, a measurement a dik em tih te pawh hi ngaihtuaha hma kan lak deuh chu a ngai awm mang e. Heta thawktute pawh hi an tang viau chuan ka hria a. Hengah hian tang leh zual se, kan consumers te hmakhua ngaiin hma te han la chho zel sela a thain ka hria.

Dermand No. 35 - Fisheries Department:

Nichina kan ngaihthlak tak ang khan, fisheries lamah hian potential kan nei tha kan ti a, kan sawi kan sawi a, mahse kan la intodelh lo hle mai a. Fisheries lamah hian tuna kan sangha ei te hi Andra Pradesh atanga lo kal te a ni a, a lo kalna a hlat tehluul nen...

(Speaker-in Chair a la a.)

A lo kalna hlat tehluul nen a rate ah hian kan sangha thar chhuah hian a la compete thei lo a. Chuvang chuan, helama hian tan kan lak chu a ngai hlein ka hria a. Sangha dil te reuh te te buaipui lovin dil lian tham deuh te buaipui zawk ila hma kan sawn chak deuh zawk turah ka'n ngai a. Tin, Fisheries lama hma kan sawnna turin cold storage leh ice plant te changtlung zawk hi kan sual chhuah a tul hlein ka hria.

Demand No. 33 - Land Resources, Soil & Water Conservation Department:

Soil Department hi ka hrethiam vak lo a; a lan danah chuan soil test-na laboratory changtlung tak nei turah hian ka lo ngai a; test result atangin, 'chulai hmunah chuan chu chu a chin chi e,' tia kan farmers te guide tur zawnga ka lo ngaih laiin, hmunphiah te, rubber te, coffee te kan buaipui ta viau mai hi engnge a awmzia ni ang aw, ka ti deuh a. A nihna tur diktak hi a buk thelh hian kan thelh deuh em, te ka'n ti deuh a ni.

Demand No. 41 - Sericulture Department:

Sericulture hi a ngaih pawimawh awm khawp mai a. He department hi lian lo tak ni mahsela, ram economics-ah hian chanvo lian tak a nei niin ka hria a. Cocoon thar chhuah hi market lamah a hralh lamah harsatna a awm lo a, a rate a tha a, tin a hnah hi a nem a, tar chaklo deuh te leh hmeithai te thawh theih chi a ni a. Chuvang chuan, department lam pawh hian tan la sela mipui lamah pawh hian awareness te pawh hi pe tam deuh thei sela, sericulture hi kan ram economics dinhmun nasa taka min chawikang thei tur niin a lang.

Demand No. 36 - Environment, Forest & Climate Change Department:

He department hi a pawimawh hle mai a. Sik leh sa nei tha tur chuan ramngaw kan neih that a ngai a. Forest Deptt. hian plant protection lampangah hian hma kan lak nasat a ngaiin kan hria a. Tunlai khawvel lo lum chho zelah ramngaw kan neihte hi kan duat a ngai a. Plantation lamah kan kal nasa a, kan senso ngaihtuahin hlawkna hmuh tur hi a tam lo hlein ka hria a. Chuvang chuan, kan ramin a hrin chhuah kan thing leh mau te duat taka enkawl hi kan tih tur pawhmawh tak niin ka hria a. Hei tunah hmasawnnain a ken tel kawng siam te an ni chho dawn a, four-lane te kan sawi a. Heng kawng kan laihna leivung te awmze nei deuha kan paih a ngai dawn a, tangkai zawka hman dan te pawh ngaihtuah a tul hlein ka hria a ni.

Demand No. 6 - Land Revenue Department:

Land Revenue hi a buaithlak khawp mai a, ram buai a tam hle mai. Ka bial chhungah ringawt pawh Salem Mualpui ram te, Kulikawn ram te, Chekbawk-ah te hian harsatna tam tak kan tawk a. Tun hma atanga huan leh loneitu kum 10-20 te lo enkawl tawhte kha sorkar hmasaah khan kawng te lain, plot te an rawn siam teuh mai a, plot 1400 dawn lai, khang kha inthlan dawn khan duhsakte invulh nan an sem a ni. Helai hmunah hian Aizawl West-II leh Aizawl East-I bial mipuite ramah in-hmun an rawn nei teuh mai a. tunah hian kan buai a ni, a dik tak chuan. Hengte hi kan Minister hnenah chuan ka sawi tawh thin a, engtianga hmalak nge a nih tih kha ka'n hre duh a. Kan farmers te an rilru a na ngawih ngawih a, an tap a ni. Chinfel chu a harsa tawh viau mai thei. Khang pass nei thenkhatte khan an hralh leh a, sumdawn nan an rawn hmang a, an rilru a na em em a ni. Hei hi kan Minister hian hma min lak sak tawh nualin ka hria a. Eng chen nge hmalakna hian a thlen tawh tih ka hre duh bawk a. Helai hian kan Minister hian a beng lo chhu deuh sela, kan farmers te rilru han thawidam dan te min ngaihtuah sak theih chuan a lawmawm hle ang.

Pu Speaker, ka duh tawk ang a. Kan Minister-te pahnih Demand hi tha ka ti a, ka thlawp e.

SPEAKER : Tunah member zahawm tak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, ka lawm e. Demand indawt dan pangngaiin kei chuan ka han sawi ang a.

Demand No. 36 - Environment, Forests & Climate Change Department:

Hei hi a pawimawh hlein ka hria a. Ramngaw kan ti chereu nasa a, sik leh sa a inthlak danglam nasa kan ti a, a dik reng a. Amaherawhchu, tuihna chungchangah hian pawm ve hleih theih loh ka nei a. Thingkung ngaw avanga tuihna awm ang deuh thawa kan chhuah hi a ni ber chuangin ka hre lova. Khawvela Pathian thil siam phung a ni a. Ka bial East Lungdar-ah pawh tlang chhipah tuihna leh dil tha tak a awm a, ngaw a awm reng reng lo. Pu W. Chhuanawma bial Khawhai phul chungah dil tha deuh a awm a, Shillong kawngah

te pawh han tlan ila tlang kawlh rel rul phul tlangah tuihna tha em em a awm a, chutiang chu a ni ve tho a ni. *'Ramngaw kan humhalhin sik leh sa inthlak chhe lutuk tur kan veng ang'*, tih hi chu a dik reng mai. Nikum Krismas dawn khan Manipur-ah Tuivai Lei kan han hawna chhak Lungthulian-ah an khaw centenary hmanpui turin min sawm a, ka han kal a. An khaw hmun hlui kan han kal chu, ngaw tha em em mai a awm a, 'helaiah hian hmanah chuan tuihna tha tak a awm a, tunah chuan a kang ta a ni,' an ti tho a ni. Ngaw kha an preserve tha lutuk tlat; mahse tuihna kha a kang ve tho. Hemi tuihna lo tlem telh telh chhan hi ramngaw thiah vang em em pawh ni lovin, global warming vang zawk niin ka ring a.

Chuvang chuan, ramngaw hi tih that loh tur ka tihna lam ni lovin, helaia kan sawi dan lutuk hi; science zir ho hian an thil zir lam hi an sawi vung vak a, an zir loh lam hi an awih duh mang hauh lo a; doctor-te pawh scrab-typhus leh septicemia damdawi atan rulsa a that zia an hre vek a, an awih duh lo reng reng; mak ve deuh anni science lam zir ho hi.

Kum 2017 khan ka ke a pahnhin ka titliak a, damdawi-inah thlakhat chuang ka awm a, treatment pangngai ang khan ka kal mai a. In ka haw ve leh tual damdawi ka han apply ta chu, routine check up-a ka kal apiangin doctor khan a rin aia ka that chak thu kha a lo sawi ziah a. A last ah chuan, *"Ka that chak zia hi ka rawn inentir apiang hian i sawi ziah a; ka that chak chhan nia ka hriat ka sawi ang aw"* tiin, tual damdawi ka apply thu ka sawi a, a nui ringawt; a awih lo reng reng. Chuvang chuan, thil nih dan pangngai hi chu a awm ve a, an zir loh lam pawh hi. Pathian thil rel dan hi chu a awm ve a ni.

Tuihna te chu, tlang chhip hi kawrawng huau ah tui tling khat pupin rawn luang chhuak zur zur pawh ni seng, a daih seng lo a ni. Pathian-in lei hnuai atangin a rawn pump chho ve a, a kal ve a ni. Chuvang chuan, ngaw avanga tuihna awm ringawt ang sawi hi chu, a ni bik chiah lovin ka hria. Ramngaw awm lohnaah phul tlangah te pawh tuihna tha tak tak hi chu a awm ve a nia. Amaherawhchu, kha avang khan ramngaw hi humhalh lo ang u, ka ti reng reng lo.

Nimin ni tain ka hria, kan House Leader khan ruihhlo dona chungchangah khan "NGO te, khawtlang tlawmngai pawlte tuam chak ila," tih a sawina ah khan, "Excise Act atangin an han en a, a lo tih theih loh a; Vantlang local police officer tih ang chi police manual ah khan a lo awm a," a tih ang deuh khan, 'ramngaw leh nungcha humhalh turin tualchhung mi NGO te tihchak' tih ah pawh khan, tualchhung volunteers te hi ruihhlo dapah ringawt ni lo khan power pek ve theih dan awm se a va tha awm ve aw, ka ti a ni.

A dik tak chuan, nungcha humhalhna lamah kan thangtharte an than harh chak leh an rilru a pek nasat tawh viau laiin, ze hlui ngai, tunhmaa ram vah nuam ti tlat te kha an la tam lutuk. Hengah hian awareness a that chhoh viau zel a ngai.

Tin, a lehlam zawngin department pawh hi an inenchian ve chu a ngai ka ti. Ka bialah Tuichang kamah khian vahui-sih tha deuh mai a awm a ni. Tunhma Serchhip bial anni laiin private school an din a, an zirtirtu hlawh tuak nan vahui an kap a, an zuar thin a ni. Chu chu Forest Department pawhin man an tum hial tawh a ni. Chutiang khawpa sih tha chu hmanni ah a humhalh nan Thenzawl DFO tirhin RO-in khawtlang ngenna angin a humhalh dan tur leh a venna tur buk siamna tur proposal an siam a. Proposal a kal a kal a, a tawpah, 'a lu lam chu forest area a ni lo a, kan siam thei lo,' an ti daih mai a ni. Khatiing khan khawilaiah emaw khan an ram forest area ni loa an hriatah khan sazuk zu kap se, an man leh tho si ang; 'kan

ram' an tih loh laiah khan sakhi te, sakei te emaw kap se, an man tho si ang.

Tiang deuh chuan, sum senna tur nia an hriatah hi chuan an teh dan hi a mak ka ti. Chuvang chuan, kha proposal kha an ti duh lo tak tak anih chuan, 'Hriangtlang khua chuan high school private-in kan din a, zirtirtu hlawh tuak nan kan lo hmang leh mai dawn em ni ang' tih kha kan Minister hian a tawp khaikhawmnaah min rawn react se ka duh khawp mai.

Ramngaw phul chak zia kan sawi a, thingkung kum tin Aizawl City Park-ah an sem chhuak chur chur a. Guideline tha awm bawk si lo; kum tin thing phun tur sem chhuak siin a thing hi kan nei puitling lo lutuk; a guideline awm bawk silo. 'Kawng atanga feet chuti zat tur a ni,' tih lam a awm lovin kawng hnaih em emah rem leh rem lovin kan phun a, a enkawl zui a awm bawk silo. Chuvang chuan, a department ber hi an sincere tawk lovin ka hre deuh a ni.

Tin, ramngaw humhalhna atana ka duh em em leh ngaihdan ka neih chu, khilai khawchhak lam tlangdunga leirawhchan (brick) siamtute'n an vawikhat rawhah thing motor trip eng emaw zat an hmang ni thin hi. Khang humhalh nan khan state tinah tunhmaa kan hman tangkai loh *lungalhthei quota* min pek thin min chhuhsak leh tak vek kha ramngaw humhalh nan min pelet turin Central Sorkar dil ila, Forest Deptt. hian buaipui zui ta sela; kan thingpui dawr meihawl hmang zawng zawng leh brick rawh ho hnenah hralh ta ila ramngaw hi chu kan humhalh tha viauin ka ring.

Hmanah kum 20 kal ta ah khan Tuahzawl, kan khuate'n ramsial kan humhalh a, kan lo neih a harsat phah em em chungin Forest Department hian min ngaihsak lo reng reng a. Khatih laia bialtu MLA Pu Thlenga khan engmah ti velo kan khaw thenawm Rulpuihlim kha nungcha humhalh lawmman kha a va pe ve ringawt a; kan khaw thinrimin ramsial humhalh pawh kan va ti tawp a ni. Hetiang lamah hian a department ber hi sincere deuhin kal tawh se, tih kha a sawi duh a ni.

Tin, pollution test-na hi privatize theih ni sela; hmun khatah new capital-a va intlar put ngai lovin hmun tinah hian awm mai sela a tha awm mange aw ka ti bawk a.

Demand No. 35 - Fisheries Department:

Fisheries hi hma kan sawn viau naa kan ram leilung zir loh avangin kan dil te a lian tawk thei lova, tan hi kan la ngai viau a ni tih kha kan sawi duh a.

Demand No. 41 - Sericulture Department:

Sericulture pangang vulh eizawn nan a tlak zia kha Dampa bialtu Pu Rintluanga khan a rawn sawi a, dik pawh a dik hmel a. Mahse, 'pangang vulh hi a tha a sin maw le', tia an fak an fak lai hian kum hnih-khat an ti a, an tawp leh ringawt mai thin a, a vulhtu tam ber hi. Hei hi engnge a chhan zir chiana hmasawn a tulin ka hria a. Pu Rintluanga khan, 'ka ngaina vaklo' a ti a, kan Minister hi chu engmah hlau lo a ni a, a huaisen a; a nupui chauh a hlau a. Chuti chungin zantin a bulah a mu ngam a, mi huaisen a ni. Ani hian theitawp chhuahin han bei chho sela thain ka hria.

Demand No. 6 - Land Renenue & Settlement Department:

Kan minister hian thil thar tha tak tak a tichhuak a, a fakawm khawpin ka hria. Empanelled firm an tih hian thingtlang lam a la cover thei dawn rih lova. Heng te hi Aizawl pawnlama tlawm tak taka koh theih an nihna tur hian hma han la se la a thain ka hria. Tin, Lengte

khu tunhmaa Mamit District indan tawh hnu si Revenue Office a la mumal hma si khan Aizawl District lama pass siam tam tak, Aizawl Revenue office-a chhiah pe tam tak an awm a, hengte hi engtia tih fel tur nge tih hi ka zawhna a ni a.

Pu Chhuanthanga'n a rawn sawi tawh a, Chekbawk buai hi chin fel vat a tha khawp mai. Tin, Maumual khu hmanni khan a committee te an din a; kha kha engtianga tih fel tur nge tih kha ka hre duh baw k a. Tin, ramri hrula ramri buai, Assam nen ramri hrula leilet neiho hi ka ngaimawh khawp mai; anmahni an awm peih si lova, vai an dah a, a chanve in an insem a. Khang vai an chhawrte khan vai dang an chaw lut zel a. Ramri buaiah chuan, 'nakinah' kan ti kan ti ang a, physical occupation kha a lo pawimawh a. Khunglaiah khuan mihring kan indah tam a ngai. Khunglai ramri hrula ram nei enkawl peihlo zawng zawngte chu an pass cancel vek mai thain ka hria.

Pu Speaker, ti khan kan minister pahnihte - Pu Lalthansanga leh Pu B. Lalchhanzova te demand hi tha ka ti a, pass ngei ka duh e. Ka lawm e.

SPEAKER : Tunah chuan, Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e. Hei, a tlailam deuh tawh a session a rei tawh deuh baw k nen hun pel thui lova sawi kan tum ang a.

Demand No. 33 - Land Resources, Soil & Water Conservation Department:

He department-ah hian Mizoram tana pawimawh tak tak mai item a awm a, a pakhatna chu *kuhva* a ni. Soil Department hi *kuhva* changtu department a ni a, Mizoram sum-chang thlaih chuan *kuhva* hi a sum hrawm na ber leh sum kan lakluh tamna ber niin ka hria a. Kan bialte pawh han sawi ila. Hachhek bialah *Kuhva* chingtute an hlawhtling em em a, an taima baw k a; *kuhva* huan hi an nei zau tawh hlawm khawp mai a ni.

Hmanniah he House zahawm takah hian ka sawi tawh a. Farmers te hi khawngaih ngai, mirethei leh eng emaw ang zawnga kan sawi thin hi, Hachhek bial ah chuan he tawngkam hi a tidik lo a ni tih kha ka sawi tawh a. Hachhek bialah hian farmer khawsa thei tak tak, chhuanawm tak tak, hausa tak tak *kuhva* avang hian an awm mek a ni. Chutih mek lai chuan *kuhva* hi tunlai hian a hriin a man tlat mai a, Hachhek bial mai ni lo, Zampui tlangdung te pawh *kuhva* chin nasatna hmun a ni a. Anni phei chuan Kawrthah tlangdung leh Hachhek tlangdung te aiin an tuar hmasa a. Hei hi he House zahawm takah hian Pu Speaker, nangmah kaltlangin kan minister zahawm tak ka ngen duh a, hmalak tumna rilru te pawh a nei niin ka hria a. *Kuhva* tam leh *Kuhva* hri venna hi ngaihtuah a ngai khawp mai; zirtirte pawh an ngai a. Kei pawhin keima thahnemngaih nain horticulture lama kan mithiamte pawh ka hruai thla tawh a, mahse *kuhva* farmers te hriatthiamna level a la sang taw k lova. Sum tam tak tak an tel a, an sum tel kha an *kuhva* damrei nan leh a lo hrisel nan an hmang tam taw k lo ni te pawhin a lang a. Hei hi awareness neih that taw k loh vang te pawh a ni mai thei a. Chuvang chuan, *Kuhva*-tam tih rehna tur hi Mizoram-in kan mamawh a; tihreh theih ni te pawh hian a lang a. Tawngkama mithiamte kan zawh dan chuan, chu chu he subject kan sawi lai hian, Mizoram *kuhva* chingtute tan *kuhva* tam zel tur danna turah sorkarin hma a lak a tul hle a ni. Hengah hian engtinng e hma lak a tum tih te ka hre duh a.

Tin, a hralhna chungchang hi House-ah hian ka sawi fo tawh a, a ninawm mai thei a; mahse ka sawi leh talh duh a ni. *Kuhva* hi nikum hmasa leh hmasa leh ah te khan a man pawh a man

khawp mai a. Tun hnaiah hian kuhva man hi a tlahniam tlat mai a, *price-support* kan tih ang chi te hi tun financial year tharah hian, a item te kan la thlang fel lo te anih chuan a tam emaw, tam lo emaw kuhva ah hian price support pek ngei hi avan tul em.

Tin, Land Resources chan tho ah hian hmunphiah chungchang hi a sawi loh theih loh a. Hmunphiah hi free market system anga an kal chuan mahal system te hi control na chikhat a ni a, tuna ZPM rawh tih hma pawhin khang khan min tibuai thin a. A free hian an hralh tha a ni, tunah hian empanel firms te an awm laklawh a, sorkarin a leina tur rate te a puan hian hmunphiah hralhna hi a tilai khawlo zo nge, hmunphiah rate hi a thalo tlat mai a ni. Kan rate sawi anga hralh te chu a awm zeuh zeuh mai thei a, khatiang awmchhun kha kan vawrh lar thiam viau a. Mahse sorkarin rate kan tuk anga hralh pha lo hi an tam a ni. Chungah chuan kan bialte pawh an tel a, hei hi en that a va ngai em tih kha ka'n sawi duh bawk a ni.

Demand No. 35 - Fisheries Department:

Fishery hi kan chhungkaw eizawna te pawh a ni ve a. Sangha dil enkawl hi kan management te chu a fuh tawklo tih ka hria a, kan hmanlo bawk a; kan thiam tawklo te pawh a ni ang a. Kan Governor kalta kha a tui ve khawp mai a, tum khat chu kan ti ti a, kan sangha dil neih dan te pawh a lo hre ve a. 'Andra Pradesh-ah i engineer pakhat tir la, sum te pawh seng la, tuna i thar let tam tak hi i thar thei ang' te pawh min ti a, min phurpui em em a. Mahse, tunah a takin kan la chantir chuang lova. Engpawh nise, Sangha dil neitute hian enkawl ve deuh hi chu a ngai a ni tih hi a takin ka hmuchhuak a. Han dah tawpa, a man hun nghak ringawt lova han enkawl hian Tripura te pawh an hlawhtling em em a, chutiang chu keini pawhin kan tum ve a. Chutiang anih lai chuan, sorkar sem hi keini hi chuan kan dah duh miah lo; hei hi sorkar ka demna em em pawh a ni lo. Tun ZPM sorkar emaw, MNF sorkar emaw pawh. Tum khat chu subsidy in kan ti ve a, dil pawh an rawn phur thlang a. Mahse kan dah duhlo, a te lutuk. Chuvang chuan, man to deuh mahse a lian tham deuha kan sangha farmer-te hian an dah a pawimawhin ka hria a, chung chu a hlawhtlinna bul pawh a ni. Hei kum tam tak kan lo ti ve tawh a, a taka hma kan laknaah pawh a supply hi tlem deuh mai se, a chi hi erawh lian deuh se; chutiang chuan kan sangha farmers ten an hlawkpui ang tih kha kan sawi duh a ni.

Demand No. 36 - Environment, Forests & Climate Change Department:

He department hi a pawimawh em em a, mahse kha lam sawi lo tho siin kan bial lam a sawi loh theih lova.

Forest hian pawimawhna tak a nei a; Langkaih balu kan duh vek tawh. Hman deuh khan Siaha ah ka va kal a, Langkaih balu tho a ni an lo duh ni. Tin, PWD quality control pawh hian Langkaih balu kher hi quality control nan hian a pawimawh tih an hria a, sorkar building atan pawh Langkaih balu kan hmang zel tawh a. Helai hi Forest Department leh Geology & Mining an ni maithei e, ka hre chiah lova; mumal zawk, systematic zawka Langkaih balu lak dan tur ngaihtuah a ngai khawp mai a. Ei bela hmang tam tak an lo awm tawh lai hian kan lui kamte tichhe lutuk lo zawng sia thlah zalen, mahse, ram tichhe lo zawnga balu te kan lak thiam a pawimawhin ka hria a, helai hi kan sawi duh a. Forests-in Dan hmanga khauh taka an han tih tlur chuan Zoram pum hi kan buai der tawh, khu lai balu khu kan rin vek tawh avangin.

Tin, Forests IB ka bialah khuan a awm nual a, ka hriat chian pakhat chu Kawrthah Forests IB khu a ni a. Riah te a nuam a, ngaw hnuaiyah a awm a. Thla en zan leh a en loh zan te

pawhin khu IB khu a nuam a. Khu khu chei that deuh ni se, AC te pawh room khatah chuan a awm a, dah belh dan a awm thei em tiin Pu Speaker, kan Forests Minister zahawm tak hi ka ngen duh a ni.

Tin, PWD IB hi; ram lum a ni a, PWD IB Zawlnuam te, Kawrthah te khuan AC kan mamawh khawp mai a. Thil harsa pawh a ni lova, SASCI ah sum kan puk tam bawk a. Chuvang chuan, khang kha ka'n ngen ve duh a ni.

Tin, forest clearance chungchang hi hei aia awlsam hian a tih theih em, tih hi ka rilruah a lian a. Kan development kal hleihtheih lohna chhan hi forest clearance hi a ni fo mai a, kan Chief Minister zahawm tak pawh hian a buaipui nasa a ni tih ka hria a. Mihring ve tho an ni a, State Govt. leh Central hnuaiia thawkte pawh. Kan development leh project te dal zawng nilo hian forest clearance inpek dan hi a awm theih ka ring tlat a ni. Chuvang chuan, helai hi kan Minister zahawm tak hian lo enchiang sela tiin ka'n ngen duh a.

Kan bial bikah Darlak leh Bairabi inkara Sihthiang kawng, economic kawng pawimawh lutuk te khu forest clearance awm theih loh avangin sanction sa thlap a han tawl ringawt te khu a uiawm em em a. Tin, Lunglei-a Sports Department hnuaiia Zobawk Sports Academy te pawh North East-a Sports Academy tha ber tura duan MNF sorkar hmasa hunlaia duan Congress sorkarin a chhonzawm, MNF kan han sorkar ve leh, kei pawh Sports Minister ka han nih khan phur taka kan chhonzawm, sum tam tak sanction Central sorkar atanga kan hmuhchhuah pawh kha 90% deuhthaw zawh anih hnu khan 90% chu a tling chiah lo maithei e; Green Tribunal atangin forest issues avangin tihtawp a ni a. Tukin chawhma lamah te pawh kan sawi ang khan, a phul lem te pawh la sawn tura tih kan ni a, Rajiv Gandhi Stadium, Mualpui ah kan lo mamawh em avang khan khalaia phul lem an cease mai tura kha cease lovin Rajiv Gandhi Stadium ah khan kan suan phei ta kha a ni a. Sorkar order leh minutes te pawh a awm thlap a ni; kha kha chu ka sawi thui tawh lo ang a. Tichuan, forest clearance hi tih takzeta kan ngaihtuah a ngai a.

Demand No. 17 - Food, Civil Supplies & Consumer Affairs Department:

Tin, a pawimawh vanga a hnuhnung lama ka dah hi Pu Speaker, tawitein ka'n sawi leh ang a. Hei, *hnam issue* a ni a, ram pum issue pawh a ni. Phuldungsei khuuah ration card dan dik taka nei thlap mi 85 (tihsual palh ni chuan ka hria a) delete (paih sak) an ni a. Hei hi a serious-na em em chu, ramri a ni a, ramria ram kan inchuh te, mihring kan inchuh te hian 'ration card petu nih kan inchuh thin' tih hi chu sawi ngai lovin helaia awm te hi chuan kan hre vek mai. Ration card an neihna lam kha an awn lam pawh hi a ni duh khawp a; chumi hria chuan hei Nagaland leh Assam ramri ah te, Vairengte thlang lamah te pawh a ni ang a; Kerala leh an state thenawm ramrite pawh Tripura-a an officer pakhat Keralian nula fel takin 'ramri ah chuan ration card hi a double deuh vekin India ramah hian a awm a ni lawm ni' tih te pawh kha a sawi dan a ni a.

Tiang khan heta mi 85, Mizo tawng hmang lo chu pathum chauh an awm a niawm e. Sailo Lal Hrangvunga khaw din Mizo khaw chhuanawm taka Mizo hman atanga mei mit lova awmte ration card atanga kan paih chhuak hi a pawiin, a serious hle a. An YMA President te an tel a, an rilru a na ngawih ngawih a; an khawtlang hruaitute pawh an tel a, an rilru a na a. Ka hriat ve leh kan Chief Minister zahawm tak hnenah appointment pawh la lovin an ration card no. te nen chuan ka tlan chho a, kan sawi dun a. Tha takin min lo dawngsawng a, hma pawh la nghal tura a insawi avangin hma pawh a la nghal ang tih ka ring a. Chuvang

chuan, ‘politics-a lak pawh a tha lo e; hnam issue tak tak a ni a,’ tiin politic-a lak loh hram hram pawh kan tum a. Mahse, counter-na leh eng emaw indiriamna lek lek te kha a awm a, mahse kha kha chu sawi ka tum chu a ni lo.

Tunah hian Mizoram sorkar-hnathawkte an smart hle tih ka hria a, ration card management system ah hian a che hmasa Mizoram hi kan lo ni a. 2021 vel atang khan he RCMS hman hian an system hi keimah pawhin ka mit ngeiin ka hmu a, Pu Speaker, hnial chi ka ni miah lo; hei hi chu ka hrechiang ve tlat. Suakkungi te pawh kha engtik niah nge a ration card leh a adhaar card kha online-a linked a nih tih hi system ah hian a lang vek a ni; an approved ni te pawh kha a lang vek a. Chu mai ni lovin, an delete sak ni pawh kha a lang vek a ni he RCMS ah hian. A lo tha khawp mai. Chu chu sorkar hmasa lam atanga lo implement ngar ngar tawh kha a ni a, 2024 May lai vela tihsual palh a nih ka ring a. A officer concern te pawh hi an hming chu ka sawi lo ang a, kan inbia kan inbia a.

Heng kan sawichhuah avang hian engmah tuar lo se ka duh a. Mahse, ration card online thlunzawm tawh hi state dangah off-line in an lo la nei anih pawhin, a online zawk kha survive tur, preview zawk tur a ni a. Mahse, online a zawm zawktu chu Mizoram kan nih lain, a online-a zawm zawk tu dan dik thlapa ration card an neihna hmuna mite khan a delete tu ah kan tang khut a ni a, hei hi a pawh khawp mai a. Chuvang, chuan hei hi chu kan vei tlang turah ka ngai a. Khawngaih takin kan Minister zahawm tak hian he thil hi, a theih ang angin keipawhin ka tanpui ang, tanpui a ngaih chuan. An duhthlanna an adhaar card leh ration card online-a thlun zawm leh dan tur hi min ngaihtuahpui sela; kan House Leader zahawm tak pawhin a vei zawng te pawh a ni bawh a. Hei hi min hriatpuiina, a theih ang angin he thil hi min pui sela.

Buhfai man to leh a *multiplier effect* – ‘buhfai man to avanga maian man te, samtawh man te, tawkte man te a to vek’ tih laia kha sawi ka tum viau a, mahse ka sawi tawh lo mai ang. Awle, Pu Speaker, ka lawm e.

SPEAKER : Aw le. Hei dar 5:00 a la ri lo deuh a. Hriselna te a inchen lo thei avangin kan chawl ang a, dar 5:30 ah i lut khawm leh ang u aw.

(Recess at 4:53 PM)

5:30 PM

SPEAKER : Member zahawm tak Pu TBC Lalvenchhunga ilo sawm ang.

PU TBC LALVENCHHUNGA: Pu Speaker, ka lawm e. Vawiina kan Minister zahawm takte - Pu Lalthansanga leh Pu B. Lalchhanzova te department chan demand sawihona ngaihnam tak tak kan ngaihthla tawh a, han sawi belh em em tur pawh ka nei lova. Vawinah department 7-te demand han en mai chuan kum dang aia a danglamna em em a awm lem lova. Chutih rual erawh chuan pawimawh, ka duh lai tawi te te han thur chhuah ka duh a. Kan sorkar tharin amalgamation a han kalpui atang hian department thenkhat enkawl sorkar revenue expenditure tih hautak lohna tura kawng pawimawh tak tak lo la awm turte niin a lang a.

Demand No. 17 - Food, Civil Supplies & Consumer Affairs Department:

He department leh a enkawltu kan Minister a chhuanawm hlein ka hria a. Pakhatnaah chuan, Mizo mipuite kan moral min siamtha thei tura hma la ngam, politically chuan, ‘a huaisen thlak mang e’ han tih tur, han rik deuh nak nak te pawh a awm chungin huai taka kaltlang puiin vawiin niah chuan sorkar-in sum eng emaw zat a lo hum thei ta a. Hemi a humna kawngah hian sawi dan chi hrang hrangte pawh awm mahsela, mirethei leh harsa *below-poverty line* a awmte tan khan danglamna pakhatmah awm chuang si lovin, khawtlanga eizawnna nei ve deuchte leh *above-poverty line* a awm chinte tana sorkara innghat bur tawh lova mawhphurhna mipui hnena min han hlan let ngama, kan moral te sorkar pui tura min rin ngamna, Foods, Civil Supplies & Consumer Affairs Department-ina hma a lakna hi lawmawm ka ti em a, han sawi loh theih niin ka hre lova.

Demand No. 6 - Land Revenue & Settlement Department:

Chutiang bawkin, Land Revenue & Settlement Department-ah pawh han sawi hnawm viau mah sela, kan sum lak luh leh kan sum thawhchhuah ve te a beitham em em tih kan hria a, kan pawm vek a. Chutiang kawnga a punna a percent te pawhin han sawi thin mah ila, mi State aiin a la hniam fe a ni. Amaherawhchu, ke pen a ngai si a, chutiang kawnga Minister-in a ke min han penpui ngam ngat hi fakawm ka ti em a, han sawi lohah chuan ka ui a. Kan ram kalphung angah hian sorkar atanga engkim beiseina, Mizoram sorkar ah pawh eng thil pawh lo thleng se dil theih, sawi chhuak thei nia kan innghahnaah hian kan moral corruption ngaihtuahnaah leh kan thil thlir dan reng rengah hianin a thlawna neih tumna a lian ta em em mai a.

Chumi se-dai han thiata, ‘kan thawk chhuak ve tur a ni, kan chanai malsawmna kan dawn te hi sorkar-ah a harsa zawkte tan tho a ni’ tia an hlan ngamna kha a lawmawm ka ti em em mai a. Anni avang hian vawiin niah hian kum 60 chunglam enkawltu nei tawh lote pension a let 10 dawna a han pung thei ringawt te hi, an hmalakna avang a ni, a tih loh theih loh a. Khang sum zozai kan pek chhuah te, kan sorkarin a mi harsa zawkte a han pek thina te leh 300/- lek lek han lak te, khatiing ni tawh lova a 1000/- chuang thah han lak theih a ni ta te hi, an thawhrah leh an thawhchhuah ti ila kan sawi sualin ka ring lova, a lawmawm hlein ka hria.

Chutihrial erawh chuan, hmabak kan la nei ko em em mai a. a bik takin Land Revenue & Settlement pawh *hnawk* tia sawi thin a ni a, zep thu a cheng lova. Kan ram neih danah te kan hre vekin ka ring a, a thei fate, a thil ti theite, eng emaw chenah ram han humhalh te, ram han insahthlak kawngah te, LSC siam kawngah te kan inthlau em em mai a. Tam tak kum 2-3 te an vei lain, a then nikhata han lehlan thei te kan awm bik thin a; chu chu thu dik a ni a, vawiin nia mite hi chuan kan hre vekin ka ring a. Hemi kawngah hian eng emaw chen chu hma sawn tawh mah ila, land record digitalization chungchangah hmasawmna tur kan la ngah hlein ka hria a. Hemi hi kan tih vat loh chuan kan ramchhungah keimahni ngei te pawh kan bial chhungah buai han tih te, danin a phal loh LSC tereuchte te LSC lo nei fir ferte, stall pass lo nei fir ferte, revenue pass lo humte kan tam lutuk a, heng hian khawtlang leh ram tana hmasawmna tur thui takin a dal a. Heng digital land record management pangngai tak kan neih hunah chuan awlsam zawka kan inpek chhuah theih ka ring a. Chutiang sutkianna kawnga *e-Ram* kan neih te, hemi piahlahmah consultancy te rawih theiha out source han neih te hi a lawmawm ka ti em em a.

Chutih rual chuan, mihring fel famkim kan awm lova, tuna kan implementation ah pawh

hian *flaws* (famkim lohna famkim lohna) a awm tih a lang reng mai a. Hengte pawh hi department lam pawh inenfiah a thain ka hria a. Kan Consultant rawih ngei ngei te pawh department-a stake nei, mahni chenpui - *under the same roof*-a la awm te pawh he consultancy-ah hian an involve nia sawi a ni bawk a, heng te pawh hi enfiah ngai ngawih ngawih a ni a. Heng hi danin a phal loh mai piah lamah, a *immoral* em em mai a, chungah chuanin mipui tana thatna leh zangkhaina a thlen aiin mithenkhat tana hlawkna kan insiam ang tih a hlauhawm a. Hetiang lamah hian ‘a tawp’ kan tih lai tak kan sawi chhuah ngam thin loh laia kha a daltu a ni ang tih a hlauhawm a.

Chutiang bawkin Food, Civil Supplies & Consumer Affairs ah pawh Legal Meteorology lamah hian hmalakna tur a la lian hlein ka hria a. *Bukna dik* tehna tur kan neih theihna tur te, chutiang bawkin *Essential Commodities Act* kan kenkawhna kawngah te pawh hmalakna tur a la awm niin ka hria.

Demand No. 36 - Environment, Forest & Climate Change Department:

A dawt lehah chuan, kan member thenkhatte kan sawi nual tawh nangin Environment Forest & Climate Change-a ka sawi duh chu, ramngaw humhalh chungchangah kan ram chu 85% forest cover area a la ni a. Chuti chung chuan thangthar-thalaite, NGOs te, CBOs te kan harh thar em em a, nungcha leh ramngaw humhalh kawngah te. Amaherawhchu, a extreme zawnga kan kal lutuk hian mi fate’n an tih bik ni lem lo, hmasawwna kawnga min daltu tam tak, kan rama department pakhat *concurrent list* a awm, Central-in thuneihna eng emaw chen a nei a ni tih kan hriat rualin, kan hmasawwna tur dal zawnga chet lakna a tam em em mai a. ‘*Ka department*’ han tih ang chi te, Forest Clearance han dil pawha expedite mai lova file kal kual thui lutuk te; chutiang bawkin water-rejuvenation tan a ni emaw, keimahni forest reservation a tan a ni emaw kan hmalakna leh kan sum sen tawhte thlirin he ram hian hei aia tha reserve area, ngaw enkawl, nungchang humhalh hi chu kan thei turah ka ngai a.

CAMPA fund chungchangah heng kan sum neih dan leh kan hmandan zawng zawngte thlir hian Environment, Forests & Climate Change Deptt. ringawt ni lovin, Mizoram sorkar department hrang hrang Central-a zawmpui nei, a bikin sectoral scheme kan implement hrang hrangtea sorkar-hnathawkte hi kan tan leh zual a ngai hlein ka hria a. A chhan chu, Annual Plan of Operation (APO) te, Annual Action Plan te a hun takah tumahin kan siam hlei thei lo a, financial year tharah kan han siam chawp a; approval a lo thlen chuan kum chanve a lo ni tawh a. Sanction a lo thlen chuan first-second installment pawh hmang hman lovin budget kan han revise a, RE-ah chuan a rawn pung thur thur a, GIA te pawh eng emaw chen chu. Mahse, a tak tak a rawn chhuah leh chuan installment vawi 1-2 bak kan la hman meuh lo a.

Chutiang a nih mek lai chuan central scheme heti zat nei department tam zawk hian kan beisei chu, harsa vak lem lova concept note nena kan hmuh theih, kan loan lak theih hrang hrang SASCI a ni emaw, NABARD a ni emaw, NCDC a ni emaw REC a ni emaw loan lamah invawm luh zung zung kan tum a, project plan siam kan taima em em bawk a. Amaherawhchu, keimahniin approved allocation pawh kan hnuk chhuak hlei thei lova. 10% GBS pheih chu kuminah hian (ka hriatsual loh chuan) department pakhat chiahin Central-ah kan dil a ni.

Hengte avang hian kan sum neih a ngai angin alang ka han tihna chhan kha, waviin hian

kan sum neih tam zawk hi nikum kum hmasa nen a danglam vak lo, salary component 90% dawn a ni deuh vek mai a ni. Khawi atangin nge hna a thawh ang? A hmaa kan sawi thin - kan duhloh deuh *other charges* ah heti zat a awm kan tih thin kha, a head a inthlak a, *other revenue expenditure*-ah tunah pawh another 5% dawn kan awm leh a ni. 100 zela 5 dawn *Office Expense* te, *POL* te, *Medical Treatment* te, engkim sorkar-hnathawkte hlawn leh salary kan inpek piah lamah *other revenue expenditure*-a hmanna tur mumal miah lo, a head mumal lo leh a hnuaia sub-head mumal tawh lovah kan hmang nasa a, heng hi a tawpah surrender kan ui leh a, kan savings te sorkar financial transaction a tibuai lian em em bawk niin a lang a. Hengte hi ngaihtuahnaah kan sorkar kalphung lo kal leh zel turah pawh hian kan rilruah awm se ka duh tak zet a ni.

Chungte avang chuan Pu Speaker, vawiinnia kan Minister Pu Lalthansanga leh Pu B. Lalchhanzova te demand hi tha taka, a bo a bang, luang ral awm lova mipui tan hman a nih theihna turin pass-pui atan ka rawn thlawp thu ka rawn sawi chhuak a ni e. Ka lawm e.

SPEAKER : Aw le. Member zahawmtak Dr. K. Beichhua ilo sawm ang.

DR. K. BEICHHUA: Pu Speaker, ka lawm e. Vawinah Pu Lalthansanga leh Pu B. Lalchhanzova te demand sawi mek a ni a, Member tamtakin tha tak takin kan sawi a, budget lampang kan rilru ah a awm lutuk lo hian ka hmu a, kan thusawi atang hian. He sorkar hi engkim tithei ang mai hian kan hmuh deuhin ka hria a. ‘Kan bialah chumi khami, chuti khati’ tih kha kan sawi dan tlangpui a ni a. Mahse, a chhungril han luhchilh hian chutiang em ema han chetna tur hi kan budget ah hian ka hmu bawk si lova.

Demand No. 33 - Land Resources, Soil & Water Conservation Department:

He Deptt. demand budget tlak hniamna chhan hi Pu Speaker, salaries vang te, 2024-2025 RE rawn langa NABARD loan atanga kuhva leh rubber te, link road siamna tura dah te sorkar kumthara a rawn lang ta lo vangte hi a ni ang a. Hei hi engnge a chhan tih laia hi a Minister hian nakinah min hrilhfiyah theih chuan. Tin, sorkar kumthar ah hian RKVY atanga ruahmanna rawn lang ta lo hi enge ni a chhan? RKVY hi a bikin he deptt. ah hian kan hmang tangkai viau thin a, kuminah hian rawn lang a awm ta miah lo a ni. Hengte pawh hi engnge ni a chhan kan Minister hian nakinah min han hrilhfiyah bawk se. Pu Speaker, NABARD RIDF te hi Rural Infrastructure dinna tur anih angin LRS & WC Deptt. te hnathawhna liantham ber a ni thin a.

NABARD loan leh RKVY kan tih te hi an hmuh loh chuan deptt. tan hmasawna hnathawh ngaihna hi a awm lo ti ila, kan tihsual ka ring lo a. Chung avang chuan sorkar kum kal mek NABARD loan crore 250 puk tura kan beisei kha kan budget speech ah khan kan CM zahawmtak khan a rawn sawi a, crore 180 vel beisei a ni a. Chuvangin, kan ram dinhmun heng kuhva te, rubber te, hmunphiah te mipui nawlpui hian nasa takin social media ah a ni emaw, kan titi ber a ni a. Kan economy uplift tur hian a tul zia kan hmu vek si a, mahse kan budget ah hian chutiang han hmuh vak tur a awmlo hi a pawl ka ti viau a ni.

Demand No. 35 - Fisheries Department:

hi Pu Speaker, heti taka kum kal mek RE punna chhan hi BE-a kan beisei loh sangha dil tanpuina PMMSY cheng nuai 4,226.90/- kan hmuh vang niin a lang a, kumthar 2025-2026-a budget kan beisei zat pawh a rawn lang lo a, SMS pawh kan dah lova. Heng avang hian sorkar kumthara deptt. demand a pun pah ta lo em ni, tih lai hi Pu Speaker, nakinah

a changtu Minister hianin min sawifiah sak se.

Tin, Pu Speaker, budget-ah hian RE tih tlem kan tum luat vang nge nia Supplementary Demand 2024-2025 Object head - *medical treatment* ah hian sum pek belh a lang nasa hle mai a, department tin deuhthaw sum ruahman aia tam an rawn hmang deuh vek mai anih kha. Kha kha RE ah a rawn reflect leh ta tho si a. Chuvang chuan hei hi kan lo sawi tawh fo - a nihna anga lang lo, ziaka lan mawi tumna mai a ni em tih ngaihtuahna te pawh min neihtir a ni. Helai te pawh hi chiang deuh hlekin Deptt. changtu Minister khan nakinah a rawn sawifiah theih chuan a lawmawm hle ang a.

Demand No. 36 - Environment, Forest & Climate Change Department:

2024-2025 BE atanga RE punna hi CSS, SMS atana sum hmanna a ni deuh ber a, sorkar kumthar budget a rawn punna chhan ber pawh CSS atanga sum hmuh kan beisei te rawn tarlan anih vang ni deuhin a lang a, Pu Speaker. Chuti chuan, Forest Deptt. hi ramngaw leh nungcha humhalh kawngah CSS thahnem tak implement tu deptt. a ni a, an dinhmun a pawimawh a. Kumtharah pawh theih tawp chhuah zel turin duhsakna ka hlan a ni.

He department hi kan ram dinhmun tunlai khawvelah *global warming* kan ti a, thil tamtak sawi tur a awm a ni. Pu Speaker, a bik takin heng pollution control lama kan hmalaknaa *vehicle pollution test* kan tih ang chi te pawh hi nikum lam atang khan ‘hmun tam zawkah siam ni thei se mipui tan kan lo awlsam phah anga, deptt. tan pawh hnathawh a awlsam phah ang’ tih kan lo sawi tawh thin kha a ni a. Vawiin ni thleng hian a tak hmuh tur a la awm lutuk lo te pawh hi kan Minister zahawmtak hian hma min lakak se a tha hle ang a.

Tin, Pu Speaker, Wildlife victim te zangna dawmna ex-gratia hi a dawngtu tur ten tun dinhmunah hian an hmu tha em, tih lai hi lo react thei se a tha hle in ka hria. Tin, tute chiah hi nge heng ex-gratia hi dil thei tih te pawh hi mipui ina kan hriatchian theih nan lo sawifiah se tha hle in ka hria a, cheng engzatnge pek annih thin te pawh hi min sawifiah sak se tha hle in ka hria a ni.

Demand No. 41- Sericulture Department:

Pu Speaker, 2024-2025 BE atanga RE tlema a rawn pun chhan ber nia lang chu, *Medical Treatment* head baw kha niin a lang a ni. Sorkar kumthar 25-26 ah hmasawna hnathawh liantham kalpui tur ruahmanna a lang lo a, a kallai mekte thawh chhunzawm bak tih tur awmin a lang lo a ni. Pu Speaker, a bik takin Sericulture hi State sorkar pawh hi helaiah hian kan insawrbing a tul hlein ka hria a. Sawhthing kan ngai pawimawh, hmunphiah kan ngai pawimawh, aieng leh hmarcha kan ngai pawimawh; a tha, a ropui. Chutih rual chuan, chungho ai chuan kei ka hmuh danah chuan kan ram hian potential a nei tha zawkin ka hria a ni. A bik takin rim lutuka thawh ngai lo, tar lam deuhte, naupang deuhte ina income an generate theihna tur deptt. a ni tlat a ni.

Chuvang chuan, tuna kan Silk Samagra-II kalpui mekah te pawh hian thar theihin a lo awm ta a, a lawmawm hle in ka hria a ni. Hengah hian sorkar pawh hian nichina ka rawn sawi takte a ngaih pawimawh ang hian ngaipawimawh se. Central Silk Board emaw Central sorkar, Ministry of Textile atanga scheme hrang hrang kan hmuh piah lamah hian state pawh hian helaiah hian kutthlak ve ta se chuan mi tam tak kut-hnathawktute hi kan chhawk zangkhai ngei ang tih hi ka hmuh dan a ni.

Ka ti thin a; *muga* te, *eri* te hi kumkhata thar chhuah theih a ni a; tin, mulberry te pawh a ni tho a. Muga te phei hi chu hunrei tak eizawna atana kan hman theih, thingkung pakhtatah ringawt pawh hian pawisa tam tak hmu theihna a ni a. Ka sawi thin a, pangang tam tak thingkungah kan lawn tir ang a, an rawn chhuk lamah chuan ₹3 theuh a rawn chhukpui dawn a ni. Chutiang deuh chuan, state sorkar pawh hian helai hi ngai pawimawhin concentrate deuh se a tha hlein ka ring a ni.

Demand No. 6 - Land Revenue & Settlement Department:

2024-2025 BE atanga RE punna langsar em em chu, *Medical Treatment* tho hi a ni leh a. Hei hi sawi tawh ang khan budget-ah hian RE lan tlem nan kan indim deuh thin niin a lang a, Pu Speaker. 2024-2025 BE atanga 2025-2026 BE a punna chhan ber chu, salary dah tam vang niin a lang a ni. Chuvang chuan, Land Revenue Department hian challenge lian tak a nei a. Kan Minister zahawm tak hi a fakawm ka ti a, a inpekna ropui ka tiin, taimak pawh a taima a ni. Revenue Department a thubuai rem tur a tamzia te ka ngaihtuah thin a, ka chan tura ka indah hian a luhai thlak dawn mang e aw ka ti thin a ni. Chutiang anih avang chuan, department changtu Minister hi vawiinah hian ka fak a, a inpekna hi ropui ka ti a ni. Tin, ani hi a la thalai baw k a, a viak a la tha a, a ropui hle a ni.

Department-in programme lian tak *Digital India Land Records Modernization Programme* a kalpui meka hi India ramah land records 95% dawn digitalized a ni tawh a. Vawiina kan Zoram, kan state dinhmun hi chiang taka member-te min hrilh theih chuan a lawmawm hle ang a. Chutiang chuan, thildang tam tak sawi tur pawh a awm a; Stamp Revenue atanga sum lakluh tam tak a awm a ni tih te pawh kha nichinah an rawn sawi tawh a. Theihtawpin tang zel se tun ai pawh hian inpe leh zual se. Hei hi kan ramin bung thar kan kai theihna tur nia ngaiin amah hian beisei tam tak ka nei a ni. Chuvang chuan, duhsakna kan inhlan te pawh ni ta se.

Demand No. 17 - Food Civil Supplies & Consumer Affairs Department:

He department-ah hian BE 2024-2025 atanga 2025-2026-a tlak hniamna hi ₹2072.65 lakh a ni a. He BE 2025-2026 tlak hniamna chhan hi salary leh wages-ah sum ruahman a tlak hniam vang te; tin, object head hrang hrang - 21. *Material supplies*, 27. *Minors civil & electrical works* leh 49. *Other revenue expenditure* atana sum ruahman kan dah tlem vang ni te pawhin a lang a. RE-ah chuan a rawn pung leh viau turah ngai ta ila.

Pu Speaker, sorkar kum kal mekah hian Supply Minister hian thuthlukna lian tham, Mizoram chhungkaw tam tak nghawng thei a siam a. *Card-var* hmang tute buhfai leina man 15/-kg atanga 30/-kg a tihsan a ni te hi decision lian tak, mipui min khawihna thei tak, mipui tana thil tha leh thil tha lo lian tak thlen thei decision a ni a. Vawiinah hian a reaction erawh chu kei chuan comment ka pe hran lo ang a, kan social media-a mipui tawngkam leh mipui chet vel dan atang hian he thil kan tih hi a fuh nge fuh lo tih lai hi kan en a tha hlein ka hria a ni. Revenue kan lakna lam ringawt ngaihtuah chuan, ‘a va’n ropui em’ tih theih tur chu a ni a. (**Speaker:** Minute 2-in i pel ta a; i zo thei dawn tawh em?) Chutih ruala mipui lam tawrhna kan chhut chuan, hei hi a fuh ber em ti kan in examine fo a pawimawhin ka hria.

Pu Speaker, heti laiah hian vanduaithlak takin non-NFSA te tana 15/-kg atanga 30/-kg a tihsan a nih thu nichin khan ka lo sawi tawh a. Special ration package *card-sen* kan han siam thar leh hian buhfai man hi 15/-kg atanga 20/-kg a tihsan hi, a punna tur dik tak a ni

zawk em tih te pawh rilruah a awm a. Chuvang chuan, mipuite hi kan darthlalang anni tih hi public leader-te chuan hria ila. Mipui chet vel leh mipuiina an lo perceive dan atang hian keimahni lam pawh hi sorkar ang pawhin, a department ang pawhin leh mimal ang pawhin Pu Speaker, kan hmalakna chhunzawm leh chhunzawm loh tur te pawh thliarthiam a tul awm mang e, tih lai hi ka rilruah a awm a ni.

Pu Speaker, vawiina kan Minister zahawm tak takte pahnih Demand hi ka support e. Ka lawm e.

SPEAKER : A lawmawm e. Member zahawm tak Pu C. Ngunlianchunga ilo sawm ang.

PU C. NGUNLIANCHUNGA: Pu Speaker, ka lawm e.

Demand No. 33 - Land Resources, Soil & Water Conservation Department:

Pu Speaker, Pathian leh mipuite zara helaia ka'n thut ve takah chuan, Lawngtlai-ah Soil DO Office hi a hmingin a awm ve mai a, a khawngaihthlak khawp mai. District hqrs. office ve si a building leh a vel hrim hrim pawh sum awmluh chu thudang ni se, district hqrs. a kan office te em hi chu tlema han dah pawimawh ve deuh hi chu a va'n tha em! Kan Minsiter khan min hriatsak se, SASCI te pawh a awm chho zel dawn a. Tin, he sorkar thar, mipui sorkar hian department anga a enkawl te pawh tih changtlun a tum chho zel ni te pawhin kan lo hre ve a. Hemi kawngah hian sawi tur tam tak awm karah kha kha ka'n sawi duh a ni a.

Tin, ka hma ami sawi ang khan Soil & Water Conservation-ah hian thil tam tak hmalakna RKVY atang te leh NABARD atang te pawhin a awm tawh thin a. Lawngtlai ah division kan nei ve a, a hmingin a awm ve chang chang a ni tih kha ka'n sawi duh a.

Demand No. 35 - Fisheries Department:

Pu Speaker, sangha-chi supply chungchangah hian kan fimkhur deuh chu a tha ka ti a. Hei, sorkar thar a lo piang a; nichinah khan Tuichawng Bialtu khan a sawi a, a bikin keini chhim lama Chawngte area-ah hian sangha chi siamna a awm tha a. Karimganj emaw, vairam atanga an rawn phurhte an luhai chauh em hnu ah dila kan han dah hi chu, survival chance hi a chhe khawp mai a. Tunlaih hian tender ni awm takin ka hria a, tin tender an pek hian fingerlings 2-3 inches tih vela sei tur a nih laiin a nawi thei khawp mai a.

Sangha dil hi eizawn nan tak pheii chuan ka hman lo na in, dil hi ka nei ve teuh mai a, Lawngtlai-ah. Chuvang chuan, heng hi buaipuia enpui deuh hi chu a tha khawp mai. Kalphung thar a ni bawka; tunah pawh hian 1 crore a awm dawn niin ka lo hria a; an tender chhuah danah te pawh hian hnawhsarum deuha tender chhuah han nam liam deuh mai tumna te pawh a awm em aw tih theih tur khawpin a ni a.

Tin, nikum budget session-ah khan kan Minister khan helai House-ah ngei pawh khan *'tumah duhsak bik kan nei dawn lo e; mipui-sorkar anih angin sangha dil siamtute tan a rualkhai thei ang berin tih kan tum dawn a ni'* a ti a. Zawhna ka zawt a, *Unstarred*-in a lo chhuak hlauh mai a, vawiinah hian; a vanneihthlak khawp mai a. Lawngtlai District tan 50 pek a ni a. Tichuan, Lawngtlai District-ah hian Lawngtlai East leh West MLA Constituency ang pawhin kan awm a. Chutah chuan, beneficiaries list ka dilna min rawn

chhannaah hian mi 50 hnenah cheng ₹75,600/- CSS pek a ni a. Chutah chuan, Lawngtlai West lamah mi 14 in an dawng a, chungte chu - ZPM Block President te, ZPM General Secretary te anni hlawm a. Hei, an hming list ka nei vek a, a baka hi Lawngtlai East vek an ni. Mi 36 hi Lawngtlai East lam an ni a. A nihna takah chuan, kei pawh CM ve thin ka ni a, tlang zawl emaw, khawilai zawl emaw laiha han siamah hi chuan hlawhtlinna tak tak a awm lo a ni. Kan bial leh Pu RMa bial ang te hi chu sangha dil siam nana *potential* tak tak, hectare chanvea zau han siamna ang chi kha a ni a. Amaherawhchu, ka zawhna min chhanna ah hian, a sem dan leh selection-ah pawh department-a thawkte kalin a hmuna an ram neih dan - tui a pe tha em; kawng a awm tha em, tih te en vek a ni a ti a. *Zawhna* hi a dik hian inchhang mai ila ava tha em aw ka ti a, a tak ram hi a tlem a ni, Pu Speaker, vawiin ah hian.

Hei sorkar tharah kum 4 hun a la awm a, a la kal chho dawn chauh a. Hetah hian sangha-a kan intodelh theihna tur a nih chuan 50% *political selection* ni sela, 50% hi department hian a ti tak takte thlang sela, tichuan kan hlawhtlin theih ka ring a ni. Tin, *mipui-sorkar* a nih ang taka a kal hi a tha khawpin ka hria a; a area-a awm, a hretute kan ni ve a. District a officer te pawh kan han be ve a, ‘kan naute an rawn dil ve dawn a’ ka’n ti a; ‘E, dil rawh se, dil rawh se’ an ti a. A hnu ah, ‘E, Sir, recommend siam tur chuan selection list a awm a, chu bak chu kan ti thei lo; an leng ta ngang lo a ni’ tih kha min chhanna te a ni a, vanduai thlak ka ti khawp mai a, hemi chungchangah hian. Kan Minister-in nikum Budget Session a a lo sawi tawh ang khan, a ti hlawhtling thei turte hnenah ngei hian pek ni thei se ka duh hle a ni.

Tin, *chinai-thi* kan tih te pawh hi tunhma kha chuan Fisheries Department office-ah hian lei mai theih in a awm thin a. Sangha dil siamtute tan sangha dil lei kha a lo thur tawh chuan chinai-thi hmang khan tuikang hnuah han theh ila, a lo al thar leh a, sangha te pawhin a ngaih thin a. Tunah chuan mumal tan lei tur a awm ta tlat lo mai hi ngaihtuah theih ni se a tha khawpin ka ring a ni.

Demand No. 41 - Sericulture Department:

Sericulture chungchangah hian CSS lam atangin Lawngtlai District-ah hian hei, Siaha bialtu MLA zahawm tak hi a minister anih lai khan hmalak a ni a; hengte pawh khi tlema enpui deuh chu a tha ka ti. Sericulture silk lamah hian Mizoram hi hmuna tha nei, potential tak a ni tih te pawh kan ngaihla thin a, sorkar hmasa ah te pawh. Amaherawhchu, kan sum hmuh atang te hian a hlawhtlinna kan hmuh loh palh a hlauhawm hle-in ka hria a ni.

Demand No. 36 - Environment, Forest & Climate Change Department:

Pu Speaker, ka sawi ziah thin a; kumin ah pawh zawhna ka siam leh a, mahse a chhuak lo tlat mai a. Ni 29.4.2021 ah khan vanduaithlak takin Sanctuary luia an kalna ah Hmunnuam khua Hnianshniangi chu vanduaithlak takin sai-in a phin darh vek mai a, sawichhuah pawh nuamlo khawpin a ruang hlawm tur te a awm lova. Zawhna ka siam thin hian ‘Wildlife Board thut a ni lo’ tiin min chhang a. July Ni 24, 2024 khan Wildlife Board meeting kan CM hovin neih a ni a, chutah pawh chuan sawichhuah a ni a. Amaherawhchu, decision hi a awm lem lova. Hetia department hotute ka’n zawhna mai mai ah pawh ‘Hei hi chu sanctuary chhung, protected area chhungah an kal a’ an ti a. Pu Speaker, kha sanctuary kha hung a ni lova, thingtlanga mite Ngengpui Lui-ah an kal a, Ngengpui Lui sir kam mai kha a ni a, mihring te pawh kha thingtlang mimawl tak takte an ni a. Chuvang chuan, ex-gratia pek ve hram hi chu a tha ka ti a ni. Mi-khawngaihthlak tak an ni a. Tunah hian a pasal hi Wildlife Guard-ah MR-a ni ang chu, lak a ni ve a, hei hi chu sorkar inthlakah hian thlak

anni ve mai zel a. Chuvang chuan, a pawisa kan pe thei lo anih pawhin, compensation atan PE ang tala appointment pek dan awm hram sela, tih kha ka rawn ngenpui leh hram a ni.

Tun tum Session-ah hian a lar ang reng khawp mai a, Phawngpui National Park te, Ngengpui Wildlife Sanctuary te. Kan CM pawhina a lo sawi thin, “a pek hi kan duh a ni’ a ti a, a lawmawm ka ti a. Kan ram tan thil tha a ni a. Tin, hei hi ka hriatsual loh chuan kum 18 chhung tan Mizoram sorkar hian a enkawl a, khami hnua peklet tur niin ka lo hria a; mahse, vawiin ni thleng hian peklet a la ni lova. Heng te hi kan Minister chak tak hian LADC area, an mahni thuneihna anih ang takin tunah chuan mithiam B. Sc Forestry te kha tam tak an lo nei ve tawh a. Chuvang chuan, heng te pawh hi tihhlawhtlinsak dan awm hram se, Pu Speaker.

Demand No. 17 - Food & Civil Supplies Department:

Kan Minister hi a lawmpuiawm ka ti a; mi viak tha tak leh chak tak a ni a. Chutih rual chuan, *card-var* chungchang kha thenkhat khan ‘a lawmawm’ ti zawng khan an sawi a; keini bial, minority leh thingtlang tak takte tan chuan *card-var* kan la effort lo deuh a ni. BPL-te leh a dang ho quota kha a awm si a, an zavaiin hlawh neilo, sorkar-hnathawk lo, income neilo te khan chang vek thei sela chuan a lawmawm lutuk dawn a. Mahse khatiang ni lo khan; ka biala khaw 2-3 lek han lachhuak ila - Bolisora ah hian in 212 an awm a, sorkar-hnathawk chu zirtirtu MR leh dawrkai (thingtlang dawrkai chu te-reuh-te te a ni a) hetah hian in 72 hian *card-var* an la nei a ni. An khawngaihthlak em em a, cheng 15/- atanga cheng 30/- a an han lei kha chu; an tap a ni. Chutiang chuan, Damlui - in 194-a in 68 kha *card-var* nei an la ni a; chutiang chuan, Karlui I - in 266-ah in 121; Pandawnglui - in 147-ah in 59; Vaseikai - in 325-ah in 100; Nghalimlui - in 267-ah in 81. Chutiang chuan, ka bial, a bik takin rural area te hi BPL ni vek thei se chuan a lawmawm lutuk ang a; mahse, BPL ni tur khan quota a lo awm si a.

Helaiah hian, *entirnan*: - Lawngtlai College Veng te, AOC te, Thingkah te, hengah te chuan sorkar-hnathawk leh tlema sum leh pai dinhmun tha deuhthe pawh an lo awm a, a zia tak a awm e. Tin, helaia kan MLA-pui thenkhat ten a tha an tih viau lai khan keini tan chuan hei hi chu manganthlak tak a ni. Ni khatah chaw vawi thum - zing, chhun leh tlaiyah an ei a, 15/-a lei thin pawh kha a harsa tih tawh naka laiin 30/-a an han lei kha chu, a tah hian an tap a ni! Chuvang chuan, kan Minister zahawm tak hian min han enthat pui deuh sela; khang ho tih nep sak dan a awm theih chuan a lawmawm khawpin ka ring a ni. Thenkhat tan a that viau laiin, keini tan erawh chuan a vanduaithlak mah mah kan ti a ni.

Tin, ration hi thla tir lam nilo thla tawp lamah te, thla laihawl velah te an han la hi chu a manganthlak khawp mai. Ration an han lak tlai deuh tak tak pawh hian ration-a innghat hi an tam si a, hengte hi thla tir tea lak theih dan kawng te hi a awm em? Sorkar lam atanga harsatna awm an sawi ang khan, khawpuiah chuan buhfai han leina mai turah an harsa lo a ni. Amaherawhchu, keini thingtlang bialtu tan chuan phurrit a ni tlat a ni Pu Speaker.

Pu Speaker, an sawi tawh a; buara bag ruak kha dah let tur an ti a, a remchanglo te khan pawisain an pe tih te a ni a. Buara ruak kha enga tana hman tur nge? Tin, thingtlang godown tam takah khang buara kha retailer atangin collect a ni a, sorkarin a la leh tawh si lova, buhfai dahna tur tak tak atan pawh hnawksakna chin a awm tlat mai a ni. Chuvangin, buara bag kha dah let tura kan ti a nih rau rau pawhin a seng khawm ran dan ngaihtuah ni ta se.

Tin, buara pe theilote'n a pawisaa an pek tlingkhawm kha engzah nge ni tawh? Tin, kha pawisa kha eng head of account-ah nge dah luh a nih? Tiang khan buara man an chawi a, engmah report leh deposit mumal awmlo khan a duh duhin an lo hmang ta mai nge, tih laia kha kan Minister hian a hre vek turah ka ngai a, mifel tak leh leh tha tak a ni a. Khangte kha ho ang reng taka lang ni mahse, pawimawh tak a ni tlat a ni, Pu Speaker.

Tin, *revenue head*-ah khanin land-lease (**Hon. Speaker:** minute 5-in a pel tawh e.) Aw le. *Land lease* han tih khan, *hralh* nge, *hawhtir* tih laia kha; hei kan House-ah hian land lease kha hralh ang lek lek te'n kan sawi a. Kei paw'n ka lo hriat ve dan chuan, lease-a kan pek hi chu *entirnan*: - kum 99 atan te, kum 50 atan te pawh a lo ni mai thei e; khang kha 'hawhtir' a ni a. Kha a lease neitu khan a ownership kha a va nei chuang lova, a hawhtir mai kha a ni a. Kan House-ah hian *lease* kha *hralh* ang maia kan han sawi laia hi; *hralh* nge nia, *hawhtir* tih laia kha min han react bawk se.

Pu Speaker, hun min pek belh a, kham lo tak chungin, ka lawm e.

SPEAKER : Tunah chuan, Opp. Leader-in sawi tur a neih chuan han sawm ila.

PU LALCHHANDAMA RALTE, OPP. LEADER: Pu Speaker, ka lawm e. Kan Minister zahawm tak takte pahnih Pu Lalthansanga leh Pu B. Lalchhanzova te demand kan han sawiho a, sawi tur tam tak kan nei a. Vawiina kan discussion tur a indawt dan ang hian kei pawh kan lut thla char char mai ang a.

Demand No. 33 - Land Resources, Soil & Water Conservation Department:

He department hi *dying-department* ang lek lekah kan ngai em aw, ka ti a. An pawimawhna te, an tangkaina te, an cover te hi ngaihtuah chian a thain ka hria a. Tun kum kal tur BE-ah nuai 947 zeta kan han pe tlem te hi engnge a chhhan aw ka ti a. Hei, a bik takin kut-hnathawk tam tak kuhva chingtute, hmunphiah chingtute, rubber lama eizawngte, coffee lama eizawngte, anni hian an cover anih avang hian kan House Leader hian nakinah sum an mamawh pawhin a *khawnpui* atang khan lo duh sak thei deuh se a thain ka hria a.

Chumiah chuanin, lian deuha kan sawi duh chu marketing lam kut mah mah chu a ni deuh a; *hmunphiah* bik hi Soil Department chanvo a ni a. Kan sorkar hian kum hnih hmel hmunphiah hralhna kan lo nei ta a; hmunphiah chingtute mittui kan han tlak nawn tir fo mai hi chu a pawh ka ti khawp mai. Kan bial leh zoram hmun tam takah hmunphiah hralh hlei thei lovin sorkarin kut-hnathawktute tana thahnem a ngaihna pawh a ni mai thei e; amaherawhchu, hmunphiah hralh theilo leh man chhe lutuk te, kek thei lova an awm avanga hmunphiah chingtute harsatna hi kum thar lo kal leh turah chuan he sorkar hianin uluk zawkin ngaihtuah thei hram hram se.

Tin, kuhva chingtute pawh hi an mangang chho viau a, kuhva smuggling item lo kal avanga kuhva hralh chungchangah harsatna te pawh an tawk thin tih te pawh kan hria a. Kan sorkar hian uluk zawkin kuhva chingtute hamthatna tur hi a ngaihtuah zel ka ring a. Hei tun hnaiah hian ram kang avangin kuhva plantation eng emaw zat kang tuarte an awm a. Heng te hi Soil changtu minister hian kuhva plantation kang te hi tanpui dan a awm em tih kha nakinah min react ka'n beisei deuh a ni.

Rubber plantation lamah pawh hian engzat nge tunah hian kan thar chhuah tawh? A

process-na tur khawl te pawh beneficiary ho hnenah tunah hian kan la pe leh zel thei em? Subsidize-a kan tih thin kha tunah hianin chhungkaw tam tak rubber thartu an awm avangin chu chu kan sawi duh lawk a ni.

Demand No. 35 - Fisheries Department:

Hei kan budget bu-a BE hi han en ila - central lam nena kan thawhhona turah sum leh pai hmuh beisei emaw, a dawhthleng tur lamah khan sum hmuh kan inbeisei lo nge ni; dah lan a nilo hi nakinah hei pawh hi hriatchian a tha hlein ka hria a.

Sanghaah potential area kan nei tha kan han ti a, kan la intodelh lo fo hi engnge a chhan ni ang, tih te kha rilruah a awm a. Kan sorkar hian kan hmalak chhohna turah hian sangha-a intodelh turin tih tak zeta hma la turin kan inruahman em, tih te ka'n zawh duh bawk a.

Demand No. 36 - Environment, Forest & Climate Change Department:

Pu Speaker, kan thu rei deuh tawh bawk a, fiamthu tlem te pawh han thawh ve deuh hlek ila. Hmanniah kan Forest Minister hi 'I vannei mang e aw' ka ti a. '*Savawm tibo tupa*' tih kha ka'n chak tehlu nen. Aizawl Zoo-a savawm kha a bo a, an zawng luih luih a, an hmu lova, amahin a lo haw ringawt mai kha a vannei hlein ka hria a. '*Savawm tibo-tupa*' kan ti thei ta lo hi a vannei a, vanneihna a keng hlein ka hria a.

Tin, thla khat dawn he House hi kan thu chho tawh a, mipuite paw'n min thlir a. I ding leh vei lama mite kan inpawh hle tih hriatna chu, wawiinniah te pawh khan Champhai North bialtu zahawm tak a zawhna tlat te kha a dangdaiin ka hria. '*Dampa tiger Researve-ah Dampa-savawm engzat nge awm*' tih a zawt tlat mai kha; kan House leader hian eng emaw *coined* kha a lo nei tawh a, khami a rawn sawi chhuak kha a dangdai ve-in ka hria a. Khatiang chi te kha kan innel tawhna, kan inkawm ngeihna niin a lang a. Kan han inti deuh barh barh thin nachungin helaiah hian chu chu kan sawi tel duh lawk a ni.

Hei, sik leh sa inthlak chho zelah hian Forest Department te pawimawhna a lang chho mek zel a. Tunah hian forest cover hi India ramah a nei zau pawl kan ni kan tih rual hian, 'dense forest' kan tih tak tak hi engzat vel nge kan neih tih te nakinah a wind-up naah han sawi thei se ka duh khawp mai a.

Tin, *pollution* chungchang kan han sawi a, pollution board te thuam chak an tul kan ti a, thain ka hria a. Khawvel boruak inthlak chho leh lirthei tam chho zelah helam kawngah hian kan sorkar hi a kal chak deuh a ngai awm mang e; Supreme Court ruling alo pian zel avangin chulai chu ka'n sawi duh a ni.

Kan zawh tel duh lai chu - sorkar hian Riverine Reserved Forest (RRF) chungchang hi thawk khat lai khan kan House Leader ngei pawh hian a sawi tawh thin a. High Court case kan neih chungchangah khan, lui atanga km chanve vel kan potential area tha lai khawi theih loh chungchangah khan a tlang sang lai, emaw a bua deuh zawk emawa thlak chungchang te; tin, High Court case kha Supreme Court ah han khin let deuh te kha kan nei em? Helaiah hian engnge thu thar ber kan ram tan, kan hnam tan hriat ve a tulin ka hria a. Hei hian thil tam takah development work kan khawih tur a khawih buai tel avangin ka'n zawt tel duh a ni.

Tin, kan Minister-in min chhan atana ka duh bawk chu - ministry hmasa MNF sorkar-a kan

Forest minister khan JICA khan crore 512 vel forest huang chhunga hmalakna hrang hrang atan project kha a an siam a, hmin tep khan a awm a. Kha hna kha a hmin tawh em; hna kan thawk tan dawn tawh em tih kha nakinah min hrilh theih chuan ka lawm khawp ang.

Demand No. 41 - Sericulture Department:

Kan CM leh kan Finance minister ni bawk budget speech para 14-a skilled Samagra-II chungchangah hmalak tumna awm ang khan a sawi a. Amaherawhchu, kan BE-ah hianin Central lam atangin khami kan dawnthlenga sum leh pai lo tlinna turah mumal taka dah kha a awm lova, khalai kha Finance minister speech meuha awm si kha BE-ah khan kan lo inbuatsaih dan kha a fuh nge fuh lo ka hrethiam lova.

Tin, Sericulture hi Mizoram-ah tunah hian chhungkaw engzatin nge eizawna atan hmang? Kan budget speech-ah khan cocoon metric ton 17.97 State pawnah kan thawnchhuak tawh tih a ni a. Mizoram-ah hian a processing unit te hi a din ve mai theih em? Khatianga a bulk-a kan thawnchhuah ai khan Mizoram-a kan tih hian; sawng kan puantahtute'n an hman tangkai turin Mizoram chhung, Thenzawl-ah te emaw, khawi khawiah emaw ah hianin a processing tih dan hi a awm thei em le? Kha kha sericulture subject te pawh a la ni thovin ka hria a.

Tin, Golden muga-silk chungchangah 'a potential area kan ni' tiin vawi tam tak kan sawi thin a, 'a hralhnaah pawh kan buai lo; a hralhna hriat sa a ni' te kan ti a. A hralhna hriat sa, potential area ni bawk si, ching kan tam bawk silo chung hian heti lama harh kan tam lo hi engnge a chhan? Department hian a tak takah pangngang vulh hi Mizote'n kan tui tak tak lo a ti deuh nge, tih te kha kan Sericulture minister khan min chhan theih chuan a lawmawm khawp ang.

Demand No. 17 - Food & Civil Supplies Department:

Kan sorkar thar hian mipui hnena kan inzawrh lai khan mipui phur tirit lo tur zawng khan kan inzuar (kan intiam) kha a ni a, 'tax tipung lo theih ang berin tih kan tum ang' te kan han ti a. Amaherawhchu, kan han sorkar a; nichina kan ngaihthlak tak ang khan buhfai man kg ah ₹15/- atangin ₹30/-ah kan han tisang a. Khamiina a nghawng thingtlang bialtute hi chu kan rum nasa khawp mai; kan mi leh sate BPL leh AAY in a cover zawh si loh, *card-sen* pawhin a la cover phak loh tam tak economy hniam tak tak kan nei a, hengah hian harsatna tam tak kan tawh a ni a. Kan Minister chan hnuaiyah hian buhfai man tilto bakah stamp duty 1% thin kha 3%-ah a'n pung a, chhiah khawntu leh revenue tithatu a niin a hriat a. Kan thian tam takte'n buhfai manah crore 20 vel kan save-ah lawmthu in han sawi kha chu, thingtlang lam bialtu dinhmun atang kha chuan kan lo ip nasa khawp mai.

Hachhek bialtu zahawm tak Pu Roberta'n a rawn sawi - kan unaute Tripura ramri depa awm mi 80 chuang zette nikumah ration card atanga kan han paih te kha, he House-ah hian kan sawi chhuak tawh a. Hei, kum khat zet-zawt a lo kal ta a, tunah hian kan thun leh thei tawh em? Kan thun leh thei lo anih pawhin, beiseina kan nei em? Inpumkhat leh inunauna turah ram inchuh boruak a awm laia thil thleng serious tak anih avangin, hei hi chu politics lam nilo, *hnam-issue* anih vangin ka ngaipawimawh ema ka'n sawi tel bawh a ni.

Tin, online-gas booking, home delivery chungchangah eng chen nge sorkar hian hma a laka, gas agency engzatin nge tunah hian *home delivery* ti thei tawh? Aizawl khawpui leh thingtlangah te hian kan ti tawh em, tih kha ka hrechiang duh bawh a. Tin furpui a lo hnai ta

a, monsoon stock hi tunah hianin kan ti tha thawkhat tawh em; ruahtui lo tla se, a ngaihngam thlak tawh em, tih ang chi te pawh report hriat a chakawm tawh khawp mai.

Kan sorkar kal tawhah khan Mualkhang-gas bottling plan te, rail feed lamah te pawh hmalak a ni a; amaherawhchu, beisei angin a kal thui lutuk hman lo a; hmanni *Zawhna & Chhanna*-ah pawh a awm tawh a. Kan minister hian hemi chungchangah hian hmalakna *positive* deuh te sawibelh tur a neih chuan, hei hi kan mamawh tak anih avangin ka'n sawi tel leh duh a ni.

Demand No. 6 - Land Revenue & Settlement Department:

Pu Speaker, kan House Leader khan hmanni ah min chhang tawh a, Land Revenue Act hnuaia compensation chungchang kha. MNF khan 'compensation late atangin a ram neitu sorkar hian 15% vel chang ve rawh se' tia kan daha kha, kan siam lai pawh khan vawiina i dinglama thute pawh hian, '*hei hi mipuite ta tur a ni e; mipui lamah kan tang e*' an ti a. Amaherawhchu, vawinnah an han sorkar ta a, amendment tam tak, a tihpunna tur leh a dan te pawh tam tak an rawn siam tawh a. Tun tumah hian engatinge 15% sorkar hmasain kalpui tura a tih an amend pui si loha kha, mahni tana hamthatna tur a lo chhuah dawn hi chuan a hmaa mite lo siam tawh kha kan hmang leh ta mai zawk tih, House-a han sawi te kha a dik chiah em le? Kha kha ka han zawt tel duh bawk a.

Progressive tax chungchang hi session hmasa lamah khan kan sawi viau tawh a, kan Minister tuipui tak pawh a ni a. Hengah hian eng chen nge hma lak anih tawh? Tin, e-RAM, *computerized land record* chungchang vawiinah kan sawi a, hmanni lawkah kan CM-in a'n hawng a, a lawmawm a. Kha kha kan sorkar hmasa lamah kan Minister-in hma a lo lak tawh leh, 19th July, 2023-ah *expression of interest* te pawh kha chanchinbuah a lo chhuak a, firm te pawh kha sorkar hmasaiin a lo koh tawhte thlanga an han bawhzui hi a lawmawm ka ti a. Hei hian vawiina kan land-lock, LSC chungchanga kan harsatna tak tak hi a sukiangin ka ring a. Tin, kan Minister-in min chhan atan ka duh chu - khang firm 13 bawr vel hmanga kan han thawh tan tir khan, hna kan beisei pending te tun dinhmun reilo te chhung hian a kiam chak em? Tin, Kan firm rawihte an hnathawhah kan sorkar a lungawi em? Ram chungchang hi chu court case hnaivai anih angin mi reliable-te hman an ngai a. Khang kha kan Minister min chhan atan ka'n duh a.

A tawp lamah chuan Pu Speaker, authorized land valuer hi engzat nge kan neih? MLA kan in candidate dawnin affidavit-ah kan ram, in leh lo neih hlut zawng te, tin loan la tur tan te, ram hralh duh tan pawh a ni a; authorized land valuer hi kan nei reng em? Kan zavaia harsatna kan tawhna kha a ni a, sorkar tan pawh hei hi dik takin nei ila chuan revenue tam zawk kan neih theihna pawh a ni mai thei a. Helai bawr chungchangah hian eng ruahmanna nge kan sorkar hian a neih tih kha a ni a. (**Speaker:** Tawp dar a kawka ta e; tawp thei dawn tawh em?)

Pu Speaker, a tawpna tak tak lamah chuan, kan Minister achievement a ropuiin, a dedication (a-inpekna) a tha ka ti a. Tun hnaia ka lawmpui em em chu, Aizawl District-a kan revenue single-nodal ringawta harsatna awm thin kha hmun hnih - *North* leh *South*-ah then a ni hian eng emaw chenah kan harsatna hi a sukiangin dawnin ka hria a. Kha kha tunah hian mipui dawr theih turin kan inpeih tawh em? Land Record han tihfel khan eng emaw neuh neuh thil buaithlak tak a awm ka'n ring a, engtik hunah nge full-fledged in kan kal theih ang tih te kha kan minister-in a wind-up hunah min hrih theih ka beisei a ni.

Pu Speaker, sawi duh tam tak kan neih rualin hunin a liampui ve zel si a. Kan Minister pahnihte Demand vawiina kan sawi hi House-in lungrual taka kan pass turin ka rawn thlawp e. Ka lawm e.

SPEAKER : Aw le, kan House Leader-in sawi duh a neih te sawi turin ilo sawm ang.

PU LALDUHOMA, CHIEF MINISTER: Pu Speaker, a hmasa berin Tipa Bialtu member zahawm tak Pu Hrahmo hmanni Home Minister lo kal chungchanga buaina a tawh atang khan han tan kan duh a. Ni e, VVIP Security hi a rit khawp a, a rit tual tual a. Vawikhat Upa C. Rokhuma'n Padma Shri Award Delhi a a dawn dawna a sawi ka hriat reng chu, "*min han check tak tak mai chu, a tawp lamah chuan keimah pawh ka inringhlel zo vek tawh*" a ti a, khatiang kha a ni a. Tin, tiang nikhuaah hian VIP nih leh hmeh te pawh a inhme deuh a ngai ve a. MLA thar ho Delhi-a training an neih tum khan Pu TBC-a te ho hian MLA seal va siam tir an tum rawk mai a; an hmeh an han en thin a, an siam sak duh miah lo mai a. Kan Dy. Speaker pawh hian MLA anih finfiah nan khan electric bill pekna receipt te an phawrh thin a ni awm e; tiang te kha thil awm ve a ni a.

Tin, Pangkhua-ah hian zawlnei deuh, tawngtai reng mai Pi Dari a awm a, kan inah hian kum khat dawn dawn te a rawn awm thin a ni. 'Delhi-ah ka au a ngai' a ti a, *Hnamchhantu* neitupa Pu Ramhmangaiha hi 'mi hruai rawh' a ti tlat mai a, kei zawk min ti ang tih kha ka hlau khawp a. Pu Ramhmangaiha'n a zuk hruai a. ID card nei miah lo, Adhaar card nei miah lo kha Delhi ah a chhuk a, a rawn haw ve zan mai a ni. A mak angreng viau, chu te pawh chu.

Tin, Siaha bialtu Pu Pawchhua khan MR Bill hi 'in ziah ai hian a tam deuh zel' a ti a, chu chu niin kei pawhin ka hre deuh a. A chhan chu, department hian an naute zingah hian *kuminah engzatnge dam lo dawn* tih kha chhut har an ti a ni; a hriat lawk lova. Chuvang chuan, a uar lo deuh zawng hian an chhut thin ni ber tur a ni a. A takah hian lo tam leh thin. Amahaerawhchu, bill dik vak lo hi a lo awm thin a lo ni a, chu chu kan han sorkar hnu hian theih tawp kan han chhuah a. Kumin hian crore 14 vel (niin ka hria) chuan kan ti tlahniam thei a ni.

Aw le, Pu Speaker, vawiina kan department sawiho tur hi kan flagship programme hand holding hnuaiha pawh department pawimawh tak tak leh chanvo lian tak tak nei te an ni hlawm a, a phurawm hlein ka hria a.

Demand No. 42 - Sericulture Department:

Sericulture chungchangah hian, India President anih lai khan Pu APJ Kalam-a kha lo kalin, helaiha hian thu a rawn sawi a. Chutah chuan, "sericulture ringawtah hian chhungkua chuti zat chu awm ula, heta tang ringawt pawh hian in ram chuan intodelhna in nei thei a ni" tih kha min rawn hrilh a. A rawn study vek mai a, kan ram kha; 'za-a heti zat hi hetah kal ula, heti zat hi..' a ti a, min rawn then phawk phawk a; kha kha min rawn hmu chiang hlein ka hria a. Potential kan neih that zia kan sawi thin a. Amahaerawhchu, engatinge 'potential kan nei tha' kan tih kan tih lai hian pangang vulah eizawngte an pun tak tak theih loh, tih zawhna te pawh kha a awm a. Ka rin dan leh ka hriat ve dan chuan, tun hma zawng khan Central Silk Board hnuaiha hian direct funding an hmu thin a, State-sorkar hian a hriatpui vak lo a. Chu chu PAC atanga kan han chhui tak tak khan sum bo pil a lo tam em em mai

a ni, Sericulture-ah hian; State sorkar atanga tlema an independent deuh avang khan. *'Tiang direct funding ang chi reng reng hi chu kan zo lo deuh a nih hi aw'* kan tih phah nghe nghe a. Chuvang chuan, thil kha a nih tur ang ni lo a tam em em mai a. Khang Central Silk Board atanga kan sum hmuh zawng zawng kha thahnemngai taka lo hman thin chu ni se, khitah kan awm tawh ka ring a.

Tin, farmer te buaina ber, 'a market a rate a tha tawh lo' an tih chhung kha kum tam tak a ni. Chutah a nih ang ang an han hralh paawhin department lamin pawisa a pe nghal ngai lo a, rei deuh deuh a bat sak thin a. A bat sak rei lutuk thu he House-ah hian vawi duai lo ka au chhuahpui tawh a ni. Khang zawng zawng kha tun hma lama an lo kal pelh a ni a, khang khan tlemin a ti thuanawp deuh a ni mai awm mang e, ka ti a. Tunah erawh hi chuan farmers te nen inrintawnnain ke kan han pen chho leh ta a, chuvang chuan kan phur thar hlein a lang a. Tin, a market lamah pawh a lo tha ta a, 16% in a chi hrang hrang khawitute hian kg ah 16%, tunah hianin a rate kan tihsan sak tawh a, a hlawk thawkhat viau tawh a ni. Tin, bat hi a awm tawh mang lovin ka hre bawh a. Chuvang chuan, tuna tang chuan theih tawpa uar chho leh tlak a ni.

Demand No. 35 - Fisheries Department:

Fisheries-ah hian a chi tur, kan memberte sawi ang khan kan siam hnem tawh khawp mai a. A input leh output hi zirna tak tak kan nei em; sangha chi-ah hian engzat nge kan sen tawh; tichuan, a output hi engzatin nge a lo pun tawh; kan thil tihdan phung pangngai kumtina kan budget-a kan lo dah chhoh thinah hian, hei hi investment tha-ah kan la ngai reng em; tih zel tlakah kan la ngai reng em, tih te chu zirchian a ngaiin ka hria. Chuvang chuan, chhim lamah te pawh a chi tur tam tak kan nei ve tawh tih report te pawh kan dawng a, a lawmawm ka ti a. Kan ram chhunga mite ngeiin a chi an supply thei anih chuan, kha mite ngei khan an supply theihna turin department hian hma an rawn lak a thain ka ring. Tin, ka bial ngeiah te pawh tunah khian a chi supply loh hlaua a nuai tel thar mangang em em an awm a ni. Khatih lai khan kan hriat chu, tute'n emaw supply an chang a, vai nen an tangkawp a; vai sangha-chi te tak te te tha vak lote an supply thin tih te pawh a awm a. Heng hi a reh theihna turin kan ram chhunga ngeiah hian a chi hi intodelh tum ila, kan la intodelh thei lo anih pawhin, kan ram chhunga supply thei an awm hi chuan, chungte chuan an dil an dil ngai lovin awlsam te hian supply thei sela a lawmawm khawpin ka ring a.

Tin, Pu Robert-a khan 'lian deuh se' a tih kha, a pawmawm khawpin ka hria. Sangha dil te chu kan nei tha ve lo a, keini chu; amaherawhchu, Sangha note te tak te han dah ai chuan a lian deuh sa dah hi chu kan duh zawk deuh a ni; tlemin a man lo sang deuh pawh ni se, a survival rate a lo sang nge nge a. Chung te pawh chu ngaihtuahnaah awm sela.

Tin, Tripura kan Association ten an zu tlawh a, a feed-ah problem an nei lo a; sorkarin tha takin a pui bawh a, self-help group ten tha takin hna an thawk a; kum khatah vawi eng emaw zat an harvest thei a ni. A feed a that chuanin an thang chak a, an harvest rang a. Tin, bigha khat rau rau ah kan thar zat a intam hleih lutuk a ni. Chuvang chuan, tuna potential area kan neih 20-100 bawr vel chauh pawh hi kan la hmang tangkai a ni tih kum 10 vel chhung kan economic survey-ah hian a chuang tawhin ka hria. Hma kan sawn tur a ni. Kan area cover hi zau sela; tin, a nei sate pawh a quality upgrade dan ngaihtuah ta ila; tichuan, production tihpun tum ila. Chhut danah chuan Mizoram hi kan intodelh mai ni lovin, thawn chhuah tur tam tak kan nei thei a ni. Chutiang khawp potential chu kan nei tih kha economic survey ah te a chian em em kha.

Tin, Japanese koi-fish te pawh hi dil pangaiah hian a lo vulh theih nasa mai a, a man a tam ropui mai si a. Aizawlah milian-nu in an duh deuh vek tawh mai bawk si a. Heng te hi kan tih theih loh tur emaw kan ti a, a lo theih reng mai. Ka bialah pawh an lo vulh reng mai a, dil pangai ah; chungte chu kan sawi duh a. Tunlaih thiamna thar te pawh a lo chhuak tawh a, tuizem lian vak lo atanga tam tak biofloc hmanga tih te pawh a tha em em mai. Midangte tihmuh nan kan ti a, kan khawi ve a, kan bangla sirah khian; kan dahna kha a lo dam lutuk a, ni eng a hmu loh avangin a tha thei lova, kan sawn ta a. Chu chu mi tih hmun kan duh vang a ni a.

Tin, kan intodelh dawn tak tak a nih chuan ram dang atanga sanga lo lut tur dan dan te pawh hi kan ngaihtuah a ngai. Hei, chemical hmanga sawngbawlina, mitthi ruanga an hnawih chi an hmang tih te video eng eng emaw hmuh tur a awm thin a. Heng te pawh hian chhuanlamah kan hmang ve tlat mai ang a, kan dan ve mai theih dan kawng hi kan hmuchhuak thei turah ka ngai a. Kan farmers te an dinchhuahna tur a nih phawt chuan, chung te chu kan ngaihtuah a tha khawpin ka ring a.

Demand No. 36 - Environment, Forests & Climate Change Department:

A tawi zawngin *Forest* ti leh tawp mai ang; *Herhse* hi kan State tree a ni a, kan uar tawk lovin ka hria a. Kan ram kawngpui dung zawng zawng maiah hian Herhse hi han awm se; kan bangla ho ah te pawh hian. A mawi a ni, Herhse hi chu. Prune ngai reng reng lo, nalh deuh mai a ni a, thala a hnah sen a'n chhuak te phei hi chu; kan ramah hian khat ta chuk mai sela, Mizoram hmingthanna tur a ni. *Herhse Kut* te pawh kan la hmang duhin ka ring. Chutiang chu a nih avangin kan ram State tree hi kan uar a thain ka hria a.

Tin, Member thenkhatte khan 'kawng hi vat chhuak tawh lovin kawngpui dung chhaklam leh thlanglam hi reserve tawh ila', tih rawtna kha a awm a, ka pawm zawng tak a ni a, ka lo rawt ve thin tawh a ni. Hemi ti tur hian Forest Department hian nge ni convergence la dawn; convergence-a kalpui a ngai a. LAD, tuna *Rural Development* kan han tih tur tak department te, Revenue Department te, Forest Department te leh a dang dangte nen convergence-a kalpui a ngai dawn a. Heng kawngpui chin deuh kawng chhak leh kawng thlang hi vat thlang tawh lo ila, pass kan pek pawhin reserve ta ila; tichuan, kawng ba sam sam hi a ngai dawn lo a, a thelh mai dawn a ni. Chu bakah sik leh sa a lo vawng nuam ang a, pangpar chite leh ei theih chite han ti tak tak ta ila nungcha tan pawh a nuam ang a, zin veivahin rilru pawh a ti hahdam em em dawn a. Hei hi chu mahni department mai a han tih theih thil a ni lo a, convergence a ngaihtuah chhoh atan a tha hle mai. Demand neitute an ni bawk a, kan CF & CC Department lam hian bul tum thei phei se chuan a lawmawm khawpin ka ring a ni.

Tin, kan ramah Land Used Policy (NLUP), ram hman tangkai dan kum tamtak kan lo kalpui a, amaherawhchu, tangkai taka kan hman ram hi hmuh tur a vang hle mai. Han zin ila kawng sirah hian kawngchhak-kawngthlang huan a lo awm pawhin han bih chiang ila, zim te a ni. Zau tak tak hmuh tur hi a vang a, khua leh khaw inkar hi ram awl hi a la tam lutuk vek a ni. Chuvangin, kan ram hi chuti lutuk chuan ren a la ngai lo mang e aw, ka ti thin a. Kan humhall tur a ni rual rual hian, development kan ti dawn a nih chuan a man kan pek a ngai; tin, a man pek tur pawh kan la nei rih e. Dik chiah chuan, tunah chuan kan ram hi a min pawhin a kum lehah chuan a hring leh vek a ni; chuti khawpa ram tha chu kan nei a.

Tin, lo kan vat a, kan vat thlu vek a, kan halral leh vek a; kumtluanin a lo chawr apiang

kan tuk leh bawk a. Chuti chung chuan chul a han ni a, a hnu lawkah forest a rawn ni leh zel a. Kan ram hi a tha danglam em em a ni; tihchhiat pawh tum ila a tihchhiat hleihtheih loh tluk a ni. Khatiang ramah khan Pathian-in min dah avangin kan mipuite'n a an mamawh thilah hi chuan ren lutuk pawh hi a tha lo e. Amaherawh chu, tuna *shifting cultivation* kan han tih ang chi hi chu permanent-a mechanize zawngin tunlai thiamna te nena kan tihchho zel erawh hi chu Sorkar chuan a tum tur a ni tih hi chu kan pawm theuhin ka ring a. Tin, forest reserve area hi kan lui dungte atanga tlangchhipa sawn hi hmanah ZNP kan ni laiin helaiah hian House-ah resolution kan lo pulut tawh a, min pharthlak sak a; kha kha ka rilruah a la awm reng a. “*Luidung ram tha a kan chetna tickep zawnga reserve forest kan siam hi chu a fuh chiah em; tlangah te hian sawn dan a awm chuan ngaihtuah a va tha em*” tih hi kei ka rilru chu a la ni reng a.

Tin, kan Opp. Leader khan RRF chungchang kha a rawn sawi a; a hnawkhawp mai a hei hi. A tira kan Riverine reserved forest kha Guwahati High Court khan min han quash sak a. Tichuan, Chief Secretary ho khan ‘challenge tur a ni; Court-ah appeal tur a ni’ an ti a; a hnu kar khat velah CM hovin ‘*challenge loh tur*’ tih kha an ni ve leh a; a aiah *Protection of Rivers Bill* i pu lut ang an ti a, hmanhmawh em emin an ti a. Tichuan, *Protection of Rivers Act* chu tunah hian a hming chuan kan nei a ni. Amaherawh chu, rules pawh a la awm chuang lo va, kan la hmang chuang miah lo va; tikhan a awm ve ringawt mai a. *Conservation of Forest Act, 1980* kan nei leh a, nikum hmasa ah *Amendment Act, 2023* kan nei leh a, chu pawh chu Supreme Court-ah challenge a ni chho leh a, ‘*Forest* chu dictionary meaning-a define tur a ni’, tih te a lo ni leh a. A *Act* awm chuang reng reng lo kha Supreme Court judgement zawk kha tehfungah hman a ni ta zel a. Chutah chuan ‘*irrespective of the ownership*’ tih te kha a lo ni a. ‘Revenue ram a ni emaw, mimal ram a ni emaw, a eng pawh kha lo ni se, thil hring a awm tawhna reng reng chu Forest ram a ni’, tih te a lo ni ta a ni. Kan *Act* khan awmzia a nei vak thei ta lova.

Tichuan, sawi nuam lo zet mai chu, Tuirial hydel project kan han tih khan Forest ram chin chu Company khan zangnadawmna an pe a ni; khami chhunga ram neitu dik tak ho kha an pe bawk a ni. Tichuan, land-owner pe bawk, Forest Department pe bawk, engkim clear-ah an inngai a ni, NEEPCO khan. khatih laia rorelna changtu Congress sorkar khan a ram neitu dik tak chin kha a chhinchhiah vek a, ‘hei bak hi tumah helaiah hian ram pass pek tur a ni lo’ tih order an chhuah thlap a ni. Amaherawhchu, a hnuah MNF a rawn sorkar a, chu dan chu an hai tetin ram an inpe ta mawlh mawlh a; kan ram lalber te chhungkua pawhin compensation nuai tam tak an la ta a, tunah hian lak leh tur pawh an la nei tih kan hria a ni. Khatiang kha a nih chhoh tak nuai avang khan kan ram tichingpentu hi chu helaia roreltute hi kan lo ni zawk mah thin em aw, tih theihin thil hi a kal ta a.

Tichuan, thubuaiah a lut a, tikhan a kal ta zel a tunah hian. Khatih laia pass pek tawh loh tur tih hnua pass nei leh ho zawng zawng khan tunah hian sorkar hi min khing a ni. Tuna a lan dan chuan - pe dawn ta ila, vaibelchhe tam tak pawisa fai kan chawi dawn bakah motor tha lai 200 kan chawi a ngai bawk dawn a ni. Khatiang khan min tlakbuak chuan tu sorkar mah hi kan ding zo dawn lo a ni. Chutiang dinhmunah te chuan kan lo ding ta a. Tichuan, Riverine Reserve Forest kha a changin an han quash a, a changin an tungding leh a; chuti reng reng chuan tunah hian inchai buai a ni ta a. Tichuan, kha RRF kha a la ding a nih chuan, khami huam chhunga ram neite kha chu compensation pek loh tur ni awm tak a ni ta a ni, Forest ram chhunga nei an nih dawn avangin. Amaherawh chu, RRF hi paih a niha Forest ram a nih loh chuan, Land-owners te khan neitu-nihna an chang thei ang a, pek

tur an ni dawn te pawh ni awm tak a ni a. A chingchi vet nuai mai a hei hi, kal ngaihna vak pawh kan hre rih lo. Supreme Court lama a kal zel dan tur hi kan nghak tawp mai a ni.

Hei Kolasib Division chhungah te pawh rei tak compensation-a kan buaina chu, hetah hmun sang atanga kan tihbuai zel a nih kha; kha mi chungchang kha term hmasaah ka sawi nasa tawh helaiah hian. Surveyor rual te Kolasib-ah kan tir thla a, ‘ram pek tawh loh tur’ tih hnu ah thuneitu sang atangin pass kan inpe chho malh malh a, kan la inkhung hmiah hmiah a; khang avanga tihian buai chho kan ni. Chuvangin, a chingfeltu tur zawkte hi a tibuitu ah hian kan tang thin a. Tun atang hi chuan sorkarin project pawimawh a neihna tur reng rengah hi chuan khatianga mi pamhamte’n ram an inpeka compensation tin zawna hma an lak theihlohna tur khan, kan hre hmasa a nih phawt chuan i freeze zel ang, tih hi kan ngaihdan a ni a. *‘Helai area ah hian pass pek awih tawh loh’* tiin order kan chhuah zel ang a, kan freeze zel tawh dawn a ni. Ram neitu diktakte erawh chuan compensate an dawng ang.

Tin, kan ram luidung leh engkim mai humhalhna tur kawngah pawl tha tak tak *Riparians* leh a dangte an lo ding a, an zingah te kan han hnatlang ve nawk nawk a, keini te pawh. Ka bial ngeiah pawh YMA ten Serchhip khaw chungah khian ngaw tha em em mai an humhalh a, a nuam khawp mai a. Khatiang khan sorkar hian thawhpui tur tha tak tak kan nei mek a, khaw tamtak ah pawh chu chu a awm a; an chungah lawmthu ka sawi duh a.

Tin, *carbon trading* hi term hmasa khan kan hrilhfiah fuh lo deuh em maw ni, kan ti a. *‘Bur te takte te ah kan ram boruak hi thun ila, Delhi ah zuk zuar ila’* tih lampang khan kan sawiin ka hria a. Kha kha carbon trading a ni lo a. Company lian te’n meikhu phal tawk aia tam an tihchhuah dawnin, ‘boruak chhia an siam ang hen boruak tha khawvel khawi emaw laiah an siam tur a ni’, tih a ni; chu chu *carbon trading* a ni a. Helam pang pawh kan ngaihtuah tan a thain ka hria a. Khawvel company lian tute emawin kan rama forest ramrawn siam a, a senso pawh tum vek turarawn siam saktu tur carbon-trading hnuaiyah te pawh kan ngaihtuah a thain ka ring a.

Tin, kan Member pakhat (tu ber nge ka hre lo a) khan ‘coal quota kan neih thin kha a neih let leh theih em’ arawn ti a. Aw, Pu Muanpuia a ni maw kha. Kha kha kan nei thin a, kan hmang tangkai lo em em mai a; a coal hmel kha hmuh tur a awm vaklo a ni. Tunhma khan Mizoram quota kha tute’n emaw khan an zuk lachhuak a, Tripura lamah te an hralh leh a; khatiang reng reng kha a ni a. A tawpah chuan min tihtawpsak ta niawm tak a ni a. Chu chu, ‘neih leh theihdan a awm chuan a kawng dap leh a tha ngawt ang’ tih kha kan comment duh dan a ni a.

Tin, *Pollution Test* chungchangah ‘hmunkhat chauha tih hi chu nilo se’ tih kha Member tamtakin kan aupui leh ta a. Nikum lamah pawh kan aupui tawh a, he thil hi kan au chhuahpui rei mah mah tawh a ni, Pu Speaker. Department hian tih dan an zawn vat vat a hun ta e. Hei hi chu kan inchhawk zangkhai theihna turin concerned department-in hma arawn la turah i ngai ang.

Tin, hei Aizawl-ah hian mipakhat Oakwood Industry neitu a awm a, a hming pawh kan sawi law law ang a; Pu Lalzidinga a ni a. Thing leh mau ringawt hian Mizo-in nalh tak tak a sa mek a ni, tunah hian. Hei hi *innovation* chikhat a tlingin ka hria a. Kan ram raw material hmangin inchhawng te thlengin a sa thei tawh a ni. Hei hi kan ngaihven a; mahni hnam thil kan chawisanna leh mahni mimal in atan te pawh, sorkar building atan te pawh

'han tih chhin a tha awm mang e' aw ka ti a. Hei hian nasa takin ram dang rod, cement tih vel kan lei hi min chhawk zangkhai thei dawn a ni.

Tin, *balu* chungchang kha Pu Robert-a te, Pi Prova-i leh mi dang dangte pawh khan an rawn vei bawk a. Balu hi, ni e, *mahal* hi chu tha kan ti lo kha a ni a. Amaherawhchu, *Langkaih-Balu* kan lo inngahna tunah hian tih hleihtheih loh in a awm a. Langkaih chauh nilo, a dangte pawh a ni a. 'Mihring hi *Dan* tana siam kan ni em; nge, dan hi mihring tana siam' tih hi kan buk a thain ka hria. Kan department te pawhin *Dan* hi chu mihring tan maia siam a ni; mihringte thatna atan leh remchanna atan. '*Dan hi mihring tana siam a ni a, mihring hi Dan atana siam kan nilo*', tih principle hi kan hman dik a ngai in ka hria a. Chuvang chuan, kan balu te pawh a ti pawilo zawng, a vaukam hreuh chhe lo zawng leh JCB te nena han lak ang chi te kan khap thei a; tin, li chhunga mi lak chhuah te pawh kan khap thei a. Heng balu, Pathian siam pangngai ang han lak leh theih dan te hi chu insiamrem dan kawng awm thei sela chuan a tha ngawtin ka ring.

Tin, *medicinal plant* hi chu Health Deptt. lam chan a ni mah mah maithei a, mahse Forest Deptt. pawh hi a kaih hnawih tho maithei a. Hengte pawh hi kan uar chhoh zel a ngai a. Kan Member zahawmtak Pu Muanpuia khan tualchung damdawi tangkai zia kha a sawi a; kei pawh tualchung damdawi hi a thatzia ka hre ve tawh a. Thing ka thlaknaah ka kiu ruh hi ka ti sawp a ni. Tichuan, tlai dar 4 thlengin hna ka la thawhpui tho a, a sawp tih ka hre lem lova. Dar 4-ah chuan ka tuar tak vak loh avangin ka entir a, an x-ray a. Hnapkhawn ka ei a, a dam mai. Hnapkhawn hi a tha em em mai a ni. Chung te pawh chu a ni ve tlat a nia. Kei hi allergy nei nasa thin ka ni a; allergy damdawiah hian thumbawh-kaihsawih ah hmawlhthe ka thiat a, a dam hmak mai a ni. Chuvang chuan, a thiat duh tan ka ti a, thumbawh-kaihsawih ka siam a, Chawlhmun-ah khuan ka dah ran thin a, mi tamtakin an dampui ve a ni. Khatiang khan thengrengah hian kan hriat loh thil hi a awm a ni. Pathian dan siam scientist-te hriat phak loh hi a awm a ni. Chuvang chuan, kan Bru-unaute pawh hian '*bawidaw*' an ti a, thiamna sangtak nei anni a; heng hi promote a tha ka ti a.

Tin, CAMPA fund kan hman dan hi, ni e, a chairman ka ni awm e. 'Hei, heti zat kan nei a engtin nge kan hman ang', han tihawm pawh hi ka la hre chuang lo a, kan blind ve khawp mai; review meeting kan neih vat te pawh a tha awm e. JICA loan kha kan ti vaklo a ni. Delhi-ah min rawn hmu a, JICA loan tih mek kan nei a, Cancer Institute te. Tuna tih leh an tum hi Forest Department-ah a ni a. An lo tih tawh dan ka'n en hian hmuh tur a vang deuh hlek a ni. Pawisa tamtak kan puk ang a, kan rul leh dawn si a; 'a khawi ber atan nge an hman leh dawn le' tih kha kan ngaihven a; chuti tehchiamin kan tangkaipui lovin kan hria a. Chuvang chuan, kan borrowing ceiling kha a rawn hnawh tawt ve tho dawn si a, hei aia tangkai zawk loan puk tur hi a awm ang; anni hi chu tilo mai ang kan ti a. Anmahni pawh hmaichhanah ka hrilh a, sawi ngaihna vak an hrelo. "Project pawimawh dang in khawih tho a, hei hi chu kan ti lem dawn lo a nia," tiin ka hrilh a ni.

Demand No. 33 - Land Resources, Soil & Water Conservation Department:

Soil lamah khan han kal leh dawn ta ila. Soil ah khan project paruk atan planning atangin crore 43.24 kan pe tawh a, kumin chhung hian. Kuhva kha a tam thin a, hei hi kan hria a. 'Agricultural drone' an tih ang hi kan neih a ngai a ni. Agriculture Department emaw, Soil Department emaw hian nei ila kan inhman tawm theiin ka ring a. Lei atangin a kah phak si lo a, chung lam atanga zuk spray erawh chuan a dan theihin ka ring a; chung te pawh chu kan ngaihtuah a thain ka ring a. Kan *hand-holding* policy hnuai ah hian kan dah

pawimawh em em a, training nan te kan pe a; Ministry atang pawh hianin crore 7.44 kan hnuk chhuak tawh a. Tichuan, Central lampang hian kuhva plantation area zauh hi min tuipei tawh lo a. Amaherawhchu kan neih zat tak tak an rawn hmu phak lova, kan zauh zel tho a. Kan mite'n an mamawh chuan kan ti a. Tichuan, a awm sa tihchangkan leh a ring thar neih belh pawh kan la remti zel tho, harsatna kan tawh lo. Tin a processing lam hi tunah hian tih tak zetin kan ngaihtuah a, kan zia awm chho zel turah kan ngai a ni.

Tin *hmunphiah* hi sawi loh theih loh a ni a. Suggestion kan nei a, kan MLA - Pu RM Chakma te, Er. Zira te, Pu Dawngtea te leh Pu RSa te khan, 'nakumah chuan a hring hian lei mai tawh teh u a', tih thu rawn mi pe a, ka lawm khawp mai a. Thurawn hi inpe zel ila; inngaihtuah deuh chu a ngai a ni, nakum atang hi chuan. A ro kan ti a, kan tiro hlei thei si lo a, kan farmers te'n. Chu pawh chu graded tur a ni a. Grade A ₹100/-, Grade B ₹80/- kan ti a, grading an ti thei bawh si lo a. Grade loh na nana kha chu empaneled buyers te khan an lei thei bik lo a ni. Kan farmers ten tuna kan system hi chu an tlin lo niin a lang a. Kan vawikhat tihna deuh a ni a, nikum lama an tih pawh kha ti kha a ni tawh a. Saipum ho ta an bat saka pawh kha kan rulh sak ringawt a ni, hand-holding sum atangin. Amah lah kha kan be pawp hlei thei tawh lo va; a be pawp thei Pu Chatea hovin an zawng a, an be pawp hlauh a. Tichuan, a ngam tawh tlawm te kha a sawi a, Guwahati-ah a stock teuh tawh bawh si a. A ngam tawh bak zawng kha kan rulh sak tawp mai a ni, hand-holding sum atangin.

Tin, *mahal* hi kan duh ngai lo a, tunah hian sorkarin kan lak avang hian a free ta lo a ni miah lo. Kan farmers te hian an duh duh hnenah an duh duh rate-in an la hralh thei reng; a free reng a ni, market chu. Amaherawhchu, sorkarin 'helaiah hian heti hian kan lo ti ve ang e' kan ti a, a man hniam tur kan lo pui ve mai a ni a. Kuminah hian a rate a chhiat avangin hralhna tur dang an hre vak lo ni hian a lang ta a, sawhthing pawh a rate a chhia a. Kuminah hian ZPM sorkar hi lo piang ta lo se la hmunphiah leh sawhthing lei tur sorkar hi awm ta lo se an che chhe leh zual ngawt ang. Sawhthing phei chu a ngaihtuahawm ngawt ang. Amaherawhchu, market awmlo chung chung ₹50/- in kan lei sak a, kan lei sak zo vek dawn a ni. Grade lovin; Grade A/B thliar lovin a chawhpawhlin ₹80/kg in kan lei fai vek dawn tho tho; lo lungngaih tur a awm lo. Chu chu ZOHANDCO ah kan pe ang a, ZOHANDCO-in an process ang a, an hralh leh ang a, min rul leh ang; a man chu min pe let leh dawn a ni. Chu chu kan tih dan tur a ni.

Tin, *rubber* hi CM-Rubber Mission te kan han ti a, hma i hruai ang kan ti a, Pu Chatea nen hian. Rubber huan hi kan nei ve ve dawn a ni, keini pahnih hian. Keini te chuan a rah kan ei hman lo ang; amaherawhchu, 'kan mite kan tiphur dawn anih chuan hma i han tawn ve teh ang; kan pahnih hian huan i nei ang' te kan ti sauh sauh ve a ni a. Tichuan, *rainwater-harvesting* pawimawh zia kan sawi a. Tui-hna tipungtu a ni. Chutiang atana hual chu kan nei nual a, kan sawi tam hman lo ang.

Demand No. 6 & Demand No. 17 - Land revenue & Settlement; Food, Civil Supplies & Consumers Affairs Department:

A tawp berah chuan, Revenue leh Supply hi ka'n sawi pawlh nawk nawk ang a.

Revenue Department bik atang hian pawisa hi kan pe tha angreng a. SASCI Part 7A atang hian Champai-Keifang tlanga Revenue office sakna tur crore ₹4.68 kan pe tawh a, Mamit Revenue office sak nan crore ₹4.50 kan pe bawh. Tin, SASCI Part I (additional) ah hian Revenue staff-quarters complex - Kolasib, Serchhip, Saitual, Khawzawl leh Hnahthial tea

sakna tur hian crore ₹11.42 kan dah a. Tin, Revenue staff-quarters complex Aizawl-Kawltheihuan, Mission Veng leh College Veng-a sakna tur crore ₹5 kan dah sak bawk a. NEC hnuaiia *Maintenance & Management of Land-records* tihah hian crore ₹6.40 a awm bawk a. Tin, Supply office, Aizawl East leh West hmun hniaha kan han then hran taknaah hian crore ₹8 kan dah bawk a ni. Chutiang chuan anni hi investment ah kan inngai a, revenue-earning department an nih angin. Khatiang khan kan theih ang angin sorkar pawhin kan ti a.

Tin, *card-var* tih bawr velah hian, mi tam takin an card an surrender a, chhungkaw 200 chuangin. Kha mite avang khan mi eng emaw zat kha *card-eng* leh *card-pawl* ah an lo luh theih phah a. Tin, *card-eng* leh *card-pawl* a awm thin chhungkua eng emaw zat khan, ‘khawngge, kei aia rethei zawk ka’n kian teh ang’ tiin *card-var* ah an insuan chho hlawm a ni. Khatiang *card-var* a awm tur ang chi income neiho zawng khan piantharna dik tak changin *card-var* ah insaseng thei vek dawn se chuan, kan mirethei ho hi chu *card-pawl* leh *car-eng* ah hian kan accommodate zawh theih kan beisei a ni. Chuvang chuan, hetiang a card-pawl atanga card-var a kan han chhoh te hian midang rawng kan bawl a, keini aia harsa zawk kan kian a ni. Pathian malsawmna hnar, ‘*a ram leh a felna zawn hmasakna a ni*’ tih hi hria ila a tha khawpin ka ring a.

Tin, petrol leh diesel *Cess* kan han lak pawh hian, petrol leh diesel kan lak apiang hian kan ram kawng siamnaah kan hnatlang ve a ni tih kan inhriat hi ka duh. Zoram mipui hian petrol/diesel kan lak apiang hian cess kan chawi a, kawng siam nan a ni. He kan ram kawng chhia kan nin em em siam nan hian a hranpain ka va thawk thei lo; contractor pawh ka va ni thei lo. Amaherawhchu, petrol ka lak rual hian ka hnatlang ve a ni tih inhria ilangin. Tin, kha vek kha, petrol/diesel kan va lak khan hetah damlo kan kan a ni; damlo tan, health atana hman tur a ni. A hranpain damlo kha kan va kan kual kan va kan kual theilo; petrol kan lak apiang hian damlo kan kan tih te hi inhria ila. Tin, petrol kan lak apiang hian zirlaite kan tanpui tih hi inhre bawk ila. Thil dangah hman a thiang miah lo; khang atan chauha hman tur kha a ni a, mipuite kan tel vena kawng a ni. Hetiang chi hi kan vai hian han invuipui zawng nilo hian, ‘*a tul a ni*’ ti thap thap ta ila, kan rorelna hi a mawi awm mang e aw ka ti a. Pu Speaker, i veilama mite khan tiang chuan han ti thin se la, inthlan lehah chuan ‘anni tal na na na hi chu thlang leh ang’ an tih mai te ka ring deuh a, mipui fak an hlawh zawk daihin ka ring a ni.

Tin, ‘petrol pump Chawngte ah’ ti kha Pu RM-a ani maw? Petrol pump hi a harsa lo khawp asin maw le; kan minister hian a puih theih ka ring. Chawngte-ah petrol pump a awm a ngai ngawih ngawih; keini pawh kan lo zinin a buaithlak lutuk. Hetah Lunglei atanga inphurh lawk te a ngai a, kawng a chhe bawk si. Chuvang chuan, sawngah sawn petrol pump awm tura hmalak kha a har vak kan ring lova. Tin, cylinder put ut ut hi reh tawh sela. Tui kan herh haw ang hian a pipe-in ti ve thuai thuai thei ila kan ti a, chu chu company hian Tripura atangin an rawn bei mek a. Khang te kha kan sawi duh mai mai a.

Tin, kan Opposition Leader khan, ‘compensate late’n 15% sorkara an chhunluh kha engatinge in siamthat mai loh’ min ti deuh ni khan ka hria a. MNF sorkar khan 15% lak kha an lo duh khawp a; court ah an khing a, ‘pelet leh vek ru’ an tih avanga pelet leh kha anni a. Mahse, 15% lak zui zel an duh avang khan, *Land Revenue Act, 2013* section 75 (a) niin ka hria, kha kha an siam chawp a, an khung lut leh ta a. Chuvang chuan, ‘compensation la apiangin 15% sorkarah an chhung lut tur a ni’ tih kha an lo siam leh tawh

si a, chu chu hriat pawh kan lo hre mang lo a. Kolasib velah compensate an la a, an lo khawn ta mawlh mawlh a, 'engatinge' ka zuk ti nghe nghe a. 'Hei Dan a awm alawm' an ti a, kan la siamtha hman bawh si lova. An khawn zel a; a thenin an lo pek laklawh tawh kha chuan tih zel mai te pawh kha a tha zawk tawh mai thei a. A sawi theih tak tak tawh loh, kha kha chu.

Ni e, *e-RAM* te kan han ti a, tawn tur a tam hle a. Tin, land-bank chungchang Pu Chhuanthanga'n a rawn sawi kha a dik ka ti a. Sawlai a bial buiana pawh kha ka hre ve khawp mai, ka hnenah an lo kal nasa. Ram neitu LSC a rawn dil a, a ram an han theh sak ta tak tak mai a. A chhe laite kha a ram neitu khan a chang ta a, a thlam awmna mual pawh a ram neitu'n changlo te an awm a ni. Kha kha sorkarah a lut vek lo; tute'n emaw an hlep ral a, tute'n emaw an nei leh mai mai a ni. Ka sawiselna a rei tawh hei hi. Amaherawhchu, hmalakna hi a kal chak lo em em mai a. Tun atang chuan hemi kan tih dan system hi ennawna tih vat a that ka ring. Heta tanga hlawkna lo telte pawh kan awm a ni mai thei e; resistance te pawh a awm a ni mai thei. Mahse, kan Revenue Minister hi huai taka awm turin ka duh a. Thil tha kan tih dawna min dodal an awm anih chuan, kan len lawp dawn; tumah kan dim dawn lo. Puih a ngaih chuan ka pui tlat dawn; a hnungah ka ding zel dawn. *'Mipui tana tha anih chuan thil hi kan tidanglam ngam tur a ni'* tih kha ka'n sawi duh a ni.

Tin, Consumer Protection Council hi thawhpuih i hmang tangkai teh ang u. Bukna tihdikna ah te, adulteration chungchangah te, kan YMA leh NGO zawng zawng leh party te nen pawh theihtawpin i tang tlang ang u.

A tawp bera ka'n sawi duh chu - boundary dispute kan nei a Assam nen. An lo kal a, kan han inbia a, kan sorkar hnuah inbiak zelah kan ti a. Tichuan, vawihnih kan rawt tawh a, min chhanglo hrim hrim mai a. A lungthu kimna'n kan ti a, tunhnaiah kan zuk rawt leh a, min chhan dawn leh dawn loh kan hre lo a. En pawh ni se, thiam kan chan nan, vawi thum kan rawt pawha min chhang lo a nih chuan, a ngaihtuah dan te pawh kan la thiam ang chu kan ti a. Kan ramri buai hi pending lovin kan hunchhung a tihfel hi kan duh khawp mai a. Amaherawhchu, kan sawipui turte'n kan lehkha pawh an chhan ngai tlat loh chuan hmalak chak a har khawp mai a. Chumi atan chuan tun hnaiah a lungthu kim nan lehkha kan thehtla leh a ni, tih kha ka sawi a ni.

Tichuan, Pu Speaker, a sawitu zawng zawngin kan Minister-te demand hi a tha kan ti tlang niin a lang a, a lawmawm khawp mai a. Hahdam takin kan pass thei dawn niin a lang a, a lawmawm khawp mai. Ka lawm e.

SPEAKER : Tunah chuan Minister zahawm tak Pu Lalthansanga'n kan sawihona te windup-a, sawifiah ngai a tihte rawn sawifiah tur leh, a demand te House-ah pass-pui rawn dil turin ilo sawm ang u.

PU LALTHANSANGA, MINISTER: Pu Speaker, ka lawm e.

Demand No. 33 - Land Resources, Soil & Water Conservation Department:

Vawiinah ka demand bik sawitu kha member 25 an ni a; Soil bikah 10-in min sawipui a. A sawitu reng rengin an rawn sawi hmangah khan thahnem min ngaihpuoi rualin, duhthawhna leh thurawn min rawn pe a, kha kha a lawmawm hlein ka hria a.

Pu Lalrinsanga Ralte hian Serlui Constituency chhunga Soil Department thuamchak turin Kolasib District Office staff-quarters te sak that a rawn rawt a, chu a rawn rawtna chu tunah hian SASCI-ah dil mek a ni a, hmuh kan inbeisei a. Hei hi hmalak mai theih turah kan beisei a ni.

Tin, Pu R. Rohmingliana, Thorang Bialtu MLA zahawm tak khan hmunphiah grading chungchang kha a rawn sawi a. Hmunphiah grading hi 10th January-February thleng hi Grade A, chumi hnuah a par a lo kuhmum hian Grade B; chu chu a grade then dan pakhat a ni a. Mahse tihro dan, a processing kha a la awm cheu a, hei hi inzirtir nasat a ngai hle a. Chuvang chuan, Grade A anga buyer ten an lei duh dan tur angin tunah hian hmalakna kalpui tur a ni.

Pu W. Chhuanawma khan a bial Khawzawl District-ah hian District Office hi awm ve se a ti a. Hengte pawh hi ngaihtuahna kal mek a ni a. Khawzawlah khian nasa taka hmalak tum chhoh a ni a. Heng a rawn sawi ang hian tunah hian kalpui a ni a. 16th Finance Commission-ah pawh heng hi thlen a ni.

Tin, Pu H. Lalzirliana, Mamit Bialtu zahawm tak khan department-a thawkte indaihlohna a rawn sawi a, a ni khawp mai a. Department chhungah hian kan indaihlo khawp mai a. Pathian leh kan pute duhsakna azara minister ka nih hian ka department chan hi ka han en a, ka department chante an lo tlabal angreng viau mai a. Soil-ah pawh hian tunah hian 34% vel vacant post kan nei a ni. Chuvang chuan, nasa takin kan indaihlo a. Chuta ka rilrua lo awm ta chu, *'minimum management, maximum work'* tih hi a ni a. Chuvang chuan, kan department-a hnathawktute hi an rim em em mai a, mi pathum thawh ang te hi pakhatin an thawk a ni. Chutiang chuan vawiinah hma kan han la chho a ni a. Hengah hian Pathian hian min hruai ni te pawhin ka hria a, kan hmalaknaa hlawhtlinna te a lo lang chho ve det det a.

Tin, Pi Baryl Vanneihsang, Aizawl South III khan testing laboratory chungchang a sawi a. Hei hi 16th Finance Commission-ah khan thehluh a ni a. Tin, Ice Plant te pawh Ngaizel pheiah kan han bun chho ve leh a. ZOFISHFED ta New Bhaga- Bawngkawn ami kha chu hmantlak a lo ni tawh lova. Tunah hian proposal hi 16th Finance Commission-ah khan thehluh a ni.

Tin, Pu H. Ginzalala, Champhai North Bialtu zahawm takin a ngaihpawimawh earthing-dam siam chungchang kha a sawi a. Soil Department kan han hriat tlanglawn dan tak hi chu department eng emaw deuh maiah hian kan ngai deuh tlat a. Soil Department hnathawhna ril zawk tak hi chu kan ram top-fertile soil te hi kumkhatah a luanral dan hi a rapthlak em em mai a. Buh tin hnih leh a chanve hmun velah hian top fertile soil metric tonne 40 vel a luangral a ni. A awmzia chu, khami luangral kha vairamah kan zu pe thla a, kha kha an deposit a, khatiang khan leitha leh thlai tha tak tak kha an lo neih theih phah a. Chutah market competition-ah chuan khan price-ah kan pha ta thin lova; tin, thil te an lo thar tam a. Heng venna tur atan hian Soil Department hian nasa takin hma a la a.

Tunah hian engineering measure leh biological measure anga hmalak a ni a. Engineering measure-ah hi chuan checked-dam te, terrace te, contour te, contour trench te, spillway te, drop structure te, percolate tank te, water harvesting tank etc ang te hi tunah hian hma a la a ni. A awmzia chu, ruahtui tamtak kan dawng a. khang ruahtui tam tak kha luangliam mai lo deuha, lo tih khawmuanna dan chi hrang hrangte. Tlangchhipah te pawh lei te kan

laikhuar ringawt a, khami laih khuar kha tui tling tho baw k si, sangha khawi theih si loh te kha a ni thin a ni. Pu Speaker, chutiange chu engatinge min rawn question tih khan, khuar a lo awm deuh a, ‘tui dahkhawl na’ tih khan an hrethiam thin lova. Chuvang chuan, khatiang question kha min rawn zawt thin a ni. A nihna takah chuan, kha khan ruahtui enge maw chen a lo dah khawl a, luang ral mai tur a lo tih khawtlai khan nasa takin khati lai area kha tuiin a chawm thei a ni, tih kha ni a. Chuvang chuan, hemi engineering measure-ah hi chuan khatiang khan hma a la a, biological measure hi chu rubber plantation te, areca nut plantation te, coffee plantation te leh broom grass plantation ah te hma a la a.

Kan ram hi vawiinni ah dense forest engzat nge awm tih pawh kha nakin ah kan la chhang turah ngai ila. Kan ram hi a bua nasa ang reng viau a. Mahse, *Forest Survey of India* chhut danah chuan 85% green cover area angin a chhut a ni. Mahsela, nasa taka ven ngai a lo la ni a; chutiang atan chuan hetiang permanent farming hi a introduce a, chu chuan vawiinia kan ram chereua bua zel tur venna atan kha kha hmalak a ni a.

Tin, funding-ah hianin kan pachhe em em a, kan normal budget pangngai ah chuan hnathawhna tur kan nei meuh lo a. Amaherawhchu, kan inghahna chu centrally sponsored scheme te a ni a. Chutih rualin RKVY scheme ah te pawh hian hma kan la a, chung chuan Mizoram chhung hmun hrang hrangah harvesting water tank te, steam bank erosion control structure te, field division drain te, pipe water distillation system te leh cluster mode anga hnathawhna hrang hrangah chutiang chuan hma kan la chho baw k a ni.

Tin, *hmunphiah* chungchang hi kan sawi nasa khawp mai a, allocation of business-ah kan subject a ni miao a. Hmunphiah hi Mizoram ah 2024-25 chhungin quintal 9600 vel thar inbeisei kan ni a. A lei tur hian Agriculture Marketing Board hian nasa takin tan an la a. Empanelment tier te, non-empanelment private tier te, chutiang chuanin kan ti nasa viau a. Chuti chung chuan nikum lam khan kan hralh hlau niawm tak mai khan kan MLA pahnihte khan Silchar-a a stock-na hmun leh khulaia a leitute kha an zuk hre fu mai kha a ni a. Kha mi kal zel kha em maw ni, vawiin niah pawh hian kan la tih fuh hlei thei lo a. RR Associates te lah kha khatiang vel kha an lo ni a. Hemi chungchangah hianin farmers te pawh an khawngaihthlakawm a, a department ang leh a ngaihtuahtu tan pawh a hrehawm ang reng viau a ni.

Amaherawhchu, hemi rual hian NABARD hnuai RIDF 19-na atang hian broom godown 5 sak a ni a, tunah hian 99% peih a ni tawh a ni. Hei hi tun session zawhah hian hawn mawlh mawlh theih a nih ka ring a; in bial chhungah te a awm a nih kha chuan kan hawng zel ang a. Pi Prova-i pawh khan Tiperghat-a dah belh te kha a ti a. Kan Chief Minister zahawm tak hian Soil Department hi a ngai pawimawh avangin hand holding atang te pawhin hmalak kan han tum ang a.

Tin, a lei dan chungchangah suggestion hi min pe nasa viau a. Amaherawhchu, a system dika kan kalpuia dry-yard te kan neih chuan hralhna hi kan tlachhamin ka ring lo a ni. Nimin khan Kolkata tangin Kausik Gupta, Cooperative Society Chairman a lo kal a, Pu Speaker, min hmuh a duh avangin heta tang pawhin ka zuk chhuak kha a ni a. Tichuan kan inkawm a, kuhva leh hmunphiah an lei duh thu min hrih bakah sawhthing pawh lei an inhuam vek a. Chutiang chuan, company lian tak, society lian tak mai an ni a, an ni chuan ‘Mandi te in dawr a niang chu maw le’, an ti mai a. Keini hian khunga *Mandi* te kha ropui kan tih viau lai khan anni chuan kha kha an hmuh dan a ni a.

Chutiang chuan, *Mahananda Co-operative Society* khan department nen hian direct-a indawr an duh thu an sawi a. Mizoram an vawi khat lo kalna a ni a, kan Secretary chak tak mai hian lo zuk zawng chhuakin, a lo receive a, chutiang chuanin an lo kal a ni. Hetah hian beiseina kan nei sang khawp mai a, kan marketing board lama Vice Chairman kan ko thla nghal a, an nite nen chuan an inkawm chho a, an inzui chhuak ta a ni.

Chuvang chuan, vawiin niah hian kut-hnathawktute thlai hi department leh sorkar hian kan lei ang kan ti chiah lo a, *support-price* kan pe ang kan ti a ni. A sawitu reng reng hian ‘in lei tawh em?’ tih ringawt mai hian mi hi an charge a ni. An thil hriat duh loh hi an hre duh lo khawp mai a. An *mizo* dan hi; mizote chu hngang tah mi kan ni a. A pu in hngang a lo tah a, a tupa a va lut kha chu a lo kian zat zat mai a, a inrap at ang tih a hlau a; thenawm naupang a lo kal kha chuan a sawn duh lo ang khan, thil kan hriat dan, kan mizo-dan hi lehlam pangah hi chuan a zo dal deuh tawh nge maw ni, inthliarna a nasa tawh lutuk, tih lai hi ka rilruah a awm a ni.

Chuvang chuan, farmers tena man man zawk leh an kut hah man an tel theihna turin sorkar hian nasa takin tan kan la mek a. Chutiang chuan, sawhthing te pawh engtik atangin nge an lei ang, tih kha a ni a, kan fimkhur tawh khawp mai. Mahananda Cooperative Society hnenah pawh, ‘nangmahniah hian rinawmna kan hmuh loh chuan kan ring dawn lo che u’, kan ti tawl mai a ni. A chhan chu RR Associates ah kan tih sual deuh tawh avangin ti ila, kan *tisual* chiah pawh a nilo, RR Associates hi kan *tihusual* zawng lek lekte pawh hian kan han ngai thei a. Ti khan, workers an hmu tlat lo a ni; khuti lai bagha vel syndicate ah khuan an lo inzawm thui viau mai a. Hlawhfa an zuk la dawn a, an hmu zo tlat lo; an kal ngam lo. A chhan chu, an let leh hunah syndicate-a inhlawh an phal loh an hlauh vang a ni a. Chu chu RR Associates fail chhan pakhat chu a ni.

Pu Speaker, he House kaltlanga ka sawi duha chu - RR Associates kan deal danah ‘in tisual e’, min tih rual khan, lehlam pangah a brake raptu an awm avang zawk a ni a. RR Associates te khatiang annih avang khan, nichina kan Chief Minister zahawm takin a sawi ang khan, a rate hniam zawk, an ngamna aia rate hniamin an lei ta a ni, tih kha.

He ZPM sorkar hi Pathianin a malsawm hle anih ka rinna chhan chu, Rubber Board of India-a chairman hi Tripura-a zin kha Aizawl a lo chho a, Minister a hmuh duh thu a sawi a. Kan inkawm hnu chuan kan Chief Minister a hmu leh duh a, Chief Minister appointment kan siam a, a tui em em mai a. Mizoram-ah hian rubber hi a tha a ni, tih a rawn hmu Chiang a. Tichuan, Mizoram-ah rubber lama hmalakna tur an sawi ta a, chumi sawina engah chuan CM-Rubber Mission pawh hi din a ni a. Tichuan, December, Ni 20 khan CM-Rubber Mission hi kan launch ta a. Chumi kan launch ni tak mai chuan NABARD General Manager kha a lo tel ve hlauh mai a. Chu manager-nu chuan kan hriat lawk leh kan beisei ang ni lo khan crore 27 bawr vel cheque kha min rawn pe ringawt mai a ni. DPR engmah kan ziak bawk silo a, a tihngaihna pawh kha kan hre lo a. Chu cheque kan dawn hnuah chuan DPR hi tunah hian kan siam a, kumin hian pilot project kan ti a, hectare 1000 velah hian rubber mission hi kan kalpui dawn a, nakum ah chuan a normal in kan kalpui ang a. He kum 5 chhung hian hectare sing 5 emaw vel cover kan tum dawn a ni. Chu chu a ni a, he ministry Pathian-in a malsawmna em em nia ka hriat chhan chu.

Tin, chumi rual chuan kan hotupa ber kan Chief Minister zahawm tak hian a sawi fo, hlawh hniam zawkte hlawh kan pe lo thin hi; kei phe chu Forest Deptt ah hian ka lo ngah angreng

viau a. State pawisa puk han dil ula te a ti a; chutiang khawpa pachhe zawkte hmangaih a nihna angin, keini department pawh hi min hmangaih hlein ka hria a ni.

Tunah hian kuhva chungchangah training-na tur cheng nuai 4 kan dil a, chu pawh chu min approve sak a. Tichuan, kuhva chin dan systematic tak, technology hrang hrang leh mithiam experts te nen inzirtirna kan pe dawn a ni. Chutiang chuan, wawiina kuhva tam leh harsatna neite pawh hma kan lakpui dawn a ni.

Hmanni VC thlan dawn khan Zampui tlangdung lam ka han kal a, an kuhva a lo upa deuh tawh nge, a tam nasa khawp mai a. Hachhek tlangdung ai chuan tam nasa tak a ni. Chuvang chuan, kan harsatna leh kan duh te hriain kan pu hian *'Enhance path of the economic value of existing areca nut plantation in Kolasib leh Mamit'* project atan crore 7.45 chu NEC hnuaiah tunah hian priority-ah min pe a, pawisa kan hmu a. Tunah hian tender hi la tihfel loh deuh a ni a. Chuvang chuan... **(Pu Lalchhandama Ralte, Opp. Leader:** Pu Speaker, khawngaihni a sawi lai khan. Kuhva tam te leh kangmei tuar ho tanpuina eng emaw a awm thei em, tih kha, i sawi thleng deuh tep a, i rawn lehpelh leh takin...) Pu Speaker, kha kha nakinah kan la sawi ang a; mahni maia han declare kha chu a remlo thei a.

Engnge ni a dinhmun; engnge a tam dan; a upat vanga lo tam nge tihte kha, nichina khan Hachhek Bialtu zahawm tak Pu Robert Romawia'n, "a pawisa ringawt an tel a, a kung enkawlina lampangah pawisa an seng leh silo te hi a chhan pawh a ni ang e" a tih ang khan, thil kha investigate phawta, chumi zawhah chuan compensate dan a awm em, tih chu ngaihtuah tura la awm turah ngai ila.

Kuhva hi Zamuang leh Chemphai ah te a sawngbawlina, a tih ro-na te, kuhva hmin tha skop-a siamna te. Tin, he project ina a ken tel hrang hrang a tam khawp mai a. Kuhva hnah leh a khehna atanga a bi-product awm theihna tur he project hian a keng tel a, kuhva chingtute hi chuan nasa takin hma kan sawn ka ring a ni. Tin, *Hama Mahanana* te duhdan pawh hi a lian angreng thin khawp mai a, chung te pawh chu kan han tawng chho a ni a. Tin, NABARD atang hian *'Kuhva approach road'* kan tih mai link road laih mek te, thawh mek te a awm rualin, PCC te pawh wawiinah kan nei nual a ni.

Kan budget crore ₹900/- chuang zeta a tlakhniamna chhan hi nikum *civil works* hnuaiia broom godown sakna te pawh kha a ni a. Khang zawng zawng han paih thlak khan wawiinah hian thawh a ni tawh a, a thar hi la tih loh a ni a. RE ah chuan nasa takin a rawn pung chho leh turah ka ngai a ni tih kha, kan Opp. Leader zawhna kha ka chhanna ni ta sela.

Demand No. 35 - Fisheries Department:

Fisheries ah kal leh ta pawr pawr ila. Fisheries hi a mak angreng khawp mai a, Fisheries kan chang a, hemi kan chan ve chhung reiloteah hian Mizoram-ah sangha nasa zawka kan thar theihna turin scientists te hian tum eng emaw zat training an rawn nei tawh a; Chutiang scientists te chuan nasa takin tan min rawn lakpui a. Mithiamte chhut danah phei chuan, mi pakhat hian kum khatah sangha kg 7 vel a mamawh a, hei hi minimum requirement anga an chhut a ni a. Chuvang chuan, wawiina kan sangha tharchhuahte hi rin aiin a la tam lo hle mai a. Potential kan neih zawng zawng atanga 25% emaw vel chauh hi kan la khawih a. Sangha tharchhuak tam turin kan potential neih zawng zawng hectare 24,000 ah hectare 5,880.08 (24.5%) chauhah hma kan la mek a. Tin, sangha dil nei mi 18,519 awma chhut a ni a, kum

khata kan tharchhuah hi qtl 54,700.50 niin, chu chu 4.8% vel chauh a ni. Chuvangin, kan sangha thar hi a la tlem em em a, khawih tur hmabak hi kan la ei zau hle a, kum khata kan mamawh 40% vel chauh hi kan la thar ang a ni a.

Tin, kan potential area neihna hrang hrang - Mamit, Kolasib atang te hian 50-60% vel chu thenawm Tripura State velah hian hralh a ni a, 2023-2024 chhung khan qtl 9500 vel kan lalut a ni. Sangha kan lakluh hi a thianghlim em, a tha em tih zawhna a awm a. Sangha kan lakluhte hi a that leh that loh test-na *testing kits* te pawh kan han nei a. Mahse, hma kan han lak dawn tak tak chuan Food & Drugs Department lampang khawih a lo ni daih mai a; keini subject chiah a lo nih loh avangin a zawhna kha ka chhang thei lo a. Amaherawhchu, *formalin a tam lutuk* tih ang chi, nichina kan House Leader zahawm takin a sawi ang khan, khang kha eng ang chiah hian nge ni kan play ve ang; miten an play nasa tawh a, an mahni tharchhuah kha an mahni state chhungah tihral an duh avangin keini pawh hian dramatic deuh chu kan la play ve a ngai maithei. Amaherawhchu, tun dinhmunah chuan kan requirement atanga 40% emaw chauh tharchhuak kan ni a.

Tin, Fisheries Department-a post zawng zawng 178 awmah post 99 fill up a ni a, a dang zawng 44.36% hi vacant posts a ni. A zatve pawh kan han ti pha lo a, kan pachhe angreng khawp mai.

Fisheries Department hi sorkar hmasaa minister-te portfolio semna ah khan an lo theihngihl daih mai anih chu! An hrilh kha a hai em em mai a; minister nei lo khan an lo awm ta deuh reng mai a, 'Minister hi kan nei ve lova, engatinge ni ang' an ti a. Chuta sorkar beng a'n thlen takah khan, an pe chawp leh a. Chutiang vel te chu kan ni a. Chuvang chuan, post vacant a lo tam viau pawh hi a awm viau a.

Mahse, nasa takin tan kan la a. Kan Chief Minister hi pachhia te hmangaih thei tak a nihna angin kan hnung khan PE post 5 min han pe a, kan lawm hle a; chu chuan nasa takin kan indaih lohna min puhruk a ni. Tin, District hrang hrangah, nichin khan Hnahthial lam bialtu leh Khawzawl lam bialtu zahawm tak te khan, (Saitual kha chuan a sawi chiah lo nachungin) hemi District pathum ah pawh hianin District Office hawn tumin tunah hian tan kan la a, tunah Finance ah te kan thehltut mek a ni tih kha ka'n sawi lang duh bawk a ni. Tin, Serchhip, Champhai, Hnahthial, Khawzawl leh Saitual ah te hian office building kan la nei lova. Hei, kan pu ber bialah pawh hian Fisheries Department hian office kan la nei lo bawk a, chuti chung chuan a bialah khan an hralh chak em em mai a, sangha-note thar hralh loh nuai tel kha a la awm a ni. Sangha-chi supply chungchangah hian accredited supplier lo hi chuan an supply thei lo a; in han sawi a, a lawmawm ang reng viau a.

Hemi chungchangah tlem ka sawi duh chu - Sangha-chi supply thei hi mi 11 vel chauh tunah hian an awm a, a thlan dan criteria kha a awm ta a. Tichuan, kan officers te a hmunah kalin an en vek a; anni khan sangha-note chi hi an thar chhuak ngei em tih kha an han verify phawt a ni. Chumi hnuah chuan an sangha a-nu leh a-pa (an breeder) kha, *a-pa kg 3 acceptable a ni a, a-nu kg 3 aiin a lian ngei ngei tur a ni*, tih a ni bawk a. A chhan chu, tunhma a an lo tih thin dan - kutphah chen lek lek zut tuia an lo tih thinte kha thla 8-10 hnu ah pawh a thang thei lo reng reng; kha kha he department charge ka lak khan miin min rawn hrilh a; ka'n zawt chiang a, a lo ni ta chiah mai a ni. Chuvang chuan, hemi endiknaah pawh, 'a dik lova in tih chuan kan spare dawn lo che u' tih kha a ni tawp mai a ni. Chuvang chuan, an endik vek a, 'an ti ngei e' tia thlalak te nen kan hmuh atang chauhin wawiinniah

hianin sangha chi supply hi Mizoram chhunga mite chauhin an supply tawh a, pawnlam atangin kan la ta lo a ni. An lo la palh te anih chuan minrawn hrilh ula; khang kha chu kan cancel zel ang.

Tin, Pu RM Chakma khan, 'saw lamah a tam e' a ti a. Mahse, helama supply turin tunah pawh tender te an chhuak mek a, tender an chhan ve loh chuan a supply theih tlat loh. A hmaa kan tih ang khan Bagha pheikhawi emaw lai vela mi va la-a supply anga min ti leh si te kha a hlauhawm a ni. Chuvang chuan, sawti laiah a chi siam chhuah a awm chuan Fisheries Department ah quotation te inrawn chhang ve ang a, chutah chuan anrawn endik ang a, tichuan, *approved supplier* in ni thei dawn a ni. A tam e, tih avang ngawt khan khatia supply theih kha a ni lo tih kha, Pu Speaker, ka'n sawichiang duh bawka ni. **(Pu RM Chakma:** An tihna a rei tawh a, a tha a ni. Vawiin tlaiah ka va hrilh nghal ang e) Kan department te paw'n an lo chhinchhiah ang a, an larawn en turah ngai ang. A chhan chu sangha hi vawiinniah hian 60 - 80 mm hi a ni tlangpui a, chu aia a len chuanin oxygen te nena tih a ngai a ni. A lian kha kan duh a, kutphah chen chen ni se chu a mortality rate pawh kha a lo sang lo viau thei a ni. Survival chance kha a sang a, a lian deuh ah chuan.

Amaherawhchu, a transportation ah khan buaina kan nei a. A chhan chu, oxygen te nena sarang a transport theih chin a hi chu transportation kan tih theih china hi chu 60-80 mm, 'fingerlings' kan tih kha a ni. Tin, kawng a lo hlat tham hi chuan a thi duh em em bawka. Tin, sangha chhuah an tih hian an theh thla a, kha kha sangha-note hian a haw em em a, a thi duh a. A chhuaha chhuah delh delh tur a ni a. A tihdan tur instruction kan follow loh avangin sangha-note hi a thi a tam a ni. House kaltlanga ka'n sawi duh chu - sangha-note chhuah dan instruction pek ang ngeia tih theih ni se tih hi. Tin, a chaw supply tih hi district tina district officer-te hnenah 50% subsidised in a awm a, subsidy-a lak theih vek a ni. Chuvang chuan, 'sangha chaw chuti khati' an han tih pawh hian, vawiinniah kan tih dana chu kha kha a ni. District tinah sangha chaw kha 50% subsidy-in a lak theih tih kha kan sawi duh a.

Tin, *centrally sponsored scheme* 'PMSSY' kan tih hi vawiin nia kan hnathawhna lian deuh ber chu a ni a. Hetah hian central share 54%, state share 6% a ni. Tichuan, 40% hi beneficiary te tum ve tur a ni ta a ni. Chumi awmzia chu, hetia kan han pek hian 'heti zat lek, cheng 50,000/- hian engtingge kan inkhuah thei ang; engtingge hma ka lak theih ang' tih question hi a tam viau mai a. Chuvangin, beneficiary share 40% kha an thawh ve tur a ni. An hnathawhna tura tanpuina central-in arawn pe a, state in 6% a lo tum a ni. Chu chu a kal dan a ni a. Heti lai hi Pu Speaker, House kaltlang hian kan MLA tinte hian hetiang kalphung hi lo educate, lo hrilh ve turin kan ngen che u a. Chutiang chuan, tunah hian project hrang hrang nghah mek te kan nei a. Hei tunah pheih hi chuan action plan-ah Project Appraisal Committee-a approved tawh eng emaw zah kan nei a ni.

Tin, Ministry of Fishery Development Board (FDBD) hian hian min recommend tawh a nei nual a. Chungte chu - State Department ah Integrated Aqua Park nuai ₹3,756/- lakh Zawlnuam - State farm ah khuan tih tum a ni a. Tin, Lai Autonomous District Council (LADC) ah ₹372/- lakh; Chakma Autonomous District Council ah hian ₹373/- lakh te a ni. Fishery Department hi chuan kan en hrang lo a nia, Lai te, Chakma te hi Pu Speaker. Chuvangin, eng emaw riaua an inhre thin kha keini chuan khatiang zawng khan kan ti lova. 'Engatinge Mara kha' inti mai thei a, Mara lam hian vawiinniah engmah anrawn dil lo a ni. Tin, a hmasa lama an lo hmuh tawh emaw anih chuan, chutiang chu a awmdan a ni a.

Tin, MIFMA hian ₹298.20 lakh, ZOFISFED hian ₹446.75 lakh a nib awk a. Tunah hian Project Appraisal Committee ina min recommend tawh zawng zawng hi ₹5,246.92 lakh a awm mek a ni.

Tin, 2024-2025 financial year chhunga hmalakna langsar zualte chu – Newport, Dil thar siamna hi hectare 125.5 tih belh ani ang tih a ni a. Hatchery hi tun financial year ah hian 10 siam mek a ni a, 3 dang siam belh turin minrawn ti leh tawh a ni. Tin, Lawngtlai ah Hatchery hmun mipakhat hnenah kan pe a. Amaherawhchu, amahin ‘ka tlin lo e’ tiin arawn surrender a ni. Hetiangah hian a tlin lo kha chuan anrawn surrender hlawl hlawl mai a ni.

Tin, kan Lawngtlai bialtu zahawm tak khan ‘hetiang thlanah hian ZPM chuan kan thliar lo ang in ti a, in va thliar si ve Lawngtlai East leh West ah pawh’ a ti a. West lamah 14, East lamah 36 leh tih kha arawn sawi nasa viau a. A nihna takah chuan Pu Speaker, ZPM Party-a lo awm tang tangte hi chuan tanpuina an la hmu ve ngai lo a, an phu ngawih ngawih a, Dil te an nei a, engkim an neih ve pawh hian pek an ni ngai lo a ni. Chuvang chuan, (**Pu C. Ngunlianchunga**: Pu Speaker, khawngaih takin. Khang ho kha, a awm ngar ngar an nilo, BJP a tanga lo lut te, MNF a tanga lo lut te an ni zawk a ni.) a phar hmasa an nih pawhin, khati zawng khan kan kal a, min lo hrethiam ula; kan la kal zel dawn. A leh peka kan select turah pawh a pek theih ang angin kan select dawn a ni. A chhan chu, kan pu berin, ‘*political selection* hi chu ti suh ang che u’ tiin, mawhpurhna sang tak min pe a ni. Mawhpurhna sang tak kan neih avangin

Pu Speaker, heng kan thlanah hian diklo te a awm anih chuan kan MLA zahawm tak tak hian complaint terawn thehlu ula, khang kha chu kan cancel ang tih hi kan tiam ngam che u a ni; chu chu kan assure che u a ni. Tunah hian thlan tur chu tam tak a la awm ang, chungah pawh chuan a la hmu ve ngai lote, lo hmu thang tawh deuhthe chu a hnung deuh ah pawh awm sela; chu chu in hriatthiam kha ka dil nghal bawk a ni. Hmu thang deuhthe an lo awm a nih hmel a, an sawidan hmangin; khatiangte pawh kha awm theih kha a lo ni a. Chuvang chuan, waviinniah chuan department-in verification fel tak a neiha hmu tlaka a tihte chu kan pe zel dawn a ni. Tin, kha kha PMSSY ah pawh a ni a; hand-holding ah kan progress-partner turte pawh a ni a.

Soil Department-a ka’n sawi theihngihl lawka chu, hand-holding hnuai CM- Special Package-ah ₹150 lakh kan dawng tawh a, sem mai theih turin tunah hian progress partner te pawh thlan a ni tawh a ni. Chutiang bawk chuan Fishery Department ah hian ₹150 lakh hand-holding atanga pek kan ni a, kan progress partner turte pawh waviinniah hian kan thliar chho fel tan thawkhat tawh a. He Session zawhah hi chuan kumina tih tur a ni a, project anih avangin chu chu kan thleng dawn; kan tifel dawn a ni. Chuvang chuan, hetah tu emawrawn recommend emaw, headquarters a ni emaw, kan MLA te te pawh nise, kan officer te verification report-a a tlin loh chuan kan thlang dawn lo; kan party mi tih lam kha a awm tawh dawn lo. Tin, ‘W’ partner awmzia chu, hna kan thawhpui tur te kha an ni. Hnathawhpui tur an neih loh kha chuan kan cancel mai tur a ni. An neih ngei ngei a ngai tih kha ka han sawi duh a chu.

Tin, NEC- ah hianin kan hotupa, kan CM zahawmtak hian minrawn duh sak a, Lengpui farm khu tunah kan han titha dawn a, fish-farming training center kan siam dawn a ni. Hei hi ₹972.97 lakh, NEC atanga kan hmuh a ni a. PWD tender a ngai a, PWD-in tender tunah

hian an han tichho mek a, tender hi a lo chhuak mai dawn.

Hei hi 'Pu Laldenga fish-farm' an ti deuh em maw ni kha le, a hming pawh hi. Engah emaw kan buai vak lova, 'ZMC' han ti ringawt te pawh hi kan sawi ve lem lova, khati lamah khan in huat thu a chhe angreng khawp a; 'MIMER' ti khan awm mai sela a tha tur kha nia. Hming thlak te in uar a, hming hi kan la thlak vak lova. Bill kan han putluh te pawh hian a main title hi chu a awm vek a ni a. Mahse a bill ah khan a body thar kha kan siam mai a ni. Chuvang chuan, thil hi hming kan thlak vak lo a, a tha zawk turin kan siam a ni. Chu chu *kalphung-thar* kan lanna a ni bawk a ni tih kha ka'n sawi duh a. Kha kha kan hmalakna tlangpui chu a ni a.

Tin, *National Disaster Response Fund* hi ₹54.47 lakh kan dawng a, hei hi chhungkaw 334 hnenah sem tur a ni. Hei hi a nihna takah chuan NRDF hian a chhutna hi a tlem em em mai a. Kan hria ang a, sawti laia chhiatna rapthlak tak kan tawn pawh khan a NDRF ang kha chuan a ngaihna a awm mang lo; In chhe vek pawh kha sing 2-3 vel emaw, nuai emaw vel kha a ni lek chauh mai a. Chuvang chuan, hei hi engati nge in tih tam viau loh in ti mai thei a. Amaherawhchu, anmahni chhutna leh kan zuk thehluh ang khan minrawn pe a ni tih kha ka'n sawi duh a.

Hmanni khan Guwahati-ah Central Minister pathum an lo kal a, India hmarchhak State Fishery Department Minister-te chu kan kim a. Chuta Central Minister chuan, 'heti zat pawisa hi kan hmang tawh a, engatinge in production hi a tam theih loh?' a ti a ni. Nichina kan pu berin Sericulture a sawi ang deuh khan, question hi a rawn awm ta a ni. Chuvang chuan, tunah hian ICAR leh NFDB ten nasa takin training minrawn pein minrawn enpui dawn tih kha an sawi a. Central khuan thahnem a ngai khawp mai; thil hi a-ral tih mai mai lo dawnin a lang a. Vawiinah he Demand kan sawi lai pawh hian heng kan beneficiary te, kan progress partner leh kan thil tih reng reng hi Central hian a lo monitor a ni tih kha kan sawilan tel ka duh bawk a ni. Chuvang chuan, kan fimkhur tlan a ngai a; waviin nia helaia rorel tura mipui thlante hian nasa takin kan educate a ngai a ni tih kha ka'n suggest duh bawk che u a ni.

Fisheries-ah khan tlem kan sawi leh duh chu, kan budget tlak hniamna chhan kha chu *salary, wages* leh *medical treatment*-ah a langsar deuh hlek a. A chhan chu pension-te leh khatiang ang kha an awm avang khan ₹112.65 lakh in a tlahniam a. Tin, chumi rual chuan tunhmaa budget a lang ngailo chu *Fluids & Lubricant* hi a ni a. Tunhmaa OE vela awm thin kha, tunah chuan a head hrangin anrawn dah ta a ni. Khata a kal hek avang khan khati zawnga en kha chuan tlem anga lang thei kha a ni. Hetaah pawh hian ₹6,00,000/- lai chu min dahsak ve a ni.

Demand No. 36 - Environment, Forests & Climate Change Department:

Tichuan, Environment, Forest & Climate Change Deptt. budget hi tlem tlem hian a danglam chho ve hret hret a, kan budget kalphungah te pawh hi danglam a awm a. Tin, Forest-ah hian kum kal lai aia kan budget estimate thar a punna dan hi crore ₹474.34 a ni a. Tin, budget estimate-ah ₹111 lakh-in a tla hniambawk a. A chhan chu, CSS atanga kan hmuh tur hi nikum revised aiin ₹938.38 lakh laiin a chho dawrh ve thung a ni. Tichuan, state leh central atanga sum kan hmuh tur belhkhawm chu ₹474.34 lakh nia chhut a ni.

Tin, budget head thar a awm a. Hmanni khan Pu Beichhua khan Excise & Narcotics-ah

khan hemi head ang tho hi a rawn sawi a. Hemi budget head tharah hian *Arms & Ammunition* hi a rawn awm thar ta a ni. Forest Department-a *arms & ammunitions* han awm ta hi engnge a chhan han tih mai kha a awm thei a. Amaherawhchu, kan hriat ang khan cyclone *Remal* thlipui leh ruahpui avanga kan savawm han chhuak ta te, khangte kha han lak let leh tum khan kan bei nasa khawp mai a, nimahsela rin ai khan a lo harsa a. Khatiang han bei tur khan khang savawmte kha hmu ta thut ila chuan va thaha kahhlum mai emaw anih loh chuan reh beh mai a theih a ni bawk si lova. Chung atan te chuan tranquilizers (anmahni va kah mutna) ang te kha a ngaih avang khan budget head tharah hian min rawn dahsak ta a. Hemi atan hian ₹2,00,000/- lai kan sorkar hian min dahsak a, chutiang chu a ni.

Budget head thar dang leh chu, royalty hi tunah hian budget-ah kan dah ta a. Hemi kan dahna chhan hi mi fel tak tak, thiam tak tak leh a tuimi tak tak ten forest leh nungcha chanchinte an ziak a, chung a ziaktute han tanpuina tur chu a ni a. Hei hi kuminah hian ₹1,00,000/- kan dah a ni. Tin, *Fluid & Lubricant* hi a hranpain a awm leh bawk a, head thar a ni a. Hetah pawh hian ₹33.50 lakh dah a ni. Chutiang chuan hemi estimate tlak hniam chhan chu salary-ah hian ₹130.43 lakh in a tla hniam a. Tin, *medical treatment* ₹52/- lakh laia a tlakhniam chhan hi chu, sorkar-hnathawktu thenkhat pension vang leh mitthi eng emaw zat an awm vang a ni a. *Per-head* ang zawnga Finance Department-in a chhut dan anga chhut a nih angin hei hi a tlem ta, a tlahniam ta a ni. Tin, *minor civil works* leh *electrical works*-ah hian ₹180.81 lakh in a pung chho ve leh a ni.

Forest Department hian kan ram zawng zawng hi a enkawl a ni mai a. Roadside reserve clearance an ti tlat mai a, concrete building nen, assam type nen a ding thup tawh si a. Nimahsela *roadside reserve* kha a la ti si a ni. Hei hi engnge a chhan kan tih chuan, Conservation Act, 1980 kha a hmang tlat mai a ni. Khata tang khan a chhut tlat mai si a. Nimahsela, hemi chungchangah hian Pathian hian mal min sawm hlein ka hria a, kan hotupa hi Pathian ring mi tak a ni a, '*Amah ringtute chu malsawmin an awm thin*' tih laia hi ka thinlungah a lian hle mai a. Hemi chungchangah hian deadlock hi a rei tawh em em mai a. Vairengte - Sairang hi NHIDCL-in hna a thawk dawn a, an ngam si lova; Forest Clearance la turin Parivesh Portal kan han dah a; double entity pek theih anih loh chuan, forest clearance leh land owner compensation kha kan pe thei lo an ti si a. Nimahsela, kan pu hian nasa takin a zuk bei a, a tawp ah double entity, double compensation min rawn pe ta a. Tunah hian package zawng zawng hi KALA-ah an thun tawhin ka hria a. Chutiang chuan, tuna Forest Clearance la hmuh lohna chhan hi chu, Shillong-a a dealing officer ber kha ni 14 thleng leave a la a, ni 15 ah kha chuan zawm turah kan han ngai a. A zawm chuan, rang takin forest clearance pawh hi kan hmu thei turah kan ngai a ni.

Tin, forest hi project kan neih reng reng hian kan lo palzam lutuk hi a pawh a, NIT Lengpui chungchangah pawh nasa takin harsatna kan tawh a. NGT-in Supreme Court a complaint a thehluh hlek chuan Court intervention hi a rawn awm nghal zel a ni. Khami a nih kha chuan contractor khan a thawk ngam lova; thawk lui se chu Supreme Court in a hrem dan tur kha a hre vek si a ni. Chuvang chuan, an thawk thei lo a. Kan Education Minister chak tak pawh hian tih viau an tum thin a, a mangang a ni. Amaherawhchu, a tawpah kan Pu-ber hmalakna zarah vawiinniah kan han breakthrough thei ta a. Crore 14 vel kan senna turah khan crore 3.8 velin tunah hian NPV vel kha pe lovin kan kal chho thei dawn ta a ni a. Tiang chuan, forest clearance te pawh process mek a ni a, *in-principle* approval awm tawh anih avangin har lo turah ka'n ngai a ni.

Tin, Forest hian centrally sponsored scheme atangin a tlangpuiin hna a thawk a, Green India Mission hi 2008 atangin tan a ni a, 2016 ah kal chho zelin ₹1870 lakh chu pawmpui a ni a. Chutiang hnuai atang chuan tunah hian hnathawh mek a ni a. Tichuan, Integrated Development of Wildlife Habitants (IDWH) hian National Park 2 leh Wildlife Sanctuary 7-te a enkawl mek a ni a. Heng atan hian annual action plan ah ₹1530.337 lakh leh first instalment ₹344.32 lakh hmuh a ni tawh a. Tin, SMS hi 38 hmuh a ni bawk. Tichuan, he scheme hi hetiang a bika enkawl ngai kan national park te leh sanctuary te enkawl na tur a ni a. Tin, *Project Tiger* hi Dampa ah a awm a; savawm awm zat erawh chu minrawn pe lo a, ka chhang thei lo a, nakinah a tul leh ziakin kan la pe turah ngai ila. Dampa *Project Tiger* hi National Tiger Conservation Authority sum hmanga enkawl a ni a. Kum 2024-2025 chhung khan APO-in Annual Action Operation hi ₹378.26 lakh a approve a, first instalment ₹85 lakh hmu tawh niin, SMS ₹9 lakh September, 2024 khan hmuh a ni bawk a. Second instalment hi ₹152 lakh leh SMS hi December 2024 khan dawn leh a ni a, last instalment hi beisei mek a ni.

Tin, IDWH te, Project Tiger te tan hian Wildlife Guard kan dah a, chung Wildlife Guard hrang hrangte chu 300 dawn vel kan nei a. An hlawh hi central atanga lo kal a nih avangin an hmu tlai thin a. Nichina kan pu berin, ‘hengte hi churawn ti ula, kan lo pe ang che u’ a tih ang khan tunah pawh kan dil a. Heng ho hlawh hi tun budget thar atang hi chuan kan update ang a, anmahni pawisa tur a lo kal hunah State pawisa kan lo hmanpuk chu kan rul leh dawn a ni. Hei hi thil lawmawm tak niin kan hria a, keini a department neitute tan phei chuan kan khi ver ver mai a ni. A chhan chu, batna tur pawh an nei tawh lo. An ba rei thin lutuk a, an batna te khan bat an phal tawh lo a ni. Hna dang an thawk thei bawk si lo a, chutiang khawpa harsa chu an ni a. Chuvang chuan, an dinhmun hrethiam takin kan Finance Minister zahawm tak hian khatiang tur khan min han phalsak hi kan lawm em em a ni.

Tin, *Forest Fire Prevention & Management Scheme* (FFPMS) sum hi February khan kan dawng a, tunah hian division tinah kan pechhuak tawh a ni. Hmanni khan Phawngpui tlang kha a kang a, Archhuang ho lo hal vanga kang chu a ni an ti a. Archhuang VC khan mipakhat hnenah cheng ₹35,000/- an pe a, chu chuan mi 11 chauh a chhawr a. Tichuan, Ni 13, a kan ni khan mi pahnih chia an chhawr leh si avangin, kangmei kha an dang zo lo a ni. Chuvang chuan, Sentettlang leh sawmi Thaltlang khuate an thawk rim em em a, forest hotute nen; Far Park chu a thleng chho lo turah kan ngai a. Tunah hian Sentettlang leh Thaltlang mite tui lakna chu tunah hian kha mei avanga lung tla khan a deng chhe nasa a, an mangang nasa hle a. Tichuan, kan Minister PHE changtu zahawm tak hi ka hrilh a, a niin action a la nghalin ka hria a, an harsatnate pawh rang taka solve theih kan inbeisei a ni.

Pu Jeje-a, Hnahthial Bialtu zahawm takrawn sawi Reiektlang kang pawh kha nasa takin kan RO ten an thut chilh a, a ngawpui lam pang kang lo khan an timit thei hlauh a ni. Chutiang chuann hmun dang tam tak a kangmei chhuak hi keimahni forest area chhung anih loh hi chuan, kan jurisdiction pawn ami hi chu kan thunei hna a ni lo a ni. Chuvangin, khami fund kan neih te kha chu eng emaw hnatlanna atan te chuan kan ti thei.

Tin, *National Plant for Conservation of Aquatic Eco-system* hnuai ah Tamdil leh Pala Wetland kan nei a, Pala Wetland ngat phei hi chu *Ramsar Site*-a pawm a ni. ‘*Ramsar*’ ti hi forest-ina convention an nei hna hmasa ber Middle East-a *Ramsar* hmun hmingin international level-in a hriatpui tihna a lo ni a. Chuvang chuan, *Ramsar Site* hnuai ah chuan hma lak chhoh zel a ni a, heng hmunte hi nasa taka humhalh an ni a. Hei hi kum nga chhung

atan plan siam a ni a, *Integrated management plan* pawisa pawh tunah hian Tamdil Wetland atan APO ₹168.80 lakh dawn a ni a, Pala Wetland atan ₹170.44 lakh dawn a ni bawk.

Tin, Central Sector Scheme *Nagar Van* hi ‘Urban Forest’ tih te a ni ta a, tunah Bawngkawn leh hmun hrang hrangah siam a ngai ta a. Climate change nasa lutuk avang hian khua a lo lum nasa ta a. Tianga harsatna namenlo an tawh avang khan *Nagar Van* hian hectare 50 vel ang hi a ti a ni a. Khatiang atana area tur kha a awm chiah lo na a, engtin tin emaw kan officer-te remhriatnain an han ti a. Tin, tunah hian *Nagar Vatikan* hi a lo chhuak dawn a, hectare 10 vel a ni dawn a, khami hmang khan khawpui hrang hrang, hmun hrang hrang kha ala tih theih dawn a ni. Hei hi central sector a ni a, kum 2021 atanga tan a ni.

A hma chuan Aizawl leh Champhai chauh a ni a, tunah chuanin hmun 14 ah *Nagar Van* hi min rawn phalsak a, chungte chu – Hnahthial, Saikah, Mamit, Zongaw, Kawrthah, Khawzawl, Lawngtlai, Saiha, Serchhip, Darlawn, Serchhip ah te hian a ni a, Serchhip chu kan pu ho khan hmanni ah hawn a ni a. Nichina a sawi ang khan, highland area kha an develop , Serchhip khua saw a tinuam em em a. ‘Lowland area te reserve area-a kan dah hi high land area hi ni tawh se’ tih rawtna te kha min ti hrechhuak hle a. Tin, Darlawn, North Vanlaiphai, Tlabung leh, Kolasib te a nib awk a. Hnathawhna tur 1st instalment ₹1,760 lakh hmuh a ni a, 2nd instalment ₹756.8 lakh chu nghah mek a ni.

Tin, Ministry of Ayush, Govt. of India hnuai a National Medicinal Plant Board hian medicinal project a rawn siam a, hetah hian component pahnih - *Ex-Situ conservation* leh *In-situ conservation* te a ni a. Ex-Situ hi chu engnge ni ka ti a, min han hrilhfiah a. *Ex-Situ conservation* ah hi chuan hmun hran atanga medicinal plant lakkhawmte chinna kha a ni a, *In-situ conservation* hi chu a awmsa conserve-a tihpun kha a ni a. Chutiang atan chuan central sorkarin project cost ₹952 lakh a rawn ti a, heta tang hian ₹809.52 lakh hmuh tawh a ni a, ₹114/- lakh balance kan la nei a ni.

Tin, Project dangte - *Nature Learning Centre*, Champhai ah tih a ni a. Tukin zing khan he Nature Learning Centre huaihawtin Vanapa Hall kawtah zing 6:30 khan college 5 atanga thlan bik mi 30-te Kaziranga leh Guwahati Zoo te en turin ka vai liam a ni. He *Nature Learning Centre* hi chuan a ken tel chu - mipuite hnenah zirtirna pek a ni. Heng atan hian ₹200 lakh hmuh a ni a, ₹150 lakh chu dawn tawh a ni.

Tichuan, Woodbase Industry hi mi 42 hnenah pek a ni a, chung zinga 40 te chu operational a ni a. A pek danah hi - Aizawl 4, Mamit 16, Kolasib 14, Lunglei 6, Champhai 2 te an ni. Hei hi a area-a thing awmzat atanga teha pek an ni. Tunah pawh hianin dilna hi a tih theih reng a, wood-based industry-ah tunhmaa round-up a tih thin kha tunah chuan *value addition*-in, readymade leh helaia employment thliar theihna tur atana hei hi kalpui a ni a, 2020 atanga lo tan tawh kha a ni.

Tichuan, CAMPA chairman hi CM a ni a, kum khataah wawi 2 tal hi meeting tur a ni. Tunah hain vawihnih kan meeting tling tawh a. A lo ngaituah tawk lo nge ka hre lova; . Sorkar hmasaah khan engtik nge an last meeting tiin min zawt a, chairman khan a chhang thei lova. Chuvang chuan, CAMPA hi an lo ngaihsak lo hle niin a lang a. Amaherawhchu, kan Chairman leh kan CM ni bawk hovin hma kan han la chhova tunah chuan expenditure sanction pek chhuah tawh a ni.

Pu Speaker, Wildlife sector-ah chungchanga savawm chhuah chhan kha a mak khawp mai a. Pu Rintluanga a awm lova; savawm emaw tih kha an tam khawp mai a. Kha savawm emaw tite kha an va kal a, cage ah eitur tui tha tha - mai te leh eng eng emaw kha an keng a, a kal duh reng reng lo. ‘khutah a inbual’ an ti a, a inbirh phur phur mai a. Kha savawm kha a duh chuan a fing em em mai a. Minrawn phone thin a, ‘hei thi te a awm a, mi a hliam te’ anrawn ti a. Savawm tichhuaka a tihhuai tur lek lek khan kan awm tawh mai si a. Nimahsela, he Ministry hi Pathian-in a malsawm a ni ang. Pu TBC-a phei chuan, ‘kahhlum vat tur; ka bial mipuite a ti ralti nasa lutuk a ram an kal ngam lo a nia’ a ti thul. Mahni lo maha ti tha kan han intih tehlu nen, tikhan zantin mai hi ka zawt a, a hrehawm pawh kha an ti a. Hnuchhui thiam bik leh uisa thiam nen; mahse a tawpa tawpah chuan arawn let ta a. Tichuan, sahan hungna bulah khan cage kan siam a, a trap-ah khan a lut ta hlauh a; tichuan kan dah lut thei ta a ni.

Tin, mak leh em em mai chu, ‘kasovo’ an tih, kiwi ang deuha thla neilo sava tlan luah luah chi, khang kha exotic bird zinga mi kha a ni a, *exotic animal* pawh an ti mai thei a. Mak ang reng deuh mai chu, a tui ta tlat mai anih chu! A han tui lian em em mai lehngal a; a tui pakhat pawh artui pum nga hian a tiat lovang tih tur vel a ni. Tunah hian incubator-a dah turin kan la chho a. Khang exotic bird te pawh kha Mizoram-ah hian kan tikeu ve mai thei a ni. Chuvang chuan, he Ministry hi Pathian hian a malsawm hle a ni tih hi ka chhut ve dan a ni a. Malsawmna hi kan dawng mawlh mawlh mai hian ka hria a, a lawmawm hle a ni.

Tin, Wildlife sanctuary chhunga Dampa South khuaa chhungkua zawng zawngte chu anmahni remtihain sawnchhuah an ni vek tawh a. Khami chungchang kha minrawn zawt a ‘a dangho kha’ anrawn ti a. A nihna takah chuan, in register zingah an tel lo a hnuat leh kha an ni a, an tan hi chuan a hrehawm hle ang tih pawh kan ring. Tin, tuna kan sawn chhuah te ngat phei chu (a sentimental zawnga kan ngaihtuah chuan) vawiina kan chhuahna tur hi he nuai 12 lek hian a phu lo an ti hial a ni; a dik pawhin ka ring. Amaherawhchu, khalai hmun kha protected area-a puan alo nih tawh miao avangin anmahni duhna ngeiin sawnchhuah an ni a, he achievement hi a ropui hlein kan hria a ni. Chuvang chuan, he sorkar hi Pathian malsawmna a niin ka hria tih kha ka’n sawi nawn leh duh a ni.

Tin, International boundary-a awm kan nih avang hian ramsa *entirnan* - exotic bird/animal kan tih ang te hi an kal hnem a; hetiang hi enkawl ngai an awm zeuh zeuh a ni. Tin, ramsa hliam 200 chuang chhanchhuah tawh an ni a, chumi kaihawihah chuan mi 50 vel hi case siam sak an ni a, kan strict hle mai. Pu Speaker, nangmah kaltlang hian vawiin nia ka member puite ka’n chah duh che u chu, airgun te in naute’n an lo pu vu vu mai thei a; khang kha an man ngei ngei a ni. Vahrit, Ramar pawh an kap tih hriat anih chuan, fridge a mi pawh kha kan lachhuak zel a ni, kan ham strict khawp mai. Phunchawng khu hetiang lamah hian an entawn tlak ang reng viau mai a, an Local Council ten air gun neih an khap a ni. Mipui te pawhi vawiinniah hian heti lam conservation ah hian kan harh tan tlat a ni. Chuvang chuan, kan bial theuhah hian zirtir ila, chah ila, chutiang chuan vawinniah kan nungchate Pathianin a kan zinga cheng ve tur leh tel ve tura a tih angin thlamuang takin kan chengza thei dawn a ni.

Pollution Control Board hi kan sawi zeuh a, kan hotute khan; a pawimawh em em a. A Act hi 1974 kuma siam a ni a, ‘*The Air Prevention and Control Pollution, 1981*’ tih a ni a. Tichuan, Ni 22.9.1989 ah Mizoram sorkarin a din a, *Statutory Board* niin Environment, Forest & Climate Change Department hnuaih awm mek a ni. Ahnathawh ber chu - leilung

hausakna humhalh a ni. Tin, Pollution Control Board-in vawiinnia a hnathawh ropui tak chu, *Manual air quality monitoring* station hmun 34 ah nei a, tunah hian station thar 10 siam belh a tum a ni. Chutiang chuan, vawiinniah hian *Continuous-Air quality monitoring system* hmangin Aizawl khawpui boruak hi teh reng a ni a, heng data te hi englai pawha en thei a ni. 2012 atang khan Aizawl -Lunglei motor khu endikna kalpui a ni a. Aizawl-ah hian testing centre 3 te chu mobile van 5 hmanga kalpui a ni. Lunglein centre 3 a awm baw a, Aizawl hi hawn belh tura hma lak a ni.

Pollution Control Board hi Transport Department chan niin, a *outsource* a. Keini chuan khata revenue kan hmuh kha Transport Department ah kan chhunglut a; kum 3 chhunga kan chhunluh hi - 2022-2023 ah ₹2,47,740/-; 2023-2024 ah ₹8,73,440; 2024-2025 (upto January, 2025), ah ₹9,24,280/- a ni. Chutiang chuan, vawiinniah Transport nena an thawh dunnaah hian revenue pawh hi a hmu tam sawt ve viau a ni. Tin, *Bio-medical Waste Management Rules* hnuaiah hian heng healthcare facility ah te phalna mi 229 pek ani tawh a, *hazard wasteful* bawlhhlawh siamna hi 23 pekchhuah an ni tawh baw a ni. Tin, electric waste, 'e-waste' kan tih ah hian Producer Responsibility Organisation (PRO) pahnih an thawk mek baw a. Tin, *Plastic Waste Management Rules* hnuaiah hian importer pakhat hnenah register tawh a ni a. Plastic hi chhe mai thei lo a nih avangin hian a buaithlak em em a, heng atan hian mass awareness campaign hi sikul leh college 2400 ah eco-club te public leh mass media kaltlangin thalaite zirtirna pek a ni a. Tin, *Green Development* hnuaiah training pek a ni baw a.

Tin, Pu Speaker, thawktu Chairman leh Member-Secretary tih lohte hi chu a la nghet lo vek a ni a. Vawiinniah hian a thawktute service rules leh post creation siam fel a la ni lo cheu hi a paw tak zet a ni. Draft service rules hi DP&AR ah thehluh tawh a ni a, nichina an sawi Supreme Court intervention avangin a pawnga puia kan palzam theih a ni dawn lova, *mandatory* angin a kal chho dawn niin a hriat a. A chhan chu, tunah hian thawktu mi 69 vel a awm a, a theih chen chen absorption kan tih hi a ngaih hmel hle a ni. State thenawmah te hi chuan, Meghalaya ah post 119 leh Manipur ah post 152 lai an lo fill up tawh a ni. Keini hi kan sum dinhmun kan en hian a huphurhawm hle a. Mahsela, Sorkar ngilneitak, *mipui-sorkar* a nih angin heng te pawh hi kal chhohpui thei zel turah ka inngai a ni.

Demand No. 41 - Sericulture Department:

Pu Speaker a tawp ber naah Sericulture hi kan hriat angin Maimaw pangang khawi a ni mai a, pangang han tih hian a rapthlakawm viau mai a, chutiang chu a ni a, heihi rawn sawi hi an awm deuh nual a, nichina kan sawi ang khanin Sericulture-te hi kan uar a, India President Dr. Abdul Kalam a lo kal pawh khanin khatiang khawp khanin Mizoram economic chu dinchhuah theihna chu Sericulture hi a ni, a rawn ti tawh a, churang chuanin Sericulture hi a pawimawhawm hle a ni, a chhan chu ngaw siamna a ni a, leilung ruangam top fertile soil te chutiang luangral tur venna a ni a.

Sericulture-ah hian Pathian malsawmna mak tak mai a lo thleng baw a. Silk Board of India Member Secretary, 'Next to Minister' an tih mai khan *North-East Sericulture Director Conclave* hi Guwahati-a neih thin kha, 'Mizoram-ah neih ka duh a ni' a rawn ti mai si a. Department lam ka'n zawt a, eng State-te in nge lo thlen tawh han en teh u ka ti a, Guwahati lo tumahin an lo la thleng lo a ni. Tichuan, Guwahati pawnah a vawikhatna atan Mizoram kha a rawn propose ta a, chutiang chuan kan lo thleng ta a ni. Tichuan, State tin Director lo kalkhawm an ni baw a; Aizawl khawpui kha *traffic jam awm lohna*-ah

khan kan lo la siam hman lova, motor parking problem awm lohna turin hma kan lak hman si loh avang khan, kan han ngaihtuah vang vang a, 'Thenzawl Golf Course-ah i ti mai ang u' kan ti a, chutah chuan kan va ti ta a.

Tichuan, chawp leh chilh khan *mugha* project 500 nos. beneficiary atan crore 13 vel kha min han pe nghal tawp mai a, ni 7 chhungin pawisa hi ka rawn sanction ang an ti a ni. Kan pu pawh hian a awih lo lek lekin ka hria a. Commitment a siama, min assure bawk si kha chuan kan ringlo thei lova. Tichuan, a sawi ang ngei khan ni 7 chhung velah first installment kha a lo kal ta a ni.

Tichuan, beneficiary hi Mizoram pumah mi 500 kha kan thlang a, chungah chuan Pathian malsawmna kha kan dawng nasa khawp mai a. Tunah hian P3 unit hi min rawn pe leh dawn bawk a, chu chu kan CM hnena a tiam a ni a. Kan pu pheichuan, 'P4 hi chu Thenzawl-ah hian awm sela maw le' a ti a. Chutih lai chuan, kan *mugha* pangang khawitute hi engatinge an zuih leh mai thin, tih kha ka chhan tel duhna chhan chu, a chi hi department hian kan pek theiloh avangin an tan khawi zawm zel kha a lo harsa a, kumkhat emaw vel te an lo tih theihloh kha chuan an lo zuzi ral mai kha a lo ni ve bawk a ni. Eng ang pawn thuam ila, a chi kan pek theih si loh kha chuan, khawi tur kha a awmlo miau mai si a ni. Chuvang chuan, khawvel lum chho zel climate change avang hian tunah hian Assam, a chi lama kan inngahna berah *mugha* hi a tha thei ta vak ta lo a ni. Tin, *mulberry* te, *Air-layering* te pawh hi a nihna takah chuan Manipur-a inngat kan ni a; an ram a buai avangin wawiinah a chi kan hmu theilo a ni. Chung harsatna lian tak chu kan nei a. Zemabawk-a a chi siamna te pawh saw tuaihnum a ngai khawp mai; in ram tawh emaw in ti mai thei. Chutiang chuan kan department hian han tuaihnum dawn tan a ni a. Tichuan, P3 kan hmuha unit kan neih ve leh hemi *mugha* pangang khawi duh hote chu a chi kan pe thei tawh dawn a ni.

Tin, Cocoon tharchhuah te hi Zemabawk hmunah process a ni a, wawiin hian ka ha ang ka ti a, kan theihngihl hlauh a; naktukah ka rawn ha mai ang a. Department zawng zawng hak mek te pawh hi Mizoram thar a ni a; kha, kha kan Opp. Leader hak pawh kha a ni mai lo maw? Present nge nge ula a tha ang a; Mizoram-ah khan la process lo emaw te kha an ti a. Puan te Thenzawl ah demand a awm chuan, an colour duh zawng nen englai pawhin leitur a awm a, an duh angin a colour pawh an siam thei a, dying an ti nghal vel bawk a ni.

Tin, pawn lamah kan hralh bawk a. Tin tunah pheichuan hei kan department-in chak taka a lakna ah cocoon pawh 16 % in a man tihpun a ni ta a, hei hi farmers te tan chuan thil lawmawm em em a ni a. Tunah hian pangang khawiin thla khatah cheng sing 4-5 hmuh theihna a ni. Wawiin niah hian vawk-vulh te, ar-vulh te, broiler-vulh te ai hian a la thar hma zawk a ni a. Tin, a hna a hautak lova, pitar leh naupang thlenga thawh theih a ni. Chuvang chuan, Sericulturure ah hian nasa takin tan kan la chho leh dawn a ni.

Diary ah hian 100 nos. beneficiary-in wawiinniah kan han tichho a, *mulberry* ah hian pawh chutiang bawk chuan kan ti a; tunah hian Chawngte ah hma la turin kan inpuah chah mek a ni tih kha kan sawi duh a. Sericulture hi tunah hian Samagra-II hnuaiah *mulberry* te *muga* leh *air-layering* te kalpuiin kan ti chho ve zel a, Mizoram hmel tidanglam turin tan kan la a ni. Chutiang tur chuan in bial theuhah te mamawh leh duh te an awm chuanin department ah lo thlen ula, kan rawn bawhzui zel ang a. Hei hi kan sorkar, *mipui-sorkar* hian mipui duh anga kal a tum avangin heng kawngah hian tan a la hle a, tunah pawh hian CM-Special Package *hand-holding* hnuaiah hian tunah hian ₹30 lakh min pe a, a progress partner tur

pawh kan thlang chho mawp mawp a. Nichin a kan sawi tawh ang bawkh khan, tun financial year chhunga pek tura tih a ni a, tiang chuan silk product pawh hi a pung chho zel dawn a ni. Tin, a rate pawh kan tipung chho zel turah ngaih a ni.

Tichuan, Pu Speaker, heng ka Demand-te –

<i>Demand No.</i>	<i>Department</i>	<i>Amount in ₹</i>
33	Land Resources, Soil & Water Conservation	18,99,76,000.00
35	Fisheries	11,01,80,000.00
41	Sericulture	16,03,24,000.00
TOTAL		1,94,88,48,000.00

te hi he House zahawm takah hian min pass-pui turin ka rawn ngen a che.

SPEAKER : Awle, tunah chuan Minister zahawm tak Pu Lalthansanga demand te: -

<i>Demand No.</i>	<i>Department</i>	<i>Amount in ₹</i>
33	Land Resources, Soil & Water Conservation	18,99,76,000.00
35	Fisheries	11,01,80,000.00
41	Sericulture	16,03,24,000.00
TOTAL		1,94,88,48,000.00

te hi he House ah pass a rawn dil ta a. Remti apiangin, ‘remti’ ti ula; remti lo kan awm chuan, ‘remti lo’ ti ula.

(House-in pass a remti a.)

A lawmawm e. Minister zahawm tak Pu Lalthansanga Demand chu House in lungruak tak in a pass ta a ni. (**Pu Lalthansanga, Minister:** Pu Speaker, ka lawm e.)

SPEAKER : Aw le, tunah chuan Minister zahawm tak Pu Lalthanzova’n a heng a Demand-te –

<i>Demand No.</i>	<i>Department</i>	<i>Amount in ₹</i>
6	Land Revenue & Settlement	36,58,23,000.00
17	Food Civil Supplies & Consumer Affairs	2,78,68,80,000.00
TOTAL		3,15,27,03,000.00

Henga kan sawihona te windup-in, sawifiah ngai a tih te rawn sawifiah turin leh House ah pass rawn dil nghal turin ilo sawm ang u.

PU B. LALCHHANZOVA, MINISTER: Pu Speaker, ka lawm e.

Ka department enkawl Land Revenue & Settlement leh Food, Civil Supplies & Consumer Affairs te vawinah he House zahawm takah hian thahnemngai takin House Leader tiamin Hous member 26 in an sawi a. Uluk takin ka lo ngaithla a, a lawmawm ka ti hle a. Kan ram tana an vei te he House ah an han sawilang a a lawmawm hle a ni.

Pu Speaker, vawiin hi *World Social Work Day* a ni a, nangmah kaltlangin he House zahawm tak hi *Social Work Day* chibai ka buk a. Kumina *World Social Work Day* thupui chu - '*Strengthening inter-generational solidarity for enduring wellbeing*' tih a ni a. He World Social Works Day theme hmang hian ka department enkawl pahnih sum lak luhna lam te, mipui hne tak mai te kan enkawl chhan leh kan hmalak chhan te hi hemi hmang hian bul han tan ka duh a. He Hosue-a mawhpurhna neia kan lo din ve hian keimahni tana thawk hi kan ni meuh lo a. Thang leh thar lo la awm zel tur leh Mizoram lo la kal zel tur thangthar zawkte mahni kea ding theia Mizoram kan din duhna avangin hmalakna hmachhawp lian tham tak takte, mahni lam tawrh theihna ang chi leh sawiselna awm thei ang chite pawh kan han hmachhawn chho a ni a.

Pu Speaker, vawiina sawitu te sawi chi hrang hrang te kha chhan kim vek ka duh a. Amaherawhchu, theihtawpin ka'n bei chho ang a. Land Revenue & Settlement lama ka luh hma hian i veilama mite rawn sawi tam tak te leh kan zawhna tam takte pawh chhang nghal thei turin, thil pawimawh em em *buhfai* leh a kaihhnawih ration card chungchang hi han sawi hawn hmasak ka duh a.

National Food Security (NFS) hi a phute tan chauh; '*NFS hi chiang taka hriat hi kan chanvo a ni*' tih booklet ka department in a siam a, hei hi House property atan hlan nghal ka duh a ni. He booklet hi kan MLA zawng zawngte kan rawn sem vek ang che u.

Demand No. 17 - Food, Civil Supplies & Consumer Affairs Department:

Pu Speaker, a hmasa berah chuan, 2011-a National Household Survey sorkarin a buatsaih kha 2021-a neih leh tur a ni a. Amaherawhchu, Covid-19 avangin neih a ni ta lova. Tunah hian Mizoram-in National Food Security a quota kan neih chu mi 7,06,296 tan *card eng* leh *card pawl* min pe a. Chu chu rural ah 81.88% leh urban ah 48.60% min cover mek a ni. Kan thusawi zawng zawngte khaikhawmna chu kan House Leader pawh khan a rawn sawi tawh a. Mi 7,062,96 ah hian a thlan dan dik, fair takin khaw tin leh veng tin hian thlang ngam ila. Pu Speaker, he thil kan buatsaiha kan hmachhawn naah hian '*thlang ngam ila*' tih hi ka rilrua a thawh dan pawh a ni ta chiah lova. Thlang phal ila, mirethei an chanvo tur changlote hi duhsak tak takna nen National Food Security kalpuina hi thlang phal ila chuan, mi 706296 ah hian (chhim lama kan thiante paw'n an rawn sawi kha) miharsa tak takte khungkawm kim deuh vek theihna tur hi a ni a.

Amaherawhchu, 'NFSA' kan tih ah hian mirethei tak takte an luh loh laiin, mi-awmthei zawkte an la awm fer fur mai tih kan hria a, hei hian rilru a tihrehawm khawp mai. Tunah hian ration card hi Mizoram-ah 2,82,894 a awm a, hetah hian mihring 11,38,846 kan awm mek a ni.

He House zahawm takah hian zawhna lo lut tura ka beisei lut chiah lo a awm a, chu chu kan sawilang nghal ang a. 'NFSA hi engtin nge an thlan; achantu minister hian a thlan dan criteria fiahfai takin he House hi hrilh rawh se' tih kha burning question deuh tura ka ngaih nia, a rawn tel ta chiah lova. National Food Security Act, 2017 Mizoram ina a adopt-ah khan criteria siam a ni. Kha criteria siam kha kan han chingkual nasa khawp a, chi hrang hrangin kan ching a ni. Khami hmang khan National Food Security Committee-in tunah hian khaw hrang hrangah an kalpui chho a. Amaherawhchu, a selection criteria kha sawrkar hmasain a lo hman kha a buaithlak lutuk ani. Motor ke pali nei te chu card pawlah an lut thei lovang, card engah an lut thei lovang tih kan han hmang a. Tawngmawi lo ni lo

se, taxi driver dinhmun harsa ve tak te kha motor ke pali nei an lo ni si a. Khangho kha kan han telh dawn loh khan a buai zo leh vek mai a. Tin, *'concrete building nei'* han tih ringawt pawh kha, eng emaw avanga concrete building-a cheng ve ringawt, rethei viau site kha an awm avangin Pu Speaker, House-ah te pawh a rem chuan kan la pulut tho ang a, Cabinet-ah te pawh kan la thehlut ang a. Rawtna deuh kan thusawi tifiaktu atan ka chhawp chhuak duh a.

Assam leh State thenkhatte pawhin NSFA thlanah hian income hmangin criteria an lo siam thin a. Keini Mizoram-ah pawh researcher te kan ruai a, chung findings based chuan he House-ah hian ka sawi duh a. Aizawl leh Lunglei khawpui Municipal Area-ah chhungkua, kumkhata an sum lakluh zawng zawngin ₹5/- lakh a tlin loh chuan, chung mite chu NSFA-ah lut rawh se. Tin, District hqrs., sub-Division leh *notified town* kan tih zawng zawngah an chhungkaw sum lakluhin ₹4/- lakh a tlin loh chuan, NSFA-ah lut sela, a bak zawng thingtlang khawdangah khan an chhungkaw sum lakluh belhkhawmin cheng ₹3.5/- lakh a pelh loh chuan NSFA-ah lut mai rawh se tih hi, vawiina ka thawhpuite nena he House zahawm taka chhawp chhuah ngei tul nia ka'n hriat a ni. Amaherawhchu, hei hi hman nghal tur tihna a ni chuang lova. A selection criterion hi kan lo chhawp chhuah dan, hun hmasa lama mite lo tihdan kha, a saptawng takin 'a-subjective' lutuk a, a *selection criteria* kha a fiahfai loh avang khan, khawtina NSFA Committee te pawh han dem viau thin mah ila, a criteria felfai loh avang khan khang kha kan la hmachhawn a ni.

Tichuan, tuna data-in min hrilh dan chuan, mi 7,06,296 hi ration card-a chuang mi nuai 11,38,846 atang khan, Mizoram-ah hian dinhmun harsa hi 70% vel kan awm mek a ni. Mahse hei hi BPL kan ni vek tihna a ni lova. National Food Security Act, 2013 an duan lai khan NSFA-a lut tur hi BPL aia chung pawh huam ila, dinhmun harsa sawrkarin subsidy a pek loh dinhmun harsate huap ni rawh se tiin. *Right to Food* hi India Constitution-in a sawi angin *Right to Life* hnuaiah awm se an tih avangin tunah pawh hei hi he House zahawm takah hian ka sawi duh a. NSFA a lut tur *card pawl* kan tih te hi BPL an ni kher ang tihna a ni chuang lo. BPL ni silo dinhmun harsa, sawrkar puihna tel lova mangang ru riau ang kha NSFA-ah hian kan rinlut thei a ni. Hei hian Mizoram-a inhnialna pawh hi a tihreh deuh ka beisei a ni.

Tichuan, Mizoram economic status hi, Pu Lalduhoma kaihhruai sawrkar hian kan sawrkar tirh phat atang khan kan au dan - *'economic-ah hian data dik kan nei tur a ni; ration card leh healthcare te pawh a kal kawp tur a ni; ration card leh tribal scholarship-te pawh a kal kawp tur a ni'* tiin, NSFA-a lut chin hi chu 'Low-income group' tihna a ni. Chung chu Chiang takin ka sawi duh a ni. NSFA-a lut ve lo, khami category-in a tuam ve loh chin zawng chu 'Above low-income group' tih ang te pawhin kan han dah chhin a ni.

Tichuan, ration card chungchangah khan, 'keini bial chu kan rethei si a, *card-var* in han ti to a' tih hi Pu Speaker, *card-var* man tih to hi kan tum ber a ni lova. He thil kan tih chhan chu, *Mizoram-ah hian moral reform tundin kan duh vang a ni*. Minister niha Delhi ka zuk kal hmasak ber khan, 'Mizoram-ah chuan card-var hmang mi nuai 4 bawr vel tan buhfai kg-ah ₹15/- in kan pe' tih kha, zah tur tih pawh hre chiah silo khan Central Minister leh khunglaia officer pawimawh hmaah ka zu sawi ngawt mai a, an hmel ka en khan mak an ti lutukin, "Engtin nge in tih theih? In State chu in hausa awm hle mai; National Food Security-ah mi nuai 76000 tan a thlawna kan pek che u bakah, mipui nawlpui kg-ah ₹15/- in in la pe a maw? In timak hle mai" ti ang zawngin min lo en a ni.

Tichuan, kan rawn chhuak chho a, rawtna te ka'n siam a, cabinet ah te ka'n thehlut a. *Card var*, chhungkaw awm theiin a kg ah ₹15/-a buhfai kan khul hian, sawrkar chuan OMP (Open market price) kan tiha kan leina ₹4100/- atanga chhut phei chuan *card-var*-in ₹30/- a kan khul hian sawrkarin kg khatah ₹11/- zel a la tum ta tho a ni. Pu Speaker, i veilama mite'n, "*miretheite rawkna; hemi hmanga sum kan save hi miretheite thawh khawm a ni*" an tih hi chu, a diklo a ni. Mi nuai 7,06,996 te hian thla tin a thlawnin buhfai an dawng. Enga tinge chungah chuan miretheite kan khung khawm theih loh? Nikum October thlaah NFSA te Local Council leh Village Council tinin thlan that tur a ni kan ti lai khan, tlang au an awm miah lo chu ka ti miah lo; amaherawhchu, Aizawl khawpui chhungah leh Mizoram khaw hrang hrang pawh tlangau tha duh local council pawh ka hre mang lo. Mipuite'n thlan that a ni dawn tih hi an hre tam ang tih an hlau niin ka hria; sawrkar in ti tura kan tih kha an ti tha duh lo. Kei chuan, 'Sorkar-in thil tha a duh a nih hi' tiin *card-var* hmang mi-rethei awmte kha an seng thla sung sung anga; *card-pawl* a awmthei deuh te khan, 'keichu mi retheite hi ka dinhmun hi ka'n kian teh ang', an ti dawn emaw ka ti a, a nilo reng reng! *Moral reforms* kha he ration card siamna hmang hian bul kan tan a ni. Hei hi kan tih makmawh, kan step rah tur pawimawh em em a ni.

Tin, Pu Speaker, i veilama mite, Pu Rintluanga Sailo kha a awm chiah lova, Pu Zira pawh khan a sawi tho a; i veilama mi Pu Rintluanga phei chuan, 'a bin 200-in an ti pung tam' a'n tia; ani khan, '*thluak chet hmasak tir lova, hmui chet hmasak tir tur a ni*', a ti a; a bin 200-a tipunga min han puh ngawt kha, a thluak a tiche hmasa lova, a hmui pawh a tiche hmasa lova, a ke zungpui a tiche hmasa niin ka hria. MNF an sorkar laia buhfai OMP rate-a an lei theihna chu ₹2,750/- a ni; an manganpui em em a, 2023 pawh kha an lo kal ve hram hram a; chu pawh chu document-ah a lang vek. MIFCO te, MAMCO te khan ₹3400/- a an lo supply theih loh avangin July-August ah te khan an lo fail tawh a ni. Tichuan, an mangangin '*card-var* man ennawn a ngai a nih hi' an ti a. An rawtna chu, ₹2750/-a an lei theih lai khan, '₹22.50/-in tisang ang u', tih kha file ah a inziak thlap a ni; chu chu 81%-a sangin tihsan an tum a ni. *Card-var* ₹15/-a kan khul tir ₹30/-a kan tih chhoh hi a thlep anga chhut chi a lo ni lova, a formula hran a awm a ni. ₹2750/- OMP a an lei thieh kha ₹22.50/- a an tihsan khan ₹15/- atangin, chu chu 81% a ni. Keini chuan tunah hian 70%-in kan hrutruat ta a ni. MNF propose ai khan a hniam zawk; chu chu document atangin a prove theih vek a ni.

Tichuan, Pu Speaker, i veilam atangin Pu Nguna te pawhin; (a hming phel te pawhin han ti nawk nawk ta ila. '*Zahawmtak*' tih te pawh khan hun a heh deuhin ka hria a, ka ti lutuk lo mai ang a.) Ration *card-sen* hi *card-var* a la awm si mi harsa, *card pawl* leh *card eng-a* lut leng rih silote tan he sorkar hian a ruahman a, MLA i veilama mite tumahin, 'i bialah *card-sen* ah chumi chu; mi 500 chu; mi 1000 chu lo thun teh, an rethei' tih hi dawn ka la neilo hrim hrim. Tin, Pu Speaker, *card sen* hi neih a awlsam lutuk; mirethei hlamchhiah an awm loh nan, dilpuitu neilo pawhin a amahin a dil thei. Tin, an khua-an veng a mipangngai deuh khan, "kan veng a mirethei deuh kha kalsan an awm palh ang e; heng ho tan hian *card-sen* a awm turin DCSO ah ka'n dilsak ang e", tiin a dil thei bawk. Political party unit zawng zawng pawhin a dil thei; YMA pawhin a dil thei; MLA leh Minister pawhin an dilsak thei. MLA leh Minister te paw'n an dil sak thei. Khatiang khawpa awlsam khan kan siam a ni.

Tin, buhfai atanga sum save hrim hrim kha kan tum ber a ni lova. Amaherawhchu, buhfai bothlau avanga sum kan loss nasa lutuk te; tin, Pu Speaker, buhfai man a tlawm khan

mipuite'n kan buhfai lak kha buk dik/diklo tih lam pawh kan ngaihtuah lo; an lak ang ang kha an pawm ringawt. A thlawna dawng pheih chuan buk pawh an buk tha vak peih lo. *Eirukna* (tawngkam mawi lo a nilo turah ngai ila) a tam em em a ni. Buhfai leina atana 2024-25 inkara kan hman chu crore 152 a ni a. Tichuan, tun March thla hi assumption-a kan chhut chuan crore 110 vel Mizoram sorkarah a return kha kan thehltut dawn tihna a ni a. Tichuan, tun kum kal meka theihpatawpa hma kan laka kan han tih vel khan crore 49-in kum khat buhfai mamawh hi kan lo lei thei ta a ni. Amaherawhchu, a phurh kual velna man hi a to khawp mai. Kum khat chhunga FCI buhfai kan zuk phurh chhuahna zawng zawng te, card-var buhfai Mizoram-a kan tih kualna velah hian crore 49 vel kan seng a, a vaiin crore 93 vel kan seng tihna a ni. Chu chuan quintal 1 kha cheng 425/- velin kan phurh kual thei tihna a ni. Pu Speaker, mipuite tawrhna ni si lovin, an chanvo dik tak mipuite'n an chan theihna tur ngaihtuah chungin he crore 93 kan sen hi nasa taka la tihhniam theih beisei a ni a. Mizoram kawngpui te pawh a lo tha chho zel a, hei hian kan hmalakna pawh nasa takin a tihthat kan beisei a ni.

Tin, Pu Speaker, buhfai phurh kual velah hian engatinge pawisa a tam em em, kan tih chuan, godown ah kan va dah phawt a, retailer-in an la leh a. Khami kual velah khan pawisa hi a luangral nasa em em a ni. Chuvang chuan, kan sorkar hian *permanent fair price shop*, thingtlang khuaa retailer-in amaha dawr a zawrh chiam ngai tawh lovin permanent fair price shop tam thei ang ber siam kan tum a, SASCI ah te pawh chutiang chuan ruahmanna kan siam a, kan dil chho mek a ni.

Tin, Pu Speaker, *card-var* man kan ennawn avanga kan sum save te pawh kan thiante'n an rawn sawi tawh a. Nikum leh kumin inkarah ringawt hian ₹20 crore kan humhim a. Tin, nikum March thla atanga tun February thla thleng hian retailer tena buhfai an sem bang sorkara thehltut lova an hralh ral thin kha, "an appointment retailer ah khan a inziak sa vek a, (chu chu 'carry-over' tih tawngkam kan hman a) nikum March thla atang khan carry-over in nei tawh tur a ni; an lak bang hi tiral tawh suh se, stock-ah kan ring ang", kan ti a. Tun February thleng hian qtl 46,000 buhfai stock kan khawlkhawm a ni. Chu chu 3550, OMP rate-a chhut chuan crore 16 hu vel a ni. Khatia retailer ten an lo stock kha a hlut zia chu, sawta tanga phurh nawn kha a ngai tawh lova, transportation cost pawh kha kan save bawk a ni. Kan tum ber chu - *hnam zahawm, ram zahawm*; 'Mizoram-ah engtinngge buhfai in tih; engtinngge in kalpui; engtinngge NFSA te in thlan dan' tia state dangin min rawn zir theih hi kan duh a, chumi thlir chung chuan he hmalakna hi kan kalpui a ni.

Tichuan, ration *card sen* hi mi 1,00,000 tana kan buatsaih kha tunah hian mi 41,819-in an hman-gangkai tawh a, chu chu chhungkua 10,744 an ni. Tunah hian House zahawm tak information atan - AAY tan hian kum khatah buhfai qtl 9,066.75 kan lalut thin a, *card-pawl* (PHH) kan tih ho tan qtl 32,011.5 a ni a. Central-in mi pakhat tan kg 5/- a thlawna a pek bakah State-sorkarin kg 3/- mi pakhat tan a lo pek kha tied-over atangin qtl 19,182 kan hmu thin bawk a. A vaiin NFSA atan thla tin qtl 60,259.8 kan mamawh a, *card-var* leh *card-sen* atan qtl 37712 kan mamawh a. Tichuan, thla tin hian qtl 97,997 buhfai kan lalut a, kum khatah qtl 11,75,964 kan chawlut a ni.

Zawhnate kha ka rawn address vek ang a. Tuna ka rawn chhiar hmasak, ka rawn buatsaih hmasak khan heng ka inbuatsaihna tam tak pawh hi a rawn chhang nawn zel dawn a. 'Engvangin nge ration card te pawh kan ennawn; kum 2016' a tih kha, covid a lo awm nen ration card enzui kha mumal takin a awm ta lo reng reng a. National Food Security Act

hian a zing thei ang bera ennawn tur a ti a, tun sorkarah chuan nitin hian kan ennawn a. Mirethei harsatna tawkte an awm anih chuan inthlahrung suh se, kan lo ngaihsak zel ang.

Retailer-te hi ‘in buk diklo’ kan han ti chiam chiam thin a. Mawhphurhna min pek ve atang khan ka’n chhui Chiang a, retailer-te lawmman kha a chhe em em a ni. Tunah hian retailer lawmman hi *card-var* leh *card-sen* ah *duli* hlawh thin khan, cheng 1.50/- an hlawh tawh a ni, nikum October thla atang khan. Tin, *card pawl* leh *card eng*-ah ₹1.80/- hlawh thin khan kg-ah ₹2.85/- an hlawh ta a ni. Pu Speaker, he thilah hian ka tawng duham deuhah min ngai lo ula; kan ramah *moral reforms* thlen a ngaih nasat zia chu, retailer lawmman kan han tisang kha, ‘E, ava lawmawm em! Pu Lalduhoma kaihhruai-sorkar chuan kan lawmman a tisang’ tih emaw, a minister chungah pawh lawmthu an sawi dawn emaw ka ti a; official-in emaw, mimal ang emaw pawhin lawmthu sawina hi ka la dawng lo hrim hrim. Chu chu engnge a chhan, kan tih chuan, ‘he sorkar hian retailer lawmman a tihsan hian retailer lama a phut a na sawt dawn’ tih avangin an lawmlo em maw ni le aw, ka ti. Hei vang hian retailer-te ka dem a ni lo; kan rilru put hmang siamthat hi a va ngai tehlu em! he thil kan tihna chhan chu retailer-te dinhmun zahawm zawka kan siam duhna avanga ti kan ni. Finance lam te pawhin ‘pawisa a kal viau dawn a sin’ an ti a, ‘E; buk dik kan kalpui a, *card-var* man kan ennawna, a minister ka nihna ang pawhin mualpho pawh huamin he thil hi ka ti a. Retailer lawmman hi chu in tisang tur a ni’ kan ti a. State Sorkarin sum chawi belh a nei miah lo; kan thil ruahman vel atangin hei hi kan in manage thei a ni.

Tin, Pu Speaker, tunlaia kan hriat lar em em *e-KYC* hmalakna - *card pawl* leh *card eng* a mite chu a thlawna buhfai dawn, National Food Security in a tuam anih avangin, ‘an la dam ngei em; mi dik tak a dawngtu kha an ni em’ tih India sorkarin supreme court thupek angin ration card-a chuang zawng zawngte’n an kut zungpui *e-KYC* tih kha a ni mai a, an nem vek tur a ni tih a ni a, tunah hian 60% in kan nem tawh a ni.

Hachhek bialtu MLA Pu Roberta’n Phuldungsei lampang chungchang a sawi pawh kha kan mizote khua leh tui, kan mi leh sate te kan lainat a. Amaherawhchu, tunlai khawvelah digitization thil te a lo changkangin, ration card system pawh an lo strict tawh em em a. Chuvangin, ramria kan mi leh sate pawh hei hi ka chah duh a - kan hmangaih a, kan lainat a; huaisen takin Mizoram lamah awm ngam mai rawh se. Tripura ration card atang pawh khan in delete ngam sela, Mizoram-ah awm rawh se; MFSA-ah phei chuan Tripura aiin kg 3 in kan la pe tam zawk. Chuvang chuan, kan mi leh sate thlavang kan hauhna kawngah hian khawvel hmasawnaa dan leh dun fel tak a zam hi kan bawhchhe ngawt thei bik si lova.

Tin, Pu Speaker, buhfai buk dik tur hian hma kan la nasa khawp mai. Kan House Leader, kan CM Pu Lalduhoma hian “Pu Chhanzo, buk dik hi i hlen chhuak zo ang em?” tiin min zawt a, bul ka tantirh khan. “Theihtawp ka’n chhuah ang e” ka ti a, kan tang khawp mai a. Retailer kan han um viau a, godown-a ka thawhpui te pawh an lo dik bik chuang lo. Nikum December thla khan DCSO te hnenah ‘vau khanna thu te chhuah rawh u’ ka tia, Director hmingin. ‘In area ah buhfai buk dik loh godown-ah a awm anih chuan mawh in phur ang’ ti hialin vau khanna thu te pawh kan chhuah hial a ni. Kha vang khan kan Mizo-pui kan thawhpuite ‘in dik lo e; in fel lo e’ kan ti chiam a ni lo, ‘diklohna hi rei tak a lo zalen tawh a, dikna hi zalen ve tawh rawh se’ kan ti a ni mai. Chutiang tur chuan hma kan la a, godown tinah digital weighing machine kan dah vek dawn a. Finance Department pawh hian tunah kan pawisa mamawh eng emaw zat min pe tawh a, April thla chhung hi chuan godown eng emaw zat ah hian khawl hmanga digital weighing scale dah hman kan tum bawka ni.

Tin, retailer zawng zawng te hian digital weighing scale an hmang vek tur a ni a, lo hmang lo an awm chuan ban nghal vang vang theihna a ni. Eng emaw avanga an bukna kha a lo chhia anih chuan DCSO ah report sela, DCSO hriatpuina chauhin chu chu hman tur a ni. Tin, hmun thenkhat ah digital-a lo bukthe pawhin buhfai khul tute hmuh theih loh tur khan a screen lo lang kha puan te'n an khuh daih a, khatiang kha a tha lo. Tin, retailer te'n an buknaah eng eng emaw te an lo dah rih belh a, khatiang chi chi hrang hrang kha a awm a. Chuvang chuan, tunah hian Addl. DC te hi Grievances Redressal chairman turin a hma daih chuan kan kal tir tawh a nimiran khan ka department ten a function theih nan meeting te an nei a, DC leh Addl. DC te. Buhfai buk dik loh chungchanga lungawi lohna nei zawng zawngte'n tah khan thlen thin tawh tur a ni a, chak takin hma kan la dawn a ni.

Tin, Food Commission pawh tunah hian a function tak tak theih nan hma kan lakpui dawn a. Food Commission hian NFSA a mite'n buhfai buk dik tak an dawng em; a hun takah an dawng em tih ang chi kha theihtawpin kan address chho dawn a ni. Tin, hriatchian duh leh harsatna nei tan *Phone no. 1967* bakah Mipui Aw leh CPGRMS ah kan harsatna te hi thlen theih a ni.

Pu Speaker, IOCL Oil depot neih chungchang hi Ni 6th March khan he House zahawm takah hian Assembly Question te kan chhang a, a hma pawhin phone-in kan um tawh a, khami ni pawh khan kan um leh char char a. 'Hei House member te'n an hrechiang duh tawh; in muang lutuk' kan ti a, anni chuan thla li hnuah hi chuan an chinchang kan hriat theih tur thu an sawi a. Khulai Sairang leh a chheh velah khuan hmun pahnih an identify-in an zirchiang mek a, sorkar pawhin kan tawiawm theih thu lehkhain kan hrilh tawh a ni. He ram lo la awm zel turina Oil depot tha strengthen theih, tih zauh theih an thlan ngei theih nan IOCL lam pawh kan vaukhan deuh ti tih a, hmun zim zawk emaw, hmun thalo te an thlang palh ang tih kan hlau em em a ni. Tin, IOCL bakah hian Hindustan Petroleum Ltd. in Oil depot kan duh ve an ti a, nikum July thla khan Kolkata-a an hmunpui te min fanpui tawh a. Anni pawh tunah hian Bairabi leh Vairengte velah hmun an zawng mek a, sorkar chuan theihtawp kan chhuahpui bawk a ni.

Tin, Food Corporation of India-in Khawzawl ah Oil depot an neih theih nan sorkar chuan theihtawp kan chhuahpui bawk a. Tin, Mualkhang bottling plant hi kan sawi zing tawh a; tunah hian 30 trillion metric ton per annum siam chhuak thei tur, nitin cylinder 7000 vel pechhuak thei turin hei hi kalpui mek a ni a. Ni 29th September, 2023 khan Central Minister, Petroleum & Natural Gas, Govt. of India lung phum tir tura ruahman a ni a. Amaherawhchu, Prime Minister Office lam atangin clearance a awm tak loh avangin sorkar hmasa khan an kalpui thei ta lova. Tichuan, kan han sorkar ve a, tihfel ngai a lo tam khawp mai a; kan theihtawpin kan umzui zel a ni. Tunah hian Contractor ten hna an thawk mup mup tawh a, hei hi rang taka kalpui chhoh mek a ni a.

LPG home delivery te pawh tunah hian theihtawp chhuah a beihchhoh a ni a. Kan Chief Minister bial, Serchhip khawpui ah phei chuan veng zawng zawngah LPG Home Delivery hi an kalpui tawh a. Nimiran *World Consumers' Right Day* te pawh kan hmang a, chungah te pawh chuan Distributor chawimawina te pawh kan nei a ni. Tin, Consumers' Welfare te pawh tunah hian tha pangngai takin kan kalpui bawk a, a pung (interest) hmangin tunah hian consumer lampang tihchakna te pawh kan kalpui bawk a ni.

State Consumers Commission leh District Consumers hmalakna hi tawitein han sawi leh

lawk ila. State Commission ah hian no. of case file chu 274 a ni a, disposed tawh 261, pending 12 a awm a. District Commission ah case file tawh 4,675 a awm a, case pending 4,604 leh disposed tawh 71 a awm a. Tichuan, case kan tih fel tawh hi State leh District ah 4,949, case tihfel tawh 48,666 leh case pending 83 a awm a ni.

Tin, Pu Speaker, Legal Meteorology lam pawh kan tichak chho viau a, hma pawh lan la chho ve zel a. Bukna leh khawl hrang hrang enfiah hna kalpui niin, tehna khawl 20,385 endik tawh a ni a, pawisa pawh ₹15,59,015/- an chhung tawh a ni. Acts leh Rules kenkawnah ah pawh theihtawp kan chhuah a. Tin, heng petrol, diesel, cement endik hna te pawh hi chak taka kalpui a ni a. Tunah hian Tank Lorry Calibrator Centre (Tank Lorry phurh tam zawng tehna) hi a pawimawh khawp mai a. Phaia an zuk kala a tehna mumal tak nen kan State pawna an lo teh sak khan Mizo tanker te khan an ringhlel deuh thin a. Chuvangin, Mizoram ah neih ve ngei a ngai tiin sorkar in ₹40 lakh a sanction tawh a ni.

Demand No. 6 - Land Revenue & Settlement Department:

Pu Speaker, Land Revenue & Settlement ah hian kan kal ang a, (Pu C. Ngunlianchunga: Khawngaihin. Nichin khan kan hming lam meuhin a ti si a; *card-sen* chungchangah ‘engmahrawn ngen pui lo’ a tih kha, *card sen* leh *card var* atangin; *card sen* tan ₹20/-a siam a ni a; ‘in bialah *card var* atanga *card-sen*-a insawn duh an awm chuan dilpui theih a ni e’ tih kha..?) Kha kha chu a question ka rawn luh hunah ka sawinawn tho ang. Information kha min pe si lova, tunah khan ka rawn lut nawn dawn.

Land Revenue kha rei loh kan tum ang a, mahse hna hi kan sorkar hian a thawh that em a vang hian chen rei hi a awl phian mai a. *Land record computerization* hi kan ramah mellung pawimawh tak siam mek a ni a. A technical hming chuan, ‘*Record of Rights*’ a ni a, tunah hian Mizoram pumpuia ram pass awm zawng zawng data dik tak kan nei ta a, chu chu nuai 3,60,983 a ni ta a ni. Hei hi kan sorkar hma khan data mumal a lo awm si lova, heng nuai 3,60,983 te hi *excel* a chhutluh vek a ni tawh a ni. Kan ram neih zawng zawng kha house-pass emaw, LSC emaw, periodic pata emaw a nim ai thei a, khang zawng zawng kha kan digitized vek tawh a. ‘Digitized’ ti ila, *excel* a kan chhutluh khan digitized a ni mai a. chu chu geo-reference in kan thuam that leh vek a ngai a, *Excel* a chhut luha digitized ringawt kha a tawh lova. Geo-reference hi, tunlaia tlang te pawh an rawn au a, ‘In veng ah GIS mapping an rawn ti dawn’ tiin. Heta nuai 3,06,983 ah khan nuai 1,67,386 kan zo tawh a. 46% kan achieved tawh a ni.

Tin, No. of ULPIN, *Ulpin* kan ti mai a, *Bu-Aadhar* ti tein chi hrang hrangin an sawi thin a. Hetah hian 1,45,923 zawh tawh niin, 40.5% kan achieve tawh a ni. A awmzia chu, kan ram pass zawng zawng khami ram kha *Aadhar* kan neih tir vek dawn a ni. Chumi mai ni lovin, 3,60,983 ah khan 2,63,260 (73%) kha field management book ah Zoram mipuite in ram document zawng zawng 73% hi kan scan lut vek tawh a ni.

Heihian a tum bera chu, *LSC tihbo* kha a awm tawh dawn lo; kan digitized vek tawh ang. Kan digitize mek a, kan ram kha han hmeh keuh khan kan hmet chhuak per per tawh mai dawn a ni. Tuirial bialtu Pu Dawnga te pawhin loan va la dawn ta se, bank lamin ‘Revenue ah va kal la, i ram pass kha va certify tir rawh’ tih kha a ngai tawh dawn lo. Khawi maw ka pu, engnge i pin number, I ram aadhar number’ an ti ang a, an hmet ang a, ‘E! i ram chu a dik thlap a nih hi’ an ti ang a, a zo der. I tax pek that leh that loh pawh online ah engkim Chiang takin a awm dawn. Hei hi *mellung* ropui tak a ni.

Tin, Pu Speaker, Tripura khu keini aiin a chanve velin an te zawk a, *Record of Right (RoR)* kan tih ram nuai 13,13,000 vel an nei a, keini Mizoram-in document kan neih chin hi nuai 3,60,000 vel chauh a ni. Tripura khuan kumtin stamp-duty leh a kaihhnawihah crore 260 vel a la lut a ni, kan state aia te daih si khan. Karnataka te chu a lian khawp mai a, crore 26000 vel kum tin kan budget aia lian daih hi stamp-duty leh registration kaihhnawih ah hian an la a ni. Ka lawmna em em chu, he House zahawm taka memberte'n 'chhiah a pun theih nan ram teh hi tihchak tur a ni' in han ti thin te leh, thingtlang hmun hrang hrang kan zinah pawh chutiang chu thahnem ngai taka an sawi thin te hi a lawmawm hlein ka hria a. RoR ah ₹3,60,000/- kan nei a; Tripura pawhin nuai 13 chuang an neih theih chuan Mizoram ah phei chuan RoR ram hrim hrim document hi nuai 25 te nei ta ila, kan tax collect tur chu a sang viau ang.

Tin, *Empaneled farm* te kan sawi a, kha pawh kha detail in kan sawi lo ang a. Member zahawm takte'n fimkhur a ngaih zia inrawn sawi a, kha pawh kha ka larawn address leh ang a. *Stamp and registration* atanga revenue tam zawk lakluh hi kan ngai-pawimawh tlang a, a lawmawm hle mai. Hemi tur hian kan House Leader, kan CM pawh Revenue deptt-a ka thawhpuite nen kan hmu a; *staff-indaihloh* tih sawi sawi te pawh hi a hrehawm a ni. Kan Excise Minister pawhin a sawi, 'staff-indaih loh ang ang hian tha takin kan productive tur a ni' a tih te kha kan pawm viau a. Amaherawhchu, Revenue Department bik hi chu kan indaih deuh a ngai a ni. Sum la luttu department kan nih avang hian hei hi minister dangte pawhin lo en kan deuh sela, 'min lo duhsak fal deuh sela' tih te pawhin ka'n ngen a ni.

Tin, Revenue structure siamthat te pawh sawi tur tam tak a awm. Karnataka kan zuk zina kanrawn zir chhuah chu, an revenue minister chu (ka'n ti mai mai teh ang) an chief minister dawtah khan a lo awm a, keini kan zu thleng thla kha kan lo zu inngai ropuilo ang reng si a. State dangah chuan revenue minister kha an lo ngaisang em em a, an sum khawntu lian ber kha an lo ni a; an DC zawng zawng kha revenue vek an ni; an State civil service zawng zawng kha revenue vek; an engkim mai kha revenue vek a ni; a chhan chu, an State sum bawm lian lutuk a lo nih avang khan. Khavang khan Karnataka revenue minister phei chuan, 'ka dawhkan atang hian rural land utilization, kum khat chhunga ram nei zawng zawngin engtin nge an hman tih hi ka hre vek; alu an ching em, buh an ching em tih zawng zawng hi ka hre vek' ti khawpin an revenue minister chuan min lo hrilh a ni.

Chuvang chuan, he House zahawm takah hian, kan DC te hi kan ti-revenue chho ta em em mai a ni. Mamit DC Office leh hmun hrang hranga DC Office tihchangtlun te, kan tum ber chu - Revenue Department hi DC nen kal kawp tur kan lo ni. British-in min awp khan revenue administration mumal min lo chhawm ve si lova, kan thiam ang angin kan lo kal a, kan lo hnufual phah em em mai a ni. Tin, Aizawl District ah pawh *North* leh *South* kan hawn chhan hi, a bulthumah tawitein ka'n sawi ang a. Vawiina Revenue Department-a ka thawhpuite pawh, ka lo tawng na deuh anih pawhin ngaih loh lamah lo ngai lo se - Revenue Department min hmuh thin dan chu Director-in power zawng zawng hum a duh a; a thuneihna laksak an phalsak thin loh avangin, 'SO office te hi thuneihna an pe tha phal lo alawm' an ti thin. Amaherawhchu, sorkarna kan han chan chiaha kan han sawiho chuan, chutiang chu a lo ni lem lo a ni ang. Tunah hian kan tih tum dan leh kan tih mek dan chu, Director hian monitoring leh supervision a khawih ang a, ram teh leh rambuai kha Director khawih a ngai tawh lo, SO level ah an chingfel vek ang. Chu chu tuna revenue administration kan siamthat dan hi a ni ta a ni.

Aizawl North office saw lam Ramhlun lamah kan kaltir a, heng te pawh hi space-in a min zawh chuan Aizawl DC-ah ngei SO office hi dah kan tum a ni. Tin, revenue tax online payment system te pawh (a tawi zawngin sawi ta ila) kan sorkar hma kha chuan SO office Aizawl-a fee pe tur kha SO office-ah an zuk kal a, SBI-ah han chho phawt turin an lo ti a, fee pe tur pawhin ni hnih-thum, thinrim takin taxi te an hmang a, office an zuk kal leh a, officer emaw dealing clerk kha a lo awm leh tawh lova, khati reng reng khan mi an buai a. HDFC nen thawk hoin nikum atang khan *online payment system* hi kan kalpui ta vek a ni. Bank-a kal hran kha a ngai tawh lo, SO office-ah fee pek ngai kha a pek theih tawh a ni.

Tin, Pu Speaker, Ni 11-ah khan, ‘*The Right to Fair Act*’ kha he House zahawm tak hian Mizoram State-a adopt turin min pawmpui tawh a, a lawmawm hle mai a. ‘The Right to Fair Act’ hi tunah chuan Mizoram-ah dan ang takin kan hmang ve thei dawn ta a. A chhunga siamthat ngai kan neihte chu kan siamthat theih dan- *Land Revenue, The Right to Fair Act, 2013*, Central Act-in a State te’na kan zawm ngei ngei tura min pek chu, “the *Right to Fair Act* hi amend a ngai anih pawhin in amend thei ang; amaherawhchu, in amend anih pawhin, *Right to Fair Act*, Central Act ina compensation la turte a duhsakna aia chhe zawk engmah in bilh thiang lo ang” tih a ni. Chuvang chuan, 2016 - Mizoram-a compensation Dan ‘Land Acquisition Act’ kan chaklohna chhan pawh kha, Right to Fair Compensation and Transparency in Land Acquisition, Rehabilitation and Resettlement Act, 2013, Central Act aia a lo *generous* tawh loh vang kha a ni.

Tin, revenue dan enthat hi kan ngaipawimawh a, tun 9th Assembly Session-ah pawh hian put luh hman kan han tum viau na a, kan hman ta chiah lova; drafting committee te kan din a, anni hian an endik mek a ni. Stamp & Registration chungchangah pawh theihtawpin hma kan la a, tin Autonomous District Council-a kan thawhpuite, Pu RM Chakma te pawh khan an han sawi a, ka lawm hle mai. I hovin sawihona te kan nei tawh a; Mizoram pumpuiah hian central in kan land record hi 100% in ADC te pawh tel vekin min hrut rual zel a. Sawlam a lo hnufual khan, a state pumpui kan hnufual zel si a. Kha vang khan inlungual taka pen theih kan tum a tha hle a ni.

Tin, empaneled firm kha kan thlang uluk hle a, theihtawp kan chhuah a. Kan duh aia kan tihchak theih lohna chhan pawh, tihsual kan hlau lutuk a, *terms & conditions* te pawh kan fimkhur viau a ni. Empaneled firm kan rawih zinga sorkar duh loh zawnga awmte, mipuite chunga eng emaw zawnga thil thalo ti empaneled firm te kha chu uluk takin kan zir ang a, kan terminate zel ang. Kalpui kan tum danah pawh empaneled firm duhsak bik kan nei dawn lo. Karnataka model-in kan kal dawn a, vawiinah empanel firm hnenah hna 30 kan peka, thla khat chhunga a tih tur a tih zawh hman loh, kan peka a tih zawh hman loh zela kha *firm-tha* ah automatic-in a kal zel dawn; firm tha apiangin thawh tur an ngah ang a, firm thawk thalo kha chu an zuih telh telh ang a, an bo mai ang. Chutiang chu kan kalpui tum dan a ni.

Tin, Digital India - Land Record Modernization Programme (DILRMP) hi a pawimawh em em a, land record tha tak kan nei theihna tur atana central min puihna a ni a. Nichina ka sawi, Land Record RoR kan tih te, ULPIN kan tih zawng zawngte FMB kan tih te leh GIS kan tih zawng zawng kha DILRMP pawisa min peka kan tih vek a ni a. Tunah hian AMC nen pawh tha taka thawhhoa hmalak theihna tam tak awmin kan hria a ni. Tin, SVAMITVA hi January Ni 19,2025 khan Prime Minister hovin Governor Raj Bhavan-ah online meeting kan nei a, hei hi sorkar hmasa hunlaia bul lo tan tawh kha a ni a. Keiniin kan han ti ve a,

theihtawp kan chhuah a. Khaw 319-ah drone-fly kan zo tawh a, property card pawh 2909 kan pe tawh a, khaw 45-ah pek chhuah tawh a ni. Chak thei ang bera pek chhuah kan tum a, India ram state te, north-east zingah chuan a *ti-tha ber* record kan nei mek a ni.

National Geo-spatial Knowledge Based Lan Survey of Urban Habitations, (NAKSHA) hi February Ni 18, 2005 khan a rualin India ram pumpuiaah hawn a ni a, kei pawh Mizoram ah ka hmang a. He thil hi an tha dawn khawp mai a. Ni 16 kha Sunday a ni a, keinin khulama a thawktu tur agency te kan tur nasa ropui si a, Home Minister Pu Amit Shah a lo kal baw si nen, Saturday chuan helicopter thlawk suh u kan ti baw si a. Saturday ah in phal loh chuan Sunday-ah an ti a. ‘Ka chuang ve duh a sin, helicopter-ah’ ka tih khan, mahse Sunday a helicopter-a han chuan luah luah kha i veilama mite hian eng emaw zawng tak te hian min um let vak ang tih te kan hlau deuh si a. Sunday khan Aizawl South veng 11 ah NAKSHA kaltlangin helicopter-survey neih a ni a, Aizawl South Ward 11 atanga 19, veng 43-te tunlai thiamna thum famkimin building din dan zawng zawng te, step kal dan te, kawng kal dan zawng zawng te chiang taka kalpui turin tunah hian LIDAS thiamna hmangin photogrammetry survey neih tawh a ni a. Hei hi kan neih hunah chuan mahni building kha zoom -inhnaite ah an zu hmu ang a, an building zau zawng te, len zawng te kha an chhutchhuak vek ang a, ‘*ramri buai*’ kan tih kha a awm dawn tawh lo a ni.

Tin, Pu Speaker, nichina ka rawn sawi khang FMB te, GIS te kan tih hunah chuan pass lem hralh te kha a bo vek dawn; tunah pawh hian a kimki tawh khawp mai. Ram dik lo kawh pawh kha a theih tawh dawn loh; GIS mapping ah engkim kha a chiang vek tawh dawn. Tuna ka hnena lo kal tam ber, ‘ka ram lei ah khan in ka sa vek a, mi pakhatin a aia pass hlui zawk a rawn keng a..’ tih vel kha a buaithlak a ni. Kan hmahlirah chuan, hetiang system hi a’n kal dik tak tak ang a, ram chungchanga min rawn hmu tur pawh an tlem pharh ang; chu chu a kalphung tur a ni.

Tin, Stamp duty chungchangah kha, nikum aiin 166% in kan up a; amaherawhchu, *till February* tih a ni. March thlaa kan dinhmun kan la hre lova, nikum October thla vel atanga kan hman tan chauh kha a ni a. A la rei lo khawp mai, kan kang chak viau a ni. Amaherawhchu Pu Speaker, kan ramah hian valuation mumal a lo awm lova, ram hralhtute khan an ram hralhna dik tak kha sorkarah an report lo a ni. Kei chuan dik takin ka ti a, ka hriat chinah pu Sapa hian a ti baw a; kan chawi tur dik tak zat, *kan ram* tih vel report dik tak kan thelut a. Kan ram leina emaw, hralhna emaw dik tak kha sorkarah Kristian kan nih angin, khua leh tui tha kan nih angin han kal chho ila chuan he stamp duty kaihnhawihah hian kum khatah crore 150-200 lak a har dawn lo reng reng. Tin, Pu Speaker, ram hralh tur neih emaw, a lei thei nih emaw hi thil lawmawm a, tu phurrit mah a ni lo. Ram leitu leh ram hralhtu khan stamp duty 3% ka pek a ngai dawn a. I ram ka lei turah hian ka stamp duty pek tur hi min hriatpui rawh, an ti lawk thei em em a ni. Tu ko mah kha a rih phahna tur vak a awm lo.

Tunah hian valuation committee te dinin theih tawpin dik taka kan kal theih nan hma kan la chho a ni. Sub-Registrar office te kan thumchak mek a, District-ah Sub-Registrar mi 20 appoint an ni tawh a. Stamp duty payment process te pawh tunah hian *e-Stamping* hmang turin sorkarin hma a la mek a. E-stamping pawh hi a nihna takah chuan kan hmang deuh reuh tawh a, a full-fledge erawh chuan kan la kalpui hlei thei lova. Hei hi a inkhaidiat nasa em em mai a - Nasik, Maharashtra-ah khuan stamp paper zuk lei a ngai a, vendor-te hnenah stamp duty pe turin an lei leh a; khatiang process kha stock-holding corporation of

India nen kan indawr mek a, chak taka kalpui tum a ni.

Tin, Pu Speaker, ram hralhtu leh leitute hian kan ram, a land ringawt hlutna kha kan report thin a, building hlutna te kan report tel thin lova. Heng te pawh a ram hlutna mai ni lovin, a building hlutna te nena kan kal kawp chhoh hunah chuan kan ram sum hnar pawimawh tak a ni dawn a ni.

Member zahawm takte'n invei zawng inzawhna te in han sawi a, a lawmawm em em mai a. Pu K. Hramo, Palak bialtuin thahnemngai takin fakna thute a'n chhak chhuak a. Phulo hle mah ila, fak ve theiha kan lo awm a nih chuan han lawm phawt mai ila. Amaherawhchu, 'ka lawm,' han tih hian mawhpurna hi a sang tulh tulh mai a, a buaithlak viau a ni.

Tin, Pu Lalrinsanga Ralte, Serlui bialtu MLA hi ka tan ru riau mai a. Kha ka thusawi pawh a ngaithla na nge? A awmna hmun atang khan lo ngaithla sela. Vairengte leh a chhehvel khu ka zu fang a, ram vei a na khawp mai. Khaw pakhatah pheii chuan Pu Speaker, pa pakhatin mittui tla chungin, "Ka pu, ka kuhva huan leh ka buh hmun bigha 6 lai mai chu Assam-in min luah sak a, theih tawpa hum ka tum pawhin, *khawng e i ram pass* min ti a, ram pass phawrh tur ka nei si lova" a ti a. Khunglai kan ramri vel, a dai dova awmte kan lo ngaihsaklo rei mang e aw ka ti. Aizawl ka haw chho a, ka officer rual ka kokhawm a. Hun remchang kan en ang a, Vairengte Civil SDO hovin Kolasib SO leh helama hotu pawimawhte nen, Tuirial, Serlui bialtu MLA te nen, stake-holder te nen khulai ram chungchangah 'ram pass rang taka kan pek zung zung theih dan tur hi kan tih a ngai a ni' tiin tunah hian kan inruahman mek a. Kan Director pawhin SO te a zuk tlawh tawh a, chung lai te pawh chu lo zu thli-thlai turin kan ti a. Chumi chungchangah chuan kan House Leader, kan CM hnenah pawh report ka pe a, kei ai khan a lo vei a, a lo phawk chhah leh lutuk a. A phawk chhah dan kha ka sawi chhuak lo mai ang, a tha lutuk a; khulam tan thil lawmawm tak a ni. Tin, Bilkhawthlir, Kharzawl rama mi kha sorkarin a document kha a pe let leh a, heng te pawh hi kan lo ennawn ang.

Tin, *card sen* chungchang kha a rawn zawt a, hei pawh hi nakinah Pu Nguna te hriat duh te nen khan kan chhang kawp ang a. Pu R. Rohmingliana, Thorang bialtuin Govt. Complex Ainawn Veng chungchang a rawn zawh pawh kha sorkar hmasa, congress hun lai a ni tawh mai thei, cabinet-in khulai khu sorkarin 'regularized ni rawh se', a lo ti tawh a. Amaherawhchu, an implement chuang bawh si lova. Hming te pawh han lam ila, ka Secretary hmasa Dr. H. Lalthlangliana khan, "Ka pu, hei hi cabinet-in a ngaihtuah that pawh a ngai tawh lo; hun hmasa lamah khan an lo ti vek tawh a lawm, kal tlang pui tur" a ti a. Tiang chuan kan officer fel tak takte rawtna hmangin tunah khuan Ainawn Veng a lo ni ta a. Khung ram zawng zawng khu GAD ta, sorkar ta a lo nihna angin tehthat hna thawh mek a ni a. Ram pass lo nei tawhte kan zir chiang a, ram puitling regularize tlakte chu kan regularize vek dawn; sorkar thutlukna awm tawh a ni. Lung te pawh a chhe lek lek a ni; a veng mipuite'n min rawn phone thin a. An awm ve tho si a, an hnawtchhuak thei chuang si lova, ram pass an nei thei bawh si lova. An pate an chan a, an nute an chan a, pi leh pute an chan a. Sorkar hian an hnawt chhuak dawn nge tih pawh hre lovin rilru hreawm takin an awm a ni. Tunah chuan thlamuang takin lo awm rawh se.

Tin, hemi kaihnawihah hian Zemabawh-ah sawn *Risk-Mmual* a awm a, Risk Veng Middle School Veng nena inkawpah sawn 1983 atang te khan an lo awm tawh a, chhungkaw 130 chuang an ni; Pu Lalthansanga constituency, Aizawl East-I ah sawn. Sorkar hmasate'n

inthlan campaign laiin ‘in ram hi kan tihfel sak ang che u’, an lo ti thin a, an tifel chuang bawk si lova; an hnawtchhuak duh bawk si lova. Keini sorkar chuan sawng ram nei zawng zawng saw ram pass puitling, ram pass regularize kan tihsak vek dawn; thlamuang takin lo mu tawh rawh se. Kan hnawtchhuak ngam chuang lo a nih chuan, him tak leh thlamuang taka an awm dan tur kan ngaihtuah mai tur a ni.

Tin, Pu Rohmingliana khan a bial lampanga hmun-kilkhawr leh diak te kha a sawi a. Thenhlum-ah thla 8 daih (qtl 1224), Bungmun-ah thla 8 daih (qtl 650), Putluanga-sih-ah thla 7 daih (qtl 3612) buhfai kan chhekkhawr tawh a ni. Heti chung chung pawh hian harsatna a awm ang em chu kan hre lova, amaherawhchu theih tawp kan chhuah zel ang. Tin, ‘tlangah te, thingkungah te an lawn’ a’n ti a. Nikumah kan infiam a, ‘nang pawh lawn ve la a ni mai a lawm’ te kan inti a. Hetiang hmun harsa taka awmte hi chi hnihin an awm a, ‘E-Post’ kan tih *kutungpui-nem* kha signal chhiat avanga an nem thei lo anih chuan, DCSO te hriatpuina in e-Post ti kher lo khan a tih theih a ni. Amaherawhchu, tuna thil buaithlak deuh chu, tuna India sorkarin ration card la zawng zawng *‘kutungpui (e-Post) an nem vek tur a ni’* a tih lai hi chu, an nem ngei ngei kha a ngai; kha erawh chu a kal pelh theih loh a ni. Hei hi sorkar chuan BSNL lam te nen sawi hovin, Mizoram pumah signal a that theih nan theihtawp kan chhuah a ni.

Pu JJ Lalpekhluva, South Tuipui bialtu khan kan hmalaknate, fakna te pawh a tilang a, a lawmawm khawp mai a. Tin, ka sawi tawh ang khan ration *card-sen* 10744 tunah hian a awm tawh a, mihring 41819 an awm tawh bawk a ni. Pu Lalramliana Pachuau khan website-ah te min han fak a; tunah hian Mizoram department website enkawl tha zingah a *titha-ber* pangana kan ni mek a. Kan website hi han en ula, vawiina min zawh tur tam tak hi chu in hre deuh vek ang; chutiang khawp chuan kan website hi a changtlung a. *Right to Public Service Act* pawh tha takin kan zawm a, service 25 lai pawh kan pe a ni.

Tin, Supply Department buhfai leina tur sum tlahniam a han rawn sawilang khauh mai te kha, i bial mipuite hian MLA hi an lo thlang fuh hlein ka hria; i mit a fiah khawpin ka hria. Nikum lamah crore 200 vel lai kan budget laiin tunah chuan crore 180-ah kan tlathla ngam ta a ni. Theihtawp kan chhuah ang.

Pu Ramthanmawia, East Tuipui Bialtu khan, ‘buhfai man tihto’ a tih te kha, Hnamrun lamin an lo ena a kalh zawnga a tawng loh chuan, a mark thalo deuh turah a inngaih vang a ni; a ti vel mai mai a ni. Nimin piahah a zunthlum a test a, 230 ni thin kha, 130 a lo ni a; ‘E, i buhfai enkawl dan chu keimah tak hian ka lo ngeih anih hi khai! ka zunthlum pawh a tlahniam’ a ti. Chuvang chuan, *mipuite sum rawkna*, *mipuite sum laknaa* tih chiam chiam chi kha a nilo a. Sum enkawl dan fel, miretheite pawhin an chanvo dik tak an chan theihna tura kan beih mekna a ni. *‘Moral reforms’* tih kha in thinlungah khan min lo ziah ngheh sak teh u; chu chu kan tum a ni a. MNF sorkar pawh khan tih ngei ngei a tum; mahse ‘inthlan a hnai tawh sia, an ti ngam ta lo’ tih tawngkam chu hmang lo mai ila, an ti hman ta lo a ni. Sorkar zui leh se chuan an ti ngei ngei ang. (zawitein ka sawi anih chu).

Lunglei West Bialtu Pu T. Lalhlimpua kha 2:00 pm khan a rawn ding a, *‘engtinngan kan ram hi mahni kea a din ve ang* tih hi House-ah hian kan va han sawi tam lo em’ a rawn ti te kha, ava lawmawm tak em! Khatiang kha he House member-te hian kan ngaihtuah dan tur a ni a. Central puihna chu kan mamawh ngei ang, amaherawhchu *central-dependency* hi kan titem tur a ni. Union Home Minister ka zu hmuh ve te kha, a bula ka thut lai ngei khan ka

insehruh a *'in khawngaihna hi chu heti em em hi chuan kan va han dil reng dawn lo em'* tiin Mizoram-ah ka haw a ni. Finance Commission an lokal te khan buhfai tih dan kan tidanglam tih an han hmuh te khan sawi nuam an ti em em a ni.

Tin, Legal metrology pawimawhna te an rawn sawi a, kha kha chu kan thuam chak zel ang; theih tawp kan chhuah ang. Pu Lalrintluanga Sailo Dampa Bialtuin *'card-var* tihpunna a let 200' a tih kha chu, a sawi vawng ve deuhah ngai mai ila. Khatiang kha a ni lova, ka sawi tawh ang khan MNF-in buhfai qtl 2750 ₹22.50/-a tihsan an tum kha 81% a ni a, keini chu *card-var* punna ₹30/- leh *card-sen* punna ₹20/- khaikhawm hian 70%-in kan tipung a ni.

Pu W. Chhuanawma Tuichang Bialtu khan ram teh tura insenso ngai leh nghah rei ngai lutuk a rawn tih te kha, tun atang chuan a awm lo tan dawn ta a ni. Tin, Khawzawl mai ni lo - Khawzawl, Saitual, Hnahthial te tunah hian staff 7 theuh pe turin ruahmanna kan siam a, a rang thei ang berin hei hi tihfel theih kan inbeisei a ni. Pu Clement Lalhmingthanga, Champhai South khan weighbridge chungchang a rawn sawi a, Champhai South mai ni lo khan weighbridge tha lei tur hian SASCI-ah proposal kan submit a, hei hi a rawn hmin mai ang. Weighbridge tha tak tak nei turin ruahmanna kan siam a ni. Tin, 'Keifang tlangah Revenue Office sawn tum a ni' tih kha, a hma pawhin min hrilh nasa tawh a Pu Speaker. Office sawn hrim hrim hi kan tum a ni lova. A hun hmasa lam ka rawn sawi tawh ang khan, revenue administration hi DC nena kal kawp ngei ngei tur; hei hi State ti-tha te pawhin an lo chin than anih avangin, 'kha kawng kha zawh a tul ve dawn ta a ni mai lo maw' tih ngaihtuahna atanga lo chhuak a ni a. A bial chhung mipuite hrehawmin lo awm lo phawt mai sela, kan House Leader nen pawh kan la sawi ho ang a, ruahmanna tha a awm turah ngai ila a tha ang e.

Pu H. Lalzirliana khan a bial chhunga oil depot leh eng eng emaw lam te pawh a rawn sawi a. Ani pawh khan *'buhfai 100%-in a pung'* a rawn tih kha, a inhmehlo angreng mang e aw ka ti a. Han chhut Chiang se chuan khatiang khan a ti chiah lovin ka ring a. A pun dana kha formula chhut dan deuh a awm ve a a ni tih lai te pawh kha min lo hriat sak sela. Tin, Legal Meteorology thuam chak a tul zia te, khang te pawh kha a rawn sawi tawh a. Tin, oil tihpun chungchang a rawn sawi kha chu kan House Leader khan a rawn react tawh a. Oil man tihsan lam kha chu keini revenue lam khawih a ni lo a ni. Tin, Mamit Revenue Office ka zu tlawh tawh a, engkim mai kha a chhe em em vek mai a ni. Tunah chuan, a tha em em vek tawh dawn; SASCI atangin pawisa pawh min pe tawh; PWD lamin building mawi tak sa turin an design mek a ni.

Pu V. Malsawmtluanga, Pu MST-a, Lunglei North Bialtu khan land-bank te pawh a ni ang a. Khami kan kalpui, periodic patta-ah miin a ram kha thensawma LSC-ah a leh dawn chuan *'40% a surrender tur a ni'* tih hi kan House Leader pawh hian review kan neihah te pawh a sawi tawh a. He thil hi Pu Speaker, ka'n sawifiah lawk a ngai a, kan ram kal zelna atana pawimawh a ni a. Rilruah chuan ram enkawl tha, 100%-a an ram enkawl thate; tin, an ram vantlang tan *entirnan*: Biak-In sak nan emaw, kawng laih nan emawa lo sacrifice tawhte hi chu lo ngaihna thiamna pek hi a tha khawpin ka hria. Amaherawhchu, ram kan inpe zung zung mai si a, periodic patta zau pui-pui bigha 20 tih te kan nei zung zung mai si a. Surrender portion ngai lovin Sorkarin a kalpui tawh dawn kan tih chuan, mi hausa hian ram an lei nghal chum chum ang a, 'surrender a ngai dawn hleinem' an ti ang a, reiloteah kan ram hi an lei zo mai ang; kha kha ven tel ve deuh tho a ngai si a.

Chuti rual chuan kan land-bank enkawl dan te, hun hmasa lama mite atang khan land bank-ah ram tam tak lo nei tawh tur kan nei tlem em em lawi si te hi, ram chungchangah eirukna a tam a ni. Keini Sorkar atang chuan hetiangah lo hleh ral mai mai; tute'n emaw an ram 40% an surrender a, sorkar hriatpui mang si loh khan khang ram kha tute emaw khan an lo inpe darh khawloh zoh avang khan land-bank tha tak tak nei tur hi, kan nei lo a ni. Heihi ka officer-te pawh ka sawipui nasa tawh a, theihtawpin, rintlak takin, transparent takin. Chief Minister pawhin a dawhkan atanga 'tun thla chhungin land bank engzah nge awm' tia a lo hmehchhuah zung zung theih turin hengte hi kalpui kan tum a ni. Ka sawi tawh ang khan, permanent fair-price shop te pawh kalpui kan tum a, hei hi kan sorkara kan hotute pawhin min lo ngaih pawimawh sak se.

Pi Prova Chakma, West Tuipui Bialtu khan godown sak mek chungchang te a rawn sawi a; theihtawpin kan en zui ang. Tin, i bialah mi hrasa te tete'n ration *card-var* tih to an lo tuar tih te kha ka hre daih tawh a; House-ah pawh hian i sawi tawh a, paw ka ti em em a; tin, Pu Nguna zawhna te pawh ka han chhang tel nghal ni se. October Ni 31-ah CM-in a puang a, tv-ah te a puang dum dum a, chanchinbuah te a chhuak a; tin, DCSO te pawhin thuchhuah an siam a. Tumah indem vang lam ni lovin, information hi mipuiah hian a chhe lam hi chu a thleng chak viau a, a tha lam hi a lo thleng muang deuh a ni ang a. Kan thiamlohna a awm a nih pawhin kha kha min hrethiam tur leh, *card-sen* hmanga kg-ah 20 a khul tur chi kha sorkar hi a thilphal takzet a ni. Kan tum ber chu, he State-ah hian 'hemite chhungkaw dinhmun hi a tha, *above low-income group*, chhungkaw nuai 3,20,000 an awm; a bak nuai 8,60,000 vel hi chu *low-income group* ah an awm' tia data dik kan neih duh vanga he thil hi kan ti a ni tih te pawh min lo hriatsak ula.

Tin, monsoon stock atan godown mamawh belh thu a rawn sawi te pawh kha kan lo en nawn ang a. Tin, house-pass kalphung, house-pass LSC-a leh harsa tih te pawh kha tun kan sorkar hmalakna hian a rawn cover vek a ni. Pi Baryl Vanneihsang, Aizawl South III khan bifurcation of Aizawl North and South chungchang te a rawn sawi a, tin, empaneled of survey farm bakah hian license surveyor te pawh chhawr hial kan la tum a ni. License surveyor hi Karnataka te pawhin an lo ti a, min hrilh dan phei chuan license surveyor kan tih dawn hian revenue-a kan surveyor-te hi office tualah an nuar an ti; an thuneihna an laksak dawna an hriat avang te pawh a lo ni ve awm e. Thil tha a lo thlen dawn hi chuan eng emaw sut hi chu a lo ngai a ni.

Heng kan empaneled firm bakah hian license surveyor AMC-in engineer a rawih ang model deuh hian heng te pawh hi kalpui kan tum a ni. Rintlak taka a kal loh kan hlau hle a, rintlak taka a kal theih nan kan bei chho ang a. Tin, *Swamitva* hnuaiah hian Sialsuk hi tunah resurvey kan ti mek a; kan duhsak khawp mai che. Tin, Nula Baryl-i rawn sawi kha a lawmawm ka ti a. He House hian he ram hi mahni kea a din theihna tur lam hi kan vei tur a ni. 'He hmalakna hi kan ram tan a tha a ni' a rawn ti kha ka lawm hle mai.

Tin, Pu K. Laldawngliana Tuirial Bialtu hi tawngtai eng emaw ah te hian a rawn che tha thin khawp mai a, a thusawi nen pawh hian inhmeah ka ti a. *E-ram* lo awm a lawmzia thu te, *Swamitva* avanga thingtlang khuua huan-lo ram anmahni indinna zela kha GIS in satellite chakna hmanga tih zel kha a ni a, tunah hian mi eng emaw zatin *Swamitva* card hmangin loan te pawh an la tawh a ni. Kha kha theihtawpin kan rawn ti zel ang a. Tin, Kawnpui Civil SDO te pawh Sub-Registrar angin kan appoint tawh a, khang te pawh khan hma an la chho zel ang a. Revenue thil reng renga Director va hmuh kher kha a ngai tawh

dawn mang lo; ‘*Hmanah chuan..*’ kan ti thei tep tawh a ni.

Periodic Patta renewal chungchang pawh hi ka officer-te ka sawipui nasa viau; ‘engatinge a muan em em; engatinge a harsat em em; an ram kan cancel pawh ni chuang silo, tianga renew theih mang loha kan dah reng hi a dik lo’ kan ti a, keimahni level-ah pawh hei hi kan lo sawi nasa khawp mai. Tin, LPG bottling plant te, Oil depot te a rawn sawi bawk a, a lawmawm a. Tin, ‘Kolasib DCSO awp kawp’ tih te pawh kha kan indaih loh vang a ni. Tunah hian transfer and posting, kaisang te an awm a, hei hi chu kan chingfel thuai ang. Tin, Kawnpui Lungdai vela supply inspector leh store-keeper fello deuha i hriatte pawh kan rawn en ang.

Tin, LZ Juice buhfai supply dan te pawh kha, nikum January thla vel kha chuan a nihna takah chuan kan mangang a ni. ₹3400.50/-a buhfai supply duh kha a zawnin kan zawng a ni; chung zinga tlawmngaih chhuaha rawn supply ve tlat kha LZ Juice a ni a. Kan mangang lutuk a, buhfai sem tur neilo mai dawnin kan inhria a, CM phalnain limit tender kan ko a, farm pakhatin ₹3400.50/- in an chhang a, Chief Secretary khan ‘MAMCO-in an fail tawhna, an supply theih lohna rate kha chuan ka pe ngamlo a ni’ tiin, ₹3400.50/- kha an pawm ta lo a, SPAB khan; LZ Juice-in ₹3550/-a a chhan si avang leh, a dang ho kha a aia sang vek an ni bawk si a, an thlang ta a, March thla thleng hian an thawk dawn a. Tunah phei chuan MIFCO hi kan supply tir tawh a. Tin, Bharat Rice te la lutin theihtawp kan chhuah a. Tin, Mizoram-in OMSSD FCI buhfai mantlawm ₹2250/-a kan lak theih kha Mizoram quota mai nilo, State pawnlam quota te la turin kan bei a, kan tang khawp mai a, engnge kan an dawn chu ka hre lova.

Er. Ginzalala, Champhai North khan buk dik chungchang te leh kumkhata buhfai mana kan sen te; ani kha chu a rawn sawi tunlai angreng khawp mai a, chhiah pek auto-debit te kha a rawn ti a, a changkang khawp mai. Khatiang thleng tur khan theihtawp kan chhuah zel ang a.

Pu RM Chakma, Tuichawng bialtu MLA-in kan hmalakna te tha a rawn ti bawk a, ama hovin thil kan ti ho tawh a. Tin kan CM khan oil leh gas agent chungchang kha chu a rawn react tawh a. A sawi ang khan, department lam pawhin kawl a awm em tiin IOCL lam te nen pawn kan lo en ho ang a. Supply Department thu ni chiah lo, company lam thu te a lo nih bawk si avangin khang kha min hriatpui dawn a nia.

Tin, Pu K. Laldawgliana kha a sawi that tehlu nen, ‘mipuih chhiah kan khawn, buhfai atangin’ a han ti tel kha chu, a inhmeh lo tep a. Pu Lalchhuanthanga South-II Bialtu khan a vei zawng te thahnem ngai takin a rawn sawi a, oil depot thlen chin te pawh kha kan sawi tawh a. Buhfai, oil leh gas tihchingpen te a reh deuh ruih mai’ a rawn ti a, kei chuan ka confirm ngam lutuk lova. Amaherawhchu, a lo tlem deuh tawh a nih chuan a lawmawm ah ngai ila. ‘*Buhfai tih chingpen*’ tih hi (tawngkam mawilo a nilo a nia, min lo hrethiam thin ula) ka’n sawifiahnaah a ngai thin a. Godown thlen hmian buhfai an lo siam anih chuan buhfai kha a dik taka an lo receive tawh dawn avangin, awmzia a awm dawn chuang lo. A ruaka an tlan luh chuan, a ruak kha an receive dawn a ni mai. Godown kha a dik chho mek a ni. Tunah hian kawng laka in check vak vak kha kan tiseng tak tak bik lo. Tin Mualpui Chekbawk-zau te pawh fact-finding team kan din a, tunah hian kan tihtur kan zo tep a, tunkarah hian kan zo ang. Pu Lalmuanpuia Punte, Hrangturzo ani pawh khan midang sawi sa a rawn sawi ve te pawh a awm a, a subject kha a inang deuh thum a. (Pu

Ramthanmawia: Pu Speaker khawngaih. Khulai Chite ram leimin avanga kan buaina, kha LSC...) kha kha theihtawp kan chhuah a, DC lamin tunah hian an endik chho leh mek a ni. A lo in chiah rei khawp mai. Kei pawh a hmunah te ka va kal a, khang laia Revenue lama fel lote pawh kan en chho mek bawk a ni. Hei hi nangmah nen House pawn lamah te pawh kan la sawiho zel ang a, a fel hma dan tur te pawh kan ngaihtuah tlang dawn a nia.

Pu Lalmuanpuia Punte'n Maumual chungchang a rawn sawi kha a pawimawh khawp mai a. PAMRA ho, 1986-a hnam sipaite Mizoram-a an rawn chhuah khan khulai ram khu pek an ni a. An ram chingfel hi a muang angreng khawp mai a. Kan han sorkar a, hei kan han chingfel chho dawn a. November Ni 22 leh nikum December Ni 22 inkar khan sawifel duh nei, representation nei duh report thehluh duh tan hun kan hawng a thlakhat chhung, tunah hian kan chingfel thawkhat tawh a ni.

Tin, Pu Speaker PAMRA te hi kan CM hnenah an kal a, kan CM-in UP&PA Minister Pu K. Sapdanga hnenah phone-in, 'PAMRA te thil thlen hi lo ngaipawimawh hle teh; khulaia an sum mamawh kawng leih belhna tur pawh UD&PA lamin sum te pawh lo pek belh rawh u' a ti a. PAMRA te hi kan House Leader, kan CM ni bawk leh ZPM sorkarah hian an thla a muang hle a. Khulai Maumual plot eng emaw zat la awlah khuan PAMRA office leh an museum tur te pek duhna kan nei mek a ni. Pu Muanpuia khan '*ramri hrula leilet nei cancel*' a tih lai kha chu, a subject kha tlemin sawi ho ngai deuh niin ka hria a, ka sawizui thui lutuk lo mai ang e.

Pu Robert Romawia Royte, Hachek Bialtu hi kan fiamna deuh thin a, tunah pawh hian han fiam ka duh a; '*a hmui phun leh a aw a in mil lo*' an tih ang deuh hi a ni a. Nikum March thla House-a kan awm ho khan pawnah sawn, "thianpa, ratio card, *card var* man i ennawn tur hi chu tha ka ti khawp mai. MNF sorkar lai khan ka rawt thin a, an ngam lova" a ti a. 'E, ava lawmawm em' ka ti a. Synod-a kan kal pawh khan ka sawi nawn kha maw, 'Hnam run mitmei i veng mah mah deuh a ni' ka'n ti a ni.

Tin, Phuldungsei lam chu i chhuahlai emaw ni khan ka lo sawi tawh a, 'kan mite kan lainat' sorkarin tihna emaw, kan citizen te chan tumna lam a ni lova. Sorkar kalphung *Ration card management system* te a lo that tawh em avangin leh Mizoram-a buhfai an dawn theih kha a lo tam zawk bawk si avang khan, anni pawh kan ngaihtuah zui zel ang a. A theih phei chuan i hovin khung lai te pawh zu tlawhin, mipuite thlamuan tur te pawhin la zu kal ila a tha awm e.

PU ROBERT ROMAWIA ROYTE: Pu Speaker, nakinah i sawi zawhah ka rawn sawifiah deuh ang a; nge, kan zawhbelh dawn che em mi ni ang? A chhan chu a pawimawh em a, he hnam issue hi. Kan minister zahawm tak hian thil hi a hrelo ni hian ka hria a.

PU B. LALCHHANZOVA, MINISTER: Pu Speaker, heng mi 85 te hi manual ration card kan pe vek. (**Pu Robert Romawia Royte:** Manual ration card kha an chanvo a ni lova...)

SPEAKER : Nakinah i sawi dawn nia. Kan Minister sawi zawh tir phawt ang. (**Pu Robert Romawia:** A sawi zawhah maw? Ka lawm e, a sawi zawhah ka sawi ve ang.)

PU B. LALCHHANZOVA, MINISTER: Dan ang taka thil an tih a ngai. Mizorama Ration card a an awm duh chuan Tripura ah khan an in delete a ngai; chu bak chu kawng a awm lo. A awm kawp theihloh.

Tin, NFSA Rule, 2015 No. 9 (clause 6) hian ration card hi identity leh residential proof ah hman loh tur a ti. Residential proof dik tak chu Voters ID hi a ni. Kan unau Manipur-a mite pawh Mizoram an lo kal hian Mizoram ah ration card an nei thei. Mizoram-a ration card an nei khan Mizoram citizen an ni tihna a ni lo. India khua leh tui mite chu *One Nation, One Ration* hmangin khawi state ah pawh ration card an nei thei. Kan mi leh sa te kan voh em em a ni.

Pu TBC Lalvenchhunga, West-II MLA khan empaneled firm te that zia a sawi rualin fimkhur ngai te a rawn sawi bawk a, a thusawi kha kan lo hre reng ang a. Kan chetsual hi keini pawhin kan hlau a. Thil tha tak hi mipuite min dem let leh theihna a nih te hi ka hlau a, chung te chu ka officer te bulah pawh ka sawi nasa em em a. Legal Metrology te, Essential Commodities Act chungchang ah khan theihtawp kan lo chhuah ang.

Dr. K. Beichhua, Siaha Bialtu khan DILRMP chungchang a zawhna kha chu a tir lamah khan ka sawi tawh a. Land record 3,60,000 vel kan tihfel tawh thu te in kan chhang tawh a. Tin, Pu Beichhua hi fakawm ka ti khawp mai a, kil hrang hrang atanga thil ngaihtuah chi a ni a. ‘Thil kan tih hian side hnih a nei a, a that theihna lam a awm a, a that loh theihna lam a awm bawk a’ a tih te kha a finthlak hlein ka hria a. Kan fimkhur loha empaneled firm te hian thil tihsual phah nan an lo hmang anih te pheih chuan a thalo hle a ni. Tin, Pu Speaker, kan fimkhur zia chu he House zahawm takah hian kan sawi teh ang.

Empaneled firm te kha sorkarin rate mumal tak a siam a. Ram an va teh hnen atangin direct-in sum an la dawn lo; ram an va teh sakte khan sorkar treasury-ah direct-in an thun ang a. Ram an teh zawh hnuah 50% emaw dan ina a tih kha ram neitute khan sorkarah online in an pe ang a, sorkar-in empaneled firm te hnenah a pe dawn chauh. Direct in empaneled firm te khan mipui hnen atangin sum an la dawn lo a ni.

Tin, a rawn sawi finthlak deuh mai chu, *card-sen* chungchang kha; ‘buhfai hi *card-sen* ang vel hian card-var man hi lo *up* se a lo dik tawk vel viau dawn a ni’ a ti a. A *up* lam hrim hrim kha kan rilru a ni lova. Ka sawi tawh ang khan, kan economic status, kan khawtlangah hian ‘he mite chu well established family (kamding) anni’ tiin boundary hi fel takin awm ve tawh rawh se. Mihausa zawkte’n miretheite chanvo kan it zel a, miretheite’n an chanvo an chang lova. Chuvang chuan, *demarcation mumal tak awm se* tihna avangin he thil hi kan siam a ni.

Pu Ngunlianchnunga, Lawngtlai West Bialtu MLA khan thahnemngai taka a thil rawn sawi te kha chu kan react tawh a. Tin, a thil rawn sawia pawimawh deuh mai chu, ‘ration sem hi a va tlai thin ve ma le’ tih hi a ni. Ka officer te pawh kan ko khawm rap rap a; ‘ni 5 hmain sem ang u’ kan tichiam thin a, kan tihlei thei lo a ni. Tin, nikum khan thla 3 chhung lai mai rail kawng a chhia a, khami ah khan FCI in an buhfai dry-stock zawng zawng kha semah an lo hmang si a. Tunah an in recover chho leh mek a, kan tang viau a. Tin, nichina kan sawi tawh ang khan, Ration card management system te, Food & essential commodities securities target (FECST) te, Aadhar enabled public distribution system (AEPDS) te, khang kha a kalrual vek a ngai a. Vawiinah Pu Tlungasih-ah miin buhfai a la

a, a lak kha centralized system khan a lo record a. Mizoram pum mai nilo, central nen khan data kha a in link vel zel a ngai a ni. Kha khan hun te a lo duh a, staff thar te pawh kan han la thin a.

Tin, Pu Speaker, *buara bag dahlet* chungchangah hian keimah ngei pawh min bei nasa a; kan House Leader nen hian buara te min hak tir a, social media-ah kan lar dun khawp mai a. He thilrawn chhuah dan hi a ho ang reng si a; mahse a rawn chhuah dan kha opposition ho tan khan *vawmlung* tha tak kha a ni si a, a buaithlak ka ti khawp mai a.

A rawn rik chhuahna chhan chu, retailer-te khan sorkar kha min vau ti-tih a ni. ‘Buara rihna hi godown-ah in cut loh chuan buhfai kan sem lovang’ ti khan min rawn vau ti-tih a, kan officer-te nen khan an inberem fuh ta lova. “Mi hnenah buhfai in pekin buhfai rihna kha kg 3 te, kg 4 te, gram 500 te in chhiar tho a, mipui hnenah buhfai in pek dik loh phah nasa lutuk. Buhfai rihna kha mipui buhfai ah khan in chhiar tel a, chuvang chuan, godown atangin a rihna gram 580 hi kan cut ve tawh ang” tih vel boruak atanga lo chhuak mai a ni; sawrkarin buara ip kha kan it viau a ni lo. Kha kha thil awmzia a ni a.

Tin, Pu Nguna khan an khul tawhna pawisa zat te kha a rawn zawt a, ₹2,01,755 kan dawng tawh a. Amaherawhchu, sorkarah a head mumal siam a la nih loh avangin hei hi him takin kan kawl tha rih a ni. Tin, *land lease hi hawh theih, hralh theih* tih te kha an zawt a.

PU C. NGUNLIANCHUNGA: Pu Speaker, khawngaih takin. Buara chungchangah khan thingtlanga hnawk deuha awm te kha khang kha a lo chhuah dan te a nih si chuan, sazu te pawhin a ei chhe mai mai tho a, pe let leh mai sela a tangkai zawk mai lo ang maw? Sorkar khan chuti tehchiamin a ngaihluin a lang chuang si lo a. *Entirnan:* kan bial Tuithumhnar tih te.

PU B. LALCHHANZOVA, MINISTER: Pu Speaker, Ka sawi tawh ang khan, tun atang chuan Zoram mipui ration khul te’n buara rihna kha khul tel tawh loh tur a ni; a bak kha chu sawrkarin a rawn chingfel ang. Buara rihna kha lak tel tawh loh tur. A awmzia chu, kg 5 la khan buhfai diktak kg 5 a la mai tur a ni. Buara rihna kg 2 an chhiar tel khan kg 3 chauh buhfai an hawn a.

Tin, Land Lease hi a hralh theih, hunbi neiin. Land Lease chu mimal tan erawh a ni lo; kohhranah te, company te khatiing chi ah khan land lease hi kalpui a ni. *Entirnan:* I land lease kha Oil company hnenah kum 50 chung pawh i hralh thei; after 50 years ah i ta a ni leh dawn tho tihna a ni mai.

PU C. NGUNLIANCHUNGA: Pu Speaker, Sorkar te, NGO te, company te emaw a nih loh chuan mimalin land lease chu a nei thei em ni?

PU B. LALCHHANZOVA, MINISTER: I ramah khan petrol pump an rawn siam dawn ta a, kha kha company hnenah i lease thei tihna a nih chu. Company khan periodic patta emaw, LSC emaw a nei thei lo.

PU C. NGUNLIANCHUNGA: Kha kha chu sorkar thil a ni a; ka zawh tak chu, Revenue Department-in ‘lease’ a tih kha, ‘a hralh nge, a hawh tir’ tih kha a ni ka zawhna chu.

PU B. LALCHHANZOVA, MINISTER: Kha kha chu, sorkar ram a nih chuan dan angin a kalpui mai.

PU C. NGUNLIANCHUNGA: A kalpui tak chu, a hralh nge a hawhtir? A hawh tir a, a hawh tir kha chu *lease* man chu a ni mai. A hralh chu a ni lova, ‘a hawhtir’ tih mai kha a dik mai lo em ni?

PU B. LALCHHANZOVA, MINISTER: Pawm dan hrang a awm e, i ti mai ang aw.

Pu Lalchhandama Ralte, Tuivawl Bialtu, Opp. Leader khan thahnemngai takin a rawn react hlawm a, ka lawm hle mai a. Ani hi Hrangbana College-a kan senior thin a ni a, kan u em em a. Kan thusawi te hi chu atan chuan huat tur hi a awm theiin ka ring lova. Thinrim takin min ti pawh ni se, keini hi chu kan thinrim vena tur a awm pawhin ka hre lova. Amaherawhchu, ka sawi tawh ang khan, card man kan han ennawn vela ‘*mipui rawkna*’ han tih hi chu a inhmeh chiah lo deuhin ka hria.

Tin, Phuldungsei lam te pawh kha a rawn sawi a, kha erawh chu sawi sei tawh lo mai ila. Home delivery, online booking, Mizoram ah hian gas agency 53 an awm a. Home delivery la tihlohna veng emaw, a district angin emaw awm mahse, chung chu a district anga an duhlohna te pawh a awm a ni. Tin, monsoon stock pawh hi kan hriat dan chuan, monsoon stock ah hian 35% vel kan achieve tawh a ni.

Tin, Land Revenue & Settlement ah khan kan House Leader khan a rawn react tawh a, a react tawh chin a kha chu ka chhang lo mai ang a. Progressive tax chungchang kha chu ngaihtuah mek a ni. Uluk deuhin hei hi hi chu kan ngaihtuah chho zel ang a. *E-RAM* a that ziate pawh kan sawi a, kan lawm khawp mai. Tin, heng empaneled firm te pawh hi ‘an rintlak em; an tha em’ tih pawh kha ka sawi tawh ang khan, tha taka hna an thawh theih nan theih tawp kan chhuah a. Tin, ‘authorized land valuer engzat nge kan neih’ tih hi, Revenue Deptt. hian chutiangan a nei hran lo a. Tunah hian Land Valuation committee an din a, khang khan an ngaihtuah dawn a. Tin, Aizawl North leh South bifurcation chungchang zawhna kha, Aizawl North lam saw kan thum thar nasa a, Assembly Session zawh remchangah kan CM hi hawn tir kan tum a ni.

SPEAKER : Khawngaihin Demand pass i dil hma khan, kan Member hian eng emaw sawi loh theih loh a nei niin a inhria a, minute 2 ah khung len tum se; tichuan, kan Minister in react pahin pass rawn dil sela a tha ang e.

PU ROBERT ROMAWIA ROYTE: Pu Speaker, ka lawm e. Ni e, kan hriat tlan vek pawh hi a pawimawhin ka hria a; kan Minister zahawm tak pawhin ngun takin min lo ngaihthlak sak sela ka duh khawp mai a. *One nation, One ration* tih idea hi a tha khawp mai a. Zampui, Phuldungsei khu *One nation, One ration* hi a nghakhleltu an ni. Tripura lama ration-a an awm te pawh pawh tiin kawng te hial zawh a, ‘Mizoram ah kan awm duh’, ti a. He RCMS a lo chhuah tirh pawhin sawrkar hmasa ten ngun taka ngaihtuahin, Congress - MNF hunlaiah pawh he *Online, Adhaar-a thun* tih te pawh Mizoram sorkar hi a ti hmasa tu a ni a; Tripura lam chu an muang zawk a, offline in an awm a ni. Chuvang chuan chutiangan situation-ah RCMS implement hnu ah pawh thil a awm a. Mizoram ah sawrkar thar a lo ding a, 2024 March, April, May vel khan double a awm ni tih kan official ten an

hmuchhuak niin a lang a, an delete ta mai a ni.

PU B. LALCHHANZOVA, MINISTER: Pu Speaker, kan sawi tawh a; ngawi rawh, a tawk viau lo maw.

PU ROBERT ROMAWIA ROYTE: Aih, tawk lo; mi thih leh dam kar, hnam thil a ni a.

PU B. LALCHHANZOVA, MINISTER: Ngawi rawh; *thih leh dam kar* han tih chiam kha a tul lem lo.

PU ROBERT ROMAWIA ROYTE: Tawngkam thiama mi rilru hi dam mai thei a ni lo.

PU B. LALCHHANZOVA, MINISTER: Technology thil a ni; tawngkam thiam thil pawh a nilo.

PU LALMUANPUIA PUNTE: Pu Speaker, kei pawh Pol. Advisor to CM ka nih angin a hlim chhawnin a hmunah ka zuk kal a; kan sawi ang vak vak hi a ni chuang bik lo.

PU ROBERT ROMAWIA ROYTE: Pu Speaker, CM Advisor zahawm tak a kal pawh kha ka hre ve a, a ti beidawng tawk lek a ni.

PU TBC LALVENCHHUNGA: A zawhna chhan a ni tawh a, kha kha debate hun tur a ni tawh lo a.

PU LALMUANPUIA PUNTE: A tibeidawng tawk leka ka kal ka hre lo a; a tih dan tur zawkah khan hmun hnihah an awm a, an titawp a ni mai.

PU ROBERT ROMAWIA ROYTE: A ti tawptu tur kan nih ka hre lo.

SPEAKER : Khawngaihin microphone kha mute teh u aw. I question a Chiang e; Minister-in react se a tawk e. Zawhna i zawt tawh a, a zawhna kha a Chiang tawh e. Tikhan kan Minister khan react sela, i duhtawng ang. Aw le. Kan Minister i sawng ang.

PU B. LALCHHANZOVA, MINISTER: Pu Speaker, Phuldungsei mipuite hi Mizoram sorkar hian a hre reng a, a ngaihven a ni. India ramah kalphung technology te a lo changkang zel a, Aadhaar khawi state ah mah a awm kawp theih tawh loh a ni.

PU ROBERT ROMAWIA ROYTE: In lo delete chut a; Tripura kha delete-tu tur an nia lawm.

PU TBC LALVENCHHUNGA: Chu action chu, Pu Speaker, khawngaih takin. Kha a zawhna kha chhan a ni tawh a, kha a zawhna kha a duh a nih chuan House pawnah mumal taka la chhan theih a ni a. Zawhna dang siamna hun ni tawhin a lang lo a.

PU LALMUANPUIA PUNTE: Mamawh dang pawh ka zu collect teuh; ka tih beidawn tawka ka hre lo. (**Hon. Speaker:** A zawhna kha a Chiang a, Minister-in react sela.) Pu

Speaker, react tlak pawh a ni tawh lo; Aadhaar-a kan tih kha a lo changkan zawk avangin RCMS-in.

PU LALCHHANDAMA RALTE, OPP. LEADER: Kan House tawngkam atan a mawi lo deuh hlekin ka hria a, a then bik kha chu.

PU LALMUANPUIA PUNTE: I team kha khap ve rawh.

PU LALCHHANDAMA RALTE, OPP. LEADER: Aw, kan lo inkhap mek e. A tawh tawh e. A thu tawh a nia, keini chu. Pu Speaker, i kaihhrainaah kan lawm a, zahawm taka min kaihhruai zel pawh kan duh e.

PU LALMUANPUIA PUNTE: Pu Speaker, nichinah khan ka sawi tawh a. NFSA Tripura pek aiin Mizoram NFSA buhfai quota pek hi a tam zawk. Chuvang chuan, Tripura-a awm Phuldungsei mite Food, Civil Supplies, Tripura RCMS-a awm te kha delete sela, engtik lai pawhin Mizoram-ah.

PU B. LALCHHANZOVA, MINISTER: Pu Speaker, heng Demand –

<i>Demand No.</i>	<i>Department</i>	<i>Amount in ₹</i>
6	Land Revenue & Settlement	36,58,23,000.00
17	Food, Civil Supplies & Consumer Affairs	2,78,68,80,000.00
TOTAL		3,15,27,03,000.00

te hi he House zahawm tak hian min pass-pui turin ka rawn ngen e.

SPEAKER: Kan Minister zahawm tak Pu B. Lalchhanzova'n a Demand te: -

<i>Demand No.</i>	<i>Department</i>	<i>Amount in ₹</i>
6	Land Revenue & Settlement	36,58,23,000.00
17	Food Civil Supplies & Consumer Affairs	2,78,68,80,000.00
TOTAL		3,15,27,03,000.00

House ah pass a rawn dil ta a. Remti apiangin, 'remti' ti ula. Remti lo kan awm chuan, 'remti lo' ti ila. (*House-in a remti a.*)

Kan Minister zahawm tak Pu Lalchhanzova Demand chu House-in lungrual takin a pass ta a ni. (**Pu B. Lalchhanzova, Minister:** Pu Speaker, ka lawm e.)

Kha, kan Minister kha a tui hliam hliam a. '*Buhfai te kha i sawi mai a, i inhme lo*' tih ang chi te; mi i fak a, 'nangmah nen kan la sawi zel dawn nia' tih ang chi te kha a awm a. *Third person*-in helai Chair hi i address hram hram ang u. A phur em a, i hrethiam ang u aw.

Aw le, Report-tawi i ngaithla leh ang.

A hniam lamah chuan: -

- 1) Pu K. Hramo - min. 7:20;
- 2) Pu W. Chhuanawma - min. 10:10;
- 3) Pu V. Malsawmtluanga - min. 10:15.

A sang lamah chuan, (naktuk atang chuan minute 15 kan ti tawh mai dawn emaw ni chu aw, tih te ngaihtuahnaah a awm rum rum a.) –

- 1) Pu C. Ngunlianbunga - min. 16:1;
- 2) Pu Robert Romawia Royte - min. 14:50;
- 3) Dr. K. Beichhua - min. 14:18.

Tichuan, tum khata ding rei ber kan hre duh em? Darkar 1:30 chuang; darkar 1:35:51 a ding a - Pu Lalthansanga, Minister zahawm tak a ni e.

Aw le, kan business chu kan zo ta a, naktuk, Ni 19 (Nilaini) chawhma dar 10:30-ah an thukhawm leh dawn nia.

Sitting is adjourned. (10:21 PM)